

## ኢሳያስ ቲንቢቲ ጊዶ ቆፋ

ኢሳያስ ማጻፋይ ከርሰቶሲ ዩሌታናፔ ካሴ ኦስፑንፋ ጾቱ ላይላ ወርሴላ ሄራን ዲዛ ጊታ ናቤ ኢሳያስ ሱንፋን ጾይጌቲደሰ፤ ሃይሲ ሃ ማጻፋዚ ሄቹ ኤሬቲዳ ከፊሌታን ሻኬታናሰ ዳንዳዬሰ።

1. ሼም 1-39 ጋካናሰ ዲዛ ከፊሌዚ ዲጌሃ ባጋ ካዎቴል ዩሁዳ ዴሬ ቦላ አሶሬ ጌቲቲዛ ዋልቃማ ካዎይ ጋሊዳ ቆሆ ጊሻሰ ዮቴሰ፤ ዩሁዳ ዴሬ ሜቶን ዩጊዳይ አሶሬ ዋልቃ ጊደንታ ዴሬዛ ናጋራኔ አሳይ ጸሳሰ አዛዜቶንታ ኢጾ፤ ሄሳሶካ አሳይ ጸሳን አማኔቶንታ አጊዳይሳ ቤዪዴሰ። ናቤዚ ዴሬዚኔ ዴራ ካሌሊዛይቲ ጸሎቴላፐኔ ቱማቴሊ ዲዛሶ ሲማና ማላ ዮቴደሰ፤ ቃሴካ ጸሳሰ አዛዜቶንታ ኢጾይ ፓጩኔ ጳይሰ ኤሃናይሳ ኢሰታሰ ቆንጨሲዴሰ፤ ሄሳሶካ ቡርፔ ያና ላይላታን አላሜ ዩሾን ሳርቴሊ ኩማናይሳኔ ኩሜላ ሎኤቴላን አይሳናሰ ዳዊቲ ዜሬላፊ ካዎታናይይ ያናይሳ ናቤ ኢሳያሲ ካሴቲ ዮቴደሰ።

2. ሼም 40-55 ጋካናሰ ዲዛ ከፊሌዛፔ ዳሪዛ ባጋይ ዩሁዳ አሳይ ዲኤቲ ባቢሎኔ ቢን ሄን ኢሰታ ቦላ ካወሻቴሊ ጋካናይሳኔ ሂዶታይ ኢሰታሰ ጳያናይሳ ዮቴሰ። ናቤዚ ጸሲ ባ ዴሬዛ ዋዚን አሳይ ሎኦ ኦራላ ዱሰ ዳናሰ ኢሰታ ኢዚ ዩሩሳላሜ ዛራናሰ ዋይይ ማቲዳይሳ ዮቴደሰ። ሃይታ ሼምፖታ ጋርሳን ኬሂ ቆንጨ ቤቲዛ አይፊ ዮኦይ ጸሲ ሃኖ ኡባሰ አዋ ጊዲዳይሳኔ ባ ዴራሰ ኢዚ ሃልቺዳ ሃልቺይ፥ ጸሳ ከታይ ኢሰራኤሌ አሳ ባጋራ ዴሬ ኡባሰ ጋካናይሳ ዮቴሰ። «ጸሳ ኦሳንቻ ጊሻሰ» ዮቴዛ ካሴ ጋልኦ ጫቆን ዲዛ ኤሬቲዳ ከታታራ ኢሲፊ ቆዴቴቴሰ።

3. ሼም 56-66 ጋካናሰ ዲዛ ከፊሌዛፔ ዳሪዛ ባጋይ ዮቴዛይ ጉዬ ባ ዴሬ ዩሩሳላሜ ሲሚ ቢዳይታ ጊሻሲኔ ጸሲ ኢሰራኤሌ አሳሰ ኢሚዳ ሂዶታ ቃላ ኡባ ፖላናኮ ጊዲ ናጌ ቦላ ዲዛ አሳሰ ማርካ ጊዳና ማላሳ፤ ቲሺ ሂሰቲ ጸላናሰ ቤሲዛይቲ ጸሎቴሊኔ ቱማ ፒርዳ፥ ሳምባታ ቦንቾኔ ያርሾ ሺሾ፥ ቃሴካ ሚኒ ዎሶ። ሃይሳ ሃ ከፊሌዛን ኤሬቲዳ ሼምፖይ 61:1-2 ጊዲሺን ዩሱሲ ኮይሮ ኦሶ ኦይኪሼ ባ ጾይጌቴላሰ ማርካ ሺሺዳ ቃላቲ ዴቴሰ።

**ሃ ማጻፋይ ኦይኪዳ ኩሜላ ቆፋ**

ጊደ ቆፋ 1:1-31

የሁዳ ጊቫሲኔ ኢስራኤል ጊቫስ ኣጲዳ ኪታታ 2:1—5:30

ኢሳያስ ሃጋዞን ዲዛ ሃኖታታ 6:1—9:7

የሁዳ ጊቫሲኔ ኢስራኤል ጊቫስ ጉጃቲዳ ሃራ ኪታታ 9:8—12:6

ሃራ ዴሬታ ቦላ ጸሳ ቂጸቲ 13:1—23:18

ዋዬ ቦላ ዲዛ ጸሳ ዴሬስ ሂደታ ኪታ 24:1—27:13

ጸሲ ማካሊዛ ባ ዴራ ቃጸያና ቃጸዮ 28:1—31:9

ጸሲ ኤዶሜ ቃጸዪዛዴኔ ዩሩሳላሜ ኣንጂዛዴ 32:1—35:10

ኣሶሬ፥ ባቢሎኔ፥ ካዎ ሂዝቂያሳኔ ኢሳያስ 36:1—39:8

ጸሳይ ባ ዴሬ ኣሺዛዴ 40:1—48:22

ጸሳ ኦሳንቻ 49:1—53:12

ጸሳይ ባ ኢሚዳ ሂደታ ናጊዛዴ 54:1—55:13

ዴሬይ ዉሪካ ጸሳ ባጋ ጊዳናስ ዳንዳዬስ 56:1-8

ዴሬ ኣይሲዛይታ ጊዲ ኡቲዲ ጸሳስ ኣዛዜቶንታይቲ ቃጸዬታና 56:9—59:21

ሲንላፌ ያናስ ዲዛ ዩሩሳላሜ ቦንቾ ሂደታ 60:1—62:12

ማለሊሲዛ ጸሳ ኦራላ ሜዴቴላታ 63:1—66:24

1 የሁዳ ካዎታ ኦዚያ፥ ኢዮኣታሜ፥ ኣካዜኔ ሂዝቂያሳ ካዎቴላ ዋዴ ኣሞጼ ና ኢሳያሲ የሁዳ ጊቫሲኔ ዩሩሳላሜ ጊቫስ ቤኢዳ ኣጂታ።

ጸሳይ ባ ዴሬዛ ሴሪዳ ሴራ

2 ጎዳይ፥ «ሳሎቶ ሲዪቲ!

ቢታዬ ኔካ ኤዝጋ ሲያ!

ታኒ ናይታ ዩላዳ

ዲቻ ጋሊን

ኢስቲ ታ ቦላ ማካሊዳ።

3 ቦራይ ባ ጎዳ ኤሬስ፤

ሃሬይ ኢዛ ጎዳይ ኢዛስ ጊግሲዳ

ዜዴካ ኤሬስ፤

ኢስራኤሌይ ጊዲኮ

ታና ኤሬና፤

ታ ዴሬይካ ኣኬኬና» ጊዴስ።

4 ኢንቴኖ ናጋራንቻ

ካዎቴላቶ!  
 ቆሆን ኩሚዳይቶ!  
 ኢታ ኦሊዛ ዜሬላቶ!  
 ኢንቴ አዋታ ቱናቴላ  
     ካሊዛ ናይቶ!  
     እንቴና አዬ እና!  
     ጎዳ አጋጊዳታ፤  
     ኢሰራኤል ጌሻዛ  
     ዬጊ አጊዳታ፤  
     ዘኮካ ኢዛሰ ዛሪዳታ።

- 5 ማካላ ቦላ ማካላ ጉጂዲ  
     ኢንቴ አይሰ ዛሪ ዛሪ  
     ቃጻዬቴቲ?  
         ኢንቴ ሁኔይ ሙሌ ሳኬቲዴሰ፤  
         ኢንቴ ዋዚናይካ ዳቡርዴሰ።

- 6 ሄላ ጋሶን ሂርኪ  
     ቶሆ ጽጉንጻፌ ቢዲ  
     ሁኔ ኢሰኬ ጋካናሰ  
     ፓጻቴሉ ኢንቴሰ ባዋ።  
     ማዲንሐ፥ ኪጸኔ  
     ኡዛሰ ጸላ ጊዲዴሰ።  
     ሄ ማዲንላይ ሜጨቴቤና፤  
         ቃሼቲቤና፤  
         ዛይቴንካ ሹጊቤና።

- 7 ኢንቴ ዴሬይ አይኮይ ባይንዳ  
     ባዞ ጊዳና፤  
     ኢንቴ ካታማቲ ታማን ጸጌታና፤  
         ኢንቴ አይፌይ ጸሊሺን  
         ኢንቴ ቢታ አላጋይ  
         ቦንቂ ኤካና፤  
         ኢሰቲ ኢንቴ ቢታ ቡላ ኬሳና።

- 8 ጲዮኔ ናያ  
     ዎይኔ ሚላ ጊደን ዲዛ  
     ጋባ ማላ፥  
     ሌሌሄ ጊደን ዲዛ  
     ቄሪ ኬላ ማላኔ  
     ዋርኬይ ጊደሉዳ  
     ካታማ ማላ ጊዳዲሰ።

- 9 ኡባፌ ዋልቃማ ጎዳይ  
 ኑስ ዜሬል አሾንታኮ፥  
 ኑኒ ሶዶሜ ማላኔ  
 ጋሞራ ማላ ጊዳናኮሺን።
- 10 አንቴኖ ሶዶሜ አይሲዛይቶ!  
 ጎዳ ቃላ ሲዪቲ፤  
 አንቴኖ ጋሞራ ዴሬቶ!  
 ኑ ጸሳ ቲሚርቲ ኤዘጊ ሲዪቲ።
- 11 «አንቴ ያርሾ ዳርይ  
 ታስ አይ ኦላኔ?  
 ሃኖ ጋካናስ  
 አንቴ ታስ ሺሺዳ  
 ጸጌቲ ሺቂዛ  
 ዳርሾ አሾኔ  
 ሞጾ ሜሄታ አሾ ካላዲስ፤  
 ታኒ ቦራ ሱላን፥  
 ዶርሳ ሱላኒኔ  
 ዴይሻ ሱላን ኡፋዬቲኬ።
- 12 አንቴ ታስ ጎይናናስ ዪዛ ዎዴ  
 ሄሳ ኡባ አንቴ  
 ኤኪ ያና ማላኔ  
 ታ ኬላ ዛጎ  
 አንቴ ዬዳና ማላ  
 ኦኒ ኦይቺዴ?
- 13 ሃይሳፌ ጉዬ ሃይሳ  
 ሚሳቲዛ ሃዲ ያርሾ  
 ናሞኣጎሉ ሺሾፍቲ፤  
 አንቴ ጨዋሲዛ ኤጸኔይ  
 ታና ሻቲስ፤  
 አጊና ጴሮን፥  
 ሳሞባታ ጋላሳታኒኔ  
 አንቴ ጎይኖስ ሺቂዛ ጋላሳታን  
 አንቴ ቦንቺዛ ባኦሌቲ  
 ኢታቲላን ኩሚዳ ጊሻስ  
 ታኒ ሄይታ

ጌንጫ አጃናሰ ዳንዳይኬ።

- 14 አገና ጾሮን  
 እንቲ ሰንቺዛ  
 ጋላሳታኔ  
 ካሴ እንቲ ዋላዳ  
 ባኣሌ ጋላሳታ  
 ታ ሸምፖያ ሃራሴታዲሰ፤  
 ሄይቲ ታሰ ዳሮ ዴጾ  
 ቶሆ ገዲዳ ገሻሰ  
 ታ ኢሰታ ቶካናሰ ዳንዳይኬ።

- 15 እንቲ እንቲ ኩሺ  
 ዋሳሰ ታኮ ሚጨኮ  
 ታኒ ታ አይፌ እንቲፌ  
 ሃራሶ ዛራና፤  
 እንቲ ኩሺን ሱላ  
 ኩሚዳ ገሻሰ  
 እንቲ ኬሂ ዋሲኮካ  
 ታ እንቲ ዋሳ ሲዪኬ።

- 16 ሚጨቲቲ፤ እንቲና ጌሺቲ፤  
 እንቲ ኢታ ኦሶዛ  
 ታ ሲንፋፌ ዲጊቲ፤  
 ኢታ ኦሶካ አጊቲ።

- 17 ሎኦ ኦሶ ታማርቲ፤  
 ሱሬ ፒርዳ ኮዪቲ፤  
 ቆሄቲዳይታ ሚንፊሊቲ፤  
 ዪኦታሰ ኤቂቲ፤  
 አምኤታሰ ሞቲቲቲ» ገዴሰ።

- 18 ቃሴካ ጎዳይ፥ «ሃ ዪቲ  
 ኢሶይ ኢሳራ ኣኔ ቡጾቶሰ፤  
 እንቲ ናጋራይ  
 ጴቃ ዘኦ ገዲኮካ  
 ሻቻ ማላ ቦታና፤  
 ሱላ ማላ ዘኢኮካ  
 ፑቶ ማላ ፑቃ ቦላ ገዳና።

- 19 እንቲ ታሰ ኤኖ ገ አዛዜቲኮ  
 ቢታ አንጃ ማና።

- 20 እንቲ ታሰ አካይ ገ ማካሊኮ  
 ማሻይ እንቲና ማና፤

ሃይሳ የቲዳይ  
ታና ጎዳ» ገደሰ።

ናጋራይ ኩሚዳ ካታማዮ

- 21 ካሴ አማኔቲዳ ካታማያ  
ዋናዳ ላይማ ገዳዴ?  
ካሴ ኢዚን ሱሬ ፒርዳይ  
ኩሚዳራኔ  
ጸሎቴላ ኢዚን ኩሚዳራ  
ሃኢ ገዲኮ  
ሼምፖ ዋጂዛይታሰ  
ዴሳሶ ገዳዲሰ።
- 22 ሃኔ ኔ ቢራይ ሸይደሰ፤  
ኔ ዋይኔ ኡሻይ  
ሃላን ዬሌቲደሰ።
- 23 ኔና ካሌሊዛይቲ  
ማካላንቻታራኔ  
ካይሶታራ ላጌቲዳ፤  
ኢሰቲ ኡባይካ ማጋንጾ ደሴቴሰ።  
ማታኤካ ኬሂ ኮዬቴሰ፤  
ዪኦታሰ አጂ ኤቄቴና፤  
አምኤታ ማጋና ሲዬቴና።
- 24 ሄሳ ገሻሰ ጎዳይ፥  
ኡባፌ ዋልቃማ ጎዳ  
ኢሰራኤሌ ጸሳይ፥  
«ታኒ ታ ሞርኬታ ቦላ  
ታ ሃንቆ ጉሳና፤  
ታና ኩሚዛይታ ቦላካ  
ታኒ ሃሎ ኬሳና።
- 25 ታኒ ታ ኩሺ  
ኔ ቦላ ዴንላና፤  
ኔ ቦላ ዲዛ ኪንላካ  
ታ ጌሻና፤  
ኔ ቂታካ ኔ ቦላፌ ዲጋና።
- 26 ካሴ ኔና ኣይሲዛይታ ማላ  
ሃራ ኔና ኣይሳናይታኔ  
ዘራናይታ ታኒ ኔሰ ዴንላና፤  
ሄሳፌ ጉዬ ኔኒ፥

- (ዲሎቴሌ ዲዛ አማኔቲዳ  
 ካታማዮን ጌታታና።  
 27 ዲዮና ሱሬ ፒርዳን፥  
 ማርቴላን ሲሚዛይቲ  
 ዲሎቴላን ዋዜታና።  
 28 ጊዶ አቲን ማካላንቻቲኔ  
 ናጋራንቻቲ ኢሲ ቦላ ሊቃና፤  
 ጸሓ ኣጊዛይቲ ወሪካ ቆያና።  
 29 ካሴ ኢንቴ ዶሲዛ ካሻታን  
 ኢንቴ ዬላታና፤  
 ካሴ ኢንቴ ዶሪዳ አታኪልቴሶሆታን  
 ኢንቴ ካወያና።  
 30 ወርሴላን ኢንቴ ቦንጮይ  
 ቆኪዳ ዋላ ማላ፥  
 ሃሌ ባይንዳ አታኪልቴሶሆታ  
 ማላ ጊዳና።  
 31 ሚኖ አሲ ሃፓ ማላ፤  
 ኢዛ ኦሶይካ ፒልኢ ጊዛ  
 ላጮ ማላ ጊዳና፤  
 ናምኣይካ ኢሲ ቦላ ጸጌታና፤  
 ሄ ታማ ቶይሳና  
 ኣሲካ ዴና» ጊዴሰ።

## 2

ሜርና ሳሮ

**(ሚክ 4:1-3)**

- 1 አሞጾ ና ኢሳያሲ ዩሁዳ ዴሬ ጊሻሲኔ ዩሩሳሌሜ ካታማ  
 ጊሻሰ ቤኢዳ ኣጂታይ ሃይሳ።  
 2 ዋዴ ወርሴላን ጸሓ ኬሌ  
 ኢዛ ቦላ ኬጹቲዳ ዙማይ  
 ሃራ ዙማ ኡባፌ  
 ቶቂ ቤታና።  
 ዙምቡላታ ኡባፌ ቶቂ  
 ቶቂ ጋና፤  
 ኡባ ካዋቴላቲ  
 ሄ ጎቻና።  
 3 ዳሮ ኣሳይ ዩዲ፥

«ዋጋይ ጸዮኔፔ፥  
 ጎዳ ቃላይ ዩሩሳሌሜፕ  
 ኬዚዛ ጊሻስ ሃ ዪቴ!  
 ጎዳ ዙማ፥  
 ያቆቤ ጸሳ ኬላ  
 ኣኔ ፑዳ ኬዘሰ።  
 ኢዚ ኮይዛይሳላ  
 ኑኒ ባና ማላ  
 ኢዚ ኑና ባ ኣጌ ታማርሳና» ጋና።

4 ኢዚ ካዎቴላታ ጊዶን ፒርዳና፤  
 ዳሮ ኣሳታ ጋርሳን ዲዛ ፓላማ  
 ኢዚ ዲጋና።  
 ኢሰቲ ባንታ ጊላ  
 ማሻ ማራሻ፥  
 ባንታ ቶራካ  
 ባጫ ቆጺ ኬሳና።  
 ዴሬይ ዴሬ ቦላ  
 ማሻ ዴንፊና፤  
 ሄሳፌ ጉዬ  
 ኢሰቲ ኦላ ታማራቴና።

5 ኢንቴኖ ያቆቤ ዛሬቶ!  
 ሃ ዪቴ!  
 ኣኔ ጎዳ ፖኦን ሲሜሬቶሰ።

### ጎዳ ጋላስ

6 ጎዳዉ! ኔኒ ኔ ኣሳ  
 ያቆቤ ዛሬታ ኣጋዳሳ።  
 ኢሰቲ ኣርሼይ ሞኪዛ ባጋራ ዲዛ  
 ኣሳታ ማላ ቢታን ኩሚዳ፤  
 ፊሊሰጾሜ ኣሳ ማላ  
 ሙሬኔቴሰ።  
 ኢሰቲ ኣላጋራ ኢሲፌ ዙፔቴቴሰ።  
 7 ኢሰታ ቢታን ቢራይኔ  
 ዋርቃይ ኩሚዳሰ፤  
 ኢሰታ ዲሬቴላሰ ዛዋይ ባዋ፤  
 ኢሰታ ቢታን ፓራይ ኩሚዳሰ፤  
 ኢሰታ ፓራ-ጋሬታሰ  
 ዛዋይ ዴና።

8 ኢስታ ቢታን ኤቃ ጸሳቲ ኩሚዳ፤  
ባንታ ኩሼን ኦሊ ኬሲዳ  
ሚሻስ ጎይነቴስ።

9 ሄሳ ገሻስ አሲ ኡባይ  
ዘቂ ጋናኔ ካዉያና።  
ኢስታ ቆሆ አቶ ጎፓ።

10 ያሺሲዛ ጎዳ ሃንቆፌኔ  
ኢዛ ቲማፔ አታናስ  
ዛላታኮ ቢዲ  
ቢታ ገደን ቆቴቲቴ!

11 ኦቶራንቻ አይፌይ ጉካና፤  
ሞጴቲዛይቲ ካዉያና፤  
ሄ ዋዴ ጎዳይ ጸላ  
ጶቁ ጶቁ ጋና።

12 ኡባፌ ዋልቃማ ጎዳይ  
ኦቶራንቻታ፥  
ሞጴቲዛይታኔ  
ጩቄቲዛይታ ካዉሻናስ  
ጋላስ ባሪ ዋሊዴስ።

13 አዱሲኔ ቶቃ ገዲዳ  
ለባኖሴ ዚጋታኔ  
ባሳኔ ዋላታ ኡባ፥

14 ገታ ዙማታኔ  
ቶቃ ዙሞቡላታ ኡባ፥

15 ካታማ ናጊዛ  
አዲሳ ሚጸታኔ  
ካታማ ዩሸን ዲዛ  
ሚኖ ገምቤታ ኡባ፥

16 ታርሴሴ ማርካቤታኔ  
ቦንቾ ዋጎሎታ ኡባ  
ኢዚ ካዉሻና ዋዴይ ዴስ።

17 ሞጴቲዛይይ ካዉያና፤  
ኦቶራንቻይ ኩንዳና፤  
ሄ ጋላስ ጎዳይ ጸላ  
ጶቁ ጶቁ ጋና፤

18 ኤቃ ጸሳቲ ኡባይ

- መጥፎ ላይና።  
 19 ጎዳይ ሃይሳ ቢታ  
     ቃላናስ ዴንዲዛ ዋዴ  
     ያሺሲዛ ጎዳ ሃንቆፌኔ  
         ኢዛ ቲማፔ ኣታናስ  
         ኣሳይ ቆቴታናስ  
         ሹቻ ጋርሲኔ  
         ኦላይ ዲዛሶ ባቃታና።  
 20 ሄ ጋላስ ኣሳይ ጎይናናስ  
     ሜዲዳ ባንታ ቢራ፥  
     ዋርቃ ሚስሌታ  
     ጊሮሲኔ ካፎታስ ኦላና።  
 21 ጎዳይ ሃ ቢታ ቃላናስ  
     ዴንዲዛ ዋዴ  
     ኢዛ ያሺሲላፌኔ  
     ኢዛ ቲማፔ ዴንዲዳይሳን  
     ሹቻ ጎንጎሎይኔ  
     ዛላ ዛኣይ ዲዛሶ ባቃታና።  
 22 ሸምፖይ ሲዴራ ኩዘን  
     ኣሃ ጊዲዛ ኣሳን ኣማኔቶፍቴ፤  
     ኣሲ ኣይ ማዳኔ?

### 3

- ዬሩሳላሜ ቦላኔ ዩሁዳ ቦላ ያና ፒርዳ  
 1 ቤኢቲ፥ ጎዳይ ኡባፌ ዋልቃማ ጎዳይ  
     ኣሳስ ኮሺዛ ካል፥  
     ሃልኔ ማዶ ኡባ  
     ዬሩሳላሜፔኔ  
     ዩሁዳፔ ዲጋና።  
 2 ቃራታኔ ኦላንቻታ፥  
     ፒርዲዛይታኔ ናቤታ፥  
     መሬኒዛይታኔ ጨማታ፥  
     3 ሃምሳ ሃላቃታኔ ኦላ ጋዳዋታ፥  
     ዘራንቻታኔ ሂላንቻታ፥  
         ጨንጫቴላን ቢቲዛይታ  
         ኡባ ሳይሳና።  
 4 ታኒ ዩላጋ ናይታ

- ኢስታ ቦላ ሹማና፤  
 ቁሪ ናይቲ ኢስታ ሃራና።
- 5 ዳሬይ ዳሬ ቦላ፥  
 ኣሲ ኢሶይ ኢሳ ቦላ፥  
 ሾሮይ ሾሮ ቦላ፥  
 ዩላጋ ናይቲ ጨማታ ቦላ፥  
 ሹፋሮይ ቦንቹቲዳይታ ቦላ  
 ዴንዳና።
- 6 ኣሲ ባ ኣዋ ኬላን  
 ባ ኣሻንታፌ ኮይኪዲ፥  
 «ኔስ ማይኦይ ዲዛ ጊሻስ  
 ኑና ካሌሊዛይሳ ጊዳ፤  
 ሃ ላሌቲዳ ሶሆዛ ኣዋቴል  
 ኔ ኤካ» ጋና።
- 7 ሂስቲን ኢዚ ሄ ዋዴ  
 ባ ቃላ ጶቁ ሂስቲዲ፥  
 «ታኒ ኣይኮካ ማዲኬ፤  
 ታሶን ማይኦይኔ ሚዛ ካሊ  
 ባይንዳ ጊሻስ ታና  
 ዳሬ ካሌሊዛዴ  
 ሂስቶፍቲ» ጋና።
- 8 ዩራሳላሜይ ጋንዲጋራዉስ፤  
 ዩሁዳይካ ኩንዳና ማታዲስ፤  
 ጋሶይካ ኢስቲ  
 ባንታ ሃሳያኒኔ  
 ኦሶን ጎዳራ ኤቁቲሼ  
 ኢዛ ቦንቾዛ ቶቹቲስ።
- 9 ኢስታ ኣይፌሶይ  
 ኢስታ ቦላ ማርካቲስ፤  
 ኢስቲ ሶዶሜ ኣሳ ማላ  
 ባንታ ናጋራ ቆቶንታ  
 ቆንጨን ሃሳዬቲስ፤  
 ኢስቲ ባንታ ቦላ ኢታ ሚሽ  
 ኤሂዛ ጊሻስ  
 ኢስታስ ኣዬ ኣና!
- 10 ደሎታስ፥ «ደሎቲ ባ ሎኦ ኦሶ  
 ኣይፌ ማና፤  
 ሄሳ ጊሻስ

- ኢስታስ ሎኦ ጊዳና» ጋ ዮታ።  
 11 ኢታታስ አዬ አና!  
     ኢስታ ሶላ ኢታ ሚሺ ያና፤  
     ኣይስ ጊኮ ኢስቲ  
         ባንታ ኦሶ ማላ ኤካና።  
 12 ዬላጋቲ ታ ዴራ ኡንኤቴስ፤  
     ማጫሳቲካ ኢስታ ሃሬቴስ፤  
     ታ ዴሬዞ! ኢንቴና ካሌሊዛይቲ  
         ኢንቴና ባሌሊዳ፤  
     ኢንቴ ቢዛ ኦጌፔካ  
         ኢንቴና ካሬ ኬሲዳ።

### ጎዳይ ባ ኣሳ ሶላ ፒርዳና ፒርዳ

- 13 ጎዳይ ፒርዳናስ ሺሎታን ኡቲዴስ፤  
     ዴራ ሶላ ፒርዳናስ ዴንዲዴስ።  
 14 ጎዳይ ዴሬ ጨማታኔ  
     ካሌሊዛይታ ፒርዳናስ  
         ኢሲ ሶላ ሺሺዲ፥  
     «ታኒ ዋይኔ ቶኪዛሶሆዛ  
     ኢሲዴታ፤  
     ማንቆታፔ ኢንቴ ቦንቂዳይሲ  
         ኢንቴ ቆልኣን ዴስ።  
 15 ታ ዴራ ኣይስ ሜቶን ሊቂሲዴቲ?  
     ማንቆታ ኣይስ ዬሴቲ?  
         ሃይሳ ዮቲዳይ ታና ጎዳ፥  
         ኡባፌ ዋልቃማ  
         ጎዳ ጸሳ» ጌስ።

### ጲዮኔ ማጫሳታስ ኢሜቲዳ ሴራ

- 16 ጎዳይ፥ «ጲዮኔ ማጫሳቲ  
     ኦቶሬቲዳ፤  
     ባንታ ቆጼ ዋርጺ ሂስቲሺ፥  
     ባንታ ኣይፌን ሶምኢ ቤሲሺ፥  
     ባንታ ዱጫ ቃሊሺ፥  
     ባንታ ቶሆን ዲዛ ሳጋዮ  
         ጌሪሲሺ ሄሜቴቴስ።  
 17 ሄሳ ጌሻስ ታኒ ጎዳይ

ጸዮኔ ማጫሳታ ሁኔ  
 ጨቶን ጎኢሳና፤  
 ታኒ ጎዳይ ኢስታ ሁኔ  
 ቦኢሳና» ጌሰ።

18 ሄ ጋላስ ጎዳይ ጸዮኔ ማጫሳታ አሌቆ ሚሻታ፡ ሄይቲካ  
 ቶሆ ሳጋዮታ፡ ሁኔ አሌቆታ፡ ቆይ ጎዝዳታ፡

19 ሃይላ ጉቲቻታ፡ ኩሼ ሳጋዮታ፡ አይፌሶ ካሚዛ ቁራጩታ፡

20 ሁኔ ጎሴታ፡ ሳጋዮታ፡ ሁኔ አሌቆታ፡ ዴሳን ዳንጨዛ  
 ዳንጮታ፡ ሺቶ ቢልቃዴታ፡ አሼንኪታቤታ፡

21 ሲይ ሚዲጋታ፡ ቢራይ ሚዲጋታ፡

22 ሴሎ ማይኦታ፡ ጋርሳራ ማይኢዛ ማይኦታ፡ ካባታ፡ ኩሼ  
 ካራዲቲታ፡

23 ሄሬጋታ፡ ላይኖታ፡ ጌዶራ ማይኢዛ ማይኦታ፡ ቢናና ቃቺዛ  
 አሌቆታኔ አይፌሶ ካሚዛ ቆሌታ ኡባ ዳፊ ኤካና።

24 ሺቶ ጸንቆን፡ ዳንጮ ዎዶሮን፡

ጎፋሬ ቦኢን፡

ሴሎ ማይኦ ማቃን፡

ፑላቴል ፒጌን ላማና።

25 አንቴስ አቱማ አሳቲ ጌላ ማሻን፡

ኦላንቻቲ ኦላን ሃይቃና።

26 ጸዮኔ ፔንጌቲ

ካሎ ጋዴን ዎታ ኡታዳ

ዬኪዛ ማጫሳ ማላ

ዬካናኔ ዚላላና።

## 4

1 ሄ ዎዴ ላፑን ማጫሳቲ ኢሲ አዴ ኦይኪዲ፡

«ማና ካል ጌዲን

ማይኦና ማይኦ

ኑኒ ኑርካ ኑና ዳንዳያና፤

ኔ ሱንላን ጸላ

ዴይጌታና ማላ ሂስታዳ

ኑ ካዉሻቲላ

ኑፔ ዲጋርኪ!» ጌ ዎሳና።

ዬሩሳላሜ ኦራላቴል

2 ሄ ዎዴ ጎዳ ሚላ ሃጋይ ሎኦናኔ ቦንቺታና፤ ኢስራኤል አሳፔ  
 ዳይሼ አቲዳይታስ ሄ ቢታ ካላይ ጨቆሲኔ ቦንቺስ ጌዳና።

3 ጸዮኔን አቲዳይቲ፥ ዩሩሳላሜን ቆየንታ አቲዳይቲ፥  
ዩሩሳላሜን ሾምፖራ ፓጻ ዲሼ ጸፊቲዳ ኡባታራ፥ «ኢስቲ ጌሻታ»  
ጌቲታና።

4 ጎዳይ ጸዮኔ ማጫሳታ ቂታ ማጫና፤ ማጽቲ ኡቲዳ ሱሳፊ  
ዩሩሳላሜ ፒርዳ አያናኒኔ ዱጊዛ አያናን ጌሻና።

5 ጎዳይ ጸዮኔ ዙማ ቦላኔ ሄን ሺቂዛ ኡባታ ቦላ ጋላስ ሻራኔ  
ጩዋ፥ ኦማርስ ኤጲዛ ታማ ፖኦ ኪታና፤ ጸሳ ቦንቾይ ካታማዮ  
ዱንካኔ ማላ ካሚ ናጋና።

6 ኢዚ ጋላሳ አዋ ሱሌፔ አሺዛ ኩዋ፥ ኡሾፔኔ ኢራፔ ባቃቲ  
አቲዛሶሆ ጊዳና።

## 5

ዎይኔ ቶኪዛ ጋዴ ጊሻስ ዮቴቲዳ ጊንጾ

1 ታኒ ታ ሲቆ ላጌዛ ጊሻሲኔ

ኢዛ ዎይኔ ቱራ

ቶኪዛሶሆ ጊሻስ

ሲቆ ማዛሙራ ዩጻና።

ታኒ ሲቂዛ ላጌዛስ

አራዳ ዙምቡላን

ዎይኔ ቱራ ቶኪዛሶሆይ ዴስ።

2 ቢታ ቦኪዲ፥

ሹቻ ቆሪ ኬሲዲ፥

ኡባፌ ሎኢዛ

ዎይኔ ቱራ ቶኪዴስ፤

ሂስቲዲ ኢዛ ናጋናስ

ሻኮ ጊግሲዴስ፤

ዎይኔ ኡሹ ጉምኢዛሶሆ

ኦላ ቦኪ ጊግሲዴስ።

ሄሳፌ ጉዬ ሎኦ አይፌ አይፋና

ጊዲ ናጊዴስ፤

ጊዶ አቲን ጫላ ጸንቂዳ

አይፌ አይፊዴስ።

3 ሂስቲን ታ ሲቆይ፥

«ኢንቴኖ ዩሩሳላሜን

ዴኢዛይቶ!

ኢንቴኖ ዩሁዳ አሳቶ!  
 ታፔኔ ታ ዋይኔ ቱራ  
 ቶኪዛ ሶሆዛፔ ጊዶን  
 ዴኢዛ ዮኦዛ  
 እኔ ሃኢ ኢንቴ ፒርዲቲ።

- 4 ታኒ ታ ዋይኔ ቱራ  
 ሶሆዛሲ ኦሊዳይሳፌ  
 ሃራ አይ ኦላናይሲ አቲዴ?  
 ኢዚ ሎኦ አይፌ አይፋና ጋዳ  
 ታ ናጊሺን አይሰ ጫላ ጸንቂዳ  
 አይፌ አይፊዴ?

- 5 ሃኢ ታኒ ታ ዋይኔ  
 ቶኪዛ ጋዴዛ ቦላ  
 ኦላናዝ ኢንቴሰ ዮታይሰ።  
 ዲርሳ ሾዳና፤  
 ኢዚካ ጳያና ማላ ኦላና፤  
 ታኒ ገምቤዛ ላላና፤  
 ሄ ሶሆይካ ዱሬታና።

- 6 ታኒ ሄ ሶሆዛ  
 ማኅ ቢታ ኦላና።  
 ሄ ቱራይ ጸንቂቲናኔ  
 ቡልኤቴና፤  
 ሂሰቲን ከንዲቾይኔ  
 አጉንሉ ኢዛን ሞካና።  
 ኢራይ ኢዛን ቡኮንታ ማላ፥  
 ታኒ ሻራታ አዛዛና» ጊዴሰ።

- 7 ኡባፌ ዋልቃማ  
 ጎዳ ዋይኔ ቶኪዛ ጋዴይ  
 ኢሰራኤሌ አሳ።  
 ዩሁዳ አሳይ  
 ኢዚ ኡፋዬቲዛ አታኪልቲ።  
 ኢሰቲ ሱሬ ፒርዳ ፒርዳና  
 ጊዲ ናጊዴሰ፤  
 ጊዶ አቲን  
 ሱሉ ጉሲሺን ቤዪዴሰ።  
 ኢዚ ጸሎቴሉ ኮዪዴሰ፤  
 ጊዶ አቲን ሜቶ ዋሶ ሲዪዴሰ።

- 8 ሃራታስ ሶሆይ  
 ቆያናሹ ጋካናስ፥  
 ኬል ኬል ሶላ ጉጂዛይቶ!  
 ጋዴ ጋዴራ ጋሏ ኦይሊዲ፥  
 ኢንቴርካ ጸላ ቢታ ሶላ  
 ኣኪ ዴኢዛይቶ!  
 ኢንቴስ ኣዬ ኣና!
- 9 ኡባፌ ዋልቃማ ጎዳይ  
 ታኒ ታ ሃይላራ ሲዩሺን፥  
 «ጌታ ኬላቲ ካይዚ ኣታና፤  
 ሄ ሎኦ ኬላታን ዴኣናስ  
 ኣሲ ቆያና።
- 10 ታሙ ዋጸ ቦራታን  
 ቶኪዳ ዋይኔ ኣይፌፔ  
 ኢሲ ኦቶ ጊዲዛ ዋይኔ  
 ኡሺ ጸላ ኬኣና፤  
 ታሙ ቁንኣ ካል ዜሪን  
 ኢሲ ቁንኣ ካሊ  
 ጸላ ኣይፋና» ጊዴስ።
- 11 ማሶሲዛ ኡሹ ኮያናስ  
 ማላዶ ጉራራ ዴንዲዲ  
 ዋይኔ ኡሻን  
 ጹጌታና ጋካናስ፥  
 ሳኣ ቃሚሲዛይታስ ኣዬ ኣና!
- 12 ኢስታ ጊቢራሶሆን ማሲንቆይ፥  
 ዲሊ፥ ካራቤይ፥ ሱሱልኤይኔ  
 ዋይኔ ኡሺ ዴስ፤  
 ጊዶ ኣቲን  
 ኢስቲ ጎዳ ኦሶዛስ  
 ዉዴቲቤቴና፤  
 ኢዚ ባ ኩሼን ኦሊዳ  
 ኦሶካ ቦንቺቤቴና።
- 13 ሂስቲን ታ ዴሬይ  
 ኣኬካ ቆይዳ ጊሻስ  
 ዲኤቲ ባና፤  
 ኢስታ ሹሜቲ ኮሻን ሃይቃና፤  
 ኢስታ ዴሬ ኣሳይካ

- ሃላ ሳሞን  
 ደጌቱ ሃይቃና።
- 14 ደፍረ ያ ሳሞን አሳደሰ፤  
 ባ ደናካ  
 ዛዋፔ ቦላራ ደያዱሰ፤  
 ዩሩሳሌምን ዴኢዛ  
 ጌታ አሳቲኔ  
 ሃንኮ ዴሬይ፥ ዎጫሚዛይታኔ  
 ጉፒዛይታ ኢሲ ቦላ ሚታና።
- 15 አሲ ኡባይ ቶሼታናኔ  
 ካዉያና፤  
 ኦቶራንቻቲ ኡባይ ዩላታና።
- 16 ጊዶ አቲን ኡባፌ  
 ዎልቃማ ሳዳይ፥  
 ሱሬ ፒርዳን  
 ቶቄ ቶቄ ጋና፤  
 ጌሻ ጸሳይ  
 ባ ጌሻቲላ  
 ባ ጸሎቴላን ቤሳና።
- 17 ሄ ዎዴ ዶርሳቲ  
 ባንታ ቆሮን  
 ሄሜቲዛ ማላ ሄሜታና፤  
 ዶርሳ ላቃቲ ላሌቲዳ ዱሬታ  
 ኬላታ ሶሆን ማታ ማና።
- 18 ጨዋ ዎዶሮን ናጋራ  
 ጎቹዛይታሰ፥  
 ፓራ-ጋራ ዎዶሮን ኢታቲላ  
 ጎቹዛይታሰ አዬ አና!
- 19 «ኮኒ ኑ አይፌራ ቤአና ማላ  
 አኔ ጸሲ ኤሌሎ!  
 ባ ኦሶካ ኤሶሶ!  
 ኮኒ ኤራና ማላ  
 ኢሰራኤሌ ጌሻይ  
 ቆፒዳ ቆፋይ  
 ማታን ፖሌቶ»  
 ጌዛይታሰ አዬ አና!

20 ኢታ ሎኦ፥ ሎኦዛ ኢታ ጊዛይታሰ፥

ጳማ ፖኦ

ፖኦዛ ጳማ ኦሴዛይታሰኔ

ጫሚዛይሳ ማልኦ፥

ማልኦዛይሳ ጫሞ

ኦሴዛይታሰ ኣዬ ኣና!

21 ባንታና ባርካ፥

«ታኒ ኣጵ ኤራንቻ!

ታኒ ቃራ ጊዲኪና!»

ጊ ቆፒዛይታሰ ኣዬ ኣና!

22 ዎይኔ ኡሻን ኤሬቲዳይታሰኔ

ማሶሲዛ ኡሹ ዋላካናሰ

ጎቢዛይታሰ ኣዬ ኣና!

23 ማታኤ ኤኪዲ፥

ሞራንቻታ

ጸሊሲዛይታሰኔ

ጸሎ ኣሳታሲ ሱሬ ፒርዳ

ዲጊዛይታሰ ኣዬ ኣና!

24 ኢሰቲ ኡባፌ ዎልቃማ ጎዳ

ዎጋ ኢጺዳ ጊሻሰ፥

ኢሰራኤሌ ጌሻ ቃላካ

ካጲዳ ጊሻሰ፥

ታማ ላጮይ

ቡጸ ኦይኪዛ ማላኔ

ሜላ ማታይ ኤጺ ጳይዛ ማላ

ኢሰታ ጸጸይ ዎቃና፤

ኢሰታ ጨሻይካ ቡሄ ማላ

ላሌቲ ጳያና፤

25 ጎዳ ሃንቆይ ኢዛ ዴራ ቦላ

ኤጺ ኬኢዴሰ፤

ኢዚ ባ ኩሼ ዴንሒዲ

ኢሰታ ሾጨዴሰ፡፡

ዙማቲ ቃጺዳ፤

ሃይቂዳ ኣሳ ኣሃይ

ኦጌ ቦላ ፒቲ ዬጊዳ

ቡራ ማላ ጊዲዴሰ፤

ሂሰቲ ፔኢንካ  
ኢዛ ሃንቆይ ሲሚቤና፤  
ኢዛ ኩሼይ ሃኢካ  
ዴንዲዳ ማላ ዴሰ።

26 ጎዳይ ሃኮን ዴኢዛ  
ካዋቱላታሰ  
ማላታ ቶቃን ኤሴሰ፤  
ሳኣ ጋጸን ዴኢዛ  
ሞርኬታሰካ ዋይቄሰ፤  
ኢሰቲካ ኤሶን ቢቻሪሽ  
ፑቱ ጋና።

27 ኢሰታ ጊደን ዳቡራንቻይኔ  
ዋቤይ ዴና፤  
ኢሰታፌ ኢሶይኔ  
ፏሰኬናኔ ኢቼና።  
ጸሳን ጊጺዳ ቃባቶይካ  
ቢርሼቴና፤  
ኢሰታ ጫማ ዳፎይካ  
ዱጾና።

28 ኢሰታ ዪሻይ ሆጾ፤  
ኢሰታ ዋንዳፌይካ  
ዋጾቲ ኡቲዴሰ።  
ኢሰታ ፓራታ ቁንጫፊሌይ  
ዛላ ሹቻ ማላ፤  
ኢሰታ ፓራ-ጋሬታ ኤርዘይካ  
ጎቲ ማላ።

29 ኢሰታ ጸጎይካ  
ጋሞ ጸጎ ማላ፤  
ዋዳላ ጋሞታ ማላ  
ጸጌቴሰ፤  
ባንታሰ ሚዛ ሚሽ  
ሻንካቲ ኦይኪዲ ጸጌቴሰ፤  
ኢሰቲ ኦይኪዲሰ  
ቶኪ ኤኪ ቤቴሰ፤  
ኢሰታፌ ዋላ ኤካናይ  
ኦኒካ ዴና።

30 ሄ ጋላስ ኢስቲ  
 ጊታ አባ ዳምባላ ማላ፥  
 ኢስራኤል ቦላ ጉማና፤  
 ኦኒካ ዱጌ ዛሪ  
 ቢታ ጾሊኮ  
 ዳማኔ ማቶ ቤኣና፤  
 ፖኦይካ ሻራን ካሜታና።

## 6

### ናቤቴላስ ኢሳያስ ጾይጌቴል

1 ካዎ ኦዚያይ ሃይቂዳ ላይል ጎዳይ ቃቃ አራታ ቦላ ኡቲዳይሳ ቤያዲስ፤ ኢዚ ማይኢዳ አፋላ ማጫራይ ጸሳ ኬል ኩሚ ኡቲዳስ።

2 ሱራፌሌ ጌቲቲዛ ኪታንቻቲ ኢዛፔ ቦላራ ዳቴስ፤ ኢሲ ኢሲ ሱራፌሌስ ኡሱፑን ቂፊቲ ዳቴስ፤ ናምኡ ቂፊታን ባ አይፌሶ አይፌሶ ካሜቴስ፤ ናምኡ ቂፊታን ባ ቶሆ ቶሆ ካሜቴስ፤ ናምኡ ቂፊታን ፒራዴቴስ።

3 ኢሶይ ኢሳራ፥

«ጌሻዉ፥ ጌሻዉ፥

ጌሻዉ

ኡባፌ ዎልቃማ

ጎዳ ጸሳዉ!

ሳኣ ኡባይ

ኢዛ ቦንቾን ኩሚዳስ» ጊዳ።

4 ኢስታ ቃላ ጩንጉርሳፌ ዳንዲዳይሳን ጸሳ ኬላስ ዮቻይ ቃዲዳስ፤ ቃሴካ ጸሳ ኬላ ጩዋይ ቋፒ ጊ ኩሚዳስ።

5 ሂስቲን ታኒ፥ «ታኒ ዶናይ ቱኒዳ አሳ፤ ቃሴ ዶናይ ቱኒዳ አሳታ ጊዶን ዳኣይስ፤ ታኒ ካዎዛ፥ ኡባፌ ዎልቃማ ጎዳ ጸሳ ታ አይፌን ቤኢዳ ጊሻስ ታስ አዬ አና! ታ ቋያዲስ» ጋዲስ።

6 ሂስቲን ሱራፌሌታፔ ኢሶይ ያርሺዛሶዛፔ ቃጵን ታማ ቦንቆ ኤኪዲ ፒራዴሽ ታኮ ዪዳስ።

7 ታማ ቦንቆዛን ታ ዶና ቦቺዲ፥ «ቤኣ፤ ሃይሲ ታማ ቦንቆዚ ኔ ዶና ቦቺዳስ፤ ኔ ዋርይ ኔፔ ኪቺዳስ፤ ኔ ናጋራይካ ቁጩቲ ኪቺዳስ» ጊዳስ።

8 ሄሳፌ ጉዬ ጎዳይ፥ «ኦና ኪቶ? ኑስ ኦኔ ኪቴታናይ?» ገሺን ሲያዲስ። ታኒካ ዛራዳ፥ «ሄኮ፥ ታና ኪታ» ጋዲስ።

9 ሂሰቲን ጎዳይ፤  
«ባ፤ ባዳ ሃ ኣሳስ፥  
ኣኢንቴ ሲሲ ሲዬታ፤  
ጊዶ ኣቲን ዩሺ ቆፔኬታ፤  
ኣይፌን ያሌታ ሺን ኣኬኬኬታ»  
ጋዳ ኢስታስ ዮታ።

10 ሃይሳ ዴራ ዎዚና ዳሚሳ፤  
ኢስታ ሃይላካ ቱሊሳ፤  
ኢስታ ኣይፌዛካ ቆቂሳ፤  
ሂሰቶንታ ኣጊኮ  
ኢስቲ ባንታ ኣይፌን ቤኣና፤  
ባንታ ሃይላን ሲያና፤  
ባንታ ዎዚናንካ ኣኬካና፤  
ሂሰቲዲ ኢስቲ ታኮ  
ሲሚዲ ፓጳና» ገዴስ።

11 ታኒካ፥ «ኣቤት ጎዳዉ!  
ሃይሲ ኣይዴ ጋካናስ  
ሃናኔ?» ጋዲስ።  
ኢዚካ ዛሪዲ ታስ፥  
«ካታማቲ ኢስታን ዴኢዛ ኣሲ  
ጳዩን ኢስቲ ላሌታና  
ጋካናስ፥  
ኬላቲካ ኡባይ  
ካይዛና ጋካናሲኔ  
ቢታይካ ሙሌራ ኣይኮይ ባይንዳ  
ቡላ ገዳና ጋካናሳ።

12 ታኒ ጎዳይ ኣሳ  
ሃሳና ጋካናሳ፤  
ቢታካ ኣይኮይ ባይንዳ  
ባዞ ኬሳና ጋካናሳ።

13 ታሙ ኣሳፔ ኢሲ ኣሲ  
ቢታ ቦላ ኣቲኮ፥  
ኢዚካ ጳያና፤  
ቃንጺ ዩጊን ኣቲዳ  
ዎላ ዴራማ ማላ ገዳና፤

ጌሻ ዛሬይ ሄሳሉ  
ሄ ዲሩማ ማለ ጊዳና» ጊዳስ።

## 7

### ካዎ አካዜስ ዪዳ ኪታ

<sup>1</sup> አዚያ ና እየኣታሚይ ዬሊዳ አካዜይ ዩሁዳ ቢታን ካዎቲዳ ዎዴ አራሚ ቢታ ካዎ ኤራሶኒኔ ኢሰራኤሌ ቢታ ካዎ ኤሮሚሊዮ ና ፋቄሄይ ዬሩሳላሚ ኦላናስ ኬዚዳ፤ ጊዳ ኣቲን ጸናናስ ዳንዳይቤቲና።

<sup>2</sup> አራሚ ዴሬይኔ ኤፍሬሚ ዴሬይ ኢሲ ቦላ ጊዲዲ ኦላስ ኬኢዳይሳ ዳዊቲ ዛሬፔ ካዎቲዳ ካዎይ ሲዪዳ ዎዴ ዎራ ሚል ጫርኮይ ቃሊዛ ማላ አካዜ ዎዚናይኔ ዴራ ዎዚናይ ቃጺዴስ።

<sup>3</sup> ሂስቲን ጎዳይ ኢሳያሳስ፡ «ኔኒ ኔ ና ሻኣራ-ያሹቤ\* ኤካዳ አካዜራ ጋይታናስ ባዳ ማይኦ ሚጪዛይታ ጎሻኮ ኤፊዛ ኦኔ ማታን ጋና ባጋራ ዴኢዛ ኤሌ ሃላ ዛራ ጼራን ኔኒ ኢዛ ዴማና።

<sup>4</sup> ሂስታዳ ኢዛስ፡ «ናጌታ፤ ዎፑ ጋ፤ ባቦፋ፤ ሃይታ ታማይ ሚሽን ኣቲዲ ጨዋቲዛ ዲሩማ ናምኣታፔ አራሚስ፡ ኤራሶኔሲኔ፡ ኤሮሚሊዮ ና ሃንቆስ ሻባሬቶፋ» ጋ ዮታ።

<sup>5</sup> አራሚ ቢታ አሳይ ኤፍሬሚ አሳራኔ ኤሮሚሊዮ ናራ ኔ ቦላ ኢታ ሚሽ ኦላናስ፡

<sup>6</sup> «ኣኔ ዩሁዳ ቢታን ዎራጀስ፤ ኣኔ ላሎስ፤ ኣኔ ኦስ ኦስ ሻኬቲ ኤኪዲ ጸቢኤሌ ና ካዎሶስ» ጊ ማቄቲዳ» ጊዳስ።

<sup>7</sup> ጊዳ ኣቲን ኡባ ሃሪዛ ጎዳይ፡  
«ሃይሲ ሃ ኢስታ ማቆዚ ሚኔና፤

ሙሌካ ፖሌቲና።

<sup>8</sup> ጋሶይካ ዳማስቆይ

አራሚ ቢታስ ሁኤ፤

ካዎ ኤራሶኔይ ዳማስቆስ ሁኤ።

ኡሱፑን ታማን ኢቻሽ

ላይላ ጋርሳን

ኤፍሬሚ ዴሬይ ላሌታና፤

ሲሚዲ ዴሬ ጊዳና ዳንዳይና።

<sup>9</sup> ቃሴ ሳማሪያይ

ኤፍሬሚ ቢታስ ሁኤ፤

ኤሮሚሊዮ ናይ ሳማሪያስ ሁኤ፤

---

7:1 2ካዎ 16:5፤ 2ታሪ 28:5-6      \* 7:3 ሻኣራ-ያሹቤ፡ ሻኣራ-ያሹቤ ጊዛይሳ ኢብራዊታ ሱንላ ቢርሽላይ፡ «ኣማርዳይቲ ሲማና» ጌስ።

ኢንቴ ኢንቴ አማኖን  
 ሚኒዲ  
 ኤቆንታ ኢዲኮ  
 ሙሌካ ኤቃናስ  
 ዳንዳዬኬታ» ጌሰ።

አማኑኤሌ ዩሳ ቤሲዛ ማላታ

10 ቃሴካ ጎዳይ አካዜስ፤

11 «ጎዳይ ኔ ጸሳ ኔሰ ቦላ ሳሎ፤ ወይኮ ሳኣ፤ ጋርስ ጨማፊ ኢሲ ማላታ አማና ማላ ኦይቻ» ጌዴሰ።

12 አካዜይ ጌዲኮ፤ «ኦይቹኬ፤ ጎዳካ ፓጨኬ» ጌዴሰ።

13 ኢሳያሲ፤ «ኢንቴኖ ዳዊቱ ዛሬቶ፤ ሲዪቱ! ኢንቴ አሳ ሳሌሊዛይሲ ጉጸን ጸሰ ሳሌላናሰ ዴንዲዴቲ?»

14 ሂሰቲኮ ጎዳይ ባርካ ኢንቴሰ ማላታ ቤሳና፤ ጌላኦይ ሻራና፤ አቱማ ና ዬላና፤ ኢዛ ሱንላካ፤ ሳማኑኤሌ† ጋዳ ሱንላና።

15 ኢዚ ኢታኔ ሎኦ ሻኪ ኤሪዛ ወዴ ሃንጋራ ማሊኔ ኤሰ ማና።

16 ጌዳ ኣቲን ናዚ ኢታኔ ሎኦ ሻኪ ኤሪና፤ ሲንላን ኔኒ ኬሂ ያዪዳ ናምኡ ካዎታ ቢታቲ ኣይኮይ ባይንዳ ቡላ ጌዳና።

17 «ኤፍሬማ ቢታይ ዩሁዳ ቢታፊ ሻኬቶሶፊ ዶሚን ሃይሳፊ ሲንላን ሃኒ ኤርንታ ወዴ ጎዳይ ኔ ቦላ፤ ኔ ዴራ ቦላኔ ኔ አዋ ኬላ ቦላ ኤሃና፤ ኢዚ ኔ ቦላ ኤሃናይሲካ አሶሬ ካዎ» ጌዴሰ።

18 ሄ ወዴ ጎዳይ ሃኮ ቢታን ዲዛ ጌብጾ ሻፋ፤ ኡዲንጾታ፤ አሶሬ ቢታፊ ማላታ ወይቄላን ጾይጋና።

19 ኢሰቲ ኡባይካ ዪዲ ባዞ ሾባን፤ ሹቻ ጎንጎሎን፤ አጉንላ ቱሻኒኔ ሃላ ኦላታን ጋወኣና።

20 ሄ ወዴ ጎዳይ ኤፊራዲሴ ሻፋ ፒንላፊ ጋርጺ ኤሂዳ ማጋላን፤ ሄሲካ አሶሬ ካዎይ ዪዲ ኢንቴሰ ሁኤ ቢናና፤ ኢንቴ ቡቹኔ ኢንቴ ቦላ ዲዛ ኢሰኬ ኡባ ሜዳና።

21 ሄ ወዴ ኢሲ ኣሳሰ ኢሲ ኡሳ ሚዚኔ ናምኡ ዴይሻቲ ጸላ አታና።

22 ጌዲኮካ ኢሰቲ ማጸዛ ማሊ ኬሂ ዳር ጌዲዳ ጌሻሰ ኢዚ ኦይሰ ማና፤ ሄ ቢታን ኣቲዳ አሳይ ኡባይካ ሃንጋራኔ ኤሰ ማና።

23 ሄ ወዴ ኢሲ ሺ ቢራን ዋሼቲዛ ኢሲ ሺ ወይኔ ቱራቲ ቶኬቲዳሶሆቲ ኡባይ አጉንሊኔ ኪንዲቾ ጸላ ጌዳና።

† 7:14 አማኑኤሌ፡ አማኑኤሌ ኢብራዊታ ሱንላ ቢርሼላን ጸሲ ኑናራ ዴሰ ጉሳ።

24 ቢታ ኡባን ኪንዲቾይኔ አጉንሐ ኩሚዳ ጊሻስ አሳይ ሄ ቢዛ ዋዴ ዋንዳፌኔ ዪሽ ኦይኪ ባና።

25 ካሴ ጸይሌን ጎዬቲዲ ካሐ እሚዛ ዙምቡላቲ ኪንዲቾኒኔ አጉንላን ኩሚዳ ጊሻስ ያዩዲ ኢሲ አሲካ ሄ ቤና፤ ሜሄይኔ ዶርሲ ላኤቲዛሶ ጊዳና።

## 8

### አሶሬ ካዎ ዩስ

1 ጎዳይ ታና፡ «ጌታ ጸላ ዋራቃታ ኤካዳ፡ «ማሄር-ሻላል ሃሽ-ባዝ»\* ጋዳ ናባቤቲዛ ፒዳሌን ጸፋ።

2 ቄሴ ኦሪያኔ ባራኪዮ ና ዛካራሳ ታስ አማኔቲዳ ማርካታ ጊዳና ማላ ታ ኢስታ ጴይጋና» ጊዴስ።

3 ሄሳፌ ጉዬ ባ ማቾ ናቤይራ አቂዴስ፤ ኢዛካ ሻራዳ አቱማ ና ዬላዱስ፤ ሂስቲን ጎዳይ ታና፡ «ኢዛ ሱንላ፡ «ማሄር-ሻላል ሃሽ-ባዝ» ጋዳ ሱንላ።

4 ናዚ፡ «አቦ! አዬ!» ጊ ጴይስ ኤራናፔ ካሴ አሶሬ ቢታ ካዎይ ሳማሪያኔ ዳማስቆ አቆታ ዲኢ ኤፋና» ጊዴስ።

5 ቃሴካ ጎዳይ ታስ፡

6 «ሃ ዴሬይ ጮኡ ጊ ጎጊዛ

ሴሊሆሜ ሃላታ

አጊዲ ኤራሶኒኒኔ

ኤሮሜሊዮ ናዛን ኡፋዬቲዴስ።

7 ሄሳ ጊሻስ

ታኒ ጎዳይ ሚኖኔ

ዋልቃማ ጊዲዳ

ኤፊራጺሴ ሃላ ሃሮ፡

አሶሬ ካዎ ኢዛ ቱማራኔ

ቦንቾዛራ ኢስታ ቦላ ኤሃና፤

ሃላዚ ሻፋዛ

ኩሚ ፖሊቾዲ

ሻፋ ዶናን ዲዛ

ቢታ ኡባ ሚታና።

8 ቡሪ ኤኪዲ

ዲጌ ዩሁዳ ዋዳና፤

ቢታ ኩሚዲ አዳና፤

\* 8:1 ማሄር-ሻላል ሃሽ-ባዝ ጉሲ ዲኣናሲኔ ቦንቃናስ ኤሌላ።

ቆይ ጋካናስ  
 ሚታና» ገደሰ።  
 ገደ አቲን አማኑኤል!  
 ሚጨቱዳ ኢዛ ቄፊይ  
 ኔ ቢታ ጋጾፔ  
 ጋጾ ጋካናስ  
 ካሚ ኦይኪደሰ።

9 አንቲኖ ካዎቲላቶ!  
 ኦላስ ደንዲዲ ዋሲቲ፤  
 አንቲ ዲፒ ጋና፤  
 ሃሆ ደሬን ዲዛይቲ ኤዘገቲ!  
 ኦላስካ ገጌቲቲ!  
 አንቲ ዲፒ ጋና፤  
 ኦላስካ ገጌቲቲ!  
 አንቲ ሜቄሬታና፤

10 ኦላስ ዞሬቲቲ፤  
 ገደ አቲን አንቲሰ ሱሬና፤  
 ሃልቾ ኬሲቲ፤  
 ገደ አቲን አንቲሰ ሚኔና።  
 ጋሶይካ ጾሳይ ኑናራ ደሰ።

#### ጎዳን አማኔቲስ

11 ጎዳይ ባ ሚኖ ኩሼ ታ ቦላ ዋሊዲ ታኒ ሃ አሳ ኦጌ ካሎንታ  
 ማላ ሴሪደሰ፤

12 «ሃይሲ አሳይ፥ «ኢታ ማቆ»  
 ገ ደይገዛ ሚሽ  
 አንቲ አይኮካ፥  
 «ኢታ ማቆ» ጎፒቲ፤  
 ኢሰቲ ባቢዛይሳስ አንቲ ባቦፍቲ፤  
 ኢዛስ ያርኪያርኮፍቲ።

13 አንቲ ዱማሳና ቤሲዛይ  
 ኡባፌ ዋልቃማ ጎዳ ጸላ፤  
 አንቲ ያያናሲኔ  
 ኮኮራናስ ቤሲዛይ ኢዛ።

14 ኢዚ ጌሻሶሆ ገዳና፤  
 ገደ አቲን ኢዚ  
 ዩሁዳ ቢታ አሳሲኔ

ኢስራኤል ከላ አሳሰ  
 ቆጶህ ሹቺኔ  
 ኩንዲሲዛ ዛላ ገዳና፤  
 ዩሩሳሌምን ዲዛ አሳሰ  
 እዚ ገብኔ ዋጸማዴ ገዳና።  
 15 እስታፌ ዳሮቲ ቆጶታና፤  
 ኩንዲዲካ ሜቃና፤  
 ዋጸማዴን  
 ጌሊ ኦይኬታና» ገደሰ።

16 ማርካቴላ ሎኤላ ኦይካ፤  
 ታ ታማሬታ ገደን  
 ዋጋ ማታሚን ሾጫ።

17 ታኒ ባ ሲንሐ ያቆቤ ዛሬታፔ  
 ጌንሒዳ ጎዳ ናጋና፤  
 ኢዛካ ሂዶታ ኦላና።

18 ታናኔ ታሰ ጎዳይ አሚዳ ናይታ ቤኢቲ። ኑኒ ጸዮን ዙማን  
 ዲዛ ኡባፌ ዋልቃማ ጎዳፔ ኢስራኤልስ ማላታኔ ማርካ።

19 አሳይ አንቴና፡ «ቤሶንታዝ ታታፌቲሼኔ ሳሰኬቲሼ ሃሳዬቲዛ  
 ቢቲዛይታኔ ዋይቲሌ ጸይገዛይታ ኦይቺቲ» ገሶ ዳሬይ ባ ጎዳ  
 ኦይቻናሰ ቤሴኔ? ዴኦ ጸሳ አገዲ ሃይቂዳይታ ኦይሾ አይሰ  
 ኮሺዜ?

20 ዋጋኮኔ ማርካቴላ ቃላኮ ቢቲ! ኢሰቲ ሃይሳ ማላ ቃላ  
 አንቴሰ ዮቶንታ አገሶ ዋንታ ፖኦይ ኢሰታሰ ፖኤና።

21 ኢሰቲ ጩጪሼኔ ጋፊሼ ቢታ ቦላ ቶይላታና፤ ኢሰቲ ኬሂ  
 ጋፊዳ ዋዴ ሃንቄታና፤ ፑዴ ጸሊዲ ባንታ ካዋኔ ባንታ ጸሳ  
 ቃንጋና።

22 ሄሳፌ ጉዬ ኢሰቲ ዱጌ ቢታ ጸላና፤ ኢሰቲ ጸላናይሲካ  
 ዋዬ፤ ቆማኔ ቋፒ ገዳ ባቢሲዛ ሚሽ ጸላ፤ ኢሰቲ ገርዲ ገዳ  
 ቆማን ዩጌታና።

## 9

### ሲንሳፌ ካዋታና ሳሮቴላ ካዋ

1 ጩጪሼ ዲዛይታሰ ሃይሳፌ ጉዬን ሂዶታይ ቆዩና፤ ቤኒ ዋዴ  
 ዛቢሎኔ ቢታኔ ኒፍታሌሚ ቢታ ካዉሺዴሰ፤ ሲንሳፌ ያና ዋዴን

ጊዲኮ ሜዲቴራኔ አባ ኦጌን ዴኢዛ ቢታኔ ዮርዳኖሴ ሻፋፔ ሄ  
ፒንሳን ዴኢዛ፤ «አይዛቤቲ ዴኢዛ ጋለላ ቢታ» ኢዚ ቦንቻና።

2 ዲማን ዴኢዛ ዴሬይ  
ዋልቃማ ፖኦ ቤኢዴሰ፤  
ሃይቆ ኩዋ ጋርሳን ዲዛ ዴሬታሰ  
ፖኦይ ፖኢዴሰ።

3 ኔኒ ካዎቴላ ዳርሳዳሳ፤  
ኢሰታሰ ኡፋይሳ ቦላ  
ኡፋይሰ ጉጃዳሳ፤  
አሳይ ካሐ ሺሺሺኔ  
ዲኢ ኤኪዳ ሚሽ ጊሼቲሽ  
ኡፋዬቲዛ ማላ  
ኢሰቲካ ኔ ሲንሳን ኡፋዬታና።

4 ካሴ ኔኒ ሚዲያማ ቢታ  
ጸኒዳ ማላ  
ኢሰታ ዴጺዛ ቃምባራ፤  
ኢሰታ ሃሼ ቦላ  
ዋዲዳ ዲርቃኔ  
ኢሰታ ዋዪሲ ሃሪዳ  
ጉፌ ሚንሳዳሳ።

5 አላንቻታ ጨማይ ኡባይ፤  
ሱላን ሞሬቲዳ  
ማይኦ ኡባይካ  
ታማን ዲኔ ጊዲ ኤጻና።

6 ሄኮ ኑሰ ናይ ዩሌቲዴሰ!  
አቱማ ናይካ ኑሰ ኢሜቲዴሰ!  
ሃላቃቴላ  
ኢዛ ሃሼ ቦላ ጊዳና፤  
ኢዛ ሱንላ፤  
«ማላሊሲዛ ዞራንቻ፤  
ዋልቃማ ጸሳ፤  
ሜርና አዋ፤  
ሳሮቴላ ሃላቃ» ጌቲታና።

7 ኢዛ ካዎቴላ አኮቴላሲኔ  
ኢዛ ሳሮቴላሰ ዛዋይ ዴና፤  
ሃቺፌ ደሚዲ  
ሜርና ጋካናሰ

ባ ካዎቹላ፥  
 ሱሬ ፒርዳኒኔ  
 ደሎቹላን ኤሳና፤  
 ሎኤሊ ኦይኪዲ ሚንላና፤  
 ዳዊቱ ካዎቹላ እራታን  
 ኢዚ ኡታና፤  
 ዴራ ኡባ ሃራና፤  
 ኡባፌ ዎልቃማ  
 ጎዳ ቃናቲይ  
 ሄሳ ፖላና።

- ኢሰራኤል ቦላ ጸሳ ሃንቆ  
 8 ጎዳይ ያቆቤ ዛሬታ ቦላ  
 ፒርዳ ቃላ ከቲዴሰ፤  
 ኢዚካ ኢሰራኤል ቦላ ፖሌታና።  
 9 ኤፍሬሜኒኔ ሳማሪያን ዴኢዛ  
 ዴሬ ኡባይ  
 ሄሳ ጸሲ ኦሊዳይሳ ኤራና፤  
 ኦቶሮኒኔ  
 ሞዴቹላን ዴንዲዲ፥  
 10 «ጸቤፔ ኦሴቲዳ  
 ጊምቤቲ ላሌቲዳ፤  
 ኑኒ ጊዲኮ  
 ማሴቲዳ ሹቻን  
 ዛሪ ጊምባና፤  
 ኤላቲ ቃንጾቲዳ፤  
 ኑኒ ጊዲኮ ኢሰታሶሆን  
 ዚጋ ላማና» ጊዳ።

- 11 ሄሳ ጊሻስ ጎዳይ  
 ኤራሶኔ ሞርኬታ ሚንላና፤  
 ኢሰታ ሞርኬታ ኢሰታ ቦላ  
 ዴንፊሊዲ ኤሃና።  
 12 ኦርሼይ ሞኪዛ ባጋፌ  
 አራሜ ቢታ አሳቲኔ  
 ኦርሼይ ዉሊዛ ባጋፌ  
 ፊሊሰጾሜ ቢታ አሳቲ  
 ባንታ ዶና ሃንጊዲ

ኢስራኤል ማታና።  
 ሄሲ ኡባይ ሃኒንካ  
 ጎዳ ሃንቆይ ኢርጸቤና፤  
 ኢዛ ኩሼይካ  
 ዴንዲዳሶፔ ሲሚቤና።

13 ዴሬዚ ጊዲኮ ባና ሾጪዳ  
 ጎዳኮ ሲሚቤና፤  
 ኡባሬ ዋልቃማ  
 ጎዳካ ኮዪቤና።

14 ሄሳ ጊሻስ  
 ጎዳይ ሁኤኔ ጎይና፤  
 ዛምባ ሃጋኔ ማቃ  
 ኢስራኤልፔ ኢሲ ጋላስ ቄጻና።

15 ጪማቲኔ ቦንቹቲዳይቲ ሁኤ፤  
 ዋርዶ ታማርሲዛ ናቤቲ ጎይና።

16 ሃይሳ ዴራ ካሌላዛይቲ  
 ባሌሌቲስ፤  
 ካሊዛ ዴሬይካ ኦጌፔ  
 ካሬ ኬዚዲ ቶይላቲስ።

17 ሄሳ ጊሻስ ጎዳይ  
 ናቲላ ናይታን ኡፋዬቴና፤  
 ዪኦታሲኔ  
 ኦምኢታስ ቃዴቴና፤  
 ኡባይካ ኢታ ኦሊዛይታኔ  
 ጸሳ ያሻቲላ ባይንዳይታ፤  
 ኡባ ኦሳ ዶናፔ  
 ሃራሲዛ ቃላይ ኬዜስ፤  
 ሄሲ ኡባይ ሃኒንካ  
 ጎዳ ሃንቆይ ኢርጸቤና፤  
 ኢዛ ኩሼይካ  
 ዴንዲዳሶፔ ሲሚቤና።

18 ዴራ ኢታቲሊ ኪንዲቾኔ  
 ኦጉንላ ጸጊዛ ታማ ማላ፤  
 ዲፒ ጊዳ ዋራይ ጸጌቲሺን  
 ኬዚዛ ጩዋ ቱሳ ማላ  
 ሲቲ ጊዲ ፑዴ ኬዜስ።

19 ኡባፌ ዋለቃማ ጎዳ ሃንቆን  
ቢታይ ጸጌታና፤  
ዴሬይካ ታማን ጌሊዛ  
ሚላ ማላ ጌዳና፤  
አሻይ አሻሰ ቃዴቲና።

20 ኡሻቻ ባጋራ ቱጻና፤  
ጌዶ አቲን ጋፋ ቱቄና።  
ሃዲርሳ ባጋራ ማና፤  
ጌዶ አቲን ካሌቲና።  
ኢሶይ ኢሶይ ባ ዬሊዳ  
ናይታ ማና።

21 ሚናሴይ ኤፍሬማ ማና፤  
ኤፍሬማይካ ሚናሴ ማና፤  
ኢሰቲ ኢሲፌ ጌዲዲ  
ዩሁዳ ቦላ ዴንዳና።

ሄሲ ኡባይ ሃኒንካ  
ጎዳ ሃንቆይ ኢርጺቤና፤  
ኢዛ ኩሼይካ ዴንዲዳሶፔ  
ሲሚቤና።

## 10

1 ጌላ ዋጋኔ  
አሰ ኡንኤሊዛ አዋጃ  
ኬሲዛይታሰ ኣዬ አና!  
2 ማንቆታ ፒርዳ ጌላሲዛይታሰ፥  
ኡንኤቲዳ ታ ዴሬዛ  
ፒርዳ ቦካሲዛይታሰ፥  
አሞኤታ አቆታ ቦንቂዛይታሰ፥  
ዪኦታ አቆታ ዴቺ ሚዛይታሰ  
ኣዬ አና!

3 ኢንቴና ጾሞሲዛ ዋዴ  
ኢንቴ አዋ ጌላንዴቲ?  
ሃኮፔ ባሺ ዪዛ ዋዴ  
ኣይ ሃናንዴቲ?  
ማዶ ዴማናሰ  
ኦናኮ ባቃታንዴቲ?  
ኢንቴ አቆታ አዋን ቆታንዴቲ?

4 ቃሼቲዳ አሳራ ኢሲፌ ቃሼቴላፌ

ሹኬቲዛ አሳራ ኢሲፌ  
 ሹኬቴላፌ አቲን  
 ሃራይ ኢንቴስ አታናሶይ ዴና።  
 ሄሲ ኡባይ ሃኒንካ  
 ጎዳ ሃንቆይ ዶቺቤና፤  
 ቃጸያናስ ኢዚ ባ ኩሼ  
 ዴንሊ ዋሊዴስ።

አሶሬ ቦላ ያና ጸሳ ፒርዳ

5 ጎዳይ፥ «ታ ሃንቆስ ጉፌ፥

ታ ኤሂዛ ባሻስ  
 ጸሞኦ ጊዲዳ አሶሬ ቢታ  
 አሳስ ኦዬ አና!

6 ኢስታ አቆታ ቦንቃና ማላ፥

ባንታስ ዲኦ  
 ቡሪ ሺሻና ማላ፥  
 ኢስቲ ኦጌ ኡርቃላ  
 ዬጄታና ማላ፥  
 ጸስ ኤሮንታ  
 ካዎቴላ ቦላ ኪታና።  
 ታና ሃንቄሊዳ አሳ ቦላ  
 ታኒ አሶሬታ ዬዳና።

7 ጊዶ አቲን አሶሬ ካዎይ

ሃይሳ ሃልቺቤና፤  
 ኢዛ ዋዚናን ሃይሳ ማላ  
 ቆፋይ ዴና፤

ኢዛ ሃልቾይ  
 ዳሮ ካዎቴላታ

ባሻናሲኔ  
 ሙሌራ ጳይሳናሳ።

8 ኢዚ፥ «ታ ኦላ ጋዳዋቲ ኡባቲ  
 ካዎ ጊዴቴኔ?» ጊ ጨቄቴስ።

9 «ካልኖይ ካርካሚሼ ማላ፥

ሃማቴይ ኢርፋዴ ማላ፥  
 ሳማሪያይካ  
 ዳማስቆ ማላ ጊዴቴኔ?

10 ዬሩሳላሜኒኔ

ሳማሪያን ደኢዛ  
ኤቃ ሚስሌታፔ  
ዳሪዛ ሚስሌታ ጎይኒዛ  
ካዎቴላታ ሴራናሰ  
ታኒ ታ ኩሼ ዩዳዲሰ።

- 11 ሳማሪያ ቦላኒኔ  
ኢዚ ሚስሌታ ቦላ  
ታ ኦሶይሳሶ ዩሩሳላሜ ቦላኔ  
ኢዚ ሚስሌታ ቦላ  
ታ ኦሊኪና? ጌሰ» ጊዴሰ።

12 ጎዳይ ጸዮኔ ዙማ ቦላኔ ዩሩሳላሜ ቦላ ባ ኦሳና ኦሶ ኡባ  
ፖሊዳፔ ጉዬ፥ «ኣሶሬ ካዎ ኢዛ ዎዚና ኦቶሬቴላ ጊሻሲኔ ኢዚ  
ካዴ ኣይፌን ጸሊዛ ጊሻሰ ታ ኢዛ ቃጸያና» ጌሰ።

- 13 ኣሶሬ ካዎይ፥  
«ሃይሳ ኡባ  
ታኒ ታ ሚኖ ቄሴን ኦሳዲሰ፤  
ቃሴካ ታኒ ኣጶ ኤራንቻኔ  
ኣኬካንቻ፤  
ታኒ ካዎቴላታ  
ዛዋ ላላዲሰ፤  
ታኒ ኢሰታ ኣቆታ ቦንቃ ኤካዲሰ፤  
ታ ቃራቴላን  
ኢሰታ ካዎታ ካዉሻዲሰ።

- 14 ኣሲ ባ ኩሼ ካፎ ኬላን ዩዳዲዛ ማላ  
ታኒካ ታ ኩሼ  
ካዎቴላታ ኣቆታን ዩዳዲሰ።  
ቃሴ ኣሲ ዶጌቲ ኣቲዳ  
ጵጵሌታ ሺሺዛ ማላ  
ታኒካ ዴሬ ኡባ ሺሻዲሰ።  
ፓላናሰ ባ ቄፌ  
ሚጨዳይ ዴና፤  
ዋሳናሰ ባ ዶና  
ዶይዳይ ዴና» ጊዴሰ።

- 15 ካልታይ ባናን  
ቃንጺዛዴ ቦላ ጨቄቲዜ?  
ማጋዜይ ባና  
ጎቺዛዴ ቦላ ኦቶሬቲዜ?

ጸምኣይ ባና ኦይኪዳ አሳ ቦላ  
 ባ ሁኤ ቃፋና ዳንዳይዜ?  
 ጉፊይ አሲ ባይንዳ ባርካ  
 ሄሜቲ ኤሪዜ?

- 16 ሄሳ ጊሻሰ ጎዳይ፥  
 ኡባፌ ዋልቃማ ጎዳይ፥  
 ሞቂዳ ኢዛ አላንቻታ ቦላ  
 ጌልቁሲዛ ሃርጌ ዬዳና፤  
 ኢዛ ቦንቸዛፔ ጋርሳራ  
 ላጨዛ ታማ ዬዳና።

- 17 ኢስራኤል ፖኦይ ታማ ጊዳና፤  
 ጌሻዚካ ታማ ላጮ ጊዳና፤  
 ኢሲ ጋላሳን ኢዛ አጉንፋኔ  
 ከንዲቸዛ ታማይ ማና።

- 18 ሃርጋንቻይ ጌልቁዲ  
 ሃይቂዛ ማላ  
 ባ ዋራ ቦንቸኔ  
 አራዳ ቢታ፥  
 አሾኔ ሼሞፖ  
 ሙሌራ ቆይሳና።

- 19 ኢዛ ዋራን ጉላ ሚላቲ  
 ጫሻ አታና፤  
 ሄይታካ ቁሪ ናይ  
 ቆዲ ዉርሳና ዳዳዬሰ።

ጫሻ አቲዳ ኢስራኤል ዛሬታ

- 20 ሄ ዋዴ ኢስራኤል ዛሬፔ  
 ጫሻ አቲዳይቲ፥  
 ያቆቤ ኬላፌ አቲዳይቲ  
 ሃይሳፌ ጉዬ ባንታና  
 ሾጨዳይታ ቦላ ዜምፔቴና፤  
 ጊዶ አቲን ጎዳን  
 ኢስራኤል ጌሻን  
 ቱማፔ አማኔታና።

- 21 ጫሻ አቲዳይቲ ሲማና፤  
 ያቆቤ ኬላፌ  
 ጫሻ አቲዳይቲ  
 ኡባፌ ዋልቃማ

- 22 ጸሳኮ ሲማና።  
 22 ኔኖ ኢስራኤል! ኔ አሳይ  
 አባ ሻሚንታ ማላ ጊዲኮካ  
 ጫሻ አቲዳይቲ ጸላ ሲማና።  
 ጸሎቴላን ኩሚዳ  
 ጌታ ባሺ አዋጄቲዴስ።
- 23 ኅዳይ፥ ኡባፌ ዋልቃማ  
 ኅዳይ ሳኦ ኡባ ቦላን  
 ኤሃና ቃቺዳ  
 ባሽ ኤሃና።
- አሶሬ ቦላ ያና ጸሳ ፒርዳ  
 24 ሄሳ ጊሻስ ኅዳይ፥ ኡባፌ ዋልቃማ ኅዳይ፥  
 «ጸዮኔን ዲዛ ታ ዴሬዞ!  
 ጌብጾቲ ኔ ቦላ  
 ኦሊዳይሳሶ  
 ጉፌ ኔ ቦላ ዴንሊዳይታ  
 ዱርቃን ኔና ቆጶዲ  
 አሶሬ አሳስ ባቦፋ።
- 25 ታ ኔ ቦላ ኤሂዳ ቂጻቴዛ  
 ጉላ ዋዴ ጋርሳን ታ ኤሳና፤  
 ታ ኢስታ ቦላካ  
 ቦሻ ኤሃና» ጌስ።
- 26 ኡባፌ ዋልቃማ ኅዳይ፥  
 «ሚዲያሜ አሳ  
 ሄሬቤ ዛላ አቻን  
 ሾጮይሳሶ  
 ኢዚ ኢስታ ዱርቃፌራ ዋዳና፤  
 ኢዚ ጌብጾታ ቦላ  
 ኦሊዳይሳሶ  
 ባ ጉፌዛ  
 አባ ቦላ ዴንላና።
- 27 ሄ ጋላስ ኢስታ ቶሆይ  
 ኔ ሃሼፔ፥  
 ኢስታ ቃሞባራይ  
 ኔ ሞርጌፌ ኪቻና፤

ኔ ኦርዴቴላፌ ዳንዲዳይሳን  
ኢዛ ቃምባራይ ሜቃና» ጌሰ።

ዋራጂዛይቲ ዩጌዳ ኦላ

- 28 ኢሰቲ ኣያቴራ ቢዲ  
ሚጌሮኔ ካንሒ ቤቴሰ፤  
ባሰ ዲዛ ሚሻ  
ማከማሰን ሺሼቴሰ።
- 29 ኢሰቲ ፒኒዛሶራ ኣጁ ቢዲ፥  
ኑኒ ጌባን ዱንካኒ ኣቃና፤  
ኤራማይ ዳጋማዱሰ፤  
ሳኦሌ ካታማ  
ጌቢኣይ ባቃታዱሰ።
- 30 ጋለሜ ናዬ ኔ ዋሳ!  
ላይሻ ኤዘጋ ሲያ!  
ማንቆ ጌዲዳ ኣናቶቴ፥  
ኔ ኢዚሰ ዛሮ ኢማ።
- 31 ማዲሜናሃ ባቃታ ቦላ ዳዉሰ፤  
ጌባ ዳሬይ ቆቴታና  
ዋላን ዳሰ።
- 32 ኢሰቲ ሃቶ ኖቤ ጋካና፤  
ኢሰቲ ባንታ ኩሽ  
ዩሩሳላሜ ዙምቡላ ቦላ፥  
ጸዮኔ ማጫ ናይ ዙማ ቦላ  
ጨቄቴላን ማንዳና።
- 33 ቤኢቲ ጎዳይ፥  
ኡባፌ ዋልቃማ ጎዳይ  
ባ ጌታ ዋልቃን  
ሃጋታ ቃንጾሬላና፤  
ኣዱሳ ሚላቲካ  
ሺሬቲ ዋላና፤  
ጶቄ ጶቄ  
ጌዳይቲካ ኩንዳና።
- 34 ጌርዲ ጌዳ ዋራካ  
ካልታራ ቄጻና፤  
ሊባኖሴ ዚጋቲካ  
ዋልቃማዛ ሲንላን ኩንዳና።

## 11

## ሳሮቴሌ ኩሚዳ ካዎቴሉ

- 1 ኢሴዬ ዱሩማፔ  
 አጫይ ፑርጫና፤  
 ኢዛ ጸጸታፔ  
 ኢሲ ሃጋይ አይፌ አማና።
- 2 ጎዳ አያናይ፥  
 አጽ ኤራቴሌኔ  
 አኬካ አያናይ፥ ዞሬ አያናይኔ  
 ዎልቃ አያናይ፥  
 ኤራቴላ አያናይኔ  
 ጎዳስ ያሺሲዛ አያናይ  
 ኢዛ ቦላ ሸምፓና።
- 3 ጎዳስ ያሻን ኢዚ ኡፋዬታና፤  
 ባ አይፌን ቤኢዳ ማላኔ  
 ባ ሃይላን  
 ሲዪዳ ማላ ፒርዳና።
- 4 ጊዶ አቲን ሂዬሳታስ  
 ጸሎ ፒርዳና፤  
 ሳኦ ቦላ ማንቆታስ  
 ሱሬ ፒርዳና፤  
 ባ ኢንጸርሳ ጸምኦን  
 ሳኦ ሸጫና፤  
 ባ ዶና ፔኖን  
 ኢታታ ዎቆና።
- 5 ጸሎቴሌ ኢዛስ  
 ጾሳ ዳንጮ ጊዳና፤  
 አማኔቴላይ ኢዛስ  
 ዳባላ ዳንጮ ጊዳና።
- 6 ካና ሱይቴይ ዶርሳ ላቃራ  
 ኢሲፌ ዳና፤  
 ማሄይካ ዴይሻ ላቃራ  
 ኢሲፌ ኢቻና፤  
 ሚዛ ማሪ፥ ጋሞ ማሪኔ  
 ሞጽ ሜሄይ  
 ኢሲፌ ሄሚታና፤

- ጉላ ናይ ኢስታ ሄማና።  
 7 ሚዚኔ ዛርዶይ ኢሲፌ ሄማታና፤  
     ኢስታ ማራቲካ ኢሲፌ ኢቻና፤  
     ጋሞይ ቦራ ማላ ሃፓ ማና።  
 8 ቆሚዛ ናይ  
     ኢታ ሾሻ ኦላን ካኣና፤  
     ቆንሐ ዱሶንታ ናይ  
     ባ ኩሼ ጎፔ ሾሻ  
     ኦላን ዬዳና።  
 9 ጌሺ ጊዲዳ  
     ታ ዙማ ቦላ ቆሄቴና  
     ዎይኮ ኦኒካ ቆዬና፤  
     ሃሊ ኣባ ኩሚዛ ማላ  
     ሳኣ ኡባይ ጎዳ ኤሮን ኩማና።

## ዲኤቲ ቢዳይታ ሲሞ

- 10 ሄ ዎዶ ኢሴዬ ዜሬሊ ካዎቲላታስ ማላታ ጊዲ ኤቃና፤  
 ካዎቲላቲ ኢዛኮ ያና፤ ኢዛ ሽምፖሶይ ቦንቼታና።  
 11 ሄ ዎዶ ጎዳይ ናሞኣንሶ ባ ኩሼ ሚጪዲ ኣቲዳ ኣሳ ኣሶሬፔ፤  
 ፑዴሃ ገብጾፔ፤ ዱጌሃ ገብጾፔ፤ ቶጵያፔ፤ ኤላሜፔ፤ ሳናኦሬፔ፤  
 ሃማቴፔ ኣባ ጋጸን ዲዛ ዳሬታፔ ሺሻና።  
 12 ካዎቲላታስ ማላታ ኤሳና፤  
     ቶቁ ኦሊዲ ዳንሳና፤  
     ኢሰራኤሌፔ ጎዴቲ ቢዳይታ  
     ዛሪ ኤሃና፤  
     ላሌቲዳ ዩሁዳ ኣሳ  
     ኦይዱ ባጋ ቢታ ጋጸፔ  
     ኢዚ ሺሻና።  
 13 ኤፍሬሜ ቃናቴቴሊ ኤቃና፤  
     ዩሁዳ ሞርኬቲካ  
     ቃንጾታና፤  
     ኤፍሬሜይ ዩሁዳ ቦላ  
     ቃናቴና፤  
     ዩሁዳይካ ኤፍሬሜ ኢጾና።  
 14 ኢስቲ ኣርሼይ ዉሊዛ ባጋራ  
     ፊሊስጾሜታ ዱጉንሳ  
     ዎቆና፤

- ናምአይካ ኢሲፌ ጊዲዲ  
 እርሼይ ሞኪዛ ዴሬዛ ቦንቃና፤  
 ኢስቲ ኤዶሜ ቦላኔ  
 ሞአቤ ቦላ  
 ባንታ ኩሼ ዳንፋና፤  
 አሞኔ አሳይ ኢስታስ ሃሬታና።
- 15 ጎዳይ ኢታ ጫርኮን  
 ጊብጼ አባ ሜሊሳና፤  
 ኢዚ ባ ኩሼ ኤፊራዲሴ  
 ሻፋ ቦላ ዬዳና፤  
 ላፑን ኬሲ  
 ሻኬሬሊ ዬጋና፤  
 ሄሳ ገሻሰ  
 አሳይ ቶሆፔ ጫማ  
 ኬሶንታ ፒናና።
- 16 ካሴ ኢሰራኤሌይ ጊብጼፔ  
 ኬዚሺን ሃኒዳይሳሉ  
 አሶሬን አቲዳ አሳይ  
 ኬዛና ኦጌ ኢስታስ ገረሳና።

## 12

### ሳባ ማዛመራ

- 1 ሄ ዎዴ ኔኒ፥  
 «አቤት ጎዳው፥  
 ካሴ ኔ ታ ቦላ ሃንቄታዳሳ፤  
 ሃኢ ጊዲኮ ኔኒ  
 ኔ ሃንቆዛፔ ሲማዳ  
 ታና ሚንፌሊዳ ገሻሰ  
 ታ ኔና ሳባይሰ።
- 2 ‹ቤኢቴ፥ ጸሳይ ታ አቶቴላ፤  
 ታኒ ኢዛን አማኔቲዛ  
 ገሻሰ ባቢኬ፤  
 ጎዳይ፥ ጸሳይ ታስ  
 ሚኖቴሊኔ ዬላ፤  
 ታ አቶቴላይ ኢዛ፥ ጋንዳሳ።
- 3 ፓሊዛ ታ ፑልቶታፔ

- ሃል ኡፋይሳን ዲቃንዴታ።  
 4 ሄ ዎዴ ኢንቲ ጎዳ ጋላቲቲ!  
     ኢዛ ሱንፋካ ጾይጊቲ።  
     ኢዚ ኦሊዳይሳ ካዎቲፋታ  
         ጊዶን ኤሪሲቲ።  
     ኢዛ ሱንፋይ ቶቁ ቶቁ  
         ጊዳይሳ አዋጂቲ።  
 5 ጎዳይ ጊታ ኦሶ  
     ኦሊዳ ጊሻሰ  
     ኢዛሰ ዩጺቲ።  
     ሄሲ ኩሜላ አላሚሰ ኤሬቶ።  
 6 ኢንቲ ጊዶን ዲዛ ኢሰራኤሌ  
     ጌሻይ ጊታ ጊዲዳ ጊሻሰ  
     ጸዮኔ አሳዉ ኢሊሊ ጊቲ፤  
         ኡፋይሳንካ ዩጺቲ» ጋንዴታ።

## 13

### ባቢሎኔ ቦላ ዮቲቲዳ ቲንቢቲ

- 1 አዎጾ ና ኢሳያሳስ ጎዳይ ባቢሎኔ ጊሻሰ ቆንጨሲን ኢዚ  
 ቤኢዳይሲ ሃይሳፌ ካሊዛይሳ፤  
 2 አይኮይ ባይንዳ ሜላ ዲዛ  
     ዙዎቡላ ቦላ ማላታ ኤሲቲ፤  
     ኢንቲ ቃላ ቶቁ  
     ሂሰቲ ዋሲቲ፤  
     ኢሰታ ሹሜታ ፔንጌራ  
     ጌላና ማላ ማላታ ቤሲቲ።  
 3 ታ ጸኖን ኡፋዬቲዛይታ  
     ታ ጌሻታ አዛዛዲሰ፤  
         ታ ሃንቆ ኢሰቲ ፖላና ማላ  
         ታ ኦላንቻታ ጾይጋዲሰ።  
 4 ዳር ዴሬይ ዎጫሚዛ ማላ  
     ዙማታ ቦላ ዎጫሚዛ  
         ዎጫማ ሲደቲ!  
     ካዎቲፋታ ጊዶን  
     ሜቶቲዳ ዴሬይ  
     ጉጉሚዛ ጉጉንፋ ሲደቲ!

- ኡባፌ ዋልቃማ  
 ጎዳይ ኦላንቻታ  
 ኦላስ ሳልፊሲዴስ።  
 5 ጎዳይኔ ኢዚ ባ ሃንቆ ፖሊሳናስ  
 ጎኤቲዛ ሚሻቲ  
 ቢታ ኡባ ቆይሳናስ  
 ሃሆ ቢታፌ  
 ሳሎታ ጋጸፔ ዪዳ።  
 6 ጎዳ ጋላሲ  
 ማቲዳ ጊሻስ ዬኪቲ!  
 ሄ ጋላስ ኡባ ዳንዳይዛ  
 ጸሳ ማታፔ ባሺ ያና።  
 7 ሄሳ ጊሻስ ኩሼ ኡባይ ሲላና፤  
 ኦሳ ኡባ ዋዚናይካ ሴራና።  
 8 ኢስቲ ሺሮታና፤  
 ኢስታ ዋዬይኔ ሜቶይ ጋካና፤  
 ሚጸይ ኦይኪዳ ማጫሳ ማላ  
 ኢስቲ ሚጸታና፤  
 ኢሶይ አሳራ ዳጋማን ጸሌታና፤  
 ኢስታ አይፌሶይ ዳጋማን  
 ሻላ ማይኢዴስ።  
 9 ቤኢቲ ጎዳ ጋላሳይ ሜንጾ ኢታ፤  
 ቢታ ሜላ አሻናስ  
 ኢዚን ዲዛ ናጋራንቻታ  
 ቆይሳናስ ባሻራኔ  
 ጌታ ሃንቆራ ያና።  
 10 ሳሎ ጸሊንቲቲኔ  
 ኢስታ ቡቴቲ ፖኦ ኢሜቴና፤  
 ኦርሼይ ቡሮ  
 ሞኪዳ ማላ ቋማና፤  
 ኦጊናይካ ባ ፖኦ ኢሙኩ።  
 11 ጎዳይ፥ «ታኒ አላሜ  
 ኢዚ ኢታቴላ ጊሻስ  
 ቃጸያና፤  
 ኢታታካ ኢስታ

- ናጋራ ጊሻስ ቃጸያና።  
 ታኒ ኦቶራንቻታ  
 ኦቶሬቴል ሻራና፤  
 ሜንጾ ኢታታ ኦቶሬቴል  
 ታ ካዉሻና።
- 12 አቲዳ አሳቲ ሙሩታ  
 ዋርቃፌ ቦላራ አልኦ ጊዳና፤  
 ኦፊሬ ዋርቃፌካ አልኦ ጊዳና።
- 13 ሄሳ ጊሻስ ታኒ ኡባፌ  
 ዋልቃማ ጎዳይ፤  
 ነታኒ ታ ሃንቆ ቆንጨሲዚ ዋዴ  
 ሳሎ ቃላና፤  
 ሳኣካ ኢዚ ዴኢዛሶን  
 ኮኮርሳና ጌሰ።
- 14 ሻንካቲዛዴፌ  
 ባቃቲዛ ጌኔሳ ማላ፤  
 ሄሚዛዴይ ባይንዳ  
 ዶርሳ ዉዴ ማላ፤  
 አሲ ኡባይ  
 ባ አሳኮ አሳኮ ሲማና፤  
 ኢሶይ ኢሶይ ባ ዴሬ ባቃታና።
- 15 ዲኤቲዳ ኡባይ ጫዴታና፤  
 ኦይኬቲዳ ኡባይ  
 ማሻን ሃይቃና።
- 16 ኢሰታ አይፌይ ቤኢሺን  
 ኢሰታ ናይታ ቡሳካና፤  
 ኢሰታ ኬሳቲካ ቦንቄታና፤  
 ኢሰታ ማቹታካ  
 ሃራይ ጋይታና» ጌሰ።
- 17 ቤኢቲ፥ ቢራሰ ዉዴ ጎንታይታ፤  
 ዋርቃንካ ኡፋዬቶንታይታ  
 ሜዶኔ ዴሬ አሳ  
 ታ ኢሰታ ቦላ ዴንላና።
- 18 ኢሰታ ዋንዳፌቲ ዋዳላታ ዉርሳና፤  
 ቄሪ ናይታካ ማሬቴና፤  
 ኢሰታ ዋዚናይካ  
 ናይታሰ ሚሼቴና።

- 19 ካዎቴላታስ ቦንቾ፥  
 ካላዳዌታስ  
 ጩቆ ጊዲዳ ባቢሎኔ  
 ጎዳይ ሶዶሜ ማላኔ  
 ጋሞራ ማላ ኢዞ ሺሪ ዩጋና።
- 20 ሄ ቢታን ሙሉካ አሲ ዴኤና፤  
 አዚን ኡቲዛ አሲካ ዴና፤  
 አራቤ አሲካ ሄን  
 ባ ዱንካኔ ቶኬና፤  
 ሜሄ ሄሚዛይቲካ  
 ባንታ ዉዴ  
 ሄን ሺምፒሴቴና።
- 21 ጊዶ አቲን ባዞ ዶአቲ  
 ሄን ኢቻና፤  
 አዚ ኬላን ዎራካናቲ ኩማና፤  
 ሄን ጉቶቲ ዴአና፤  
 ባዞን ዴይሽ ሚሳቲዛ  
 ዳይዳንሳቲ  
 አዚ ቦላ ጉፓና።
- 22 አዚ ሚጸን ጎዳሬቲ ዋሳና፤  
 ሎኢዛ አዚ ካዎቴላ  
 ኬላንካ  
 ዎራካናቲ ዋሳና፤  
 አዚ ዎዴይ ማቲዴሰ፤  
 አዚ ጋላሳይካ አዲቄና።

## 14

- ዲኤቴላፌ ኢሰራኤሌ አሳ ሲሞ
- 1 ጎዳይ ያቆቤሰ  
 ናሞአንሶ ቃጴታና፤  
 ኢሰራኤሌካ  
 ዛሬሲዲ ዶራና።  
 አሰታ አሰታ ቢታን ዎላና፤  
 አማላቲ ዪዲ ያቆቤሶ  
 አሳራ ዋላኬታና።
- 2 ካዎቴላቲ ኤፊዲ

ኢስታ ኢስታ ቢታ ዛራና።  
 ኢስራኤል አሳይ ካዎቱላታ  
 ባስ ኦይኪዲ  
 ማጫሳኔ አቱማሳ  
 አይሌ ሂስቲዲ  
 ጎዳ ቢታን ሃራና።  
 ባና ዲኢዲይታ ዛሪ ዲአና፤  
 ባና ኡንኤሊዲይታ  
 ዛሪዲ ሃራና።

ባቢሎን ካዎይ ሃይቂዲይታ ቦላ ጉጃቴል

3 ጎዳይ አንቴና አንቴ ዋዬ፤

ሜቶፔኔ ኡንኤቴላፊኔ  
 ኢታ አይሌቴላፊ  
 ኔና ሼምፒሲዳ ጋላሲ፤

4 አንቴ ባቢሎን ካዎ ቦላ  
 ቂልጪሽ፤ «ኡንኤሊዲይሳስ  
 ዋዴይ ዋኒ ወሪዴ?

ኢዛስ ጊሪሲዛይሲ ዋኒ ኤቂዴ!

5 ጎዳይ ኢታ ጸምኣኔ  
 ሃሪዛይታ ካዎቱላ  
 ጉፊ ሜንሊዴስ።

6 ካዎቱላታ  
 ፓጩይ ባይንዳ ሾጪዲይሳ  
 ቃጴታይ ባይንዳ ጎዲ ጎዲ  
 ቆጶዲይሳ ሜንሊዴስ።

7 ቢታያ ሳርኔ  
 ሼምፖ ዴማዴስ፤  
 ኡፋይሳ ማዛመሬ ዬጸዉስ።

8 ሃራይ አቲን ዚጋቲካ፤  
 ሊባኖሴ ጸዳቲካ  
 ኡፋዬቲዳ፤  
 ኔካ ኩንዳዳ፤  
 ሚል ቃንጸዛዴይካ ሃይሳፊ ጉዬ  
 ካልታ ኑ ቦላ ዴንፎና።

9 «ኔኒ ዪዛ ዋዴ ሲኦሌይ  
 ኔና ሞካናስ ጊኔታዲስ፤  
 ኔና ሞኪ ኤካና ማላ

ሞይቲሌታ፥  
 አላሜ ቦላ ዳሬ ሃሪዛይታ  
 ኡባታ ዴንፌላዲስ፤  
 ቃሴ ካዎቴላታ ቦላ  
 ካዎቲዳ ካዎታ  
 ኢስታ አራታፔ  
 ዴንላ ኤሳዲስ።

- 10 ኢስቲ ኔስ፥  
 ሳካ ኑ ማላ ዳቡራዳሳ፤  
 ኑ ማላካ ጊዳዳሳ።
- 11 ኔ ቦንቾይ ዲላ ጊሪሳራ  
 ዲጌ ስኦሌ ዎዲዴስ፤  
 ባዳቲ ኔስ ጋርሳራ ሂጾቲዳ፤  
 ጉጹኔቲ ኔስ ቦላራ  
 ማይኦ ጊዳና ጋና» ጌታ።

- 12 ኔኖ ዎንታ ናዘ፥  
 ቶሮጄ ጸለንቴዘ፥  
 ኔ ዋናዳ  
 ሳሎፔ ዲጌ ኩንዳዲ?  
 ካዎቴላታ ካዉሺዳ  
 ኔኔ ዋናዳ ዲጌ ዬጌታዲ!

- 13 ኔኔ ኔ ዎዚናን፥  
 «ታኒ ፑዴ ሳሎ ኬዘና፤  
 ታ ካዎቴላ አራታካ  
 ጸሳ ጸለንቴታፔ ቦላራ  
 ቶቃን ዎላና፤  
 ዙማ ቦላ ሸቂዘሶን  
 አንጄቲዳ ዙማ ቦላ  
 ቶቃሶሆን  
 ታ ካዎቴላ  
 አራታ ቦላ ኡታና።

- 14 ታኒ ቫራቲ ዲዛ ቶቃሶሆፔካ  
 ፑዴ አሳና፤  
 ታኒ ታና ኡባፌ  
 ቶቃ ጸሳ ማላ  
 ኦላና» ጋዳሳ።

- 15 ጊደ ኣቲን ኔኒ ሲኦሌን  
ዱጌ ጨማ ኦላን ዩጌታዳሳ።
- 16 ኔና በኢዛይቲ ኡባይ  
ቲሺ ሂሰቲ ጸሊዲ  
ኔና፥ «ቢታ ቃሊዳይሲኔ  
ካዎቲላታ  
ኮኮሪሲዳይሲ ሃይሴ?»
- 17 ሳኣ ባዞ ኬሲዳይሲ፥  
ካታማታካ ላሊዳይ፥  
ዲኤቲዳይቲ ባ ዳሬ  
ሲሚ ቦንታ ማላ  
ዲጊዳይ ሃይሴ?» ጋና።
- 18 ካዎቲላታ ካዎቲ ኡባይ  
ቦንቾን ጳሰኪዳ፤  
ባ ዲፎን ዲፎን ሸምፒዳ።
- 19 ኔ ጊዲኮ ኮዬቶንታ ሃጋ ማላ  
ዲፎፔ ዋራ ኦሌታዳሳ፤  
ማሻን ጫዴቲዳይታን፥  
ዱጌ ጨማ ሹቻ  
ኦላን ዎጲዳይታን፥  
ኣሳ ኩሼን ሃይቂዳይታን  
ካሜታዳሳ፤  
ኔኒ ቶሆን ዩጴቲዳ  
ኣሃ ማላ ጊዳዳሳ።
- 20 ኔኒ ኢሰታራ ዲፎን ዳካ፤  
ጋሶይካ ኔ ቢታ  
ባሻዳሳ፤  
ኔ ዳሬዛ ኔ ጳይሳዳሳ፤  
ኢታ ኦሊዛይታ ዜሬሊ  
ሙሌካ ኣኬኬቴና።
- 21 ኢሰቲ ዳንዲዲ  
ቢታ ላቶንታ ማላ፥  
ኣላሜን ባ ካታማ  
ኢሰቲ ኩንሶንታ ማላ  
ካሴ ኢሰታ ኣዋታ ናጋራ ጋሶን

እቱማ ናይቲ  
ሲፌታናሶሆ ገግሲቲ።

- 22 ኡባፌ ዋልቃማ ጎዳይ፥  
«ታኒ ኢስታ ቦላ ዴንዳና፤  
ሂስታዳ ኢስታ ሱንላ፥  
ኢስታፌ ኣቲዳይታ፥  
ኢስታ ዜሬላኔ  
ዩሌታ ባቢሎኔፔ ዳይሳና።
- 23 ታኒ ባቢሎኔ ቁጻርሳ ኣቆሶኔ  
ጫሬ ኬሳና፤  
ባሻ ፔይጸን ታኒ ኢዞ  
ፒታ ዳይሳና» ጌሰ።

አሶሬ ቦላ ዮቴቲዳ ቲንቢቲ

- 24 ኡባፌ ዋልቃማ ጎዳይ፥  
«ታኒ ሃልቺዳ ማላ ፖሌታና፤  
ታ ቆፒዳ ማላካ ሃናና።
- 25 ታኒ አሶሬ ታ ቢታ ቦላ ሊቂሳና፤  
ታኒ ኢዞ  
ታ ዙማ ቦላ ዩዳና፤  
ኢዞ ቃምባራይ  
ታ ዴሬዛ ቦላፌ ዴንዳና፤  
ኢዞ ቶሆይካ  
ኢስታ ሃሼፔ ኪቻና»  
ጊ ጫቂዴሰ።
- 26 ሳኣ ኡባሰ ቆፌቲዳ  
ቆፋይ ሃይሳ፤  
ካዋቴላታ ኡባ ቦላን  
ሚጩቲዳ ኩሼይ ሃይሳ።
- 27 ኡባፌ ዋልቃማ ጎዳይ  
ሃይሳ ቆፒዴሰ፤  
ሄሳ ኢዞ ኦኔ ዲጋናይ?  
ኢዚ ባ ኩሼ ዴንሒዴሰ፤  
ሄሳ ዛራናይ ኦኔ?

ፊሊስጶሜታ ቦላ ዮቴቲዳ ቲንቢቲ

- 28 ካዎ አካዜይ ሃይቂዳ ላይሰ ሂዝጊዛ ቃላይ ዪዴስ፤
- 29 ኢንቴኖ ፊሊሰጾሜ አሳቶ፥  
 ኢንቴና ሾጪዳ ጉፊይ  
 ሜቂዳ ገሻሰ  
 ኡባቲ ኡፋዬቶፍቴ፤  
 ሾሻ ጋርሳፊ  
 ሃሶ ሾሺ ኬዛና፤  
 ኢዛ ዜሬሊካ  
 ጸንጌቲዛ ማርዜራ  
 ዲዛ ሃሶ ሾሽ ጊዳና።
- 30 ፑቴሳ ማንቆቲ  
 ዲሳሶ ዴማና፤  
 ሜቶታንቻቲ  
 ዎፑ ጊዲ ኢቻና።  
 ጊዶ አቲን ታኒ ኔ ዛሬ  
 ኮሻን ወርሳና፤  
 ቃሴ ኔፔ አቲዳይታካ  
 ዲፒ ሂስታና።
- 31 «ኔኖ ፔንጌዞ! ዉ! ዉይ ጋ፤  
 ኔኖ ካታማዞ! ዋሳ፤  
 ኢንቴኖ ፊሊሰጾሜ አሳቶ!  
 ኢንቴ ኡባይካ ሂርጋን ሴሪቴ!  
 ጋሶይካ ፑዴሃ ባጋፊ  
 ጩዋይ ኢንቴ ቦላ ዪዴስ፤  
 ሄ ጪፍራፔ  
 ዲጺ አታናይ ዳና።
- 32 ሄ ካዎቴላታፔ  
 ኪቴቲ ዪዛ ቃስታኔታስ  
 አይ ጊ ዛራኔ?  
 ሳዳይ ጺዮኔ  
 ሚንሳ ኤሲዴስ፤  
 ዋዬ ኤኪዳ ዴሬይ  
 ኢዚ ጋርሳን ሾምፖሶ  
 ዴሚዴስ፡ ጊ ዛሮ።»

## 15

ሞአቤ ቦላ የቴቲዳ ቲንቢቲ

- 1 ሞአቤ ቢታ ገሻስ ጎዳይ የቴዳ ቃላይ ሃይሳ፤  
 ቂሬ-ሞአቤን ዲዛ  
 ኤሬያ ላሌታዱስ፤  
 ኢሲ ጋላሳ አማርሳን ዲፒ ጋዱስ፤  
 ቃሴ ቂሬ-ሞአቤን ዲዛ  
 ቂሬያ ላሌታዱስ፤  
 ኢሲ ጋላሳ አማርስ ዲፒ ጋዱስ።
- 2 ዲቦኔ አሳይ ጸሳ ከሐ ከዚዳስ፤  
 ዩካናስ ፑዴ  
 ዙሞቡላታ ቦላ ከዚዳስ፤  
 ሞአቤ አሳይ ኔቦ ገሻሲኔ  
 ሜዳባ ገሻስ ዋሴስ፤  
 ሁኤይኔ ቡቻይ  
 ሚልጺ ገ ሜዳቲዳስ።
- 3 ኦጌይ ዲዛሶ ኡባን  
 ማቃ ማይኤቴስ፤  
 ፖቂታ ቦላኒኔ  
 ዳባባይ ዲዛሶን ዩኤቴስ፤  
 አፋንሐ ጉሴቴስ።
- 4 ሃሴቦኔይኔ ኤልኤሌይ ዋሲዳ፤  
 ኢስታ ዋሶይካ  
 ያሃጼ ጋካናስ ሴቴቴዳስ።  
 ሄሳ ገሻስ  
 ሞአቤ ኦላንቻቲ ዋሲዳ፤  
 ኢስታ ዋዚናይካ ኮኮሪዳስ።
- 5 ታ ዋዚናይ ሞአቤ  
 ገሻስ ዩከዳስ፤  
 ኢዚፔ ጎዳቲዳ አሳቲ  
 ዞኦሬ ጋካናስ፤  
 ኤገላቴ-ሻሊሺያ  
 ጋካናስ ባቃቲዳ፤  
 ኢስቲ አፋንሐ ጉሲሺ  
 ፑዴ ሉሂቴ ከዚዳ፤  
 ቃሴ ሆሮናይሜ

- ኤፌዛ ኦጌራ ቢሼ  
 ባንቲ ጳያናይሳስ ዋሲዳ።
- 6 ኒሚሪሜ ሃላቲ ሚጪዳ፤  
 ማታይ ሹሊዴስ፤  
 ጫሬቻይካ ጳይዴስ፤  
 ጨለላ ሚሺካ ቤቴና።
- 7 ሄሳ ጊሻስ  
 ኢስቲ ሃሪዳ አቆታኔ  
 ኢስቲ ሺሺዳ ሃሮ  
 አሃያ ሻፋ  
 ቶኪ ፒንፔቴስ።
- 8 ኢስታ ዋሶይ  
 ሞአቤ ዛዋ  
 ጋካናስ ሴቴቴስ፤  
 ኢስታ ዋሶይ ኤጊላይሜ ጋካናስ  
 ኢስታ ዚላሳይካ  
 ቢኤሪ-ኤሊሜ ጋኬስ።
- 9 ዲሞና ሻፋቲ  
 ሱላን ኩሚዳ፤  
 ጊዲኮካ ታኒ ዲሞና ቦላ  
 ሄሳፌ አጂዛዝ ኤሃና።  
 ሞአቤፔ ባቃቲዛይታ ቦላ  
 ቢታይን ጫሻ አቲዳይታ ቦላ  
 ጋሞ ዬዳና።

## 16

- ሞአቤስ ሂደታ ጳዮ
- 1 ባዞ ቢታፌ ሄ ፒንላን ዲዛ ሴላፔ  
 ጸዮኔ ማጫ ናይ ዙማን  
 ዴራ ሃሪዛይሳስ  
 ዶርሳ ላቃ ዬዲቴ።
- 2 ባንታ ኬላፌ ጎዴቲዲ  
 ዋዬቲዛ ካፎታ ማላ  
 ሞአቤ ማጫሳቲ  
 አርኖኔ ሻፋ ፑርዴን  
 ሄሳሶ ሃናና።
- 3 ሞአቤ አሳይ ዩሁዳ አሳስ፥  
 «ኑስ ዞሬ ኢሚቴ፤

ኑስ ፒርዲቲ፤  
 ሴታ ጋላስ ኢንቲ ኤሾን  
 ኦማርሳ ቋማ ማላ  
 ኑና ካማቲ።  
 ባቃቲዳይታ ቆቲቲ፤  
 ጎዴቲዳይታካ  
 አሊ አሞፍቲ።

4 ሞአቤፔ ጎዴቲዳይቲ  
 ኢንቲኮን ታኬቶ፤  
 ኢስታ ዳይሲዛይታፔ  
 ኢስቲ ቆቲቲ  
 አቲዛሶሆ ጊዲቲ» ጌሰ።

ኡንኤሊዛይሳስ ወርሴሊ ያና፤  
 ባሺ አታና፤

ኦቶራንቻይ  
 ቢታ ቦላፌ ዳያና።

5 አራታይ ሲቆን ማኔስ፤  
 ሄ አራታን  
 ዳዊቲ ከላፌ ጊዲዳይ፥  
 ሱሬ ፒርዳ አሞቲዛይ፥  
 ዲሎቴላ ኤሶሲዛይ  
 ኢሲ አሲ አማኔቴላን  
 ኢዛ ቦላ ኡታና።

6 ዩሁዳ አሳይ፥ «ሞአቤታ ሃላጫ፥  
 ኦቶሬቴላኔ ሞዴቴላ፥  
 ጨቁቴላኔ  
 ካዴዛ ሲዪዶስ፤  
 ጊዶ አቲን ኢስታ ኦቶሬቴሊ  
 ሃዳ» ጋና።

7 ሄሳ ጊሻስ ሞአቤቲ ዋሳና፤  
 ኢሲ ቦላ ሞአቤስ ዬካና፤  
 ቂሬ-ሄሬሴቴ ካታማ  
 አሳ ጊሻስ  
 ዩሺ ቆፒዲ  
 ካዮቲሺ ዬካና።

8 ሃሴቦኔ ጎሻ ጋዴቲ

- ሴባማ ዋይኔ  
 ሚላቲ ሹሊዳ፤  
 ካዋቱላታ ሃሪዛይቲ  
 ኢያዜሪ ኣጲ ቢዲ  
 ባዘ ቢታ ካንሊዲ  
 ባንታ ጸጸ  
 ኣባ ጋካናስ ዬዲዳይታ  
 ዶሪቲዳ ዋይኔ ሚላታ  
 ዬጴቲዳ።
- 9 ሴባማ ዋይኔ ሚላ ጊሻስ  
 ኢያዜሪ ዩኪዛ ማላ  
 ታኒካ ዩካይስ፤  
 ሃሴቦኔ! ኤልኤሌ!  
 ታኒ ታ ኣፋንላን  
 ኢንቴና ሎጺኪሳይስ።  
 ጋሶይካ ኢንቴስ ሚላ ኣይፊቲ  
 ጋኪዳ ዋዴ ዲዛ ሆምቦጫይኔ  
 ካል ሺሺዛ ዋዴ ዲዛ  
 ኡፋይሲ ኣቲዴስ።
- 10 ኡፋይሳይኔ ኢሊሊሳይ  
 ኔ ኣታኪልቲይ  
 ዲዛሶፔ ኪቺዴስ፤  
 ዋይኔ ቶኪዛሶሆን ዩጺዛ  
 ዩላይ ዴና፤  
 ኢሊሲካ ኣቲዴስ።  
 ዋይኔ ቲራ  
 ጉምኢዛሶሆይ ዴና፤  
 ጉምኢዛይታ ሆምቦጫካ  
 ታ ጳይሳዲስ።
- 11 ሄሳ ጊሻስ ታ ዋዚናይ  
 ሞኣቤ ጊሻስ  
 ቃጴታ ሚላስ ሲሳዉስ፤  
 ቂራ-ሄራሴታ ጊሻስ  
 ታ ማራጨያ ዩካዉስ።
- 12 ሞኣቤይ ፑዴ  
 ባ ዙምቡላ ቦላ ኬዚኮካ  
 ዴቡራ ጸላ፤  
 ኢዛ ዋሳስ

ባ ኤቃ ከሐ ጌሊኮካ  
ጎኣይ ዳና።

13 ጎዳይ ሞክሮ ገሻሰ ካሴቲ ዮቲዳ ቃላይ ሃይሳ።

14 ሃኢ ጌዲኮ ጎዳይ፥ ቃጸሬቲ ኦሊዛ ኦሳንቻይ ጋላሰ ቆዲዛ  
ማላ ሞክሮ ቦንቸይኔ ኦሳ ጮራቴላይ ሄዙ ላይላ ጊዶን ካዉያና፤  
ሄን ኦቲዳ ኦሳቲ ጉላታኔ ዋልቃይ ባይንዳይታ ጊዳና።

## 17

ዳማስቆ ቦላኔ ኢስራኤል ቦላ ጸሳ ቂጻቲ

1 ዳማስቆ ገሻሰ፤

«ቤኢቲ፥ ሃይሳፌ ሲንላን  
ዳማስቆ ካታማቴላ ኦታና፤  
ላሌላ ዶሬ ጊዳና።

2 ኦሮኤሬ ካታማቲ ካይሰ ጊዳና፤  
ሜሄ ሄንላሶሆ ጊዳና፤  
ኢሰታ ባቢሲዛ ሚሺካ ዳና።

3 ገምቤቲዳ ካታማይ ኤፍሬሜፔ፤  
ካዋቴላ ማታይ  
ዳማስቆፌ ጳያና፤

ኦራሜፔ ጫሻ  
ኦቲዳይታ ቦንቸይ  
ኢስራኤላታይሳ ማላ  
ካዉያና» ጌሰ  
ኡባፌ ዋልቃማ ጎዳይ።

4 «ሄ ዋዴ ያቆቤ  
ቦንቸይ ሻሩማታና፤  
ኢዛ ሞዶቴላይካ  
ሹማና።

5 ካሐ ማጺዛዳይ  
ኤቂዳ ካላ ሺሺዲ  
ሞዴ ባ ኩሺን ማጺዛ ማላ  
ኤራፋይሜ ሾባፌ ማጾቲዛ  
ፑሹሎ ማላ ጊዳና።

6 ዋጋራ ሚሐ ሾጪን  
ናሞኡ ዋይኮ ሄዙ ኦይፌቲ  
ሃጋ ጸራ ቦላ ኦቲዛ ማላ

ኦይዱ ወይኮ ኢቻሽ ኣይፌቲ  
 ጲፒ ጊዳ ሃጋታ ቦላ  
 ኣቲዛ ማላ  
 ጉላ ሃጋቲ ኣታና»

ጊ ጎዳ ኢሰራኤሌ  
 ጸሳይ ሃሳይዴስ።

7 ሄ ወዴ ኣሳይ  
 ባና ሜጲዳይሳኮ ጸላና፤  
 ኢስታ ኣይፌይ

ኢሰራኤሌ ጌሻኮ ጸላና።

8 ኢስቲ ባንታ ኩሼን ኦሒዳ  
 ያርሾሶሆታ ጸሌቴና፤  
 ኢስቲ ባንታ ኤቃታሰ  
 ኤጸኔ ጨኣሲዛሶሆታሲኔ  
 ኣሼሪሰ ጎይናና ኤሲዳ  
 ቱሳታሰ ቦንቾ ኢሜቴና።

9 ሄ ወዴ ኢሰራኤሌ ኣሳ ጋሶን  
 ቦሼቶንታ ኣቲዳ ሚኖ ካታማቲ  
 ወራኔ ኣይኮይ ባይንዳሶ ጊዳና።

10 ኔና ኣሺዛ ጸሳ ባላዳሳ፤  
 ኔ ኢዛን ቆቴታ ኣቲዛ  
 ኔ ዛላካ ኣኬካቤካ፤  
 ሄሳ ኔኒ ዶሬቲዳ  
 ኣታኪልቲ ቶኪኮካ፥  
 ኦራላ ዜሬሐ ኔ ዜሪኮካ፥

11 ኔ ቶኪዳ ጋላሰ  
 ኢዚ ሞካና ማላ  
 ኔ ኦሒኮካ፥  
 ኔ ዜሪዳ ዋንቴላ ጋላሰ  
 ኢዚ ጨያና ማላ ኔ ኦሒኮካ  
 ሄ ካላይ ሃርጌኒኔ  
 ፓጽንታ ሳኮን ሙሌራ ጳያና።

**ሞርኬ ካዋቴላታ ጸኔቴሐ**

12 ቤኣ፥ ዳሮ ኣሳ ሃንቆ ጊሪሲ  
 ኣባ ዳሞባላ ማላ ጊሬሰ፤  
 ቤኣ፥ ኣሳ ዋሶ ዳሮይ  
 ዋልቃማ ሃላ ማላ  
 ጉሜሰ።

- 13 አሳይ ዋልቃማ  
 ሃላ ማላ ጉሚኮካ፥  
 ኢዚ ኢስታ ሴሪኮ  
 ዙሞቡላ ቦላራ ጫርኮን ቢዛ  
 ጉዲላ ማላ  
 ጎቴ ጫርኮይ ላሊዛ  
 ሃፓ ማላ ላሌታና።
- 14 ሄኮ ሳኣይ ቃሚሺን  
 ቆፋይ ባይንዳ  
 ሺሮ ገዲዴሰ፤  
 ሳኣይ ዋንታናፔ ካሴቲዲ  
 ኦኒካ ቤቲቤና።  
 ኑ አቆታ ቦንቂዳይታ፥  
 ኡባ ዋልቃን ኤኪዛይታ  
 ቃዳይ ሄሳ።

## 18

- ቶጵያ ቦላ ዮቴቲዳ ቲንቢቲ
- 1 ቶጵያ ሻፋታ ማታን ዲዛ  
 ጌሬቲዛ ቄፌይ ዲዛ ቢታይሰ  
 አዬ አና!
- 2 ሄ ቢታያ ቃስታኔታ  
 ሻጫፌ ኦሴቲዳ ዋሳሎን  
 አባ ቦላራ ሻፋፔ ሄ ፒንሐ  
 ኪታ ዬዲዛሮ።  
 ኢንቴኖ ፒላታ ቃስታኔቶ!  
 አዲሳኔ ቦላ ሹሳ አሳታኮ፥  
 ሃኮኒኔ ማታን ዲዛይ  
 ኢስታስ ያዪዛ ዴሬታኮ፥  
 ዋልቃማኔ ቃላይ  
 ኤሬቶንታ ዴሬታኮ፥  
 ሻፋ ሃሳቲ  
 ኢዛ ዴሬ ሻኪ ቢዛ  
 ካዋቴላኮ ቢቴ።
- 3 ኢንቴኖ ሳኣ ቦላ ዲዛ አሰ ኡባቶ!  
 ዙማታ ቦላ ማላታይ ካቄቲሺን  
 ኢንቴ ቤኣና፤

ዛዬይ ፑኔቲሺን አንቲ ሲያና።

- 4 ጎዳይ ታስ፥ «ታ ጮኡ ጋ ኡታና፤  
 ሴታ ጋላስ አዋ ሴላን  
 ጸልቄቲዛ ሚሻ ማላ  
 ቦኔ ሆሞቤ ማላ፥  
 ሻራፔ ቡኪዛ  
 ኢራ ማላ ጊዳዳ  
 ታ ጸላና» ጊዴስ።

- 5 ካል ማጺዛ ዋዴፔ ካሴ  
 ጨሻ ዋዴይ አቋሺን፥  
 ጨሻይ ጋኪዲ ዋይኔይ  
 አይፌ አይፋና ጊሺን፥  
 ዋይኔ ቦላ ዲዛ  
 ኮሾንታይሳ ጽንቃና፤  
 ዳዩዳ ሃጋታካ  
 ቃንጾሬሊ ዲጋና።

- 6 ኢስቲ ኡባይካ ዙማ ቦላ ዲዲ  
 ባቂ ሚዛ ካፎታሴኔ  
 ባዞ ዶኦታስ አታና፤  
 ካፎቲ ቦኔ ኩሜል  
 ሚሼ ሻጫና፤  
 ባዞ ዶኦቲ ባልጎ ኡባን  
 ሚሼ ሻጫና።

- 7 ሄ ዋዴ ጎዳስ  
 ኡባፌ ዋልቃማ  
 ጸሳስ አዲሳኔ  
 ሊቆ አሳፔ፥  
 ማታፔ ሃሆፔ  
 ያዪዛ ዴሬፔ፥  
 ዋልቃማኔ ኢዛ ቃላይ  
 ኤሬቶንታ ዴሬፔ፥  
 ሻፋቲ ሻኪ ቢዛ  
 ካዋቴላፌ  
 አሞታይ ያና፤  
 ሜዴቴላ ጎዳይ ዲዛሶ  
 ፑዴ ጸዮኔ ዙማ ቦላ ያና።

## 19

ጌብጼ ቦላ ዮቴቲዳ ቲንበቲ

1 ጌብጼ ጌሻስ ዮቴቲዳ ቃላይ፥  
«በኢቲ፥ ጎዳይ ኤሶቲዛ ሻራ  
ቶጊዲ ጌብጼ ዬስ።  
ጌብጼ ኤቃ ጸሳቲ  
ኢዛ ሲንፋን ኮኮሬቴስ፤  
ጌብጼ ዋዚናይ  
ኢስታ ጌዶን ሴሬስ» ጌስ።

2 «ታኒ ጌብጼታ  
እሳ እሳ ቦላ ዴንፋና፤  
እሻይ እሻራ፥ ሾርይ ሾርራ፥  
ካታማይ ካታማራ፥  
ካዎይ ካዎራ ኦሌታና።

3 ጌብጼታ ዋዚናይ ላቤታና፤  
ታኒ ኢስታ ሃልቾ  
ሃዳ አላና።  
ኢስታ ኤቃ ጸሳታኔ ሞይቲሌታ፥  
ቲና ኢያና ጸይጊዛይታኔ  
ማርታ ዞሬ ኦይቻና።

4 ቃሴ ሜንጾ ኢታ አሳ ኩሼን  
ታ ጌብጼታ አላ ኢማና፤  
ባቢሲዛ ካዎይ  
ኢስታ ሃራና» ጌስ  
ጎዳይ፥ ኡባፌ  
ዋልቃማ ጸሳይ።

5 አባዬ ሻፋ ሃሊ ፓጫና፤  
ሃሊ ጉጺ ጉጺ ሜላና።

6 ዛራ ሃላቲ ጸንቃና፤  
ጌብጼ ካንቼቲ ሚጨ ጳያና፤  
ሻጫቲኔ ጫሬ  
ማታቲ ሹላና።

7 አባዬ ሻፋ ላንቄን  
ሃላ ማታን ዲዛ  
ሚላቲ ሹላና፤

ሻፋ ማታን ዜሬቲዳ  
 ካል ኡባይ  
 ጫርኩን ፒቲቲ ጳያና፤  
 አይኮይካ አቲና።

- 8 ሞሌ ኦይኪዛይቲ ጩጫና፤  
 አባዬ ሻፋን  
 ጋቲሌ ዩጊዛይቲ  
 ኡባይ ዩካና፤  
 ሃላ ቦላ ባንታ  
 ጌቲ ዩጊዛይታ  
 ኡባ ዎልቃይ ኢጻና።

- 9 ፓቲቲዳ ታልባ  
 ሱቂዛይቲ ጳያና፤  
 ቃሴ ቦላ ፑቶፌ  
 ማይኦ ዳዲዛይቲ  
 ሂዶታ ቃንጻና።

- 10 ማይኦ ዳዲዛይቲ ጩጫና፤  
 ዳሞዛን አቂዛይታ  
 ዎዚናይ ሜቃና።

- 11 ጸኖሴ ቢታ ሃላቃቲ ከሂ ኤያ፤  
 አጵ ኤራንቻ ጊዲዳ  
 ካዎ ፓሮኔ አጵ ኤራንቻታ  
 ዘሬይ ሃዳ።

ፓሮኔስ፥ «ታኒ አጵ  
 ኤራንቻታፔ ኢሳ፤  
 ታኒ ካሴ ካዎታ ካሊዛዴ»  
 ዋኒዲ ጌቲ?

- 12 ኢንቲ አጵ ኤራንቻቲ  
 ሃኢ አዋን ዲዞ?  
 ኡባፌ ዎልቃማ ጎዳይ  
 ጊብጼ ቦላ ኦላና ቆፒዳይሳ  
 አኔ ኢንቲና ቤሴቶኔ ኤሪሴቶ።

- 13 ጸኖሴ ሃላቃቲ ኤይዳ፤  
 ሜምፒሳ ሹሜቲ ባሌቲዳ፤  
 ኢዚ ዴሬ ካሌሊዛ ኤሬቲዳይቲ  
 ጊብጼ አሳ ባሌሊዳ።

- 14 ጎዳይ ኢስታ ቦላ

ዶቺዛ አያና ጉሲዳስ፤  
 ማሰቲዳ አሲ ባ ጮሻን  
 ጋንዲጋርዛ ማላ  
 ጊብጾይ ባ ኦሶ ኡባን  
 ጋንዲጋራና ማላ ኦሊዳ።

15 ካጩ ዋይኮ ጎይና፤  
 ዛምባ ዋይኮ ሻጫ  
 ሄይቲ ኡባይ

ጊብጾስ አይኮካ ማዴቲና።

16 ሄ ዋዴ ጊብጾ አሳይ ማጫሳ ማላ ጊዳና። ቃሴ ኡባፌ  
 ዋልቃማ ጎዳይ ኢስታ ቦላ ባ ቄሴ ዴንፊዛ ዋዴ ኢስቲ ያሻን  
 ኮኮራና።

17 ዩሁዳ አሳይ ጊብጾ አሳ ቦላ ሺሮ ዴንፊዳና፤ ኡባፌ ዋልቃማ  
 ጎዳይ ኢስታ ቦላን ኦላና ሃልቺዳ ሃልቺፌ ዴንዲዳይሳን ዩሁዳ  
 ጊሻሰ ሲዪዳ ኡባይ ሺሮታና።

18 ሄ ዋዴ ጊብጾ ቢታን ዲዛ ኢቻሽ ካታማቲ ካናኔ ቃላን  
 ሃሳያና፤ ኡባፌ ዋልቃማ ጎዳ ባጋ ጊዳናሰ ጫቃና። ሄ ካታማታፔ  
 ኢሲኒያ ባሻ ካታማ ጌቲታ ጾይጌታና።

19 ሄ ዋዴ ጊብጾ ቢታን ጎዳሰ ያርሾሶይ ኦሴታና፤ ቃሴ ጊብጾ  
 ቢታ ዛዋን ጎዳሰ ቱሴ ኤቃና።

20 ሄሲ ኡባፌ ዋልቃማ ጎዳሰ ጊብጾ ቢታን ማላታኔ ማርካ  
 ጊዳና፤ ኢስቲ ባንታና ኡንኤፊዛይታፔ ዴንዲዳይሳን ጎዳኮ ዋሲዛ  
 ዋዴ ኢዚ ኢስታ አሺዛዴኔ ማዲዛዴ ኪቲዲ ኢስታ አሻና።

21 ጎዳይ ባና ጊብጾታሰ ቆንጪሳና፤ ኢስቲካ ሄ ጋላሰ ጎዳ  
 ኤራና፤ ያርሾኒኔ ካላ ያርሾን ኢዛ ጎይናና። ኢስቲ ጎዳሰ አዲኔታና፤  
 ባ አዲኔቲዳይሳካ ጋላና።

22 ጎዳይ ጊብጾ ቦሻን ሾጫና፤ ዛሪዲካ ኢስታ ፓላና፤ ኢስቲካ  
 ጎዳኮ ሲማና፤ ኢዚካ ኢስታ ዋሳ ሲዪዲ ኢስታ ፓላና።

23 ሄ ዋዴ ጊብጾፔ አሶሬ ጋካናሰ ዋጋ ኦጌይ ኦሴታና፤ አሶሬቲ  
 ጊብጾ፤ ጊብጾ አሳይ አሶሬ ባና፤ ቃሴ ጊብጾቲኔ አሶሬቲ ኢሲ  
 ቦላ ጎይናና።

24 ሄ ዋዴ ኢሰራኤሌይ ቢታሰ አንጆ ጊዳናሰ ሄሻንሉ ማራን  
 ጊብጾራኔ አሶሬራ ኢሲፌ ቆዴታና።

25 ኡባፌ ዋልቃማ ጎዳይ ኢስታሰ፡ «ታ ዴሬ ጊብጾይ፡ ታ  
 ኩሼይ ሜዲዳ አሶሬይ፡ ታ ጸንጾ ኢሰራኤሌይ አንጃቲዳይታ  
 ጊዴቶ» ጊ አንጃና።

## 20

### ጊብጼ ቦላኔ ቶጵያ ቦላ የቴቲዳ ቲንቢቲ

<sup>1</sup> አሶሬ ካዎ ሳርጎኔይ ኦላ ጋዳዋ ከቲን አሽዶዴ ጌቴቲዛ ፊሊሰጾሜ ካታማ ኦሊ ኦይኪዳ ላይለ።

<sup>2</sup> ሄ ዎዴ ጎዳይ አዋጾ ና ኢሳያሳ፡ «ማቃ ኔ ቦላፌ ቃራ፤ ኔ ጫማ ቶሆፕ ኬሳ» ጊ የቴዴሰ፤ ኢዚካ ሄሳሶ ኦሊዴሰ፤ ካሎኔ ጫማይ ባይንዳ ሲሜሬቲዴሰ።

<sup>3</sup> ሄሳፌ ጎዳይ፡ «ታ ኣይሌ ኢሳያሲ ጊብጼ ቦላኔ ቶጵያ ቦላ ጋካናይሳሰ ማላታ ጊዳና ማላ ሄቭ ላይለ ማይኦ ማይኦንታኔ ጫማ አሶንታ ዴኢዳ ማላ።

<sup>4</sup> አሶሬ ካዎይ ጊብጾፕ ዲኤቲዳ ጨማታኔ ዬላጋታ፡ ቶጵያፕ ቤቲ ዬዳይታ ካሎኔ ጫማ አሶንታ ኤኪ ባና፤ ኢሰቲ ዱጫ ካሎ ቃሪ ዬጊዲ ዬዴሬሊሽ ጊብጾታ ካዉሻና።

<sup>5</sup> ቶጵያ ሂዶታ ኦሊዳይቲኔ ጊብጾን ጨቁቲዛይቲ ባባናኔ ካዉያና።

<sup>6</sup> ሄ ዎዴ አባ ማታን ዴኢዛ ዴሬይ፡ ሳሰ ኢሰቲ ጨቁቲዳይቲ፡ አሶሬ ካዎፕ አታናሲኔ ላኣ ኬዛናሰ ኦ ኢሰታ ጊዶን ቆቴቲዳይታ ኣዚ ጋኪዳኮ ኣኔ ጼሊቲ፤ ሂሰቲን ኦኒ ዋኒ ኬሲ ኤኪ ኣታኔ? ጋና » ጊዴሰ።

## 21

### ባቢሎኔ ቦላ የቴቲዳ ቲንቢቲ

<sup>1</sup> አባ ላንቄን ዲዛ ባዞ ቢታሰ የቴቲዳ ጎዳ ቃላይ ሃይሳፌ ካሊዛይሳ።

ዲጌሃ ባጋፌ ጎቴ ጫርኮይ

ፒቲ ኤኪ ዪዛ ማላ

ዎራጂዛይ ሸር ዴንፊሊዛ

ባዞ ቢታፌ ዬሰ።

<sup>2</sup> ያሺዛ ኣጂታ ታ ቤኣዲሰ፤

ኣሊ አሚዛይሲ

ኣሊ አሚሰ፤

ዲኢዛይሲ ዲኤሰ።

ኤላሚ ዴንዳ!

ሚዶኔ ጊዶላ!

ኢዛ ጋሊዳ ዋዬ ኡባ

ታ ኤሳና።

- 3 ሄሳ ገሻስ ታ ጸሳይ  
 ሳኮ ጸላላ ገዲዳስ፤  
 ሚጻይ ኦይኪዳ ማጫሳ ማላ  
 ታና ሌሶይ ኦይኪዳስ፤  
 ታኒ ሲዬዳ ዮኦይ  
 ታና ጋዲጋዲሲዳስ፤  
 ታ ቤኢዳ ዮኦን ሺርታዲስ።
- 4 ታ ዋዚናይ ፖዱ ገዴስ፤  
 ታና ያሺ ኮኮሪሲዳስ፤  
 ታ ኡፋይሳን ናጊዳ ኦማርሳይ  
 ታ ቦላ ሂርጋ ዬጊዳስ።
- 5 ኢስቲ ማዳ ገግሲዳ፤  
 ኡቲዛሶ ገግሲዳ፤  
 ሚዳኔ ኡዬዳ።  
 ኢንቴኖ ሹሜቶ ዳንዲቲ!  
 ጎንዳሌዛ ዛይቴን ቁጨቲ!
- 6 ጎዳይ ታና፡  
 «ባ፤ ዋቺዛ ኣስ ዋላ፤  
 ኢዚ ባ ቤኢዳይሳ ዮቶ።
- 7 ፓራን ጎሼቲዛ  
 ፓራ-ጋሬታ ቤኢዛ ዋዴ  
 ሃሬ ቶጊዛይታ  
 ጋሜላ ቶጊዛይታ  
 ቤኢዛ ዋዴ ኢዚ ዩሺ ቆፖ፤  
 ሎኤላ ዋቾ» ገዴስ።
- 8 ናጊዛይሲካ ዋሲሼ፡  
 «ጎዳዉ፡ ታኒ ጋላስ ጋላስ  
 ፓጩይ ባይንዳ  
 ሻኮ ቦላ ኤቃዲስ፤  
 ኦማርስ ኡባን  
 ታ ናጊዛሶሆን ኤቃዲስ።
- 9 ቤኢቲ፡ ኢሲ ኣሲ ፓራታን  
 ጎሼቲዛ ፓራ-ጋሬታን ዬዴስ፤  
 ሂስቲዲ፡ ሳቢሎኔይ  
 ኩንዳዲስ! ኩንዳዲስ!

- ኢዚ ኤቃ ጸሳ ሚሰሌቲካ  
 ሜቄሬቲ ጋዴን ኩንዲዳ፤  
 ጌ ዛሬደስ» ጌ ዋሲደስ።
- 10 ባሌን ቡኬቲዳ ታ ዴሬዞ!  
 ኡባፌ ዋልቃማ ጎዳ  
 ኢሰራኤል ጸሳፌ  
 ታ ሲዪዳ ቃላ ኔስ ዮታይስ።

### ኤዶሜ ቦላ ዮቴቲዳ ቲንቢቲ

- 11 ኤዶሜ ጊሻስ ዮቴቲዳ  
 ሚኖ ዮኦ፤  
 ኢሲ ኣሲ ሴይሬፔ  
 ታና ጴይጊዲ «ናጊዛይሶ!  
 ጋዴይ ዋንታናስ  
 ኣይ ከና ሳቴይ ኣቲዴ?  
 ናጊዛይሶ! ጋዴይ ዋንታናስ  
 ኣይ ከና ሳቴይ ኣቲዴ?» ጌዴስ።
- 12 ናጊዛይሲ ዛሬዲ፥ «ዋንታና፤  
 ጊዶ ኣቲን ሲሚዲ ቃማና፤  
 ኦይቻና ኮይኮ ኦይቺቴ፤  
 ጊዶ ኣቲን ሲሚዲ  
 ሃ ዪቴ» ጌዴስ።

### ኣራቤ ቦላ ዮቴቲዳ ቲንቢቲ

- 13 ኣራቤ ጊሻስ ዮቴቲዳ ሚኖ ዮኦ፤  
 ኢንቴኖ ዳዳኔ ዛልኣንቻቶ!  
 ኢንቴ ኢንቴ ጫና  
 ጋሜላታራ ኣራቤ ባዞን ኣቃና።
- 14 ሳሜቲዳይታስ ሃል ኤሂቴ፤  
 ኢንቴኖ ቴማኔን ዲዛይቶ!  
 ቤቴ ኣሳታስ ካል ኤሂቴ።
- 15 ኢስቲ ጊላ ማሻፌኔ  
 ኮሆፔ ሾዴቲዳ ጊላ ማሻፌ፥  
 ዋጾቲዳ ዋንዳፌፔኔ  
 ሱሊዳ ኦላፔ ባቃቲዳ።

16 ጎዳይ ታና፥ «ኮንቲራቴ ኦሳንቻ ኦሶ ጋላሲ ወሪዛ ማላ ኢሲ ላይላ ጊደን ቁዳሬ ቦንቾይ ኡባይ ወራና።

17 ቁዳሬ ቢታን ዋንዳፌን ዱኪዛ ዋልቃማ ኦላንቻታፔ ጉላቲ ኦታና፤ ሄሳ ጎዳ ኢስራኤል ጸሳይ ዮቲዴሰ» ጊዴሰ።

## 22

ዬሩሳሌም ቦላ ዮቴቲዳ ቲንቢቲ

1 ኣጁታ ዙሌ ቦላ ዮቴቲዳ ሚኖ ዮኦ፤

ኢንቴና ኣዚ ሜቲን ኡባይ

ፖቄ ቦላ ኬዚዴቲ?

2 ሃኔ ዋጫማይ ኩሚዳ

ካታማዬ!

ሺርይኔ ዲርባይ

ኩሚዳ ካታማዬ!

ነፔ ሃይቂዳይቲ

ማሻን ሃይቂቤቴና፤

ዋይኮ ኦላን ሃይቂቤቴና።

3 ኔና ኣይሲዛይቲ ኡባይ

ኢሲፌ ባቃቲዳ፤

ዋንዳፌ ዴንሶንታ

ዲሺ ዲኤቲዳ፤

ሞርኬይ ሃሆን ዲሺን

ባቃቲዳ ኡባቶ!

ኢንቴ ኦይኬቲዳ

ኢሲ ቦላ ቃሼቲዴታ።

4 ሄሳ ጊሻሰ ታኒ፥

«ታፔ ሃኪቴ፤

ኣኔ ጫሞ ዬሆ ታ ዬካይሰ፤

ዳይዳ ታ ኣሳ ጊሻሰ

ታና ሚንሉላና ቆፖፍቲ» ጋዲሰ።

5 ጎዳይ ኡባፌ ዋልቃማ

ጸሳይ ኣጁታ ዙሌን ዋጫማ፥

ዲርባኔ ሺር፥

ዲርሳታ ላሌሊኔ ዙማታኮ

ዋሶ ጋላሲ ዴሰ።

6 ኤላሜይ ዋንዳፌ ዪሻ ኮሆ፥

ባ ፓራታኔ

- ፓራ-ጋሬታ ገግሲደስ፤  
 ቂሬይካ ባ ጎንዳሌ ኦይኪደስ።  
 7 ሎኦ ዙሉቲ ፓራ-ጋሬታን ኩሚዳ፤  
 ቶጋ ኣሳቲ ካታማይ  
 ፔንጌን ኤቂዳ።  
 8 ዩሁዳ ሚዳታ ላሊዳ፤  
 ሄ ዋዴ ዋራ ጊደን  
 ሚንጃ ኬላን ዲዛ  
 ኦላ ማሳራ  
 ኔ ዴላዳሳ።  
 9 ዳዊቲ ካታማይ  
 ዳሮ ላሊቲዳይሳ ቤኢዴታ፤  
 ዲጌ ባጋራ ሃል ኤሊሲዴታ።  
 10 ዩሩሳላሚን ዲዛ  
 ኬላታ ቆዲዴታ፤  
 ዲርሳ ኦራላናስ  
 ኬላታ ላሊዴታ።  
 11 ካሴ ጋልኦ ኤሌ ሃላ ዛሪዲ፥  
 ኢዛ ሚንጃዛሶ ናምኡ ገምቤታፔ  
 ጊደን ገግሲዴታ።  
 ጊዶ ኣቲን ኢንቲ ሄሳ ኦሊዳይ  
 ኦናኮ ኤሪቤኬታ፤ ኮይሮ ሃልቺ  
 ኦሊዳይሳ ኣኬኪቤኬታ።  
 12 ሄ ጋላስ  
 ጎዳይ ኡባፌ ዋልቃማ ጸሳይ  
 ኢንቲ ዩካና ማላኔ  
 ዋሳና ማላ፥  
 ኢንቲ ሁኤ ቢናና  
 ቡጫና ማላኔ  
 ማቃ ማይኣና ማላ ዴይጊዴስ።  
 13 ጊዶ ኣቲን ኢንጃኔ ኡፋይስ፥  
 ቦራኔ ጳርሾ ሹካይ፥  
 ኣሾ ሙሲኔ  
 ዋይኔ ኡሺ ዴስ፤  
 «ኑኒ ዋንቶ ሃይቃና ገሻስ  
 ኣኔ ሞሲኔ ኡዮስ» ጊዴታ።

14 ጎዳይ ኡባፌ ዋልቃማ ጸሳይ ሃይሳፌ ካሊዛይሳ ታሰ  
ቆንጩሲዳሰ፤ ኢዛካ ታ ሃይላን ሲያዲሰ፤ «ሃይሲ ሃ ናጋራዚ  
ኢንቲ ሃይቃና ጋካናሰ ወርሲን ወሬና።»

15 ጎዳይ፥ ጎዳይ ኡባፌ  
ዋልቃማ ጸሳይ፥  
«ባዳ ካዎ ከላ  
አላፌ ሼቢና፥

16 ሃይሳን አይ ኦላይ?  
ሃይሳ ኔሰ ዱፎ ገገሳናሰ፥  
ጵቃሶሆን ኔ ሞጌታናሶ  
ዋጫናሰ፥ ኔ አሃይ  
ኡታናሶ ዛላ ዋጫናሰ  
ኦኒ ኔና አዛዚዴ?

17 ሃይሶ ሚኖ አዴዘ! ናጌታ፤  
ጎዳይ ኔና ሚንሳ ኦይኪዲ  
ባ ኩሼን ጨጨሚ ኦይኪዲ  
ኦላና ሃኔሰ።

18 ኔና ያንባርሻ ማላ ዩሺዲ  
ኦኮ ቢታን ኦላና፤  
ኔ ጎዳ ከላሰ  
ኔ ዬላ ገዳዳሳ፤  
ኔ ሄን ሃይቃና፤  
ኔ ቦንቾ ፓራ-ጋሬቲካ  
ሄን አታና።

19 ኔ ቦንቼቲዳሶፔ  
ታ ኔና ካወሻና፤  
አላፌቲላፌካ  
ኔ ጎዴታና» ጋ።

20 «ሄ ጋላሰ ታኒ ከልቂያሳ ና ታ አሽካራ ኤልያቄሜ ጸይጋና።

21 ኔ ሴሎዛ ታ ኢዛ ማይዛና፤ ኔ ጌላ ኢዛ ገደሳና፤ ኔ ዳናቱላካ  
ታ ኢዛሰ አላ ኢማና። ኢዚ ዬራሳላሜን ዲዛ አሳሲኔ ዩሁዳ አሳሰ  
አዋ ገዳና።

22 ታኒ ዳዊቲ ከላ ቁልፔ ኢዛ ሃሼን ዋላና፤ ኢዚ ዶዬን ኦኒካ  
ጎርዴና፤ ኢዚ ጎርዲን ኦኒካ ዶዬና።

23 ታኒ ኢዛ አማኔቲዛሶሆን ጴሽኬ ማላ ኤሳና፤ ኢዚ ባ አዋ  
ከላሰ ቦንቾ አራታ ገዳና።

24 ቂሪ ጸርፔ ቢዲ ባል ጋካናሰ ሶን ዲዛ ሚሽ ኡባ ኮጫን ካቂዛ ማላ ኢዛ አዋ ኬላ ቦንቾ ኡባይ ናይታፔ ቢዲ ና ና ጋካናሰ ኢዛ ቦላ ቃጾታና» ጌዴሰ።

25 ጎዳይ ኡባፌ ዋልቃማ ጸሳይ፥ «ሄ ጋላሰ አማንፊዛሶን ኤቂዳ ጲሽኬይ ሾዴታና፤ ሜቂ ዋጳና፤ ኢዛ ቦላ ካቂቲዳ ኡባይ ኩንዲዲ ሜቂሬታና» ጌዴሰ፤ ሃይሳ ጎዳይ ዮቲዴሰ።

## 23

ጲሮሴ ቦላ ዮቲቲዳ ቲንቢቲ

1 ጲሮሴ ቦላ ዮቲቲዳ ሚኖ ዮኦ፤

ጲሮሴይ ዲፒ ጌ ጳይዳ ጌሻሰ

ታርሴሴ ማርካቤቶ ዋሲቲ፤

ኬሊኔ ዋዴቤይ

ባይንዳሶ ጌዳዱሰ።

ቆጶሮሴ ቢታፌ

ዋሬይ ኬዚዴሰ።

2 ኢንቴኖ ሃሩሮቶ!

ኢንቴኖ ዲሬቲዳ

ሲዶና ዛልኣንቻቶ!

ጮኡ ጌቲ!

3 ጌታ አባራ ሺሆሬፔ

ጲሮሴሰ ካሊ ዩሰ፤

ጲሮሴ አቆታይ

ኣባዬፔ ቤቲሰ፤

ኢዛ ካዋቴላታሰ

ዛልኤ ባቶ ጌዳዱሰ።

4 ሃኔ ሲዶና ካታማዬ!

ሃኔ አባ ሚጸዬ ኔኒ ዩላታ፤

ኣባይ፥ «ታኒ ሚጸታቤኬ፤

ናካ ዩላቤኬ፤

ኣቲማ ናይታኔ ማጫ ናይታ

ዲቻቤኬ» ጌዴሰ።

5 ጲሮሴፔ ኬዚዛ ፓፑንሳይ

ጌብጼ ቢታን ሲዬቲዛ ዋዴ

ኢሰቲ ጩጫና።

6 ኢንቴኖ ሃሩሮቶ! ዚላሊቲ፤

ታርሴሴ ፒኒቲ።

7 ኢዚ ቶሆይ ኢዞ ሃኮ ዴሬ ኤፊዳራ

ሄን ኢዛ ኡታና ማላ  
 ኦሊዳራ፥  
 ካሴ ቤኒ ካታማያ  
 ኢንጃኔ ኡፋይሳ ካታማያ ሃኒ?

- 8 ካላቻ ጎጲሲዳሪ ቦላ፥  
 ባ ዛልኣንቻታ  
 ዳናሲዳሪ ቦላ፥  
 ቢታ ቦላ ቦንቹቲዲ  
 ባይዚዛይቲኔ  
 ላሚዛይቲ ኢዚን ዲዛ  
 ጸርሲ ቦላ  
 ሃይሳ ቆፒዳይ ኦኔ?

- 9 ኦቶሬቲዛይታ ኡባ  
 ቦንቾ ካዉሻናሰ  
 ቃሴ ቢታ ቦላ  
 ቶቁ ቶቁ ጊዳይታ  
 ዘቂ ሂሰታናሰ  
 ጎዳይ ኡባፌ ዎልቃማ  
 ጸሳይ ሃልቺደሰ።
- 10 ኢንቴኖ ታርሴሴ ቢታ ኣሳቶ!  
 ኢንቴና ቲቂዛይ ባይንዳ ጊሻሰ  
 ኣባዬ ሻፋ ማላ ኢንቴ  
 ቢታ ቦላን ኩሚዲ ጎጊቴ።

- 11 ጎዳይ ባ ኩሼዛ  
 ኣባ ቦላ ሚጨደሰ፤  
 ኢዚ ካዎቴላታካ  
 ዳጋንሲደሰ፤  
 ካናኔ ሚጸቲ  
 ላሌታና ማላ ኣዛዚደሰ።

- 12 ቃሴካ፥ «ሃኔ ቆጾቲዳ  
 ሲዶና ጌላኦዬ!  
 ሃይሳፌ ጉዬ ኡፋዬቶፋ፤  
 ደንዳ ቆጲርሴ ፒና፤  
 ሄንካ ኔ ሳሮ ደማካ» ጊደሰ።

- 13 ኣኔ ባቢሎኔ ቢታ ቤኢቴ፤  
 ሄ ቢታ ኣሳይ  
 ፓሶንታ ኣሰ ጊዲደሰ፤

አሶሬ አሳይ ኢዞ ባዞ ዶአሰ  
 ጉፋሶ ኬሲዳሰ፤  
 ኢሰቲ ባንታ ሻኮታ  
 ኢዚ ቦላ ጊሞቢዳ፤  
 ኢዚ ሚጽታ ላሊዳ፤  
 ቡዴቶይሲ ዶሬ ጊዲዳሰ።

14 ኢንቴኖ ታርሴሴ

ማርካቤቶ፥ ዋሲቲ!

ኢንቴ ሚጸይ ላሌቲዳሰ።

15 ሄ ዋዴ ጸርሴ ካታማይ ኢሲ ካዎስ ዴኦ ላይላ ኬና ላፑን  
 ታሙ ላይላ ዶጌታና፤ ሄሳፌ ጉዬ ላይማ ማጫሳይ ጊሻሰ ዩጾቲዳ  
 ዩላ ጸርሴ ቦላ ዩጾታና።

16 ኢሰቲ፥ «ሃኔ ዶጌቲዳ

ላይማ ማጫሳዬ!

ባጋና ዴንላ፤

ካታማይ ጊዶን ዩያ፤

ኔ ሃሳኤታና ማላ

ባጋና ሎኤላ ሾጫ፤

ዳሮ ማዛሙሬ ዩጸ» ጋና።

17 ላፑን ታሙ ላይላ ፖሌቲዳፔ ጉዬ ጎዳይ ጸርሴ ቆፓና፤  
 ጊዶ ኦቲን ኢዛ ካሴ ባ ላይማ ኦሶን ሲማና፤ ሳኦ ቦላ ካዎቲላታ  
 ኡባራ ባ ላይማቲላ ዛልኤ ዛልኦና።

18 ጊዲኮካ ኢዛ ዴሚዳ ኡባይኔ ዋዴይ ጎዳሰ ዴማታና፤  
 ዳጋቲናኔ ሱዴና፤ ኢዚ ዋዴይ ጎዳ ሲንላን ዴኢዛይታሰ ፓላሂዳ  
 ካላኔ ሎኦ ማይኦ ጊዳና።

## 24

ጎዳይ ሳኦ ቦላ ኤሃና ቂጻቲ

1 ቤኢቲ! ጎዳይ ቢታ

ቡላ ኬሳና፤

ሙሌራ ቋይሳና፤

ቡዴላ ዶሬ ሂስታና፤

ኢዚን ዲዛ አሳ ላላና።

2 ኡባ ሚሺካ ኢሲ ማላ ጊዳና፤

ዴሬዛ ቦላ ሃንዛይሲ

23:18 ሂዚ 26:1—28:19፤ ኢዩ 3:4-8፤ አሞ 1:9-10፤ ዛካ 9:1-4፤ ማቶ  
 11:21-22፤ ሉቃ 10:13-14

- ቄሴዛ ቦላ ሃናና፤  
 አይሌ ቦላ ሃንዛይሲ  
     ጎዳ ቦላ ሃናና፤  
 አሸካራይ ቦላ ሃንዛይሲ  
     ጎዳቴይ ቦላ ሃናና፤  
 ሻሚዛይሳ ቦላ ሃንዛይሲ  
     ባይዚዛይሳ ቦላ ሃናና፤  
 ታልኤ ኤኪዛይሳ ቦላ ሃንዛይሲ  
     ታልኤ አሚዛይሳ ቦላ ሃናና፤  
 አጮ ጨገዛይሳ ቦላ ሃንዛይሲ  
     አጮ ጨገሲዛይሳ ቦላ ሃናና።
- 3 ቢታይ ሙሌራ ቡላ ጊዳና፤  
     ሙሌራ ቦንቁታና፤  
     ሃ ቃላ ጎዳይ ሃሳይዳስ።
- 4 ቢታያ ማላና፤  
     ኢዚን ዲዛ ኡባይ ቆካና፤  
     አላሜይ ዳቡራና፤  
     ቢታ ቦላ ኤሬቲዳ  
     ጊታ አሳቲ ዳቡራና።
- 5 ቢታይ ባ አሳን ቱናዲስ፤  
     ኢስቲ ዋጋ ማንሊዳ፤  
     ማራ ሞሪዳ፤  
     ሚርና ጫቆ ቃላ ማንሊዳ።
- 6 ሄሳ ጊሻስ ቃንጌሊ  
     ቢታ ማስ፤  
     ኢዚን ዴኢዛ ዴሬቲ  
     ባንታ ሞሮን  
     ቃጸዬታና ቤሴስ፤  
     ሄሳ ጊሻስ ሳኦ ቦላ ዲዛ  
     አሳቲ ጸጌቲዳ፤  
     ኢስታፌ ቆዳን ጉላ  
     አሳቲ አቲዳ።
- 7 ዋይኔ ቱራይ ማሊን  
     ዋይኔ ኡሺ ወሪዳስ፤  
     ካሴ ኡፋዬቲዛ ኡባይ ጨጨዳስ።
- 8 ኡፋይሳን ካራቤ ባቃይ  
     ጮኡ ጊዳስ፤  
     ካኢዛይታ ሆምቦጫይካ ኤቂዳስ፤

- ኡፋይሲ ዲላ ገሪሲ  
ጮኡ ገደሰ።
- 9 ሃይሳፌ ጉዩ ኢስቲ ዩዲሼ  
ዎይኔ ኡሹ ኡዬቴና፤  
ኡሻይካ ኡዪዛይታ ጫማና።
- 10 ላሌቲዳ ካታማያ ካይዛዲስ፤  
ኬላ ፔንጌቲካ ጎርዴቲዳ።
- 11 ዎይኔ ኡሻ ገሻሰ  
ዲቡሻን ዋሴቴስ፤  
ኡፋይሲ ኡባይ  
ጨጨፍን ላማታና፤  
ሆምቦጫ ካሲ  
ቢታ ቦላፌ ጳይደስ።
- 12 ካታማያ ሙሌራ ላሊታዲስ፤  
ፔንጌቲካ ማቄሬቲ ኩንዲዳ።
- 13 ዎጋራ ሚላ ኣይፌ ሸጪ ቆቆፊን  
ዎይኔ ሚላ ቃንጺ ኤከን  
ኣቲዛ ኣቲዳ ፑሹሎ ማላ  
ቢታ ቦላ፥ ካዎቴላታ ቦላ  
ሄሳሶ ሃናና።
- 14 ኢስቲ ባንታ ቃላ ቶቄ ሂስቲዲ  
ኡፋይሳን ዩጸና፤  
ኣርሼይ ዉሊዛ ባጋፌ  
ጎዳ ገታቴላ ዮታና።
- 15 ሄሳ ገሻሰ ኣርሼይ  
ሞኪዛ ባጋራ ዲዛይቶ፥  
ኣባን ዲዛ ሃረርቲ  
ጎዳ ኢስራኤሌ ጸሳ፥  
ሱንላ ቶቄ ቶቄ  
ሂስቲቴ።
- 16 ቢታ ጋጸፔ፥  
«ዲሎዛስ ቦንሻይ ገዶ»  
ገዛ ማዛሙሬ ኑ ሲዪዶስ፤
- «ታኒ ገዲኮ ገልቃዳ  
ማቄሰ ኣታዲስ፤  
ታና ኣዬ ኣና!  
ካዲዛይቲ ካዴቴስ፤

- አላ። አሚዛይቲ  
 አላ። አሚቴስ» ጋዲስ።  
 17 አንቴኖ ሳኦ ቦላን ዲዛ አሳቶ፥  
 ዳጋማይ፥ ኦላይኔ ዋጺማዴይ  
 አንቴና ናጌስ።  
 18 ሳሎ ማስኮቲቲ  
 ደዬቲዳ ጊሻስ፥  
 ቢታ ዮቻቲካ ቃጺዳ፤  
 ሺሮፔ ባቃቲዛይ  
 ኦላን ኩንዳና፤  
 ኦላፌ ኬሲ ኤኪዳይካ  
 ዋጺማዴን ኦይኬታና።  
 19 ቢታይ ቃጺዴስ፤  
 ዛኢዴሲኔ ጳልቄቲ  
 ዋጺዴስ።  
 20 ቢታይ ማሶቲዳ  
 አሳ ማላ ዪጮቲዴስ፤  
 ጫርኮይ ሱጊዳ  
 ጋባ ማላ ጊዳዲስ።  
 ቢታ ማካላቴላይ  
 ዴጾ ጊዳዳ ጊሻስ ኩንዳና፤  
 ናምኣንሶካ ሲሚ ዴንዴና።  
 21 ሄ ጋላስ ጎዳይ  
 ቦላ ሳሎን ዲዛ ዋልቃማታ  
 ጋርስ ቢታ ቦላ ዲዛ  
 ካዋታካ ቃጸያና።  
 22 ኢስቲ ኦላን ዲዛ ቃሾ አሳ ማላ  
 ኢሲ ቦላ ኡጨታና፤  
 ኢስቲ ቃሾ ኬላን  
 ጎርዴቲ ኡታና፤  
 ዳሮ ዋዴፔ ጉዬ  
 ኢስቲ ፒርዳ ኤካና ሺቃና።  
 23 ኡባፌ ዋልቃማ ጎዳይ  
 ጸያኔ ዙማኒኔ  
 ዬሩሳሌሜን ጨማታ ሲንላን  
 ቦንቾን ካዋታና፤  
 ሄ ዋዴ አጊናይ ሻጴታና፤  
 አዋ ኣይፌይካ ዬላታና።

## 25

## ጸሐፊ ሸቂዛ ጋላታ

- 1 አቤት ጎዳዉ!  
     ኔኒ ታ ጸሐፊ።  
     ታኒ ኔና  
     ጶቁ ጶቁ ሂሰታና፤  
     ኔ ሱንላካ ሳባና።  
   ጋሶይካ ቤኒፔ ቆፌቲዳይሳ  
     ማላሊሲዛ ሃኖ ኩሚላ  
         አማኔቴላን አላዳሳ።
- 2 ኔኒ ካታማዮ  
     ሹቻ ደሬ አላዳሳ፤  
     ገምቤቲዳ ካታማዮካ  
     ላላዳሳ፤  
     ሃይሳፌ ሲንላን ገምቤቲዳ  
         አላጋታ ካታማቲ ዴቲና፤  
     ሰሚዲ ሙሌካ አሴቴቴና።
- 3 ሄሳ ገሻሽ ሚኖ ዴሬቲ  
     ኔና ቦንቻና፤  
     ሚንጼ ኢታ ካዎቴላቲ  
     ኔሰ ያያና።
- 4 ኔኒ ሂዬሳታሰ ዜምፖ፤  
     ሚቶታንቻታሰ ሚቶ ዎዴ  
         ኔኒ ዜምፖ፤  
     ጎቴ ጫርኮፌ ጌሚ አቲዛሶ፤  
     አዋ ሴላፔ  
     ኩዋቲዛሶ ገዳዳሳ።  
         ጋሶይካ ሚንጼ ኢታታ ፔኖይ  
         ኬላ ጎዳራ ኢጨቲዛ  
         ጎቴ ጫርኮ ማላ።
- 5 ባዞ ቢታ ሴላ ማላ።  
     አላጋ አቶሬቴላ ዋሶ  
     ጮኡ አሳሳ።  
     አዋ ሴላይ ሻራ ኩዋን  
         ኢርጺዛ ማላ  
         ሚንጼ ኢታታ  
         ማዛሙሬ ሲርጺ ጋና።
- 6 ጎዳይ ኡባፌ ዎልቃማ ጸሐይ

ሃይሳ ዙማ ቦላ ዳሬ ኡባስ  
 ጊዲዛ ጊታ ጊቢራ፥  
 ሎኢ ካጺዳ ዋይኔ ኡሹ፥  
 ሎኦ ኣሾኔ ደሬቲዳ  
 ዋይኔ ኡሹ ጊጊሳና።

7 ሃይሳ ሃ ዙማን  
 ዳሬ ኡባ ቦላን  
 ዋጂዳ ማጋላሻ፥  
 ካዋቱላታ ኡባ ጎዚ  
 ኦይኪዳ ጎሳ ኢዚ ጳይሳና።

8 ሃይቆ ኢዚ ሜርናስ ሚታና፤  
 ኡባ ሃሬዛ ጎዳይ  
 ኣሳ ኡባ ኣይፌፔ  
 ኣፋንሱ ቁጫና፤  
 ባ ዳራ ካዉሻቲስ  
 ቢታ ኡባፌ ዲጋና።

ሃይሳ ጎዳይ ሃሳይዴስ።  
 9 ሄ ጋላስ ኢስታስ፥ «ቤኢቱ  
 ኑ ጸሳይ ሃይሳ፤  
 ኑኒ ኢዛን ኣማኔቲዶስ፤  
 ኢዚካ ኑና ኣሺዴስ፤  
 ሃይሲ ጎዳ፤  
 ኑኒ ኢዛን ኣማኔቲዶስ፤  
 ኢዚ ኣሺዳይሳን ኡፋዬቶስ፤  
 ኡፋይሳን ሆምቦጮስ» ጋና።

### ሞኣቤ ቃጸዬቴስ

10 ጎዳ ኩሼይ  
 ሃ ዙማ ቦላ ሼምፓና።  
 ጊዶ ኣቲን ኡቱላይ  
 ኡርቃን ዬጄቲዛ ማላ  
 ሞኣቤይካ ዬጄታና።

11 ሃላ ዋጂዛይ  
 ባ ኩሼ ሚጨዛ ማላ  
 ኢዛ ጊዶን ዲዛይቲ  
 ባንታ ኩሼ ሚጨና፤  
 ጸሲ ኢስታ ጌኔ ኦሶ ባሌቶንታ  
 ኢስታ ኦቶሬቲላ ካዉሻና።

12 ኢስቲ ጶቁ ሂስቲ ጊምቢዳ ጊምቤዛ

ኢዚ ዱጌ ዘቂ ሂስታና፤  
 ዱጌ ዋላና፤  
 ካዉሺዲ ዱጌ  
 ሳኣን ዋሊዲ  
 ጉዱላ ቦላ ይጋና።

## 26

### ጋላታ ማዛመራ

- 1 ሄ ጋላስ ሃ ዬላይ ዩሁዳ ቢታን ዬጾታና።  
     ኑስ ሚኖ ካታማይ ደስ፤  
     ጸሲ ኢዛ ገምቤታኔ  
     ሚጸታ ኣቶቴላስ ኦሊደስ።
- 2 ባ ኣማኖ ናጊዳ፥  
     ጸሎ ካዋቴላቲ  
         ጌላና ማላ ፔንጌታ ደይቲ።
- 3 ኔናን ኣማኔቲዳ ጊሻስ  
     ኔናን ዜምፒዳ ሸምፖዮ  
         ኔኒ ኩሜላ  
         ሳሮቴላን ናጋሳ።
- 4 ሜርናስ ጎዳን ኣማኔቲቲ፤  
     ጎዳይ ኑስ ሜርና ዛላ።
- 5 ቶቃሶሆን ዲዛይታ  
     ዘቂ ኦላና፤  
     ቶቁ ጊዳ ካታማ  
     ካዉሻና፤  
     ዱጌ ቢታን ኦላና፤  
     ጉዱላራ ዋላካና።
- 6 ቶሆን ዬጾታና፤  
     ኡንኤቲዳይታ ቶሆይኔ  
     ማንቆታ ቶሆይ ኢዛ ዬጻና።
- 7 ጸሎታ ኦጌይ ሞሌ።  
     ኔኖ ሱሬዞ፥  
         ኔኒ ጸሎታ ኦጌ ሞሊሳሳ።
- 8 ኣቤት ጎዳዉ!  
     ኔ ዋጋ ኦጌራ ሄሜቲሽ  
     ኑኒ ኔና ሂደታ ኦሊደስ፤

- ኔ ሱንሐኔ ኔ ጊታቴሊ  
ኑ ዋዚናስ አሞ።
- 9 ታ ሸምፖፖ  
ኦማርሲ ኔና ላሞታዉስ፤  
ታ አያናይ ማላዶ  
ኔና ኮያዉስ፤  
ኔ ፒርዳይ ቢታ ቦላ ዪዳ ዋዴ  
ሳኣን ዴኢዛ አሳይ  
ጸሎቴላ ታማሪስ።
- 10 ኢታ አሳታስ ኪያ ኦሊኮካ፥  
ኢስቲ ጸሎቴላ ታማሪቴና።  
ሱሬ ቢታን ኢታ ኦሌቴስ፤  
ጎዳ ጊታቴላካ  
ኣኬኬቴና።
- 11 ኣቤት ጎዳዉ!  
ኔ ቄሴይ ጶቁ ጶቁ ጊዴስ።  
ኢስቲ ጊዲኮ ቤኤቴና፤  
ኔ አሳስ ኔ ሚሼቴዛይሳ  
ቤኤቶኔ ዬላቴቶ፤  
ኔ ሞርኬታስ ጊጊዳ  
ታማይ ኢስታ ሞ።
- 12 ኣቤት ጎዳዉ!  
ኔኒ ኑስ ሳሮቴላ  
ዮች ኦላዳሳ፤  
ኑ ኦሶ ኡባ ኔኒ ኦላዳሳ።
- 13 ኣቤት ጎዳዉ ኑ ጸሳዉ!  
ኔፔ ሃራ ኣላጋ ጸሳቲ  
ኑና ሃሪዳ፤  
ኑኒ ጊዲኮ ኔ ሱንላ  
ጸላ ቦንቾስ።
- 14 ኢስቲ ሃይቂዳ፤  
ሲሚዲ ሸምፖራ  
ፓጻ ዴኤቴና፤  
ኢስታ ሸምፖይ ሲሚ ዬና፤  
ኔኒ ኢስታ ቃጸያዳሳኔ  
ዳይሳዳሳ፤  
ኢስታ ሃሳኢሲዛ ሚሽ ኡባ

ፒታ ዳይሳዳሳ።

15 አቤት ጎዳዉ!

ኔኒ ካዎቴላ ዳርሳዳሳ፤

ኔኒ ዴራ ዳርሳዳሳ።

ኔኒ ቦንቼታዳሳ፤

ቢታ ዛዋ ኡባካ አሳዳሳ።

16 አቤት ጎዳዉ!

ኢስቲ ሜቶቲዳ ዎዴ ኔኮ ዪዳ፤

ኔኒ ኢስታ ሴሪዳ ዎዴ፥

ሳሱኪ ኔና ዎሴቴስ።

17 አቤት ጎዳዉ! ሻራ ማጫሲ

ሚጸን ሜቶቲዛ ማላኔ

ዋሲዛ ማላ

ኑኒካ ኔ ሲንላን

ሜቶቲዲ ዋሶስ።

18 ኑኒ ሻሪዶስ፤

ሚጸንካ ኡንኤቲዶስ፤

ጊዶ አቲን ጫርኮ ዬሊዶስ።

ኑኒ ሳኦስ አቶቴላ ኤሂቦኮ፤

ሳኦን ዲዛ ዴራካ ዬሊቦኮ።

19 ጊዶ አቲን ሃይቂዳ

ኔ አሳይ ፓጸና፤

ኢስታ አሃይካ ዴንዳና።

ኢንቴኖ ቢታ ጋርሳን ዲዛይቶ!

ዴንዲቴ ኡፋይሳን ዬጺቴ፤

ኔ ጸዛይ ቢታ ያኪሲዛ

ማላዶ ጸዛ ማላ

ሳኦይ ሚቲዳይታ ዛራ ጩታና።

20 ታ ዴሬዘ! ባ ኔ ኬሐ ጌላ፤

ኔ ፔንጌ ኔ ቦላ ጎርዳ፤

ኢዛ ሃንቆይ አጳና ጋካናስ

ጉላ ዎዴስ ቆቴታሻ።

21 ቢታ ቦላን ዲዛ አሳ

ኢስታ ናጋራ ጊሻስ

ቃጸያናስ፥

ጎዳይ ባ ዴኢዛሶፔ ኬዚዲ ዬስ።

ቢታይካ ባ ቦላን ጉኪዳ  
ሱላ ቆንጨሳና፤  
ሃይቂዳይታካ  
ሃይሳፌ ጉዬ ቆቱኩ።

## 27

- 1 ሄ ጋላስ ጎዳይ ሌዋታኔ ጌቴቲዛ  
ጸንጌቲዛ ሾሻኔ  
ጸጹቲዛ ሾሻ  
ባ ሚኖ፥ ጌታኔ ዋልቃማ  
ጌላ ማሻን ቃጸያና፤  
አባን ዲዛ ዋጋ ዶኣ  
ቃንጹሬላ ዬጋና።
- 2 ሄ ጋላስ፥ «ዋይኔ ሚሐ ቶኪዛ  
ሎኦሶዛስ ዬጸቴ!
- 3 ታኒ ጎዳይ ኢዛ ናጋይስ፤  
ታኒ ኡባ ጋላስ ሃሐ ኡሻይስ፤  
ኦማርሲኔ ጋላስ ኢዛ ናጋይስ፤  
ሄሳ ጌሻስ ኦኒኔ  
ኢዛ ቆሄና።
- 4 ታኒ ሃንቄቲኬ፤  
ታናራ ኦሌታናስ ኣጉንሒኔ  
ከንዲቾይ ከዚዳኮ  
ታ ኢስታ ኢሲ ቦላ ጹጋና!
- 5 ዋይኮ ታኮ ዪዲ ታና ባንታስ  
ቆቴቲዛሶ ከሴቶ፤  
ታናራ ጊጌቶ፤  
ኤ ታናራ ጊጌቶ» ጌቴታና።
- 6 ያና ጋላሳታን  
ያቆቤይ ጸጸ ዬዳና፤  
ኢስራኤሌይ ኣጫናኔ ጨያና፤  
ሂስቲን ኢስታ ኣይፊይ  
ሳኣ ኩማና።
- 7 ኢዛ ሾጨዳይታ ሾጨዳ ማላ  
ጎዳይ ኢዛ ሾጨዳ?  
ኢዛ ዋዲዳይታ ኢዚ ዋዲዳ ማላ  
ኢዛ ዋዲዳ?

8 ኦላኒኔ ዲኦን ኔ ኢዞ ቃጸያዳሳ፤  
 ኣርሼይ ሞኪዛ ባጋ ጫርኮይ  
 ጫርኪዛ ማላ  
 ዋልቃማ ጎቴ ጫርኮን  
 ኔ ኢዞ ጎዳዳሳ።

9 ያቆቤይ ያርሾ  
 ያርሺዛሶ ሹቻታ  
 ቦቂንታ ሹቻ ማላ  
 ጋጪ ሊቂሲሺን  
 ኣሺሮ ጌቴቲዛ  
 ኤቃ ጸሳይ ሚሰሌኔ  
 ኤጻኔ ጨዋሲዛ ሶሆታ  
 ኢሰቲ ዲዛሶሆታፔ ሾዲ ኦሊሺን  
 ሄ ጋላስ ሞሮይ ኣቶ ጌቴታና፤  
 ሄሲ ኢዚ ባ ናጋራ ዲጎይሳስ  
 ኩሜላ ኣይፌ ጊዳና።

10 ገምቤቲዳ ካታማያ ካይዛዱስ፤  
 ባዞ ቢታ ማላ  
 ኦሌቲዳሶ ጊዳዱስ፤  
 ማራቲ ሄን ሄሜቲዲ  
 ሄን ኢቻና፤  
 ኢዚ ሃጋታካ ፖቂ ማና።

11 ኢዚ ጸራይ ሜሊዲ ሜቃና፤  
 ማጫሳቲካ ሚጺ ኤላና፤  
 ኣኬካይ ባይንዳ  
 ዴሬ ጊዲዳ ጊሻስ  
 ኢዛ ሜዲዲይ  
 ኢዛስ ቃጴቴና፤  
 ኦሊዳይሲካ ኢዛ ማሬና።

12 ሄ ጋላስ ኤፊራዲሴ ሻፋፔ ሃሊ ባይንዳ ጊብጼ ሻፋ ጋካናስ  
 ጎዳይ ባ ካላ ቡካና፤ ኢንቴኖ ኢሰራኤሌ ኣሳቶ፥ ኢንቴ ኢሶይ ኢሶይ  
 ሺቃና።

13 ሄ ጋላስ ጊታ ዛይይ ፑኔታና፤ ኣሶሬን ዲኤቲዳይቲኔ ጊብጼን  
 ኡንኤቲዳይቲ ጉዬ ዬሩሳላሜ ሲሚ ዪዲ ጌሻ ዙማ ቦላ ጎዳስ  
 ጎይናና።

## 28

ኤፍሬሜስ አሜቲዳ ሴራ

1 ኤፍሬሜን ዲዛ ማፅቲዛይታስ፥

ኦቶሬቴላስ፥

ካላቻ ጊዲዳሪስ፥

ጨለላ ሾባ ሁኤን

ከፒ ጋ ኡቲዳ፥

ኢዛስ ቦንቾ ሴሎ ጊዲዳ

ሹላ ጨሻይስ፥

ዎይኔ ኡሻይ ኢስታ ዜሬላስ

ኦቶሬቴላስ ጊዲዳ ካታማይስ

አዬ አና!

2 ቤኢቱ፥ ጎዳስ ዎልቃማኔ

ሚሮ ጊዲዳ ኢሶይ ዳስ፤

ሄሲካ ሻቻ ኡሾ ማላ፥

ጳይሲዛ ጎቴ ጫርኮ ማላ፥

ዎልቃማ ዳምባላ ማላኔ

ዎልቃማ ኢራ ማላ

ዎልቃን ኢዚ ኢዘ

ዱጌ ቢታን ዬጋና።

3 ማፅቲዛ ኤፍሬሜ አሳታ

ኦቶሮ ካላቻይ

ቶሆን ዬጴታና።

4 ጨለላ ሾባ ሁኤን ከፒ ጋ ኡቲዳ

ኢዛስ ቦንቾ ሴሎ ጊዲዳ

ሹላ ጨሻያ፥

ካላ ሺሾፔ

ሲንላን ጋኪን

አሲ ቤኢዳ ማላ ጹጹ ኤኪዲ

ሄራካ ሚቲዛ

ባላሴ ማላ ጊዳና።

5 ሄ ጋላስ ኡባፌ

ዎልቃማ ጎዳይ

ባ አሳፔ ጫሻ አቲዳይታስ

ቦንቾ ካላቻኔ

ፑላ አኪሊሌ ጊዳና።

- 6 ኢዚ ፒርዲዛይታስ  
 ሱሬ ፒርዳ ፒርዲዛ ኢያና  
 ኦላ ካታማ ፔንጌፌ ዛሪዛይታስ  
 ዋልቃ ጊዳና።

ማላቲዛ ዩሁዳ ናቤታኔ ቄሴታ፥

- 7 ሃይቲ ዋይኔ ኡሹ  
 ኡዱዲ ዩጮቲቲስ፤  
 ማላሲዛ ኡሻን  
 ጋንዲጋሬቲስ።  
 ቄሴቲኔ ናቤቲ ማላሲዛ  
 ኡሻን ጋንዲጋርዳ፤  
 ዋይኔ ኡሻ ጋሶን  
 ዮኦይ ኢስታፌ ባሌቲዳስ፤  
 ማላሲዛ ኡሻን ጋንዲጋርዳ፤  
 ኣጁታ ሊኬራ ቤኤቲና፤  
 ፒርዳ ፒርዲሹ ጳጳቲቲስ።
- 8 ኢስታ ማዳ ኡባይ ጮሽ ጸላ፤  
 ጮሻን ሞሬቶንታሶይ  
 ዴና።

- 9 ኢስቲ፥ «ኢዚ ኦና ታማርሲዜ?  
 ኪታካ ኦስ ቆንጨሲዜ?

ማል ኣጊዳ ናይታሴዬ  
 ጳንፋ ዱሶ ናይታሴ?

- 10 ኣዛዞ ቦላ ኣዛዞ፥ ኣዛዞ ቦላ ኣዛዞ  
 ዋጋ ቦላ ዋጋ፥  
 ዋጋ ቦላ ዋጋ፥  
 ሃንካ ጉፋራ፥  
 ሄንካ ጉፋራ  
 ኦፊስ» ጋና።

- 11 ሂስቲኮ ሲንፋፌ  
 ጸሳይ ኣለጋታ ቃላኒኔ  
 ኢማፋታ ዶናን  
 ሃ ኣሳስ ሃሳያና።

- 12 ኢዚ ኢስታስ፥ «ሃና ሼሞፖሶ፤

- ዳቡርዳይ ሼምፖ፤  
 ሃና ሼምፖሶ»  
 ጌዳይ ኦናሴ?  
 ኢስቲ ጌዲኮ  
 ሲያና ኮዪቤቴና።
- 13 ሄሳ ጊሻስ ጎዳ ቃላይ  
 ኢስቲ ቢዲ ጉዬ ኩንዳና ማላ፥  
 ማዲንጸና ማላኔ  
     ዋጺማዴን ኦይኬታና ማላ፥  
 ዲኤታና ማላ  
 ኦዛዘ ቦላ ኦዛዘ፥  
     ኦዛዘ ቦላ ኦዛዘ፥  
 ዋጋ ቦላ ዋጋ፥  
     ዋጋ ቦላ ዋጋ ጌዲዲ፥  
 ሃን ጉሳራ፥  
 ሄን ጉሳራ ሃናና።

### ጸዮኔን ጉላ ሹች

- 14 ሄሳ ጊሻስ  
 ኢንቴኖ ዩሩሳላሜን  
 ዲዛ ኦሳ ሃሪዛ ቁልጪዛይቶ!  
     ጎዳ ቃላ ሲዪቴ።
- 15 ኢንቴ፥ «ኮኒ ሃይቆራ ጫቄቲዶስ፤  
 ዲፎራካ ሲጌቲዶስ፤  
 ዋርዶ ኑስ ዜምፖሶኔ  
 ቆቴቲዛሶ ኦሐዶስ፤  
 ዋልቃማ ቦሻይ ፒቲ ኤኪ ቢሼ  
     ኑና ቦቻናስ ዳንዳዬና»  
     ጌ ኦቶሬቲዳታ።
- 16 ሄሳ ጊሻስ ኡባ  
 ሃሪዛ ጎዳይ፥  
 «ቤኢቴ! ታኒ ጸዮኔን  
 ፓጩቲዳ ሹች፥  
 ዮቻ ሹች፥  
 ሚኖ ዮቻስ ጌዲዛ

- ቦንቹቲዳ ጉላ  
 ሹቾ ዋላና፤  
 ኢዛን አማኒዛይ ይላቱና።  
 17 ታኒ ሱሬ ፒርዳ ዋቆ ዋዶሮ፤  
 ጸሎቴላካ  
 ቱምቤ ማላ ኦላና፤  
 አንቴ ዋርዶ ዜምፖሶ ኦሊዳይሳ  
 ሻቻ ኢራይ ሜጫና፤  
 አንቴ ቆቴቲ አቲዘሶዛካ  
 ሃሊ ሚታና» ጌሰ።  
 18 አንቴ ሃይቆራ ጫቄቲዳ  
 ጫቆይ አታና፤  
 አንቴ ዱፎራ ሲጌቲዳ  
 ሲጋይ ላሌታና፤  
 ዋልቃማ ቦሻይ ፒቲ ኤኪ ቢሼ  
 አንቴናካ ፒቲ ኤኪ ባና።  
 19 ኢዚ ዪዳ ዋዴ ዋዴ  
 አንቴና ኤኪ ባና፤  
 ማላዶ ማላዶ፤  
 ቃማኔ ጋላሰ  
 አንቴና ፒቲ ኤፋና፤  
 ሃ ቃላ አንቴ አኬኪዛ ጊዲኮ  
 ሺሮ ቦላ ሺሮ ኤሃና።  
 20 ቶሆ ጮጎቲ ኢቾንታ ማላ  
 ሂጸይ ቃንላ፤  
 ጋሊ ማይአናሰ  
 አፋላይካ ጉላ።  
 21 ጎዳይ ፓራጸሜ ዙማን  
 ኦሊዳ ማላ፤  
 ባ ኦሶ፤ ባ አማላ ኦሶ፤  
 ሄሲካ ባ ኦራላ  
 ኦሶ አላናሰ ዴንደና።  
 ቃሴ ጌባኦኔ ዙሌን  
 ኦሊዳ ማላካ ኦላና።

22 ጎዳይ፥ ኡባፌ ዋልቃማ ጎዳይ

ኢዚ ቦሻ ቢታ ኡባ ቦላ  
 ኤሃናስ አዋጁ ዳይሳ  
 ታኒ ሲዪዳ ገሻስ  
 ሃኢ ኢንቴ ቂልጪዛይሳ አገቴ፤  
 አካይ ጊኮ ኢንቴ ቦላ  
 ቃሾይ ሚናና።

### ጾሳ አጼ ኤራቴል

- 23 ኤዘጊዲ ታ ዮቲዛይሳ ሲዪቴ፤  
 አኬኪዲ ታ ቃላ ሲዪቴ።
- 24 ጎሻንቻይ ካል ዜራናስ  
 ኡባ ዎዴ  
 ሄ ሶሆ ጎዪሼ ዴኢዜ?  
 ቃሴ ኢዚ ሄምኤ ሊቂሲሼኔ  
 ኡባቶ ፒዲሼ ዴኢዜ?
- 25 ጎሻ ሊቂሲዲ አሱታኔ  
 አኑጋ ዜሬኔ?  
 ገሰቴዛ ኢዛስ ገጊዳሶሆን፥  
 ባንጋ ኢዛስ ገጊዳሶሆን  
 አርዳ ኢዛስ  
 ገጊዳሶሆን ዜሬኔ?
- 26 ኢዛ ጾሳይ ኢዛ ታማርሴስ፤  
 ሱሬ ኦጌካ ኢዛ ቤሴስ።
- 27 አሱታይ ሎዳን ቡኬቴና፤  
 አኑጋይ ፓራ-ጋሬን ቡኬቴና፤  
 አሱታይ ጉፊን፥  
 አኑጋይ ቁሪ ሎዳን ቡኬቴስ።
- 28 ሶሎ ኡካናስ  
 ካሊ ጋጤቴስ፤  
 ሄሳ ገሻስ ኢሲ አሲ  
 ሜርናስ ካል ቡኬና፤  
 ካል ቡኪዛ ፓራ-ጋሬታ  
 ኢዛ ቦላራ ላጊኮካ  
 ካላ ጋጤቴና።
- 29 ሃይሲ ኡባይ ባ ዙሬን ማላሊሲዛዝ፥  
 ባ አጼ ኤራቴላን  
 ማላሊሲዛዝ ጊዲዳ  
 ኡባሬ ዎልቃማ

ጎዳፔ ሃኔሰ።

## 29

ዳዊቱ ካታማሰ አይ አና

- 1 ሃኔ ዳዊቱ ኔናን ዴኢዳ  
አርኤሌ ካታማዬ! \*  
ኔና አይ አና!

ላይላ ቦላ ላይላ ጉጂ፤  
ባአሌታካ ዛራ  
ዛራዳ ቦንቻ።

- 2 ጊዶ አቲን ታኒ  
አርኤሌ ካታማዮ ጊዶላና፤  
ኢዛ ዩካናኔ ዋሳና፤  
ኢዛ ታሰ ያርሾ  
ያርሺዛሶ ጊዶና።

- 3 ታኒ ኔ ዩሾን ዱንካናና፤  
ታ ኔ ዩሾን ጊምቤ  
ዩሻ አላና፤  
ኔ ዩሾን ሻኮ ኦላዳ  
ታ ኔና ኡንኤላና።

- 4 ኔኒ ዱጌ ዋሳና፤  
ቢታ ጋርሳፌ ፑዴ ሃሳያና፤  
ኔ ሃሳያይ ጉዱላ  
ጊዶፌ ኬዛና፤  
ኔ ጩንጉርሲ  
ሞይቲሌ ጩንጉርሳ ማላ  
ቢታ ጋርሳፌ ፑዴ ኬዛና፤  
ኔ ሃሳያይካ  
ጉዱላ ጊዶፌ ሳሱኬታና።

- 5 ጊዶ አቲን ዳር ኔ ሞርኬቲ  
ጉዱላ ሱላ ማላ፤  
ሜንጾ ኢታቲ ጫርኮን ቢዛ  
ሃፓ ማላ ጊዶና፤  
ቆፋይ ባይንዳ ዲሺን፤

- 6 ኡባፌ ዋልቃማ  
ጎዳይ ዳዳን፤

\* 29:1 ኢብራዊታ ቃላራ አርኤሌ ጉሲ ጾሳ ያርሾላሆ ጉሳ።

- ቢታ ቃላን፥  
 ጌታ ጨንጉርሳን፥  
 ጎቴ ጩርኮኒኔ ዋልቃማ  
 አባ ዳምባላን  
 ኡባ ሚዛ ታማ ላጮን ያና።
- 7 አርኤሌ ኦሊዛ ካዎቴላታ  
 ኡባ ወዳይ  
 ኢዚ ቦላኔ ኢዚ ሻኮ ቦላ  
 ዳፋ ዩጊዛይቲኔ ዶዲዛይቲ፥  
 አጉሞ ማላኔ ኦማርሰ በቴዛ  
 አጁታ ማላ ጊዳና።
- 8 ጋፊዳ አሲ አጉሞራ ሚሼ አቄሰ፤  
 ጌዶ አቲን ኢዚ  
 ጲሰኮፌ ዴንዲሺን  
 ጋፋይ አጎንታይሳ ማላ፥  
 ሳማቲዳ አሲ  
 አጉሞራ ኡዲሼ አቄሰ፤  
 ጌዶ አቲን ቤጊሺን  
 ዳቡራይኔ ሳሞይ  
 ኢዛ አጎንታይሳ ማላ  
 ጲዮኔ ዙማ ኦሊዛ  
 ካዎቴላታ ኡባ ወዳይ  
 ሄሳሶ ሃናና።

### ጸሓፊው አዛዝ ኢጶይ ኤሂዛ ቂጻቲ

- 9 ዳማቲዲ ማላሌቲቲ፤  
 ኢንቴና ኢንቴርካ ቆቂሲዲ  
 ቆቂ ጊዲቲ።  
 ጌዶ አቲን ዋይኔ ኡሹ  
 ኡዮንታ ጮ ማሶቲቲ፤  
 ማሶሲዛ ኡሹ ኡዮንታ  
 ዲሼ ጋንዲጋርቲ።
- 10 ጎዳይ ኢንቴ ቦላ ዋልቃማ  
 ጲሰኮ ዩጊዳሰ፤  
 ኢንቴ ናቤታ ኣይፌ ጎዚዳሰ፤  
 አጁታ በኢዛይታ  
 ሁኤ ጉሉንቲሲዳሰ።

11 ሃ አጁታይ ኢስታስ ጸላ ማጸፋ ጊደን ጎርዴቲ ዲዛ ቃላ ማላ ጊዲዴስ። ሃ ጸላ ማጸፋ ናባባናስ ዳንዳይዛ አሲ፥ «ሾቤ ኑስ ናባባ» ጊዲ አንቴ አሚኮ፥ ኢዚ አንቴስ፥ «ጎርዴቲዳ ጊሻስ ታኒ ናባባናስ ዳንዳይኬ» ጋና።

12 ቃሴ ጸላ ማጸፋ ናባባ ዳንዳዮንታ አሳስ፥ «ሾቤ ኑስ ናባባ» ጊዲ አንቴ ኢዛስ አሚኮ ኢዚ አንቴስ፥ «ታ ናባባ ዳንዳይኬ» ጋና።

13 ጎዳይ፥  
«ሃይሲ ዴሬይ ዶናን ጸላ  
ታኮ ሸቄስ፤  
ባ ሜቲርሻን ጸላ  
ታና ቦንቹስ፤  
ጊዶ አቲን ኢዛ ዋዚናይ  
ታፔ ሃኮን ዴስ።  
ኢስቲ አሲ ታማርሲዳኔ  
አሲ ዋሒዳ ዋጋን  
ታስ ጎይኔቴስ።

14 ሄሳ ጊሻስ ታኒ ሃ አሳ ቦላ  
ማላሊሲዛ ሚሻ ቦላ  
ማላሊሲዛ ሚሻ ኦላሽ  
ዛራ ዛራ ኢስታ ማላሊሳና፤  
አጽ ኤራንቻታ  
ኤራቴሲ ጳያና፤  
አኬካንቻታ አኬካይካ  
ፔንቲ ባና» ጊዴስ።

### ሲንላፌ ያና ሂዶታ

15 ባንታ ሃልቾ  
ጎዳፔ ጌንፋናስ  
ዱጌ ጨማ ኦላን  
ዋዲዛይታስ  
ባንታ ኦሶ ጵማን  
ኦሲዛይታስ  
«ኑና ኦኒ ቤአኔ?  
ኑና ኦኒ ኤራኔ?»  
ጊዛይታስ አዬ አና!

16 ኢንቴ ዮኦታ ላሚ ዩጌታ፤

ማናታ ኡርቃ ማላ ጸሌታ!  
 ሜዲቲዳይሲ  
 ሜዲዳይሳ፥  
 «ኢዚ ታና ሜዲቤና» ጊዜ?  
 ማና ሚሺ ባና ሜዲዳይሳ፥  
 «ኢዚ ኣይኮካ ኤሬና» ጊዜ?

- 17 ሊባኖሴይ ላሜቲዲ  
 ኣራዳ ጋዴ ጊዳናስ፥  
 ኣራዳ ቢታይ ላሜቲዲ  
 ዋራ ጊዳናስ  
 ጉላ ዋዴይ  
 ኣቲዳስ ጊዳኔ?
- 18 ሄ ጋላስ ቱሌይ  
 ጸላ ማጸፋ ቃላ ሲያና፤  
 ቆቄ ኣይፌቲካ ሻሩማፔኔ  
 ጳማፔ ሻኬቲዲ ጸላና።
- 19 ኣሽኬቲ ጎዳን፥  
 ሂዩሳቲ ኢሰራኤሌ ጌሻን  
 ዛሪ ዛሪ ኡፋዬታና።
- 20 ሜንጾ ኢታቲ ኡባይ ዉራና፤  
 ቂልጨዛይቲ ቲሞኢ ጋና፤  
 ኢታ ኦላናስ  
 ዛማዲ ኡቲዳይቲ ጳያና።
- 21 ኣስ ዮኦን ሞራንቻ ኬሲዛይቲ፥  
 ሺሎታን ሞቲቲዛይሳ ቦላ  
 ዋጺማዴ ዋጺዛይቲ፥  
 ዋርዶ ማርካን ቱማቴላ  
 ጸሎታፔ ቦንቂዛይቲ ጳያና።
- 22 ሄሳ ጊሻስ ኣብራሃሜ ዋዚዳ  
 ጎዳይ ያቆቤሶስ፥  
 «ያቆቤይ ሃይሳፌ  
 ጉዬ ዬላቴና፤  
 ኢዛ ሲንሒካ ላሜቲና።
- 23 ባንታ ጊዶን ታ ኩሼ ኦሶ ጊዲዳ  
 ባንታ ናይታ ቤኢሺ  
 ታ ሱንላ

- ጌሻቴላን ናጋና፤  
 ኢስቲ ያቆቤ ጌሻዛ  
 ጌሻቴላ ኤራና፤  
 ኢስራኤል ጸሳ ሲንላን  
 ያሻቴላን ኤቃና።  
 24 ኣያናን ባሊዳይቲ  
 ሰሚዲ ኣኸካና፤  
 ዙዙሚዛይቲካ  
 ቲሚርቲ ኤካና» ጌሰ።

## 30

- ጌብጹራ ጫቄቲዳ ሃዳ ጫቆ  
 1 ጎዳይ፥ «ማካላንቻ ጌዲዳ ናይታሰ  
 ኣዬ ኣና!  
 ታፔ ጌዶንታ ቆፋ ካሌቴሰ፤  
 ታ ኣያናፔ ጌዶንታ  
 ጫቆ ጫቄቴሰ፤  
 ናጋራ ቦላ ናጋራ ጉጂቴሰ።  
 2 ታና ዞሬ ኣይቐንታ  
 ጌብጹ ዎጂቴሰ፤  
 ካዎ ፓሮኔይ ኢስታሰ  
 ጎንዳሌ ጌዳና ማላ  
 ጌብጹ ኩዋን ኣታና ኮዬቴሰ።  
 3 ጌዶ ኣቲን ፓሮኔ  
 ጎንዳሌቴላ  
 ኢስታሰ ካወሻቴላ ጌዳና፤  
 ጌብጹ ካዎን ኣቴላ  
 ኢስታ ቦላ ዬላ ኤሃና።  
 4 ኢስታ ሹሜቲ ጸናሴን ዲኮካ፥  
 ኢስታ ከቲዳይቲ  
 ሃኔሴን ዲኮካ፥  
 5 ኢስታሰ ዬላቴላኔ  
 ካወሻቴላ ጸላ ጌዳና ኣቲን  
 ማዶ ዎይኮ ዎጂ  
 ኢስታሰ ኤሆንታ  
 ኣይኮ ጎኣካ ኢስታሰ

ኢሞንታ አሳታ ጋሶን  
ኡባይካ ዩላታና» ጌሰ።

6 ኔጌቤን ዲዛ ሜደሳታ ጊሻሰ ጎዳይ ዮቲዳ ቃላይ  
ዎዳላ ጋሞቲኔ

ማጫ ጋሞቲ ዲዛሶን፤

ማርዜራ ዲዛ ሾሻቲኔ

ጸንጌቲዛ ሾሻቲ ዲዛሶን፤

ሜቶይኔ ጨጨይ ኩሚዳ ቢታራ

አጁ ቢዲ፤

ኢሰቲ ጎኦንታ ዳሬታኮ፤

7 ኢዚ ማደሰ

ሙሌካ ጎኦይ ባይንዳ

ዳሬ ኢሰቲ ጊብጼ ባና፤

ሄሳ ጊሻሰ ታኒ ኢዚ ሱንፋ

«አይኮካ ጎኦንታሮ ኤራኣቤ»

ጋ ጴይጋና።

**አዛዜቶንታ ካዎቴላታ**

8 ሃኢ ባ፤ ሳሌዳን ኢሰታሰ ጸፋ፤

ጸፋ ማጸፋ ቦላካ ጫዳ፤

ሄሲ ቡሮፔ ያና ዎዳታን

ሜርናሰ ማርካ ጊዳና።

9 ሃይቲ ጎዳ አዛዞ

ሲያና ኮዮንታይቲ፤

ማካላንቻ ዳሬኔ

ባሌሊዛ ናይታ።

10 አጁታ ቤኢዛይታ፤

«ሃይሳፌ ጉዬ አጁታ

ቤኦፒቲ» ጋና፤

ናቤታ፤ «ሃይሳፌ ጉዬ ኑሰ

ቱማ ቲንቢቲ ዮቶፒቲ፤

ኑና ኡፋይሲዛዚኔ

ሚቺዛዝ ዮቲቲ።

11 ሃይሳ ኦጋፔ ኪቺቲ፤

ሃ ዎጋ ኦጋፔ ሃኪቲ፤

ኢሰራኤሌ ጌሻራ ኑና

ቲራን ጋሶፍቲ» ጋና።

12 ሄሳ ጊሻሰ ኢሰራኤሌ ጌሻይ፤

«አንቲ ሃ ቃላ ካጁዳ ገሻሰ፤  
ጌጌን አንቲ አማኔቲዳ  
ገሻሲኔ  
ባሌሶን ዘምፒዳ ገሻሰ፤

13 ሃይሲ ሃ ናጋራዚ  
ጳልቄቲ ኩንዳናኔ  
ቆፖንታ ዲሺን ኩንዲዛ  
ጌታ ገምቤ ማላ  
ኢስታሰ ጌዳና።

14 ሜቄሬቶይሳ ጌዶፌ  
ታማ ቦንቆ ካሺዛ ኮንኣይ፤  
ሃሌ ዱቂዛ ኮንኣይ  
ጳያናሼ ጋካናሰ፤  
ኣይኮይካ ኣቶንታ ቲፌቲዛ  
ማና ሚሻ ማላ

ቲፌታና» ጌሰ።

15 ኡባ ሃሪዛ ጎዳይ፤  
ኢሰራኤሌ ጌሻይ፤  
«አንቲ ታኮ ሲሞኒኔ  
ታናን ሽምፖን ኣታና፤  
ዎፓኒኔ ኣማኖን  
አንቲ ሚናና፤  
አንቲ ጌዲኮ ሄሳሶ  
ኦሊቤኬታ።

16 ቃሴካ፤ «ቺ! ኑኒ  
ፓራን ኡቲ ባቃታና ጌዴታ፤  
ሄሳ ገሻሰ አንቲ ባቃታና።  
ዛሪዲካ አንቲ፤  
ኅኒ ፒላታ ፓራን  
ኬሲ ኤኪ ባና ጌዴታ፤  
ሄሳ ገሻሰ አንቲና  
ዬዴሊዛይቲ  
ፒላታታ ጌዳና።

17 አንቲ ዙማ ሁኤን  
ኤቂዳ ባንዲራ ማላ  
ዙምቡላታ ጴራን ኤቂዳ  
ማላታ ማላ  
ጌዲ አንቲ ኣታናሼ ጋካናሰ

ኢሲ አሳ ማንዳላን 1,000  
 አሲ ባቃታና፤  
 ኢቻሽ አሳ ማንዳላን  
 አንቴ ኡባይ ባቃታና» ጌሰ።  
 18 ጊዳ አቲን ጎዳይ አንቴሰ  
 ኪያ ኦላናሰ ናጌሰ፤  
 አንቴና ባ ቃጴቴላ  
 ቤሳናሰ ዴንዴሰ፤  
 ጎዳይ ቱሙ ፒርዲዛ  
 ጸሳ ጊዲዳ ገሻሰ  
 አማኔቲዲ ኢዛ ናጊዛይቲ  
 አንጃቲዳይታ።

### ጸሳ ዴራ አንጃቴላ

19 አንቴኖ ዩሩሳላሜን ዴኢዛ ጸዮኔ ዴሬዘ! ሃይሳፌ ሲንፋን  
 አንቴ ዩኬኬታ፤ አንቴ ኢዛኮ ዋሲሺን ኢዚ አንቴና ዋኒ ማሬኔ?  
 አንቴ ዋሶ ኢዚ ሲዩዲ አንቴሰ ኤሶን ዛሮ አማና።  
 20 ጎዳይ አንቴሰ ዋዬ ካሊኔ ሜቶ ሃላ አሚኮካ ሃይሳፌ  
 ጉዬ አንቴ አሰታማሬይ አንቴፌ ቆቴቴና፤ አንቴ አይፊቲካ አንቴ  
 አሰታማሬዛ ቤኣና።  
 21 አንቴ ሃዲርሰ ዋይኮ ኡሻቾ ጊኮ አንቴ ጉዬራ፥ «ኦጌዚ  
 ሃይሳ፤ ኢዛራ ቢቱ» ጊዛይሳ አንቴ ሃይሊ ሲያና።  
 22 ሄሳፌ ቢራን ሜሼቲዳ አንቴ ኤቃ ጸሳታኔ ዋርቃን ሜሼቲዳ  
 ሚሰሌታ አንቴ ዋራና፤ «ኦፔ ሃኪቱ» ጊዲ ቱና ጫርቃ ማላ አንቴ  
 ዋራ ዩጋና።  
 23 ኔ ዜሪዳ ካላሰ ኢዚ ኢራ አማና፤ ቢታፌ ሞኪዳ ካላይ  
 ሙሩታኔ ዳሮ ጊዳና። ሄ ዋዴ አንቴ ሜሄይ አሆ ዴምባን ሄሜታና።  
 24 ጎሻ ቦራቲኔ ሃሬቲ ባካን ቡኪ ሱራጌቲዳ ሃርቆኔ ባሶ ማና።  
 25 አሳይ ዉሪዛ ዋልቃማ ጋላሳን ሚጸቲ ላሌቲሺን ጊታ ዙማታ  
 ኡባታ ቦላፌኔ ዙምቡላታ ኡባታ ቦላፌ ዴጌ ሃሊ ጎጋና።  
 26 ጎዳይ ሜቂዳ ባ ዴራ ኮሊሺን፥ ማዲንሊዳይሳ ፓሊሺን፥  
 አጊናይ አርሼ ማላ ፖኣና። አርሼሰ ኢሲ ጋላሳ ፖኦይካ ላፑን  
 ጋላሳ ፖኦ ማላ ጊዳና።

### አሶሬ ቃጸዬቴላ

27 ቤኢቲ፥ ጎዳ ሱንላይ  
 ኤጺዛ ሃንቆራ፥  
 ሻራ ማላ ጺፒ ጊዳ ጩዋራ  
 ሃኮፔ ያና፤

- ኢዛ ሜቴርሻቲ ሃንቆን ኩሚዳ፤  
 ኢዛ ኢንጸርሳይካ  
 ጹጊዛ ታማ ማላ።
- 28 ኢዛ ፔሮይካ ቆጼ ጋኪዲ  
 ሜጪ ኤፊዛ ኪጸ ሃላ ማላ፤  
 ካዎቲላታካ ጳይሶ  
 ዛይዛሬን ዛይዛሬስ፤  
 ኣሳ ዶናን ኦጌ ባሌሊዛ  
 ቢጸላ ባርሴስ።
- 29 ኦማርስ ጌሻ ባኣሌ  
 ኢንቴ ቦንቲሼ  
 ዩጲዛይሳሶ ኢንቴ ዩጸና፤  
 ጎዳ ዙማኮ ኢስራኤሌ ዛላኮ  
 ኣሳይ ሱሱልኤ ሱሱልኢሼ  
 ኡፋይሳን ኬዚዛይሳሶ  
 ኢንቴ ዎዚናይ ኡፋዬታና።
- 30 ጎዳይ ኤጲዛ ሃንቆኒኔ  
 ሚዛ ታማን፥  
 ጎቴ ጫርኮኒኔ ዳዳን፥  
 ሻቻ ሹቻን፥  
 ቲማይ ኩሚዳ ባ ጩንጉርሳ  
 ኣሳ ሲሳና፤  
 ዎጲሼ ባ ቄሳ ኢዚ ቤሳና።
- 31 ጎዳ ጩንጉርሲ  
 ኣሶሬ ዳጋንሳና፤  
 ኢዛ ጉፌይካ ኢስታ ሾጫና።
- 32 ጎዳይ ኢስታ ቦላ  
 ዩጲዛ ቂጻቲ ጉፌ  
 ኡባይ ካራቤ ገሪሳኒኔ  
 ዲላ ገሪሳን  
 ኣዛቤቲዳይሳ፤  
 ኢዚ ባ ዎልቃ ኦላን ቤሲዲ  
 ኢስታ ሾጪዴስ።
- 33 ቤኒ ዎዴፔ ዶሚዲ  
 ቶፊቲ ጌቲቲዛ  
 ጹጊዛሶይ ጊጌቲ ኡቲዴስ፤  
 ካዎዛሰካ ጊጌቲ ኡቲዴስ፤  
 ጹጋና ጎንጎሎዚካ

አሆኔ ጨማ፤  
 ኢዛ ጊደን ዳሮ ታማይኔ  
 ኤጸና ሚሊ ዴሰ፤  
 ጎዳ ፔሮይ ዲኔ ታማ ማላ  
 ኤሊ ኬሳና።

## 31

ጊብጾን አማኔተዛይታስ አዬ አና

<sup>1</sup> ፑዴ ኢስራኤሌ ጌሻኮ ጸሎንታይታስ፥  
 ጎዳፔ ማዶ ኮዮንታይታስ፥  
 ማዶ ዴማናስ  
 ዲጌ ጊብጾ ዋጂዛይታስ፥  
 ፓራ-ጋሪታ ዳሮቴላኒኔ  
 ባ ፓራ ሚኖቴላን  
 ጨቁተዛይታስ  
 አዬ አና።

<sup>2</sup> ኢዚ ጊዲኮ አጵ ኤራንቻ፤  
 ኢዚ ባሽ ኤሃና፤  
 ባ ቃላካ ላሜና፤  
 ኢታ ኦሊዛይታ ቦላኔ  
 ቆሆ ኦሊዛይታ  
 ማዲዛይታ ቦላ  
 ኢዚ ዴንዳና።

<sup>3</sup> ጊብጾ አሳይ አሳፔ አቲን  
 ጸስ ዴቴና፤  
 ኢስታ ፓራቲካ አሾፔ አቲን  
 አያና ጊዴቴና።

ጎዳይ ባ ኩሼ ሚጨዛ ዋዴ  
 ኢዛ ማዲዛዴይ ቋጵታና፤  
 ማዴተዛዴይካ ኩንዳና፤  
 ናሞኣይካ ኢሲፌ ጳያና።

<sup>4</sup> ጎዳይ ታስ፥ «ጋሞይ ዋይኮ  
 ዋዳላ ጋሞይ ሜሄ ኦይኪዲ  
 ዳሮ ሄንላንቻቲ  
 ጸይጌቲ ሽቂዲ  
 ኢዛ ቦላ ዪኮ ኢስታ ዋሶይ  
 ኢዛ ያሺሶንታይሳ  
 ኢስታ ዋሶይ

ኢዛ ዳጋንጥንታይሳ ማላ  
ኡባፌ ዋልቃማ ጎዳይ  
ዙማ ቦላኔ ዙምቡላታ ቦላ  
ኦላስ ዋቆና።

- 5 ካፎይ ቦላራ አላንፊዛ ማላ  
ኡባፌ ዋልቃማ ጎዳይ  
ዬሩሳላሜ ካማና፥  
ናጋናኔ አሻና፤  
ኢዚ ቦላራ አቋዲ  
ኢዙ አሻና» ጌሰ።

- 6 ኢንቴኖ ኢሰራኤል አሳዞ!  
ኢንቴ ኬሂፔ  
ማካሊዳይሳኮ ሲሚቲ።

- 7 ሄ ዋዴ ናጋራይ ኩሚዳ  
ኢንቴ ኩሼቲ ቢራፔኔ  
ዋርቃፌ ኦሊዳ ኤቃ ጸሳታ  
ኢንቴ ኡባይካ ዋራ ዩጋና።

- 8 «አሶሬይ አሳ  
ማሻ ጊዶንታ  
ማሻን ሃይቃና፤  
አሾ ማይኢዳዴ  
ማሻ ጊዶንታ  
ሃራ ማሻይ ኢዛ ማና፤  
ኢዚ ጊላ ማሻ ሲንፋፌ ባቃታና፤  
ናቴላቲ ዶሳይ ባይንዳ  
ዋልቃሉን ኦላና።

- 9 ሚኖ ሚጸይ ሺሮ ጋሶን ኩንዳና፤  
ኦላ ጋዳዋቲካ  
ኦላ ባንዲራ ቤኢዲ  
ዳጋማን ኩማና»  
ጌሰ ታማይ ጸዮኔን፥  
ታማ ጮጮይ  
ዬሩሳላሜን  
ዲዛ ጎዳይ።

## 32

- ጸሎቴላን አይሲዛ ካዎ  
 1 በኢቴ፥ ካዎይ ጸሎቴላን ካዎታና፤  
 ሃሪዛይቲካ  
 ሱሬ ፒርዳን ሃራና።
- 2 አሲ ሁኢን ሁኢን  
 ጫርኮፌ ገሚዛሶሆ፥  
 ጎቴፔካ ባቃቲ  
 አቲዛሶሆ ጊዳና፤  
 ባዘ ቢታን  
 ሃላ ፑልቶ ማላ፥  
 ሳሜቲዳ ቢታን ዎጋ ዛላ  
 ኩዎ ማላ ጊዳና።
- 3 ጸሊዛ አሳታ አይፌይ  
 ሃይሳፌ ጉዬ ቂሊምኤና፤  
 ሲዪዛይታ ሃይላ  
 በጊዳ ኤዘጋና።
- 4 ታፒታፒዛይታ ዎዚናይ  
 ኤራናኔ አኬካና፤  
 ዴዶቲዛይታ አንጻርሲካ  
 ቢርሼታና፤  
 ጌሺዳካ ሃሳናና።
- 5 ሃይሳፌ ጉዬን ኤያይ  
 ጌታ አሰ ጌቴቴና፤  
 ዎጋይ ባይንዳ አሲ ቦንቹቴና።
- 6 ኤያይ ኤያቴላ ሃሳዬሰ፤  
 ኢዛ ዎዚናይ ኢታቴላ  
 ዩሺ ቆፔሰ፤  
 ጸሳሰ ያሻቴላ  
 ባይንዳ ሚሽ ኦሌሰ፤  
 ጎዳ ቦላ  
 ባላ ቃላ ሃሳዬሰ፤  
 ጋፊዳይሳሰ ካላ ኢሜና፤  
 ሳሜቲዳይሳሰ ሃላ ኢሜና።
- 7 ዎጋይ ባይንዳ አሳታ  
 ሂላቴላ ኢታ፤  
 ሜቶታንቻታ ማጋናይ ሱሬ ጊዳኮካ  
 ሂዬሳታ ዎርዶራ ጳይሳናሰ

ኢታቴላን የሺ ቆፔሰ።  
 8 ጌታ አሳሰ ቆፋይካ ጌታ፤  
 ባ ጌታቴላ ኦሶን  
 ሚኒ ዴኤሰ።

ፒርዳፌ ጉዬ ያና ኢንጃ ዴኦ

9 ኢንቴኖ ኦቶርይ ቱጨዳ ማጫሳቶ!  
 ዴንዲቴ፤ ታ ጊዛዝ ሲዪቴ፤  
 ኢንቴኖ ባዲ ጊ ኡቲዳ  
 ማጫ ናይቶ!  
 ታኒ ኢንቴሰ የቲዛይሳ ኤዘጊቴ።  
 10 ላይላይ ቡር አዲዳ ማላ፥  
 ኢንቴ ባዲ  
 ጊ ኡቲዳይቲ ኮኮራና፤  
 ዋይኔ ቱራይ አይፌ ኢሜና  
 ዲማ ዲማ አይፌ  
 ኢንቴ ሺሺዛ ዋዴይ ዬና።

11 ኢንቴኖ ኦቶርይ  
 ቱጨዳ ማጫሳቶ! ኮኮሪቴ።  
 ኢንቴኖ ባዲ ጊዳ  
 ማጫ ናይቶ!  
 ሂርጋን ጋጂጋጂቴ።  
 ኢንቴ ማይኢዳ ማይኦ  
 ቃሪ ዬጊቴ፤  
 ኢንቴ ጸሳን ማቃ ዳንጨቴ።

12 አራዳ ቢታ ጊሻሰ  
 ኢንቴ ቲራ ኢጨቴ፤  
 አይፊዛ ዋይኔ  
 ሚላ ጊሻሰ ጨጨቴ፤

13 ታ ዴራ ቢታ ጊሻሰ፥  
 ኦጉንሊኔ ኪንዲቾይ  
 ሞኪዳ ቢታ ጊሻሰ፥  
 ሆምቦጩላን ኢሰታን ጉፒዛ  
 ኬላታ ኡባ ጊሻሰ፥  
 ሆምቦጩላን ኢዚን ጉፒዛ  
 ካታማይሰ ዬኪቴ።

14 ሚጻቲ ካይዛና፤

ዳር ሺሮቲዛ ካታማያ  
 ዲሚ ጋና፤  
 ሚጽቲኔ ቃቶቲ ሜርናስ ጎንጎሎ፥  
 ሃርዲዳቲ ጉፒዛሶሆኔ  
 ወዴይ ሄሜቲዛሶ ጊዳና።

- 15 ሄሲካ ሃናናይ ኢያናይ ኑስ  
 ቦላፌ ጉካናሼ፥  
 ባዞ ቢታይ ኣራዳ ጊዳናሼ፥  
 ኣራዳ ቢታይ ዋራ  
 ሚሳታናሼ ጋካናሳ።
- 16 ሄሳፌ ጉዬ ባዞ ቢታን  
 ሱሬ ፒርዳይ ዴኣና፤  
 ኣራዳ ቢታንካ  
 ዲሎቴሊ ዳና።
- 17 ዲሎቴላ ኣይፌይ ሳሮቴላ፤  
 ዲሎቴላ ኦሶይ ዋፓኔ  
 ሜርናስ ኣማኔቴላ ጊዳና።
- 18 ታ ዴሬይ ሳሮይ ዲዛሶን፥  
 ኣማንሊዛሶን፥  
 ዋፓይ ዲዛሶን ዋፑ ጊ ዳና።
- 19 ሻቺ ዋራ ኩራኪኮ፥  
 ካታማይካ ሙሌራ ኩንዲኮ፥
- 20 ሻፋይ ዲዛሶን ዲዛሶን  
 ካላ ዜሪዛይቶ፥  
 ኢንቴ ቦራታኔ ሃሬታ  
 ሂርጋይ ባይንዳ ሄሚዛይቶ፥  
 ኢንቴ ኣይ ማላ  
 ኣንጄቲዳይታ ጊዳንዴቲ!

## 33

ማዶ ዴማናስ ዋሲዳ ዋሳ

- 1 ኔስ ጳዮንታ ዳሼ  
 ሃራ ጳይሲዛይሶ!  
 ኔስ ኣዬ ኣና!  
 ኔና ኣሊ ኢሞንታ ዲሺን  
 ሃራ ኣላ ኢሚዛይሶ!  
 ኔስ ኣዬ ኣና!

- ኔኒ ጳይሶ አገዳ ዋዴ  
 ኔ ጳያና፤  
 ኔኒ አላ አሞ አገዳ ዋዴ  
 ኔና አሊ አማና።
- 2 አቤት ጎዳዉ! ኔና ማራ፤  
 ኔኒ ኔና ሂዶታ ኦሊዶስ፤  
 ማላዶ ማላዶ ኑስ  
 ዋልቃ ገዳ፤  
 ሜቶ ዋዴካ  
 ኔና አሺዛዴ ገዳ።
- 3 ኔ ጨንጉርሳይ ዳዳ ማላ  
 ጉሚዛ ዋዴ ዴሬይ ባቃቴስ፤  
 ኔኒ ዴንዳ ኤቁዛ ዋዴ  
 ካዋቴላቲ ላሌቴቴስ።
- 4 ካዋቴላቶ!  
 ቦሌይ ሺቁዛ ማላ  
 አንቴፌ ዲኤቲዳይሲ ሺቃና፤  
 ጉሞባሮይ ጉፒዛ ማላ  
 አሳይ ኢዛ ቦላ ዲርባታና።
- 5 ጎዳይ ቦላ ሳሎን ዴኢዛ ገሻስ፤  
 ቶቁ ቶቁ ገዴስ፤  
 ኢዚ ጸዮኖ ሱሬ ፒርዳኒኔ  
 ጸሎቴላን ከንላና።
- 6 ኢዚ ኔ ዲዛ ላይላ ኡባን  
 አማንሊዛ ዮች፤  
 አቶቴላ፤ አቶ ኤራቴሊኔ  
 ኤራቴላ ገዳና፤  
 ጎዳስ ያሻቴሊ  
 ሃይሳ ሃ አቆታታስ  
 ቁልፔ ገዳና።
- 7 ቤኢቴ፤ ኢስታ ጎባ አሳቲ  
 ኦጌታን ዋሴቴስ፤  
 ሲጋቴላስ ኪቴቲዳይቲካ  
 ጫሞ ዬሆ ዬኬቴስ።
- 8 ዋጋ ኦጌቲ ሳሚዳ፤  
 ኦጌራ ካንሊዛይ ዴና።  
 ቃቺዳ ቃላይ ላሊቲዴስ፤  
 ዘሪዛይቲ ካዴቲዳ፤

- ቦንቹቲዛይካ ዳና።  
 9 ቢታያ ዩካዱሲኔ ገልቃዱስ፤  
 ሊባኖሴይ ዩላቲዲ ሹሊዳስ፤  
 ላሻሮኔይ ኣራቤ ማላ  
 ባዘ ገዳዱስ፤  
 ባሳኔይኔ ቃርሜሎሴይ  
 ባንታ ሃይል ቆቆፊዳ።

ጸሓ ኢጲዛይታስ ኢሜቲዳ ሴራ

- 10 ጎዳይ ካዎቴላታሲ፥  
 «ሃኢ ታኒ ዴንዳና፤  
 ሃኢ ታኒ ቦንቹታና፤  
 ሃኢ ታኒ ቶቁ ቶቁ ጋና።  
 11 ኢንቴ ኡቱላ ሻሪዲ ሱላ ዩሊዳታ።  
 ኢንቴ ሼምፒዛ ሼምፖይ  
 ኢንቴና ሚዛ ታማ።  
 12 ዴሬይ ቦቂንታ ኬዚዛ ሹቻ ማላ  
 ታማን ጹጌታና፤  
 ቃሴካ ኣጉንላ ቱሻ ማላ  
 ታማን ኤጻና።  
 13 ኢንቴኖ ሃኮን ዴኢዛይቶ!  
 ታኒ ኦሴዳይሳ ሲዩቴ፤  
 ማታን ዲዛይቶ!  
 ታ ዎልቃ ኤሪቴ» ጌሰ።

- 14 ጲዮኔን ዲዛ  
 ናጋራንቻቲ ዳጋሚዳ፤  
 ጸሲ ኢሰታስ ባይንዳይቲ ባቢዲ፥  
 «ኑ ጋርሳፌ ጸጊዛ ታማራ  
 ዳና ዳንዳይዛይ ኦኔ?  
 ሜርና ታማራ  
 ዳና ዳንዳይዛይ ኦኔ?» ገዳ።  
 15 ጲሎቴላን ሄሜቲዛይ፥  
 ሱሬ ሃሳይዛይ፥  
 ባሌሶን ቤቲዛ  
 ዎጼ ካጲዛይ፥  
 ጉቦ ኤኬናፔ  
 ባ ኩሼ ሺሺ ኤከዛይ፥

- እስ ዎጃና ዙፔቲዛይታ ዘሬ  
 ሲያናፔ ባ ሃይህ ቱጪዛይ፥  
 ኢታ ቤያናፔ  
 ባ ኣይፌ ቂለምኢዛይ፥  
 16 ሃሳዴይ ቶቃሶሆን ዳና፤  
 ዙማ ሚጻይ ኢዛስ ሺቂ  
 ኣቲዛሶ ጊዳና፤  
 ኢዛስ ቁማይ እሚታና፤  
 ሃሊካ ኢዛስ ፓጮና።

### ቦንቾይ ኩሚዳ ሲንሓራ ያና ላይህ

- 17 ኔ ኣይፌቲ ካዎዛ ፑላቴህ ቤኣና፤  
 ሃኮን ሚጮቲ ዲዛ  
 ቢታካ ቤኣና።  
 18 ቤኒ ዋዬይ ኔስ ቆፌቲሺን ኔኒ፥  
 «ዋና ሃላቃዚ ኣዋ ቢዴ?  
 ገራ ኤኪዛይሲ ኣዋ ቢዴ?  
 ሻኮዛ ኣላፌዚ  
 ኣዋን ዲዜ» ጋና።  
 19 ሄይታንቲ ቃጵታይ ባይንዳ ኣሳ፤  
 ኢስታ ሃሳያይ  
 ኣሳስ ጌሎንታይታኔ  
 ኢስታ ኢንጻርሲ ዴዶቲዛይታ፤  
 ሃይሳፌ ጉዬ  
 ኢንቴ ኢስታ ቤዬኬታ።  
 20 ኑ ባኣሌታ ኢዚን ቦንቾዛ  
 ጸዮኔ ካታማዮ ቤኢቲ!  
 ሳሮን ዲዛሶሆዮ፥  
 ቃጸንታ ዲንካኔ ጊዲዳር፥  
 ኢዚ ቶሌይ ሾዴቶንታር፥  
 ኢዚ ዎዶሮታፔ  
 ኢሲናካ ዱጸንታር  
 ዬሩሳላሜ ካታማዮ  
 ኔ ኣይፌይ ቤኣና።  
 21 ሄን ጎዳይ ኑስ ዎልቃ ጊዳና፤  
 ሄ ሶሆይ ዳልጋ ሻፋኔ

- ካንቼ ጊዳና፤  
 ዋጎሎይ ኢዛ ቦላራ  
 ባናሰ ዳንዳዬና፤  
 ጌታ ማርካቤቲካ  
 ኢዛ ቦላራ ቤቱና።  
 22 ጎዳይ ኑስ ፒርዲዛ ዳና፤  
 ጎዳይ ኑስ ዋጋ ኢሚዛዴ፤  
 ጎዳይ ኑስ ካዎ፤  
 ኑና አሻናይካ ኢዛ።  
 23 ኔ ቶሌ ዋዶርይ ለፒዴሰ፤  
 ቱሳይ ሚኒ ኤቂቤና፤  
 ሻራዚ ቶሌቲቤና፤  
 ሄ ዋዴ ዲኤቲዳ  
 ጌታ ሚሺ ጌሼታና፤  
 ዋቤይካ አቶንታ ዲኦ ኤካና።  
 24 ጸዮኔን ዲሼ፥ «ታ ሳኬታዲሰ»  
 ጋና ኣሲ ዴና፤  
 ሄን ዴኢዛ ኣሳታ ናጋራይ  
 ኣቶ ጌቱታና።

## 34

- ዴሬ ቦላ ያና ፒርዳ  
 1 ኢንቲኖ ካዎቲላቶ ሸቂዲ ሲዪቲ!  
 ኔኒ ዴሬዚ ኣኬካ!  
 ቢታይኔ ቢታን ዲዛ ኡባይ፥  
 ኣላሜይኔ ኣላሜፔ ዪዳ  
 ኡባይ ሲዮ!  
 2 ጎዳይ ካዎቲላ ኡባ ሃንቄቲዴሰ፤  
 ኢዛ ሃንቆይካ ኢዛ ኦላንቻታ  
 ኡባ ቦላና።  
 ኢዚ ኢሰታ ሙሌራ ጳይሳና፤  
 ሹካሰካ ኣሉ ኢማና።  
 3 ኢሰታፌ ሃይቂዳይቲ ካሬ ኦሌታና፤  
 ኢሰታ ኣሃይ ጸንቃና።  
 ዙማቲ ሱላ ጸላ ጊዳና።  
 4 ሳሎ ጸለንቲቲ ኡባይ ሴራና፤  
 ሳሎይ ጋልባ ማላ ጸጾታና፤

ጮራ ጸለንቴቲ ኡባይ ሹሊዲ  
ቆቆፌቲዛ  
ዋይኔ ሃይላ ማላኔ  
ሜሊዲ ሳኣን ዋጂዛ  
ባላሴ ሃይላ ማላ ጊዳና።

5 ታ ጊላ ማሻይ  
ሳሎታ ጊደን  
ባሰ ጊዳና ጋካናሰ ኡያዱሰ፤  
ቤኢቱ፤ ኤደሜ ቦላ፥  
ታኒ ቃንጊዳ ኣሳ ቦላ  
ፒርዳናሰ ዋጃዱሰ።

6 ጎዳ ጊላ ማሻይ  
ሱላ ማይኣዱሰ፤  
ሞጶካ ካላዱሰ፤  
ደርሳ ላቃ ሱላኒኔ  
ዳይሻ ሱላን ጎዜታዱሰ፤  
ጃርሾ ኪላሆ  
ሞጶን ጎዜታዱሰ፤  
ጎዳይ ቦጺራ ካታማን ያርሾ፥  
ኤደሜን ዋልቃማ ሹካ  
ጊግሲዳ ጊሻሳ።

7 ቃሴ ኢሰታራ ሜንሐ፥  
ኮርማይ ዋፋኖራ ኢሲፌ ኩንዳና፤  
ቢታያ ሱላን ጫጳና፤  
ኢሰታ ቢታይ ሞጶን ኣራዳና።

8 ሄሲካ ጎዳይ  
ሃሎ ኬሲዛ ጋላሲኔ  
ጸዮኔ ጊሻሰ  
ሞርኬታ ኦሊዛ ላይላ ጊዳና።

9 ኤደሜ ካንቼቲ ሺዳ ጊዳና፤  
ኢዚ ቢታይ ጸጌቲዛ  
ዲኔ ጊዳና፤  
ኢዚ ቢታይ ሺዳ ማላ ኤጸና።

- 10 ኢዞ ሚዛ ታማይ  
 ቃማኔ ጋላስ ቶኤና፤  
 ጩዋይካ ሜርናስ ቱሉ ጋና፤  
 ዩሌታፔ ዩሌታ ጋካናስ  
 ካይስ ጊዳና።  
 እነካ ናሞአንሶ  
 ሄራ አይና።
- 11 ጸሎይኔ ቁጻርሲ ኢዞ ላታና፤  
 ጉቶይኔ ቁሮይ  
 ኢዚን ኬሐ ኬጻና፤  
 ጸሲ ኤዶሜ ቦላ  
 ኢዞ ላላና ዋዶሮኔ  
 ኢዞ ጳይሳና ቱምቤ ዩዳና።
- 12 ኢዚ ዳናቲ  
 ካዎ ጌቲቲ ጸይጌታናስ  
 ዳንዳይዛ ሚሺ ዳና፤  
 ኢዚ ሃላቃቲ  
 ሙሌራ ፒቲቲ ጳያና።
- 13 ጊምቤቲ ዩዪዳ ካታማታ፥  
 ኢዚ ሚጸታ ዶዮይኔ  
 ኦካይ ላታና፤  
 ዋራካናታ አላኔ  
 ጉቶታ ዱሳሶ ጊዳና።
- 14 ባዞ ዶኣቲ ጎዳሬታራ  
 ኢሲፌ ዳና፤  
 ባዞ ዳይሽ ሚሳቲዛ  
 ዳይዳንሳቲ  
 ባንታ ጊዶን ጸይጌታና፤  
 ኦማርሳ ሜይታቲ  
 ሄን ሽምፓና፤  
 ባንታስ ዱሳሶ ሄን ዳማና።
- 15 ጉቶይ ሄ ኬላን  
 ጰጰሌታ ዩጋና፤  
 ዛራዳካ ጰቂሳና፤  
 ባ ጨዩታካ ሃጳና፤  
 ዋሌቲ ዋላን ዋላን  
 ሄን ሺቃና።

- 16 ጎዳ ማጸፋን ጸሊቱ፤ ናባቢቱ።  
 ሃይታፕ ኢሶይካ ፓጮና፤  
 ኢሶይ ኢሶይ ባስ  
 ዋላ ላጌ ቆሮና፤  
 ሃይሲ ሃ ኣዛዞዚ  
 ኢዛ ዶናፕ ኬዚዴስ፤  
 ኢዛ ኣያናይ ኢስታ  
 ኢሲ ቦላ ሺሻና።
- 17 ኢስታ ጊሻ ጊሻ ኢስታስ ዋላና፤  
 ኢዛ ኩሼይ ሜዛኔን  
 ሜዛኔን ጊሻና፤  
 ኢዛ ሚርናስ ኢስታስ ጊዳና፤  
 ዬሌታፕ ዬሌታ ጋካናስ  
 ኢስቲ ኢዚን ዴኣና።

## 35

### ዎዜቲዳ ዴሬ ኡፋይስ

- 1 ባዞይኔ ሜላ ቢታይ ኡፋይታና፤  
 ኣይኮይ ባይንዳ  
 ባዞይ ኡፋይታና፤  
 ጨሻ ማላካ ጨያና።
- 2 ኢዚ ዳር ኡፋይታናኔ ሚጫና፤  
 ሊባኖሴ ቦንቾይ  
 ኢዛስ ኢሜታና፤  
 ቃርሜሎሴኔ ላሻሮኔ  
 ቲማ ኢዚ ማይኣና፤  
 ኑ ጎዳ ቦንቾኔ  
 ጸላ ጊታቴላ ኢስቲ ቤኣና።
- 3 ዳቡርዳ ቄሴታ ሚንሒቲ፤  
 ኣርጋጪዳ ጉልባታታ ሚንሒቲ።
- 4 ዎዚናን ያሻይ ዲዛይታ  
 «ሚኒቲ! ያዮፍቲ!  
 ኢንቲ ጸሲ ዪዲ ሃሎ ኬሳና፤  
 ኢዚ ኢንቲና ኣሻናሲኔ  
 ሃሎ ኬሳናስ ያና» ጊቲ።

- 5 ሄ ዋዴ ቆቁታ ኣይፌይ ጸላና፤  
ቱሌታ ሃይሊ ሲያና።
- 6 ዋቤይ ጌነሳ ማላ ጉፓና፤  
ዱዴ ዶናይ ኡፋይሳን ዬጻና፤  
ባዘፌ ሃሊ ኩዛና፤  
ፑልቶይ ባዘ ቢታፌ ፑልታና።
- 7 ጸጊዛ ቢታን  
ኤሌ ሃሊ ኩማና፤  
ሚላ ቢታቲ ሃላ ፑልታና፤  
ዋራካናቲ ኣቂዛ ኦላን  
ማታይ፥ ማቃይኔ  
ሻጫይ ሞካና።
- 8 ሄን ዋጋ ኦጌይ ኦሴታና፤  
ኢዚካ፥ «ጌሻቴላ  
ኦጌ» ጌቲታና።  
ቱናቲ ሄ ኦጌራ ቤቴና፤  
ኦጌዚ ሄ ኦጌራ ቢዛይታስ  
ጸላ ጊዳና፤  
ጌላቲ ሄ ኦጋራ  
ባና ዳንዳዬቴና።
- 9 ሄን ጋሞይ ዴኤና፤  
ዳፊ ሚዛ ዶኣይካ ኢዛን ኬዜና፤  
ሄይታንቲ ሄን ቤቴቴና፤  
ዋዜቲዳይቲ ጸላ ሄራ ባና።
- 10 ጎዳይ ማዲዳይቲ ሲማና፤  
ኢሰቲ ዬጺሼ ጸዮኔ ጌላና፤  
ሚርና ኡፋይሳ  
ካላቻ ማላ ጎጻና፤  
ኢንጄኔ ኡፋይስ ዴማና፤  
ጨጩይኔ ካዮይ  
ሄፔ ባቃታና።

## 36

ዬሩሳላሚ ቦላ ሴናኪሬሚ ማንዴ  
(2ካዋ 18:13-27፤ 2ታሪ 32:1-19)

1 ካዎ ሂዘቂያሲ ካዎቲዳ ታማኔ ኦይዳንፉ ላይላን፣ አሶሬ ካዎ ሴናኪሬሜይ ገምቤቲዳ ዩሁዳ ካታማታ ኡባ ኦሊ ኦይኪዳስ።

2 አሶሬ ካዎይ ላኪሼ ጌቲቲዛ ካታማፔ ኦላ ጋዳዋ ጮራ ኦላንቻታራ ካዎ ሂዘቂያሳኮ ዬሩሳላሜ ዬዲዳስ። ኦላ ጋዳዋዚ ማይኦ ሜጪዛዳዛ ጋዴኮ ኤፊዛ ኦጌፔ ቆሞ ባጋራ ዲዛ ኤሌ ሃላኮ ኢዛ ዛራ ላንቄን ኤቂዳስ።

3 ካዎ ኬል አይሲዛ ኪልቂያሳ ና ኤልያቄሜይ፥ ጸፊዚ ሼቢናይኔ ታሪኬ ጸፊዚ አሳፌ ና ዮአሂ ኢዛኮ ካሬ ኬዚዳ።

4 ኦላ ጋዳዋዚ ኢስታስ፥ «ሂዘቂያሳሲ፥ ጥልቃማ አሶሬ ካዎ፥ ኔኒ ሃይሳ ማላ ኔ አማኔቲዳይ አዛኔ?

5 ኔኒ ኦላ ኤራቲልኔ ሚኖ ኦላንቻቲ ታስ ዴቲስ ጋሳ፤ ጊዶ አቲን ኔኒ ጎአይ ባይንዳ ቃላ ጸላ ሃሳያሳ፤ ሂስቲን ኔ ኦናን አማኔታዳ ታ ቦላ ማካላይ?

6 ሄኮ ኔኒ አሲ ኢዛ ኦይኪ ዳርቲን ሜቂዲ ማዲንፊዛ ማቃ ሚሳቲዛ ገብጾን አማኔታዳሳ፤ ገብጾ ካዎ ፓርኔይካ ኢዛን አማኔቲዛ ኡባስ ሄሳ ማላ።»

7 «ኔኒ ታስ፥ ሱኒ ጎዳን፥ ኑ ጸሳን አማኔቶስ» ገኮ፥ ኢዛስ ጎይኒዛ ቆቃሶሆታኔ ያርሾሆታ ሂዘቂያሲ ላሊዲ ዩሁዳ አሳኔ ዬሩሳላሜ አሳ፥ ሱኒቲ ጎይናናስ ቤሲዛይ ሃይሳ ማላ ኢሲ ያርሾሶን ጸላ ገዳናስ ቤሲስ» ገቤኔ?

8 «አኔ ሃኢ ሃ ያዳ ታ ጎዳ አሶሬ ካዎራ ገጋና ማላ ሃሳያ፤ ኔስ ቶጋ ዳንዳይዛ አሳቲ ዲኮ 2,000 ፓራታ ታኒ ኔስ ኢማና።

9 ኔኒ ገብጾ ፓራ-ጋሬታኒኔ ቶጋንቻታን አማኔቲዛ ገዲኮ ታ ጎዳ ኦላንቻታፔ ኢሲ ላፋ ቡቲዛ ኔ ዎስታ ዛራኔ?

10 ቃሴ ሃይሳ ቢታ ቆይሳናስ ጎዳ አዛዘይ ባይንዳ ታ ዩዳ ኔስ ሚሳቲዜ? ጎዳይ ባ ሁኤራ ሃይሳ ዴራ ታኒ ኦላ ቆይሳና ማላ ታስ ዮቲዳስ» ገዴስ።

11 ኤልያቄሜይ፥ ሼቢናይኔ ዮአሂ ኦላ ጋዳዋዛ፥ «ኑ ኤሪዛ አራሜ ቃላራ ኑስ ኔ አይሌታስ ዮታ፤ ገምቤዛ ቦላ ዲዛ ዴፊዚ ኤሪዛ፥ ኢብራዊታ ቃላን ኑስ ዮቶፓ» ገዴ።

12 ገዴ አቲን ኦላ ጋዳዋዚ ዛሪዲ፥ «ታ ጎዳይ ታና ከቲ ዬዲዳይ ሃይታ ሃ ዮኑታ ኔ ጎዳሲኔ ኔስ ጸላ ዮታናሴ? ኢንቲ ማላ ባንታ ሺያ ማናሲኔ ባንታ ሺሽ ኡያናስ ገምቤ ቦላ ኡቲዳ አሳሳራ ዮታና ማላ ገዴኔ?» ገዴስ።

13 ሄሳፌ ጉዬ ኦላ ጋዳዋዚ ኢብራዊታ ቃላራ ባ ቃላ ቆቄ ሂስቲዲ፥ «ዎጋ ዎልቃማ አሶሬ ካዎ ቃላ ሲዩቲ!

14 ካዎዚ፡ ሂዝቂያሲ ኢንቴና ጨዋፎ፤ ኢዚ ኢንቴና አሻና ዳንዳዬና።

15 ጎዳይ ቱማ ኑና አሻና፤ ሃ ካታማያካ አሶሬ ካዎሰ ኢሜቱኩ፡ ጊዲ ኢንቴ ጎዳን አማኔታና ማላ ኦሶፎ» ጊዴሰ።

16 «ሂዝቂያሲ ጊዛይሳ ሲዮፒቴ። አሶሬ ካዎይ ኢንቴና፡ ታናራ ሲጌቲቴ፤ ሃ ታኮ ኬዚቴ። ሄሳፌ ጉዬ ኢንቴ ኡባይካ ኢንቴ ዎይኔቴ ኢንቴ ባላሴቴ ማንዴታ፤ ኢንቴ ቦኪዳ ኦላፌ ሃል ኡያንዴታ።

17 ሄሳ ኢንቴ ሃናናይ ታኒ ያዳ ኢንቴና ኢንቴ ቢታ ሚሳቲዛ ዴሬ ዴንላ ኤፋና ጋካናሳ። ሄ ቢታይ ካሊኔ ዎይኔ ኡሺ፡ ካላ ቢታኔ ዎይኔ አታኪልቴይ ኩሚዳ ቢታ፡ ጌሰ።

18 «ሂዝቂያሲ፡ ሳዳይ ኑና አሻና» ጊዲ ኢንቴና ጨዋፎ። ሃኖ ጋካናሰ ካዎቲላታ ጸሳታቴ ባ ዴራ አሶሬ ካዎ ኩሼቴ አሺዳ ጸሲ ዲዜ?

19 ሃማቴ ጸሳቲኔ አርፋዴ ጸሳቲ አዋን ዲዛ? ሴፋርዎይሜ ጸሳቲ አዋን ዲዛ? ሃይቲ ሳማሪያ ታ ኩሼቴ አሺዳ?

20 ሃይታ ሃ ዴሬታ ጸሳታ ኡባፌ ባ ዴራ ታ ኩሼቴ አሻና ዳንዳይዳይ አዎይሴ? ሂሰቲን ጎዳይ ዬሩሳላሜ ታ ኩሼቴ ዎሰቲ አሻና ዳንዳይዜ?» ጊዴሰ።

21 ጊዶ ኢቲን ካዎዚ ኢሰታሰ፡ «ኢዛሰ አይኮካ ዛርፒቴ» ጊ ኣዛዚዳ ጊሻሰ አሳይ ኢሲ ቃላካ ቃቶንታ ጮኡ ጊዴሰ።

22 ሄሳፌ ጉዬ ካዎ ኬል አይሲዛ ኪልቂያሳ ና ኤልያቂሜይ፡ ጸፊ ሼቢናይኔ ታሪኬ ጸፊዚ አሳፌ ና ዮአሂ ባንታ ማይኦ ዳኪዲ ሂዝቂያሳኮ ቢዳ፤ ሂሰቲዲ አሶሬታ ኦላ ጋዳዎይ ጊዳይሳ ኡባ ኢዛሰ ዮቲዳ።

## 37

ካዎ ሂዝቂያሲ ኢሳያሳ ኦይቺዳ ዞሬ

(2ካዎ 19:1-7)

1 ካዎ ሂዝቂያሲ ሄሳ ሲዬዳ ማላ ባ ማይኦ ዳኪዴሰ፤ ሄሳፌ ጉዬ ማቃ ማይኢዲ ጎዳ ኬል ጌሊዴሰ።

2 ካዎ ኬል አይሲዛ ኤልያቂሜይ፡ ጸፊ ሼቢናይኔ ቄሴታቴ ኤሬቲዳይቲ ኡባይ ማቃ ማይኢዲ አዋጼ ና ናቤ ኢሳያሳኮ ባና ማላ ከቲዴሰ።

3 ኢሰቲካ ኢሳያሳሰ ቢዲ፡ «ሂዝቂያሲ፡ ሃ ጋላሳይ ጨፍፍ፡ ቂጸቲኔ ካዉሻቲላ ጋላሳ፤ ሄሲካ ናይ ዬሌታና ሃኒሺን ኣቤይ ኢጲዛ ጋላሳ ማላ ጊዲዴሰ።

4 ዴኦ ጸሳ ጫያና ማላ ኢዛ ጎዳ አሶሬ ካዎይ ከቲዳ ኦላ ጋዳዎ ቃላ ጎዳ ኔ ጸሳይ ሲዮንታ ኣጌና። ቃሴ ጎዳ ኔ ጸሳይ ሄ ሲዩዳ ቃላ ጋሶን ኢዛ ቃጸዮንታ ኣጌና። ሄሳ ጊሻሰ ኔ፤ ሼምፖራ ፓጸ ኣቲዳ ጫሻታ ጊሻሰ ዎሳ፤ ጌሰ» ጊዳ።

5 ካዎ ሂዝቂያሲ ከቲዳይቲ ኢሳያሳኮ ዩዳ ዎዴ።

6 ኢሳያሲ ኢሰታሰ ዛሪዲ። «ኢንቲ ጎዳሲ ቢዲ። ሳዳይ ኔና። አሶሬ ካዎ ኣሸካራቲ ታና ጫዩሺን ኔ፤ ሲዩዳ ጫሻ ቃላሰ ሂርጎፋ።

7 ቤያ። ታ ኢዛ ቦላ ኣያና ከታና፤ ኢዚ ዎሬ ሲዩዲ ባ ዴሬ ሲሚ ባና፤ ሄን ባ ዴሬን ማሻን ሃይቃና ማላ ታ ኦላና፤ ጊቲ» ጊዴሰ።

አሶሬቲ ናምኣንሉ ከቲዳ ማንዴ ቃላ

(2ካዎ 19:8-19)

8 አሶሬ ካዎይ ላኪሼ ካታማፔ ዴንዲ ቢዳይሳ ኦላ ጋዳዋዚ ሲዩዲ ጉዩ ሲሚዴሰ። ሂሰቲዲ ካዎዚ ሊቢና ካታማ ኦሊሺን ዴሚዴሰ።

9 ካዎ ሴናኪሬሚይ። ቶጵያ ካዎ ቲራቄይ ኢዛ ኦላና ዩዛይሳ ሲዩዴሰ፤ ሄሳ ሲዩዳ ማላ ሂዝቂያሳሰ ከታ ዩዲዲ።

10 «ዩሁዳ ካዎ ሂዝቂያሳሰ። ሮሩሳላሚይ አሶሬ ካዎ ኩሼን ጌሌና፤ ጊን ኔ ኣማኔቲዳ ጸሲ ኔና ጨዋፎ።

11 ሄኮ አሶሬ ካዎቲ ቢታ ኡባ ቦላ ኢሰቲ ኦሊዳይሳኔ ሙሌራ ኢሰታ ቆይሲዳይሳ ኔ ሲያዳሳ። ሂሰቲን ኔ ኬሳ ኤካ ኣታና ሚሳቲዜ?

12 ካሴ ታ ኣዋቲ ቆይሲዳ ጎዛኔን። ካራኔኔኔ ኤራፌሴን ሄሳሉካ ታላሳሬን ዴኢዛ ኤዴኔ ኣሳ ኢሰታ ጸሳቲ ሄ ቢታታ ኣሺዶ?

13 ሃማቲ ካዎይ። ኣርፋዴ ካዎይ። ሴፋርዎይሜ ካዎይ። ሄና ካዎይኔ ኢዎ ካዎይ ኣዋን ዲዞ?» ጊዴሰ።

ሂዝቂያሳ ዎሳ

14 ሂዝቂያሲ ዳብዳቤዛ ከቲቲዳ ኣሳታፔ ኤኪዲ ናባቢዴሰ። ጎዳ ኬሰ ኤኪ ኤፊዲ ጎዳ ሲንላን ሚጨዴሰ።

15 ሂሰቲዲ ጎዳ ዎሲሼ።

16 «ኣቤት ጎዳዉ። ኡባፌ ዎልቃማ ጸሳዉ። ከሩቤታፔ ጊደን ኡቲዛ ኢሰራኤሌ ጸሳዉ። ሳኣ ካዎቴላታ ኡባ ቦላ ኔ ጸላ ጸሳ። ሳሎኔ ሳኣ ኔ፤ ሜቆዳሳ።

17 አቤት ጎዳው፤ ኔ ሃይሉ ሃ ዩጋዳ ኤዘጋ። አቤት ጎዳው፤ ኔ አይፌ ፖጋዳ ሃ ጸላ። ኔና ዴኑ ጸላ ጫያናሰ ሴናኪሬሜይ ኪቲዳ ቃላ ሲያ።

18 «አቤት ጎዳው ቱማካ፤ አሶሬ ካዎቲ ሃ ካዎቲላታኔ ኢስታ ቢታ ኡባ ባዘ ኬሲዳ።

19 ኢስታ ጸላታ ታማን ጸጊዳ፤ ኢስታ ጸላቲ ዎኒካ ሚላፌኔ ሹቻፌ ኣሳ ኩሼን ማሴቲ ኬዚዳ ሚሰሌፔ ኣቲን ጸላታ ጊዴቲና።

20 ሃኢካ አቤት ጎዳው፤ ኑ ጸላው ኔኒ ጎዳይ ጸላ ጸላ ጊዲዳይሳ ሳኣ ካዎቲላቲ ኡባይ ኤራና ማላ ኑና ኢዛ ኩሼፔ ኣሻ!» ጊ ዎሲዴሰ።

ኢሳያሲ ካዎ ሂዝቂያሳሰ ዩዲዳ ኪታ

(2ካዎ 19:2-37)

21 ሄሳፌ ጉዬ ኣሞጼ ና ኢሳያሲ ካዎ ሂዝቂያሳሲ፡ «ጎዳይ ኢስራኤል ጸላይ፤ ሳኒ አሶሬ ካዎ ሴናኪሬሜይ ማንዲዳ ማንዴላ ጊሻሰ ዎሲዳ ዎሳ ታ ሲያዲሰ» ጌሰ።

22 «ጎዳይ ሴናኪሬሜ ጊሻሰ ዮቲዳ ቃላይ፡

«ጌላኦያ ጸዮኔ ናያ

ኔና ካዳዲሲኔ ሌቃዴሰ።

ዩሩሳላሚ ናያ

ኔ ባቃቲሺን ቤኣዳ

ባ ቆጶ

ቃላዲሰ።

23 ኔ ኦና ጫያይኔ ካዉሻይ?

ኦና ቦላ ኔ ቃላ

ጶቁ ሂስታ ሃሳያይ?

ኦቶሮ አይፌን ኦና ጸላይ?

ኢስራኤል ጌሻ ቦላ

ጊዴኔ!

24 ኔኒ ኪቲዳ ኣሳታ ባጋራ

ጎዳ ቦላ ዳሮ

ጫሻ ቃላ ሃሳያዳሳ።

ቃሴካ፤ ሓኒ ጮራ ፓራ-ጋሬታን

ዙማታ ካራ፤

ሊባኖሴ ሁኤ ኬዛዲሰ።

ሂስታዳ ኣዲሳ ዚጋታኔ

ኡባፌ ሎኢዛ ጸዲታ ቃንጸዲሰ።

ታኒ ኬሂ ጶቃሶሆታኒኔ

ከሂ ካይሺዛ ዋራን ጋካዲሰ።

- 25 ታኒ አላጋ ቢታታን  
 ሃላ አላታ ቦካዲሰ፤  
 ኢስታፊካ ሃላ ኡያዲሰ።  
 ጌብጼ ቢታን ዲዛ  
 ፑልቶ ሃላታ ኡባ  
 ታ ቶሆን ዬቆ  
 ሜሊሳዲሰን ጋዳሳ።

- 26 «ታኒ ዳሮ ዋዴፔ  
 ካሴ ቃቺዳይሳ፤  
 ታ ቤኒ ሃልቺዳይሳ  
 ኔ ሲያቤኪ?  
 ሃኢ ጌዲኮ  
 ፖሌታና ማላ አላዲሰ፤  
 ኔኒካ ጊምቤቲዳ ካታማታ  
 ላላዳ ሹቻ ዶሬ ከሳና።

- 27 ኢስታ ዳራሰ ዋልቃይ ኢጲዴሰ፤  
 ኢስቲካ ዳጋሚዳኔ ካዉዪዳ።  
 ኢስቲ ጋዴን ዲዛ ዶዛታ ማላ፤  
 ሙልኦ ጫሬቻታ ማላ፤  
 ኬላ ካራን ሞኪዳ  
 ማታ ማላኔ  
 ኬሶንታ ቆይዳ ካላ  
 ማላ ጌዲዳ።

- 28 «ጊዶ አቲን ኔኒ ኡቲዛሶ፤  
 ኔ አይዴ ያዳ አይዴ ባናኮ፤  
 ኔ ታ ቦላ ዋና  
 ሃንቆን ዴንዳናኮ  
 ታ ኤራይሰ።

- 29 ኔኒ ታ ቦላ  
 ሃንቆን ዴንዴቲዳ ጊሻሲኔ፤  
 ኔ ሃላጪዛይሲ ታ ሃይላን  
 ዋዲዳ ጊሻሰ፤  
 ታኒ ኔ ሲዴን ዳፎ አላና፤  
 ኔ ዶናንካ ቢጸላ ባርሳና፤  
 ኔ ዪዳ ኦጌራካ ታ ኔና

ጉዬ ዛራ ዬዳና» ጊዴሰ።

- 30 «ሄሳፌ ጉዬ ኢሳያሲ  
 ካዎ ሂዘቂያሳስ፥  
 ሃይሲ ኔሰ ማላታ ጊዶ፤  
 ሃ ላይሰ እንቲ አዛባ ሞኪዳ  
 ካሰ ማና፤  
 ዪዛ ላይሰካ አዛባፌ  
 ዎፏ ሞኪዳዝ ማና።  
 ጊዶ አቲን ሄዳንሶ ላይሰ  
 እንቲ ዜራናኔ ማጻና፤  
 ዎይኔ ቶካናኔ  
 ኢዛ አይፌካ ሺሻና።
- 31 ዩሁዳፔ አቲዳ ጫሻቲ  
 ጸጸ ዱጌ ዬዱዱ  
 ቦላን አይፌ አይፋና።
- 32 አቲዳ ጫሻቲ ዬሩሳላሜ፤  
 ሼምፖራ ፓጻ አቲዳይቲ  
 ጸዮንፔ ኬዛና።  
 ኡባፌ ዎልቃማ ጎዳ  
 ዚልኤቲላ ሄሳ ኦላና።
- 33 «አሶሬ ካዎ ጊሻሰ ጎዳይ፥  
 ላሶሬ ካዎይ  
 ሃ ካታማ ጌሌና፤  
 ኢዚ ቦላ ባ ዎንዳፌ ዱኬና፤  
 ኢዚ ቦላ ባ ጎንዳሌ  
 ኦይኪዱ ዬና፤  
 ቃሴ ካታማ ዩሾን  
 ቢታ ዶሬን ጎርዴና።
- 34 ባ ዩዳ ኦጌራ ጉዬ ሲማና፤  
 ኢዚ ሃ ካታማዮ ጌሌና፡ ጌሰ።
- 35 ታኒ ታ ቦንቾ ጊሻሲኔ  
 ታ አሽካራ ዳዊቲ ጊሻሰ፥  
 ሃ ካታማዮ  
 ካማ አሻና» ጊዴሰ።
- 36 ሄ ጋላሳ ኦማርሲ ጎዳ ኪታንቻይ ኬኢዱ፥ አሶሬ አሳይ  
 ዱንካኒ ዲዛሶን፥ 185,000 አቲማሳታ ዎፏዴሰ። ሂሰቲን አሳይ  
 ማላዶ ሱሪዱ ቤኢዛ ዎዴ ሃይቂዳ አሳ አሃይ ሄን ኩሚዴሰ።

37 ሄሳ ገሻሰ አሶሬ ካዎ ሴናኪሬማይ ኬሲ ኤኪዳሰ፤ ጉዬ ሲሚ ቢዲካ ናናዌ ካታማን ኡቲዳሰ።

38 ሳናኪሬማይ ባ ጾሳ ኒሰራኬ ኬፋን ጎይኒሼ ዳኢሺን፥ ኢዛ ናይቲ አዲራማሌኬይኔ ሳርሳሬይ ማሻን ኢዛ ዎፂዳ። ሂሰቲዲ አራራቱ ቢታ ባቃቲዳ። ኢዛ ና አሴራዶኔይ ኢዛሶሆን ካዎቲዳሰ።  
\*

## 38

ሃርጌፌ ሂዝቂያሳ ፓጾ

(2ካዎ 20:1-11፤ 2ታሪ 32:24-26)

1 ሄ ዎዴ ካዎ ሂዝቂያሳ ሃርጌዲ፥ ሃይቃና ማቲዳሰ። ሂሰቲን አሞጾ ና ናቤ ኢሳያሲ ኢዛኮ ቢዲ፥ «ጎዳይ ኔና፥ ሄኒ ሃይቃናፔ አቲን ሃርጌዛፔ ፓጾካ፤ ሄሳ ገሻሰ ኔ ኬፋ ገጊሳ ጌሰ» ጌዳሰ።

2 ሂሰቲን ሂዝቂያሳ ኬፋ ጎዳኮ ሲሚዲ ጎዳ ዎሲዳሰ።

3 ዎሲሼ፥ «አቤት ጎዳዉ፥ ታኒ ኔ ሲንፋን አማኔቲፋኒኔ ኩሜፋ ዎዚናፔ ኔና ኡፋይሲዛ ሚሽ ኦፋሼ ታ ዋና ዴኢዳኮ ኔኒ አኬካና ማላ ታኒ ኔና ዎሳይሰ» ጌ ዎሲዳሰ፤ ሂዝቂያሳ ኬሂ ጫዎ ዬሆ ዬኪዳሰ።

4 ሄሳፌ ጉዬ ጎዳ ቃላይ ኢሳያሳኮ ዪዳሰ።

5 ሂሰቲዲ፥ «ኔኒ ባዳ ሂዝቂያሳ፥ ሳዳይ ኔ አዋ ዳዊቲ ጾሳይ፥ ታኒ ኔ ዎሳ ሲያዲሰ፤ ኔ አፋንፋካ ቤአዲሰ። ኔ ላይፋ ቦላ ታኒ ኔሰ ታማኔ ኢቻሹ ላይሰ ጉጃና።

6 ኔና፤ ሃ ካታማዮ አሶሬ ቢታ ካዎዛ ኩሼፔ አሻና፤ ታኒ ሃ ካታማይ ቦላ ዪዛይሳ ቲቃና ጌሰ» ጌዳሰ።

7 ኢሳያሲ ጉጃዲካ፥ «ጎዳይ ኔሰ ጌዳ ቃላ ፖላናይሳሰ ማላታይ ሃይሳፌ ካሊዛይሳ፤

8 ቤያ፥ አካዜይ ፑዴ ኬአናሰ ገግሲዳ ኬቻታ ቦላ ዎፂዛ አዋ ኩዋይ ታሙ ኬች ጉዬ ሲሚ ባና ማላ ታኒ ኦፋና» ጌዳሰ። ሂሰቲን ኩዋይ ታሙ ኬች ጉዬ ሲሚዲ ቢዳሰ።

9 ዩሁዳ ካዎ ሂዝቂያሳ ሃርጌ ፓጲዳፔ ጉዬን ጸፊዳ ቃላይ ሃይሳፌ ካሊዛይሳ፤

10 ታኒ፥ «ታ ዴኦ ላይፋሰ ቡርን ባጋ ጋኪዛ ዎዴ፥ ሃይቆ ፔንጌራ ጌላና ቤሲዜ? ታሰ አቲዳ ላይፋይ ታፔ ቦንቄታናሰ ቤሲዜ?» ጋዲሰ።

11 ቃሴካ፥ «ታኒ ሼዎፖራ ፓጾ

\* 37:38 ኢብራዊታ ቃላራ አሲራዲኒ ኤሳር-ሃዶን ጌቲቲሰ።

ዴኢዛይታ ቢታን  
 ኔና ጎዳ ዛራ ቤኢኬ፤  
 ሃይሳፌ ጉዩን  
 ታ ኣሳ ዜሬሐ ቤኢኬ፤  
 ሃ ሳኣን ዴኢዛይታ  
 ጊዶንካ ዴኢኬ።

- 12 ታ ኬሊ ሃንላንቻታ  
 ዲንካኔ ማላ ሾዴቲዴሰ፤  
 ታፔካ ኤኬቲዴሰ፤  
 ሾማኔይ ኣፋላ ዋንዲራሾን  
 ጸጺዛ ማላ፥  
 ታኒ ታ ዴኦ ጸጸዲሰ፤  
 ኢዚካ ታና ዋንዲራሾፔ  
 ዲሊዴሰ።  
 ማላዶፔ ኦማርሰ ጋካናሰ፥  
 ኔኒ ታና ጳይሳናሰ ኤሶታዳሳ።

- 13 ሳኣይ ዋንታና ጋካናሰ  
 ታኒ ኔና ዲንዲያን ናጋዲሰ፤  
 ጊዶ ኣቲን ጋሞ  
 ማላ ኢዚ  
 ታ ሜቄላ ኡባ ማንፌሬሊዴሰ።  
 ቃሴ ማላዶፔ ኦማርሰ ጋካናሰ  
 ኔኒ ታና ጳይሳናሰ  
 ኤሶታዳሳ።

- 14 ታኒ ጨራሻኔ  
 ሃላ ካፎ ማላ ዋሳዲሰ፤  
 ሃራጼ ማላካ ጉጉማዲሰ።  
 ታ ኣይፌቲ ፑዴ ሳሎ  
 ጴሊዲ ዲቡርዳ።  
 ኣቤት ጎዳ። ታኒ ኡንኤታዲሰ፤  
 ኔኒ ታና ሃኒፌ ኬሳ! » ጋዲሰ።

- 15 ሂሰቲን ታ ኣይ ጋኔ?  
 ኢዚ ባ ሁኤራ ታሰ ዮቲዴሰ፤  
 ቃሴካ ባ ሁኤራ  
 ሃይሳ ኦሊዴሰ፤  
 ታ ሾምፖያ  
 ኬሂፔ ጨጨዳ ጊሻሰ፥

ታ ዴኦ ላይሰ ኡባን  
አሽኬቴላን ባና።

- 16 አቤት ጎዳዉ ሄይታንታ ማላ  
ዮኦታን አሳይ ፓጻ ዴሰ።  
ታ ኣያናይካ ሄይታንታን  
ዴኦ ዴማና።  
ኔ ታና ፓላዳሳ፥  
ታና ሼምፖራ ፓጻ ዋላዳሳ!

- 17 ሄኮ ታ ሜቶን ጨጨዳይሲ  
ታሰ ጎኣሰ ጊዲዴሰ።  
ኔኒ ታ ሼምፖ ባሻ ኦላፌ  
ኔ ሲቆን ናጋዳሳ፤  
ኔኒ ታ ናጋራ ኡባ  
ኔፔ ጉዬ ዛራዳ ኦላዳሳ።

- 18 ዱፎይ ኔና ጋላቴና፤  
ሃይቆይካ ኔና ሳቤና።  
ዱጌ ኦላን ዋጂዛይቲ  
ኔ አማኔቴሰ ሂዶታ ኦሴቴና።

- 19 ታኒ ሃኙ ኔና ጋላቴዛይሳ ማላ  
ሼምፖራ ፓጻ ዴኢዛይቲ ጸላ  
ኔና ጋላታና፤  
ኔ አማኔቴላ ጊሻሰ  
አዋቲ ባ ናይታሰ ዮቴቴሰ።

- 20 ጎዳይ ታና አሻና፤  
ሄሳ ጊሻሰ ኑኒ  
ኑ ዴኢዛ ላይላታ ኡባን፥  
ጎዳ ኬላን  
ዋጾቲዳ ዲላን ዬጸና።

- 21 ኢሳያሲ ካሴ፥ «ባላሴ ሚላ ኣይፌ ዳጲዲ፥ ኢዛ ኪጸ ቦላ  
ዋሊቴ። ሂሰቲኮ ኢዚ ፓጸና»  
ጊ ዋሊዴሰ።

- 22 ሂዘቂያሲካ፥ «ታኒ ፓጻዳ ጎዳ ኬሰ ፑዴ ኬዛናይሳሰ  
ማላታይ ኣዜ?» ጊዲ ኢሳያሳ ኦይቺ ዋሊዴሰ።

## 39

ባቢሎን፤ ከቲቲ ዪዳ አሳታ

(2ካዎ 20:12-19)

<sup>1</sup> ሄ ዎዴ ባቢሎን ካዎይ ባሊዳኔ ና፥ ማርዶኬ-ባልዳኔይ ሂዝቂያሲ ሃርጊ ፓጺዳ ጊሻሰ ዳብዳቤኔ ኢሞታ ኢዛሰ ዬዲዴሰ።

<sup>2</sup> ሂዝቂያሲ ከቲቲዳይታ ኡፋይሳን ሞኪ ኤኪዴሰ፤ ሂስቲዲ ካዎ ሚንጃ ኬላን ዲዛ ቢራ፥ ዎርቃ፥ ዲማ ዲማ ሳዎታ፥ ደሬቲዳ ዛይቲ፥ ቃሴ ኦላ ሚሻ፥ ኢዛሰ ዲዛ ሚሽ ኡባ ኢሲኖካ ኣሾንታ ዲሼ ቤሲዴሰ። ኢዛ ሚንጃ ኬላን ዲዛ ሚሽ ጊዲን ኢዛ ካዎቴላ ጋርሳን ዲዛ ሚሽ ኡባ ቤሶንታ ኣሺዳ ሚሺ ዴና።

<sup>3</sup> ሄሳፌ ጉዬ ናቤ ኢሳያሲ ካዎ ሂዝቂያሳኮ ዪዲ፥ «ሃ አሳቲ ኔና ኣይ ጊዶ? ኢስቲ ኔኮ ኣዎፔ ዪዶ?» ጊ ኦይቹዴሰ።

ሂዝቂያሲካ ዛሪዲ ኢዛሰ፥ «ሃ አሳቲ ታኮ ሃኮ ቢታፌ ባቢሎን፤ ዪዳ» ጊዴሰ።

<sup>4</sup> ኢሳያሲ ቃሴካ፥ «ኔ ካዎቴላ ኬላፌ ኣይ ቤኢዶ?» ጊዴሰ።

ሂዝቂያሲ፥ «ታ ካዎቴላ ኬላን ዲዛ ኡባ ቤኢዳ፤ ታ ቤሶንታ ኣሺዳ ኢሲ ሚሽካ ዴና» ጊዴሰ።

<sup>5</sup> ሄሳፌ ጉዬ ኢሳያሲ ሂዝቂያሳሰ፥ «ኡባፌ ዎልቃማ ጎዳይ ጊዛይሳ ሲያ፤

<sup>6</sup> ሳ ካዎቴላ ኬላን ዲዛ ኡባይ፥ ካሴ ኔ ኣዎቲ ሃኛ ጋካናሰ ሺሺዳ ኡባይ ዲኤቲዲ ባቢሎን ባና ዎዴይ ያና፤ ኢሲኖካ ኣሾንታ ማጺ ኤፊዛ ዎዴይ ያና» ጊሰ ጎዳይ።

<sup>7</sup> ኔፔ ዬሌቲዳይቲኔ ኔ ዜሬላፌ ዬሌቲዳይቲ ዲኤቲ ቢዲ ባቢሎን ካዎ ኬላን ጉንዱላ ጊዲዲ ኦላና» ጊዴሰ።

<sup>8</sup> ሂዝቂያሲ ዛሪዲ፥ «ኔኒ ዮቲዳ ጎዳ ቃላይ ሎኦ» ጊዴሰ። ሂዝቂያሲ፥ «ታኒ ዴኢዳ ላይላን ታሰ ሳሮኔ ዎፓ ጊዶ» ጊ ቆፒዳ ጊሻሳ።

## 40

ጸሳ ዴሬ ሚንፌሊዛ ቃላ

<sup>1</sup> ኢንቲ ጸሳይ፥

«ሚንፌሊ፤

ታ ዴሬዛ ሚንፌሊ፤

<sup>2</sup> ዬሩሳላሚስካ ሹሳ

ቃላራ ዮቲቲ፤

- ኢዚሰ አዋጁቲ፤  
 ኢዛ አይሌቱላን  
 ኦሲዛ ዋዴይ ወሪዴሰ፤  
 ኢዚ ናጋራ ዋጋይ ጨጌቲዴሰ፤  
 ኢዛ ባ ናጋራ ኡባ ገሻሰ  
 ጎዳፔ ናምኡ ኩሼ  
 ቂጻቲ ኤካዲሰ» ጌሰ።  
 3 አዋጃ ዮቲዛዴ ጨንጉርሲ፤  
 «ባዞን ጎዳ ኦጌ ገግሲቲ፤  
 ኑ ጸሳሰ አራባ ባዞን  
 አኮ ኦጌ ገግሲቲ።  
 4 ሸባይ ኡባይ ፑዴ ጶቁ ጋና፤  
 ዙማይኔ ዙምቡላይ ዚቂ ጋና፤  
 ኩንዲኩርጮ ቢታይ  
 ኢሲ ገና ገዳና፤  
 ኩርፖቲ ዴምባ ገዳና።  
 5 ሄ ዋዴ ጎዳ  
 ቦንቾይ ቆንጫና፤  
 አሾ ማይኢዳ ኡባይ  
 ሄሳ ሃሳይዴሰ» ጌሰ።  
 6 ጨንጉርሲ ታና፤  
 «ዋሳ!» ገዴሰ።  
 ታኒካ፤ «አይ ጋ ዋሶ?» ጋዲሰ።  
 ኢዚካ፤ «ኣሲ ኡባይ ማታ ማላ፤  
 ኢዛ ቦንቾ ኡባይካ  
 ዴምባ ጨሻ ማላ።  
 7 ጎዳይ ባ ሼምፖ  
 ኢዛ ቦላን ሼምፒሺን  
 ማታይ ሜሌሰ፤  
 ጨሺካ ቆኬሰ፤  
 ቱማፔ ዴሬይ ማታ ማላ።  
 8 ማታይ ሜሌሰ፤  
 ጨሻይካ ቆኬሰ፤  
 ገዶ አቲን ኑ ጸሳ ቃላይ  
 ሜርናሰ ሚኒ ዴሰ»  
 ጋዳ ዋሳ ገዴሰ።

- 9 ኔኖ መሺራች  
 ጸዮኔስ የተዘይሶ፥  
 ጶቃ ዙማ ቦላ ኬዛ፤  
 ኔኖ መሺራች  
 ዬሩሳላሜስ የተዘይሶ፥  
 ኔ ጨንጉርሳ  
 ጶቁ ሂስታ ዋሳ፤  
 ጶቁ ሂስታ፥ ባቦፋ፤  
 ዩሁዳ ካታማታሰ፥  
 «ሄኮ ኢንቴ ጸሳ»  
 ጋዳ የታ።
- 10 ሄኮ ኡባ ሃሪዛ ጎዳይ  
 ዋልቃራ ዬስ፤  
 ኢዛ ቄሴይ ኢዛ ገሻስ ሃራና።  
 ቤኢቲ ኢዛ ዋይቶይ ኢዛራ ዴስ፤  
 ኢዚ ጨጋና ኦሶ ዋጋይካ  
 ኢዛራ ዴስ።
- 11 ኢዚ ባ ዉዴ  
 ሄንፋንቻ ማላ ሄሜስ፤  
 ባ ላቃታካ  
 ባ ቄሴን ቶኬስ፤  
 ባ ኪኦንካ ኢዲሜስ፤  
 ቋንፊዛይታካ  
 ሎዳራ ካሌፊስ።
- 12 ሃሳታ ባ ኩሼ  
 ኩጴን ማኪዳይ፥  
 ሳሎታ ታቋኪዳይ፥  
 ባና ዳችን  
 ማኪ ኦይኪዳይ፥  
 ዙማታ ባ ሜዛኔን፥  
 ዙምቡላታካ ሜዛኔን ዋሊዳይ ኦኔ?
- 13 ጎዳ ኢያና ሻኪ ኤሪዳይ፥  
 ኢዛ ዞሪዛይ ገዲ  
 ታማርሲዳይ ኦኔ?
- 14 ኤራቴስ ዴማናስ ጎዳይ  
 ኦና ዞሬ ኦይቺዴ?

- ሱሬ ኦጌ ኢዛ ታማርሲዳይ ኦኔ?  
 ኤራቴል ኢዛ ታማርሲዳይ፤  
 ኣኬካ ኦጌካ ኢዛ ቤሲዳይ ኦኔ?  
 15 ቤኢቴ ካዎቴፋቲ ጎምቦ ጊዶን  
 ጸኪዳ ሃላ ማላ፤  
 ኢስቲ ሜዛኔ ቦላ ዲዛ  
 ጉዲላ ማላ ቆዴቴቴስ፤  
 ሃሩርታ ሊቆ  
 ቢታ ማላ ጌዳሬስ።  
 16 ሊባኖሴይ ያርሾሶሆ  
 ታማስ ጊዱኩ፤  
 ኢዚ ሜዳሳታ ቆዳይካ  
 ጸጌቲዛ ያርሾስ ጉላ።  
 17 ካዎቴፋቲ ኡባይ ኢዛ ሲንፋን  
 ኣይኮካ ጊዴቴና፤  
 ኢስቲ ኣይኮራካ  
 ጋኪ ቆዴቶንታ  
 ሃዳ ሚሻ ማላ።  
 18 ሂስቲን ኢንቴ ጸሳ  
 ኦናራ ጊኒሴቲ?  
 ኣይ ሚስሌራ ጋሊ ጊኒሴቲ?  
 19 ኤቃ ሚስሌይ ጊዲኮ  
 ሂላ ኩሼን ማሴቲዴስ፤  
 ሄሳ ዋርቃ  
 ኦሊዛዴይ ቦላራ  
 ዋርቃን ሜሼስ፤  
 ቢራ ሳንሳላታካ ኢዛስ ጊኒሴስ።  
 20 ሄሳ ማላ ያርሾ  
 ሸሻናስ ዳንዳዮንታ  
 ማንቆ ኣሲ ሙሶንታ  
 ሚል ዶሬስ፤  
 ኩንዶንታ ሚስሌ ኤሳናስ  
 ኤሬቲዳ ሂላ ኮዬስ።  
 21 ኢንቴ ሄሳ ኤሬኬቲ?  
 ዋይኮ ሲዩቤኬቲ?  
 ቤኒ ቤኒ ኢንቴስ ዮቴቲቤኔ?  
 ሳኣይ ሜዴቶሶፌ ዶሚን

- አንቲ ኣኩቢቤኩቲ?  
 22 ኢዚ ቢታ ዩሾፔ ቦላራ  
 ባ ኣራታን ኡቴሰ፤  
 ቢታ ቦላ ዲዛ ዳሬይ  
 ቦሌ ማላ፤  
 ሳሎታ ማጋላሻ ማላ ሚጨሰ፤  
 ዲሳሶ ዲንካኔ ማላ ቶኬሰ።  
 23 ሃላቃታ ሃዳ ሂሰታና፤  
 ሃ ቢታ ኣይሲዛይታካ  
 ፒቲ ቆይሴሰ።  
 24 ኢሰቲ ቶኬቲዲ ጋምኣንታ ዲሺን፤  
 ዜሬቲዲ ታኮንታ ዲሺን፤  
 ቡሮ ጸጸ ዬዶንታ ዲሺን  
 ኢሰታ ቦላ ጫርኮ ዬዲን ሚሊዳ፤  
 ጎቴይ ኢሰታ ሱላ ማላ  
 ፒቲ ኤፊዳሰ።  
 25 ጌሻዚ ኢሰታሰ፤  
 «ታና ኦናራ ገኒሴቲ?  
 ታናራ ገናቲዛይ ኦኔ?» ጌሰ።  
 26 አንቲ ኣይፌ ቆቆ ሂሰቲዲ  
 ፑዳ ሳሎ ደሊቲ፤  
 ሃይታንታ ኡባ  
 ሚዲዳይ ኦኔ?  
 ሳሎ ጸሊንቲታ  
 ኢሳ ኢሳ ኬሲዛይ፤  
 ኢሰታ ሱንፋን ሱንፋን  
 ደይገዛይ ኢዛ።  
 ኢዚ ባ ገታቲላኒኔ  
 ባ ኤራቴላ ሚኖቴላፌ  
 ዴንዲዳይሳን  
 ኢሰታፌ ኢሶይካ ቆዬና።  
 27 ያቆቤ ኔ ኣይሰ ሄሳላ ጋይ?  
 ኢሰራኤሌ ኔ ኣይሰ ሄሳላ ሃሳያይ?  
 «ታ ኦጌይ ጎዳፔ ጌሚዴሰ፤  
 ታ ፒርዳይ ጸሳ ኣቻን  
 ዉዲ ጌቴቲቤና» ኣይሰ ጋይ?  
 28 ኔ ኤራቤኪ?  
 ኔ ሲያቤኪ?  
 ጎዳይ ሚርና ጸሳ፤

- ኢዚ ቢታ ኡባካ ሜዲዳይሳ፡፡  
 ኢዚ ዳቡሬና፤ አዛሌና፤  
 ኢዛ አኬካይካ  
 ኦናንካ ፒልጌቴና፡፡  
 29 ሚኖቴሉ ባይንዳዴሰ  
 ሚኖቴሉ አሜሰ፤  
 ዳቡርዳይሳስ ዋልቃ ጉጄሰ፡፡  
 30 ዬላጋቲካ ዳቡሬቴሲኔ  
 አዛሌቴሰ፤  
 ናቴላቲካ  
 ቆጶቲዲ ኩንዴቴሰ፤  
 31 ጊዶ ኣቲን ጎዳ  
 ሂዶታ ኦሊዛይቲ  
 ባንታ ዋልቃ ኦራዲሴቴሰ፤  
 ኢሰቲ ጎሌ ማላ ፒራቆና፤  
 ኢሰቲ ዳቡርንታ ዋጻና፤  
 ኢሰቲ ባና፤ አርጋጨቴና፡፡

## 41

### ኢሰራኤል ማዶ

- 1 ጎዳይ፡ «ኢንቴኖ ሃሩሮቶ፡  
 ጮኡ ጊቴ፤  
 ካዋቴላቲ ባ ዋልቃ ኦራጮቶ፤  
 ሸቂዲ ሃሳዬቶ፤  
 ኣኔ ፒርዳ ሺሎታ  
 ሲንላን ጋይቶሰ፡፡  
 2 አርሼይ ሞኪዛ ባጋፌ  
 ኢሳ ዳንሉዳይ፡  
 ጸሎቴላን ባስ ሃጋዚሳና  
 ጾይጊዳይ ኦኔ?  
 ኢዚ ካዋቴላታ  
 ኢዛስ አሉ አሜሰ፤  
 ኢዚ ኢሰታ ጊላ ማሻን  
 ቢታ ኬሲዴሰ፤  
 ባ ዋንዳፌን ጫርኮይ  
 ላሊዳ  
 ሱላ ማላ ኬሲዴሰ፡፡  
 3 ኢሰታ ጎዲ ዬዲዲ

- ማቶይ ባይንዳ አፂ ቢዳሰ፤  
 ኢዛ ቶሆይ ካሴ ዩቶንታ  
 ኦጌራ ሄማቲዳሰ፤  
 4 ሃይሳ ኦሒዳይኔ ፖሊዳይ  
 ዩሌታ ቤኒሶፌ ዴይጊዳይ ኦኔ?  
 ጎዳይ ኮይሮይታራካ  
 ዉርሴላይታራካ  
 ዲዛይ ታና» ጌሰ።  
 5 ሃሩሮቲ ቤኢዲ ያዩዳ፤  
 ሳኦ ጋጸቲካ ኮኮሪዳ፤  
 ኢሲ ቦላ ሽቂዲ ሲንላ ዩዳ።  
 6 ኢሶይ ኢሳራ ማዴቴሰ፤  
 ባ አሻካ፥  
 «ኣይኮይ ባ ሚና» ጌሰ።  
 7 ሂላንቻይ ዋርቃ ኦሒዛይሳ  
 ሚንሐሐሰ፤  
 ናሪቃን ቆጺ ሌኢሲዛዳይ  
 ቢራታ ማርጮን  
 ሴሪሲዛይሳ ሚንሐሐሰ፤  
 ቢራታ ሴሪሲ ኦይሴዶይ፥  
 «ሎኦ» ጌሰ፤  
 ኤቃ ጸሳ ሚሰሌይ ኩንድንታ ማላ  
 ሚሲማሬን ቶርጌሰ።  
 8 ጎዳይ፥ «ጊዶ አቲን ኔኖ  
 ታ አሽካራ ኢሰራኤሌ፥  
 ታ ዶሪዳ ያቆቤ፥  
 ታ ላጌዛ አብራሃሜ  
 ዜሬላዘ፥  
 9 ታኒ ኔና ቢታ  
 ጋጸፔ ኤሂዳይሶ፥  
 ሳሎይ ዳንጾሶፔ  
 ዴይጊዳይሶ፥  
 ርታ ኔና ታ ኣይሌዞ  
 ጊዳይሶ ታ ኔና  
 ዶራዲሰ አቲን ኦላጋቤኬ።  
 10 ታኒ ኔናራ ዲዛ ጊሻሰ ያዮፋ፤

- ታኒ ኔ ጸሳ ጊዲዳ ጊሻስ  
 ዳጋሞፋ።  
 ታኒ ኔና  
 ሚንፋናኔ ማዳና።  
 ታ ጸሎቴላ ኡሻቻ ኩሼን  
 ዜምፒሳ ኦይካና።
- 11 «ቤኣ ኔ ቦላ ሃንቁቴዳ ኡባይ  
 ኬሂ ዩላታና ካዉያና፤  
 ኔናራ ኤቁቴዛይቲ  
 ቲምኢ ጊ ሳያና።
- 12 ኔኒ ኔ ሞርኬታካ  
 ኮያዳካ ዴማካ፤  
 ኔና ኦሊዛይቲ ፒቴቲ ሳያና።
- 13 ጋሶይካ ታኒ ጎዳ ኔ ጸሳይ፥  
 ታ ኔና ማዳና፤ ያዮፋ  
 ታ ኔ ኡሻቻ  
 ኩሼዛ ኦይካና።
- 14 ኔኖ ጉዱኔዞ ያቆቤ፥  
 ኔኖ ቁሪ ኢሰራኤሌ፥  
 ሳያና ታኒ  
 ኔና ማዳና፤ ጌሰ።  
 ኔና ዋዚዛይ  
 ኢሰራኤሌ ጌሻዛ።
- 15 ቤኣ ታኒ ኔና ኦራሉ፥  
 ቃራኔ ኣቻራ ዲዛ  
 ካል ቡከዛ ሎዳ ኦፋና፤  
 ኔኒ ዙማታ ጎያ ሊቂሳና፤  
 ዙምቡላታካ ዩሳ  
 ሃፓ ኬሳና።
- 16 ኔኒ ኢሰታ ሱራጋና፤  
 ጫርኮይ ኢሰታ ፒቲ ኤፋና፤  
 ጎቴይካ ኢሰታ ላላና።  
 ጊዶ ኣቲን ኔኒ  
 ጎዳን ኡፋዬታና፤  
 ቃሴ ኢሰራኤሌ ጌሻን  
 ቦንቹታና።
- 17 ሂዩሳቲኔ ሜቶታንቻቲ  
 ሃል ኮያና፤

ጊዶ አቲን  
 አይኮካ ዴሜቴና፤  
 ሃላ ሳሞን ኢስታስ  
     ፖራንዴይ ሜሊዴስ፤  
 ጊዶ አቲን ታኒ ጎዳይ  
     ኢስታስ ዛሮ አማና፤  
 ታኒ ኢስራኤል ጸሳይ  
     ኢስታ ዬጋ አጊኬ።

- 18 ታኒ ቡላቲዳ  
 ዙሞቡላታ ቦላ ሻፋታ፥  
 ሾባታን ፑልቶታ ቋሳና፤  
 ባዘ ቢታ ኤሌ ሃል፥  
 ሳሜቲዳ ቢታን  
 ሃላ ፑልቶ ኬሳና።
- 19 ባዘ ቢታን ዚጋ፥  
 ኦዶሮ፥ ባርሴኔቴ፥  
 ዋጋራ ሚል ሞይዛና፤  
 አይኮይ ባይንዳ ባዘን ጸዳ፥  
     ጉንላኔ እንል ቶካና።
- 20 ሄሳ ጊሻስ አሳይ  
 ሄሳ ቤአናኔ ኤራና፤  
 ጎዳ ኩሼይ  
 ሃይሳ ኦሊዳይሳ፥  
 ኢስራኤል ጌሻይ ሜዲዳይሳ  
 ኢስቲ ኢሲፌ ዩሺ ቆፓናኔ  
     «አኬካና» ጌሰ።

ጸሳይ ዋርዶ ጸሳታ ኢጼስ

- 21 ጎዳይ፥  
 «አኔ ኢንቴ ሞቶ  
 ኤኪዲ ሃ ሸቂቲ» ጌሰ።  
 ያቆቤ ካዎይ፥ «አኔ ኢንቴ ሞቶ  
     ዳፋ ሃ ኤሂቴ» ጌሰ።
- 22 ቡሮፔ ሃናናይሳ ዮታና ማላ  
 ኢንቴ ኤቃ ጸሳታ ሃ ኤሂቴ፤  
 ኑ አኬካና ማላኔ  
 ኢስታ ወርሴላካ ኤራና ማላ  
     ካሴ ዮኦቲ አዛኮ ኑሰ ዮቲቴ፤

- ቡሮፔ ሃናና ሚሻታ ኤሪቴ።
- 23 እንጥ ጸሳታ ጊዲዲይሳ  
ኑ ኤራና ማላ፤  
ሲንላፌ ሃናና  
ሚሻታ ኑስ ዮቲቴ፤  
ኑኒ ዲጋማና ማላኔ ያያና ማላ፤  
ሎኑ ጊዲን ዋይኮ  
ኢታ ሚሽ ኦሊቴ።
- 24 ሄኮ እንጥ አይኮ  
ቆዳን ጌሎንታይታ፤  
እንጥ ኦሶይ ሙሊካ ሃዳ፤  
እንጥና ደሪዳይቲ ሃራሲዛይታ።
- 25 «ታኒ ፑዴሃ ባጋፌ  
ኢሳ ዴንላዲስ፤  
ኢዚካ ዬስ።  
አርሼይ ሞኪዛ ባጋራ ዪዛይሲ  
ታ ሱንላ ዪይጊዛይሳ፤  
ማናይ ኡርቃ ዬዲዛ ማላ  
ኢዚ ካሌሊዛይታካ  
ዬዴስ።
- 26 ኑኒ ኤራና ማላ ኮይሮቲ  
ኑስ አዋጂዳይ፤  
(ኢዚ ሊኬ) ኑ ጋና ማላ  
ኑስ ካሴቲ ዮቲዳይ ኦኔ?  
ኦኒካ ዮቲቤና፤  
ሲንላቲዲ ዮቲዳይ ዴና፤  
እንጥፌ አይ ቃላ  
ሲዩዳይካ ዴና።
- 27 ኮይሮታዳ፤ (ሄኮ ታኒ ቤአዲስ)  
ጋዳ ጸዮኔስ አዋጂዳይ ታና፤  
ዬሩሳላሜስ ሚሺራሾ ዮቲዛዴ ኢማዲስ።
- 28 ታኒ ያሊዛ ዋዴ ኦኒካ ዴና፤  
ኢስታ ጊዶን ዞራንቻይ ባዋ፤  
ታ ኦይቺዳ ዋዴ  
ዛሮ ኢሚዛይካ ዴና።
- 29 ቤኢቴ ኢስቲ ኡባይካ ሃዳ፤  
ኢስታ ኦሶስካ ጎአይ ዴና፤  
ኢስታ ሚሰሌቲካ

አይኮይ ባይንዳ ጫርኮ ማላ» ጌሰ።

## 42

ጎዳ አሸካራ

1 ጎዳይ፥ «ታኒ ካ  
ኦይኪዳ ታ አሸካራይ፥  
ታ ኢዛን ኡፋዬቲዛ  
ሙሩታይ ሃይሳ፤  
ታኒ ታ አያና  
ኢዛ ቦላ ዋፋዲሰ፤  
ኢዚ ካዋቴላታሰ  
ሱሬ ፒርዳ ኤሃና።

2 ዋሴና፤ ባ ቃላ ቆቂሴና፤  
ባ ጨንጉርሳካ  
ኦጌ ቦላ ኬሂ ሲሴና።

3 ዲንጨቲዳ ማቃ ኢዚ  
ሚንሴና፤  
ጨዋቲዛ ሙቃዳ ኢዚ ቶይሴና፤  
አማኔቱላን ኢዚ  
ሱሬ ፒርዳ ኤሃና።

4 ኢዚ ቢታ ቦላ ሱሬ ፒርዳ  
ኤሃና ጋካናሰ ዳቡሬና፤  
ሂዶታካ ቃንጾና፤  
ሃሩሮቲ ኢዛ ዋጋን  
አማኔታና» ጌሰ።

5 ሳሎታ ሜዲዳይ፥  
ኢሰታ ሚጨዳይካ፥  
ሳኣኔ ኢዚን ዲዛ ኡባ ገግሲዳይ፥  
ባ ዴሬሰ ፔኖ  
ኢዚን ዴኢዛ አሳታሰ ሼምፖ  
አሚዛ ጎዳ ጸሳይ፥

6 «ታኒ ጎዳይ  
ኔና ጸሎቱላን ዴይጋዲሰ፤  
ታ ኔ ኩሼ ኦይካና፤  
ታ ኔና ናጋና።

ታኒ ኔና ካዎቴላስ  
 ጫቆ ቃላ፤  
 አይዛቤታስካ ፖኦ ሂስታና  
 7 ኔ ቆቄታ አይፌ ዶይኣና፤  
 ዲኤቲዲይታ ቃሾ  
 ኬላፌ ቢርሻና፤  
 ጹማን ኡቲዲይታካ  
 ካርቻሌፌ ኬሳና። \*

8 «ታኒ ጎዳ፤ ሃይሲ ታ ሱንላ፤  
 ታ ቦንቾ ሃራስ  
 አላ አሚኬ፤  
 ታ ጋላታካ  
 ኤቃ ጸሳታስ ሸጂኬ።  
 9 ቤኢቲ ቤኒ ዮኦቲ ፖሌቲዳ፤  
 ሃኢ ታኒ ኦራሳ  
 ሚሽ አዋጃይስ፤  
 ኢዚ ሞካናፔ ሲንሐ  
 ታ አንቴስ ዮታይስ» ጌስ።

ጋላታ ማዛመሬ

10 አንቴኖ ዱጌ አባን ዎጂዛይቶ፤  
 ሄን ዲዛ ኡባቶ!  
 አንቴኖ ሃሩሮቶ!  
 ሄንካ ዲዛ ኡባቶ!  
 ጎዳሲ ኦራላ ማዛመሬ ዬጲቲ፤  
 ቢታ ጋጸፔ ዶሚዲ  
 አዛስ ጋላታ ማዛመሬ ሺሺቲ።  
 11 ባዞይኔ ካታማቲ  
 ባንታ ጨንጉርሳ  
 ጶቄ ሂስቲቶ፤  
 ቄዳሬይ ዳኢዛ ጉታይ ኡፋዬቶ፤  
 ሴላ ዳሬ አሳቲ  
 ኡፋይሳን ዬጶቶ፤  
 ዙማ ጸራንካ ኢሊሌቶ።  
 12 አስቲ ቦንቾ ጎዳስ አሚቶ፤

\* 42:7 ካርቻሌ ጉሲ ቃሾ ኬላ ዎይኮ ዎይኔ ኬላ።

ኢዛ ጋላታይካ  
ሃሩሮታን አዋጄቶ።

- 13 ጎዳይ አላ ቃራ ማላ ኬዛና፤  
አላንቻ ማላ ሆኤቲ ዴንዳና።  
ጨቁቴላ ጋይሮ ሲሳና፤  
ባ ሞርኬታካ አሊ ጸናና።

ጎዳይ ባ ዴራ ማዳና ኢሚዳ ሂዶታ

- 14 ጎዳይ፥ «ታኒ አዱሳ ዋዴሶፌ  
ጮኡ ጋዲሰ፤  
ሲርጺ ጋዲሰ፤  
ታና ቁሞኣ ኦይካዲሰ፤  
ሃኢ ጊዲኮ ሚጸ ኦይኬቲዳ  
ማጫሳ ማላ ዋሳይሰ፤  
ሼኖታይሲኔ ባናካይሰ።

- 15 ታኒ ዙማታኔ  
ዙምቡላታ ዋዲሳና፤  
ዶዛታ ኡባ ሜሊሳና።  
ሻፋታ ሃሩሮ ቢታ ኬሳና፤  
ኤሌ ሃላታካ  
ሚጨንቻና።

- 16 ታኒ ቆቂታ ኢሰቲ ኤሮንታ  
ኦጌ ካሌላና፤  
ኢሰቲ ሜዜቶንታ ኦጌራካ  
ታ ኢሰታ ኤፋና፤  
ዱማዛ ታ ኢሰታ  
ሲንላን ፖኢሳና፤  
ኩንዱኩርጮ ሶሆታ ታ ጊሊሳና፤  
ሃይታንታ ኡባ  
ታ አሶንታ ኣጊኬ።

- 17 ኤቃ ጸሳታን  
አማኔቲዛይቲ ጊዲኮ  
ሚሰሌታካ፥ «ኢንቲ ኑ ጸሳታ»  
ጊዛይቲ ጉዬ ሲማና፤  
ኢሰቲ ሙሌራ ካዉያና» ጌሰ።

ኢሰራኤሌ ኣሳ ቆቂቴሊኔ ቱሌቴሐ

- 18 ጎዳይ፥ «ኢንቴኖ ቱሌቶ ሲዩቴ!  
ኢንቴኖ ቆቄቶ  
ቤኢቴኔ ያለቴ!
- 19 ታ አሸካረራ  
ታኒ ኪቲዳዳፌ ኣቲን  
ሃራ ቱሌይ ኦኔ?  
ታስ ኣማኔቲዳዳ ማላ  
ቆቄይ፥  
ጎዳ አሸካራ ማላ  
ቆቄይ ኦኔ?
- 20 ዳር ሚሽ ቤኢዳታ ሺን  
ኣኬኪቤኬታ፤  
ኢንቴ ሃይላይ ዶያ ዴስ ሺን  
ሲዬኬታ» ጌስ።
- 21 ጎዳይ ባ ጸሎቴላ ጊሻስ ጊዲ፥  
ባ ዋጋ ጊታኔ  
ቦንቾ ኬሲዳ ጊሻስ ኡፋዬቲዴስ።
- 22 ሃ ዳሬይ ቦጌቲዳኔ ቦንቄቲዳ፥  
ኦላ ጊዶን ዋፂዳ፥  
ዋይኔ ኬላይ ኢዛ ቦላ  
ጎርዴቲዳ ዳሬ፤  
ኢስቲ ቦጌቲዳ፤  
ኢስታ አሺዛዴይ ዴና፤  
ኢስቲ ዲኤቲዳ፤  
«ኢስታ ዛሪቴ» ጊዛይካ ባዋ።
- 23 ኢንቴ ጊዶፌ ሃይሳ ሲዩዛይ፥  
ሲንላፌ ያና ዋዴስ  
ኣኬኪ ሲዩዛይ ኦኔ?
- 24 ያቆቤይ ቦጌታና ማላ፥  
ኢስራኤሌይ ዲኤታና ማላ  
ኦሊዳይ ኦኔ?  
ናጋራ ኦሊዲ  
ኑ ቆሂዳ ጎዳ ጊዴኔ?  
ኢስቲ ኢዛ ኦኔ ካላናሲኔ  
ኢዛ ዋጋስ ኣዛዜታና ኮዮንታ  
ኣጊዳ ጊሻሳ።
- 25 ሄሳ ጊሻስ ኤጲዛ ባ ሃንቆዛ፥

ኢታ ኦላ ኢስታ ቦላ ዩዲዴስ፤  
 ታማ ላጮን ኢስታ ጊዶላዴስ፤  
 ኢስቲ ጊዲኮ ሄሳ ኣኬኪቤቴና፤  
 ኢስታ ጸጊዴስ ሺን  
 ኢስቲ ዋዚናን ዋሊቤቴና።

## 43

ጸሓዲ ዳራ ኣሺዛዴ

- 1 ሃኢ ጊዲኮ ያቆቤ፥  
 ኔና ሜዲዳይ፥  
 ኢስራኤል! ኔና ጊግሲዳ ጎዳይ፥  
 «ታኒ ኔና  
 ዋዚዳ ጊሻስ ያዮፋ።  
 ታኒ ኔና ኔ ሱንላን ጸይጋዲስ፤  
 ኔኒ ታሳ።
- 2 ኔኒ ሃላ ጊዶራ ፒኒዛ ዋዴ፥  
 ታኒ ኔናራ ጊዳና።  
 ኔኒ ፒኒሺን  
 ሻፋይ ኔና ሚቴና፤  
 ኔኒ ታማ ጊዶራ ቢሺን  
 ኔና ጸጌና፤  
 ታማ ላጮይካ ኔና ሜና።
- 3 ጋሶይካ ታኒ ጎዳ ኔ ጸሓይ፥  
 ኢስራኤል ጌሻይ ኔስ ዳሌ፤  
 ታ ኔ ጊሻስ  
 ጊብጼ ዋዞ ኢማና፤  
 ቶጵያኔ ሴባ  
 ኔ ጊሻስ ኣላ ኢማና።
- 4 ኔኒ ታ ሱንላን ኣልኦኔ  
 ቦንቾ ጊዲዳ ጊሻስ፥  
 ታኒ ኔና ሲቂዛ ጊሻስ፥  
 ኣሳ ኔ ጊሻስ፥  
 ካዋቴፋታ  
 ኔ ሼምፖ ጊሻስ  
 ላሜ ኢማና።
- 5 «ታኒ ኔናራ ዲዛ

- ገሻሰ ያዮፋ፤  
 ታኒ ኔ ናይታ ኣርሼይ  
 ሞኪዛ ባጋፌ ኤሃና፤  
 ኔና ኣርሼይ ወሊዛ ባጋፌ ሺሻና።  
 6 ታኒ ፑዴሃ ባጋ፥ «ሃማ»  
 ዱጌሃ ባጋካ፥ «ዬዳ» ጋና፤  
 ታ ኣቱማ ናይታ ሃሆፕ፥  
 ታ ማጫ ናይታካ  
 ቢታ ጋጸፔ፥  
 7 ታ ሱንፋን ጸይጌቲዳ ኡባ፥  
 ታ ቦንቾስ ታ ሜዲዳይታ፥  
 ታኒ ገግሲዳይሳኔ  
 ታ ኦሊዳይሳ  
 ሃሚቲ» ጋና።

- 8 ኣይፌይ ዲሺን ቆቂዳይታ፥  
 ሃይሊካ ዲሺን  
 ቱሊዳይታ ኬሳ።  
 9 ካዎቴፋቲ ኡባይ  
 ኢሲፌ ሺቆቶ፤  
 ኣሳይካ ኢሲ ቦላ ሺቆ፤  
 ኢስታፌ ካሴቲዳ  
 ሃይሳ ኑስ ዮቲዳይ ኦኔ?  
 ቤኒ ሚሽ ኑስ ኣዋጂዳይ ኦኔ?  
 ሃራቲ ሲዬዲ፥  
 «ሃይሲ ቱማ» ጋና ማላ፥  
 ኢስታ ቱማቴላይካ  
 ቆንጫና ማላ  
 ባንታ ማርካታ ኤሄቶ።

- 10 «ኢንቲ ታና ኤራና ማላኔ  
 ኣማናና ማላ፥  
 ኢዚ ታና ጊዲዳይሳ  
 ኢንቲ ኣኬካና ማላ፥  
 ታ ማርካቲኔ ታ ደሪዳ  
 ታ ኣይሌቲ ኢንቲና።  
 ታፔ ካሴ  
 ሃራ ጸሲ ኦሴቲቤና፤

- ታፔ ጉዬንካ  
 ሃራ ጸሲ ዴና።  
 11 ታና፤ ታኒ ጎዳ፤  
 ታፔ አቲን ሃራ አሺዛይ ዴና።  
 12 ታኒ ቆንጨሳዲስ፤  
 አሻዲሲኔ ዮታዲስ፤  
 አንቲ ጊዶን ሃራ  
 አላጋ ጸሲ ዴኢቤና።  
 ታኒ ጸሳ ጊዲዳይሳስ  
 አንቲ ታ ማርካታ።  
 13 ቤኒሶፌ ደማዳ ታኒ ታና፤  
 ታ ኩሼፔ  
 ኬሲ ኤካናይ ዴና፤  
 ታ አሊዛይሳ ላማናዉ  
 ዳንዳይዛይ ኦኔ? » ጌስ ጎዳይ።

አማኔቶንታ ኢሰራኤል ጸሳ ማርቲል

- 14 ጎዳይ አንቲና ዋዚዛ  
 ኢሰራኤል ጌሻይ፥  
 «አንቲ ጊሻስ ባቢሎኔ ቦላ  
 ኦላንቻታ ኪታና፤  
 ኢስቲ ጨቄቲዛ ማርካቤታን፥  
 ባቢሎኔታ ኡባ  
 ቤታና ማላ ኦፋና።  
 15 ታኒ ጎዳይ አንቲ ጌሻይ፥  
 ኢሰራኤል ሜዲዳ  
 አንቲ ካዋ» ጌስ።

- 16 አባ ጊዶራ ኦጌ፥  
 ዋልቃማ ሃፋ  
 ጊዶራ አዲዛሶ  
 ኬሲዳ ጎዳይ፥  
 17 ፓራ-ጋሪታኔ ፓራታ፥  
 ኦላንቻታኔ  
 ሚኖ አሳታ ኡባ ኤሂዲ፥  
 ኢስቲ ዛሪ ዴንዶንታ ማላ  
 ዛቆሊሲዳ ጎዳይ፥  
 ሙቃዳ ቢድንፋ ማላ

- ኢስታ ጳይሲዳ ጎዳይ፥  
 18 «ቤኒ ዮኦታ ሃሳኦፒቲ፤  
 ካሴ ኣጲዳይሳ ባሊቲ።  
 19 ሄኮ ታ ኦራላ  
 ሚሽ ኦላና፤  
 ኢዚካ ሃኢ ሃናና፤  
 ኢንቲ ዩሺ ቆፔኬቲ?  
 ታኒ ባዞን ኦፔ ገቢሳና፤  
 ታኒ ኣይኮይ ባይንዳ ባዞንካ  
 ሻፋታ ኬሳና።  
 20 ባዞ ደኣቲ፥  
 ዋራካናቲኔ ጉቶቲ  
 ታና ቦንቻና።  
 ታኒ ባዞ ቢታን ሃሉ፥  
 ኣይኮይ ባይንዳ ባዞንካ  
 ፑልቶ ኢማና፤  
 ታ ዶሪዳ ታ ዴራስ  
 ሃሉ ኢማና።  
 21 ታኒ ታስ ገግሲዳ ዴሬይ  
 ታ ጋላታ ኣዋጃና ማላ  
 ታ ሃይሳ ኦላና።  
 22 «ያቆቤ፥ ኔ ታና ጸይጋቤካ፤  
 ኢስራኤል፥ ኔ ታና ሳሌታዳሳ።  
 23 ኔኒ ታስ ጸጌቲዛ ያርሾስ  
 ዶርስ ኤሃቤካ፤  
 ኔ ያርሾንካ  
 ታና ቦንቻቤካ።  
 ታኒ ኔና ካላ ያርሾን  
 ዋዪሳቤኬ፤  
 ኤጳኔ ያርሾንካ  
 ሳሌሳቤኬ።  
 24 ኔኒ ታስ ሎኦ  
 ሳዊዛ ኤጳኔ ሻማቤካ፤  
 ዋዶ ያርሾን ታና ካልሳቤካ።  
 ጌዶ ኣቲን ኔ ናጋራ ቶሆ  
 ታና ቶሳዳሳ፤  
 ቆሆን ታና ዳቡርሳዳሳ።

- 25 «ታ ጊሻስ ጋዳ  
 ኔ ቆሆዛ ጳይሲዛይ ታኒ ታና፤  
 ኔ ናጋራ ታ ቆፒኬ።
- 26 እኔ ካሴ አጁዳይሳ  
 ታና ቆፍሳ፤  
 እኔ ኢሲፌ ሸቂዲ ቆጴቶስ፤  
 ኔ ቱማቴላ እኔ ኤሪሳ።
- 27 ኔ አዋ ኮይሮይሲ  
 ናጋራ ኦሊዳስ፤  
 ኔ አስታማሬቲካ  
 ታ ቦላ ማካሊዳ።
- 28 ሄሳ ጊሻስ ታኒ ኔ  
 ጸሳ ኬላ ሃላቃታ ካዉሻና፤  
 ያቆቤ ባሻሽ፤  
 ኢስራኤሌካ ጫሻሽ  
 አላ አማና» ጌስ።

## 44

- ዶሬቲዳ ኢስራኤሌ
- 1 ጎዳይ፥ «ጊዶ አቲን  
 ታ አሽካራ ያቆቤ፥  
 ታ ዶሪዳ ኢስራኤሌ፥ ሲያ።
- 2 ኔና ሜጁዳይ፥  
 ኔ አዬይ ኡሎን ኦሊዳይ፥  
 ኔና ማዲዛ ጎዳይ፥  
 ሓ አሽካራ ያቆቤ!  
 ታኒ ዶሪዳ ዪሹሩኔ! ያዮፋ።
- 3 ታኒ ሳሜቲዳ ቢታን  
 ሃሐ ጉሳና፤  
 ሜላ ቢታንካ ሻፋ ጎጊሳና።  
 ታኒ ታ አያና ኔ ዜሬላ ቦላ፥  
 ታ አንጆ ኔስ  
 ና ና ቦላ ጉሳና።
- 4 ኢስቲ ዴምባን ጨሊላ ማታ ማላ፥  
 ሻፋ ዶናን ዲዛ ሚላ ማላ  
 ሞካና» ጌስ።
- 5 ኢሶይ፥ ሓኒ ጎዳሳ» ጋና፤

ሃራይ ባና ያቆቤ  
 ሱንሳን ጸይጋና፤  
 ሃራይ ቃሴ ባ ኩሼ ቦላ፥  
 «ታኒ ጎዳሳ» ገ ጸፋና፤  
 ኢዚ ባና ኢሰራኤል ሱንሳን  
 ጸይጋና» ጌሰ።

ጎዳፔ አቲን ሃራ ጸሲ ዴና

6 ኢሰራኤል ካዎይኔ ኢሰታ ዋዚዛይ፥

ጎዳይ ኡባፌ  
 ዋልቃማ ጸሳይ፥  
 «ኮይሮይ ታና፤ ወርሴሊካ ታና።  
 ታፔ ሃራ ጸሲ ባዋ።

7 ታ ማላይ ኦኒ ዲዜ? ኣኔ ዮቶ፤  
 ኮይሮ ታ ዴራሰ ታ ዮቶ ዩጊሺን  
 ኣዚ ሃኒዳኮ፥

ሱንሳፌካ  
 ኣዚ ሃናናኮ ዮቶ፤  
 ኣኔ ታሰ ቆንጨሶ፤  
 ቡሮ ሃናና ሚሻ ገሻሰ  
 ሱንሳቲ ዮቶ፤

ቡሮ ያናይሳ ካሴቲ ዮቶ።

8 ያዮፍቴ፤ ዳጋዋፍቴ።

ሃይሳ ታኒ ኢንቴሰ  
 ዮታቤኪና?  
 ቤኒሶፌ ታ ኢንቴና  
 ኤሪሳቤኪና?

ሄሳሰ ኢንቴ ታ ማርካታ።

ታፔ አቲን ሃራ ጸሲ ዲዜ?

ሙሌካ ዴና፤

ዎይኮ ሃራ ዛላይ ዲዜ?

ዴና፤ ታ ኦናካ ኤሪኬ» ጌሰ።

9 ኤቃ ሚሰሌታ ሜዲዛይቲ

ኡባቲ ሃዳ፤

ሚሰሌታ ኢሰታፌ

ኦሊዛ ሚሻቲካ ሃዳ፤

- ኢስታስ የቲዛይቲካ ቆቄ፤  
 ኢስታስ ኤራቴሌ ዴና፤  
 ኢስቲ ዩላታና።
- 10 ኣይኮካ ጎኑንታ ኤቃ ጸሓ  
 ማሲ ገገሲዛይ ኦኔ?
- 11 ኤቃ ጸስ ሜጲዛይ ኣስ ኣቲን  
 ሃራ ጊዴና፤  
 ኢዚኔ ኢዛ ሚሳቲዛይቲ ዩላታና፤  
 ኡባይካ ሺቂዲ  
 ኢሲ ቦላ ኤቆቶ፤  
 ኢስቲ ዳጋማናኔ ዩላታና።
- 12 ቢራታ ቆጶዛይ ናሪቃ ኦይኬስ፤  
 ጸፋ ቦንቆ ቦላ  
 ዋሌ ኦሌስ፤  
 ኤቃ ጸስ ናሪቃን ቆጶዲ  
 ሚሰሌ ገገሲስ፤  
 ባ ሚኖ ቄሴን ገገሲስ።  
 ሄሳፌ ጉዬ ጋፌስ፤  
 ዋልቃ ጳዬስ፤  
 ሃል ሳሜቴስ፤ ዳቡሬስ።
- 13 ማሲዛይ ዋዶሮን ዋጵስ፤  
 ችኬን ማላታ ዋሌስ፤  
 ማርሳራ ዋጩስ፤  
 ኢርሳሴን ኢዛ ቦላ  
 ማላታ ዋሌስ፤  
 ኣሳ ሚሳቲሲ ገገሲስ፤  
 ኣሳ ማላ ፑላሴስ፤  
 ጎይኖሶን ኤፊ ዋሌስ።
- 14 ዚጋ ሚል ቃንጾስ፤  
 ዋላ ዋይኮ ዋቆል ዶሬስ፤  
 ዋራን ዲዛ ሚላታራ  
 ኢሲፌ ዲጫና ማላ ኣጌስ፤  
 ዋይኮ ጸዳ ቶኬስ፤  
 ኢዛካ ኢራይ ዲቺስ።
- 15 ኣሲ ኤሶስ ጎኤቲስ፤  
 ኢዛፔ ጉል ኤኪዲ  
 ታማን ኤሌ ሆኤስ፤

ኡኬሊካ ኢዛን ኡኬሰ፤  
 ኢዛፔ ማሲዲ  
 ኤቃ ጸሰ ገጊሴሰ፤  
 ኢዛሰካ ጎይኔሰ።  
 ኤቃ ጸሰ ኦሌሰ፤  
 ኩንዲዲካ ኢዛሰ ዘጌሰ።

- 16 ባጋ ሚላ ኤሌሰ፤  
 ኢዛ ሶላካ ቁማ ካሌሰ፤  
 ኣሾ ኢዛን ጲጲዲ ካሊ ሜሰ፤  
 ታማዛ ሆኢሼ፥  
 «ኤሮሾ ታና ሆኢዴሰ፤  
 ታማዚካ ታሰ ቤቴሰ» ጌሰ።

- 17 ቃሴ ኣቲዳ ሚላዛ  
 ባሰ ኤቃ ጸሰ ገጊሴሰ፤  
 ሆኪዲ ኢዛሰ ዘጌሰ፤  
 ኢዛካ ጎይኔሰ፤  
 ኢዛ ዎሲሼ፥  
 «ኔኒ ታ ጸሳ ጊዲዳ ጊሻሰ  
 ታና ኣሻ» ጌሰ።

- 18 ኢሰቲ ኣይኮካ ኤሬቴናኔ  
 ኣኬኬቴና፤  
 ኢሰቲ ጸሎንታ ማላ  
 ኢሰታ ኣይፌይ ጎዜቴዴሰ፤  
 ኢሰቲ ዩሺ ቆፖንታ ማላ  
 ኢሰታ ዎዚናይ ጎርዴቴዴሰ።

- 19 ኦኒካ ታኪ ጊ ቆፒቤና፤  
 ኤራቴሊ ዎይኮ  
 ኣኬካይ ባይንዳ ጊሻሰ፥  
 «ባጋ ታማን ኤላዲሰ፤  
 ኢዛ ሶንቆን ካሐ ካላዲሰ፤  
 ኢዛን ኣሾ ጲጲዳ ማዲሰ፤  
 ሂሰቲን ኣቲዳይሳን ዎሰታዳ  
 ታኒ ሃራሲዛ ሚሻ ኦላኔ?  
 ሚላ ኣኖሰ ታኒ  
 ጎይናና ቤሲዜ?»

- 20 ኤያ ዎዚናይ ኢዛ ባሌሊን  
 ንናሰ ዳንዳይቤና።

ኢዚ ቢዲንሐ ቃምኤስ፤  
 ባና አሻና ዳንዳዬና፤  
 «ሃይሲ ታስ ኡሻቻ ኩሼን  
 ዲዛይ ዋርዶ ጊዴኔ?  
 ጋናስ ዳንዳይቤና።»

21 ጎዳይ፥ «ኢስራኤል ኔኒ  
 ታ አሸካራ ጊዲዳ ጊሻስ፥  
 ናቆቤ ሃይሳ ቆፓ፤  
 ታኒ ኔና ኦላዲስ፤  
 ኔኒ ታ አሸካራ።  
 ኢስራኤል ታኒ ኔና ዶጊኬ።

22 ታኒ ኔ ሞሮ ሻራ ማላ፥  
 ኔ ናጋራካ ማላዶ ቱላላ ማላ  
 ቁጫ ሳይሳዲስ፤  
 ታኒ ኔና ዋዚዳ ጊሻስ  
 ሃ ታኮ ሲማ» » ጌስ።

23 ጎዳይ ሃይሳ ኦሊዳ ጊሻስ  
 ሳሎቶ ዩዲቴ፤  
 ጨማ ቢታቶ ኡፋይሳን ኢሊሊቴ።  
 ኢንቴኖ ዙማቶ፥  
 ኢንቴኖ ዋራቶ፥  
 ሚላቶ ኡባይ ኢሊሊቴ፤  
 ጋሶይካ ጎዳይ  
 ናቆቤ ዋዚዳስ፤  
 ባ ቦንቾ  
 ኢስራኤል ቦላ ቆንጨሲዳስ።

ዩሩሳላሜይ አሳ ዱሳሶ ጊዳና

24 ኔና አዪ ኡሎን ሜዲዲ  
 ዋዚዳ ጎዳይ፥  
 «ኡባ ሜዲዲ

ሳሎታ ታርካ ፒዲሲዳይ፥  
 ሳኦካ ሚጨዳይ ታና ጎዳ።  
 25 ታኒ ዋርዶ ናቤታ ማላታ  
 ሃዳ ኦላና፤  
 ቢቲዛይታካ ኤያ ኬሳና።  
 ታኒ አጽ ኤራንቻታ

- ሺራ ዬጋና፤  
 ኢስታ ኤራቴላካ  
 ሃዲ አላና።
- 26 ታ አሸካራዛ ቃላ ታ ፖላና፤  
 ታ ከቲዳይታ ዘሬ ታ ሚንላና፤  
 ታኒ ዬሩሳላሜ፥  
 ሳኔኒ አሲ ዲዛሶ ጊዳና፥  
 ዩሁዳ ካታማታካ፥  
 ሳኒስቲ ኬዶታና፥  
 ኢስታ ላሌላካ፥  
 ሳታኒ ኦራዲሳና ጋና።
- 27 ታኒ ጨማ ሃላካ፥  
 ሳኔ ሜላ ጊዳ!  
 ኔ ሻፋታካ  
 ታ ሜሊሳና ጋና።
- 28 ቂሮሴካ፥  
 ሳኒዚ ታ ሄንላንቻ፤  
 ኢዚ ታ ሸኔ ፖላና ጋና፤  
 ዬሩሳላሜይካ፥  
 ሳሲማ ኤቁ፥ ጋና፤  
 ጸሳ ኬላሰ፥  
 ሳኒዛ ዮቺ ዬጌቶ ጋና» ጌሰ።

## 45

### ቂሮሴ ዶሬቴስ

- 1 «ታ ቲይዳይሳሰ፥  
 ኡሻቻ ታ ኦይኪዳይሳሰ፥  
 ካዎታ ጌስ ቢርሻና ማላኔ  
 ካዎቴላቲ ኢዛ ሲንላን  
 ሃሬታና ማላ፥  
 ፔንጌቲ ሳርዴቶንታ ማላ  
 ኢዛ ሲንላን ፔንጌታ  
 ዶያናሰ ቂሮሴስ ጎዳይ፥
- 2 ታኒ ኔ ሲንላራ ባና፤  
 ዙማታ ባሳ ጊናሳና፤  
 ጸርቂማላ ፔንጌታ ሚንላና፤

- በራታ ኮላታታካ ቃንጸና።  
 3 ኔና ኔ ሱንላን ጾይጊዳ ጎዳይ፥  
 ኢስራኤል ጸሳይ ታና ጊዲዳይሳ  
 ኔ ኤራና ማላ፥  
 ጌማሶን ዳጋቲዳ አቆታ፥  
 ጹማሶን ዲዛ ሃሮ  
 ታ ኔስ አማና።  
 4 ታ አሽካራ ያቆቤ ገሻሲኔ  
 ታኒ ዶሪዳ ኢስራኤል ገሻሰ፥  
 ኔ ታና ኤሮንታ አጊኮካ  
 ታኒ ኔና ኔ ሱንላን ጾይጋዲሰ፤  
 ቦንቾ ሱንላካ  
 ኔስ አማዲሰ።  
 5 ታኒ ጎዳ፤  
 ታፔ ሃራይ እኒካ ዴና፤  
 ታፔ ሃራ ጸሲ ዴና፤  
 ኔ ታና ኤሮንታ አጊኮካ  
 ታ ኔና ሚንላና።  
 6 ሄሲካ አሳይ  
 አርሼይ ሞኪዛሶፔ ቢዲ  
 አርሼይ ዉሊዛሶ ጋካናሰ  
 ታፔ ሃራይ ባይንዳይሳ  
 ኤራና ማላሳ።  
 ታኒ ጎዳ፤  
 ታፔ ሃራይ እኒካ ዴና።  
 7 ታኒ ፖኦ አሳዲሰ፤  
 ጹማካ ሜጳዲሰ፤  
 ታ ዲሬሳይሲኔ ማንቂሳይሰ፤  
 ሃይሳ ኡባ ኦሊዛ  
 ጎዳይ ታና።  
 8 ኢንቴኖ ሳሎቶ፥  
 ቦላፌ ዲሎቴላ ቡኪሲቴ፤  
 ሻራቲካ ዲጌ ጸኪሲቴ፤  
 ቢታይ ዶዬቶ፤  
 አቶቴሊ ሞኮ።  
 ዲሎቴሊካ ኢዛራ ኢሲፌ ዲጮ።  
 ታኒ ጎዳይ ሄሳ ሜጳዲሰ።

ጸሳይ ሜጴቴላሲኔ ታሪኬስ ጎዳ

- 9 «ማና መሻታ ጊደፌ  
 ባና መጺዳይሳራ ማ  
 ርሼቲዛይሳስ  
 እዬ እና!  
 ኡርቃይ ባና መጺዳይሳ፥  
 ሩኔ እይ ኦላይ?» ጊ ኤሪዜ?  
 ኔ ኦሊዛ ኦሶይ፥  
 ሩኔስ ኩሼይ ባ» ጊ ኤሪዜ?
- 10 ባ አዋ፥  
 ሩኔይስ ታና ሃይሳሶ ዩላዲ?»  
 ባ እዮ፥  
 ሩኔይስ ኔ ሃይሳሶ መጸታዲ?»  
 ጊዛዴስ እዬ እና!
- 11 «ኢሰራኤል ጌሻይ፥  
 ኢዛ መጺዳ ጎዳይ  
 ሲንሳፌ ሃናና  
 ሃኖታ ጊሻስ፥  
 ሩታ ናይታ ጊሻስ  
 ታና ኦይቹቲ?  
 ታ ኩሼ ኦሶታ ጊሻስ አዛዜቲ?
- 12 ሳእ ኦሊዳይ ታና፤  
 እሰካ ኢዚ ቦላ መጻዲስ።  
 ሳሎታ ታኒ ታ ኩሼን ቶላዲስ፤  
 ኢስታ ቦላ  
 ሳሎ መጽታታ ዋላዲስ።
- 13 ታኒ ቂሮሴ ጸሎቴላን ዴንላና፤  
 ኢዛ ኦጌ ኡባ ጊሊሳና፤  
 ታ ካታማዮ ኢዚ  
 ዛሪ ኤሳና፤  
 ዲኤቲዳ ታ አሳ መሸ  
 ቃንጸሊሶንታ ጮ  
 ኢዚ መላ ዩዳና» ጊስ  
 ጎዳይ ኡባፌ  
 ዋልቃማ ጸሳይ።

- 14 ጎዳይ፥ «ጊብጼ ዱሬቴሊኔ

ቶጵያ ዘልኤይ፥  
 ቃሴ ጌሳን ኣዲሰ ጊዲዳ  
 ሳባ ኣሳቲካ ኔኮ ያና፤  
 ኔይታ ጊዳና።

ኢሰቲ ኔና ካላና፤  
 ሳንሳላታን ቃሼቲ ኔኮ ዪዲ  
 ኔሰ ጎይናና፤  
 ኢሰታሰ፥ ቱማፔ ጎዳይ  
 ኔናራ ዴሰ፤

ኢዛፔ ኣቲን ሃራ ጸሲ ዴና  
 ጊዲ ዋሳና» ጌሰ።

15 ኣሺዛ ኢሰራኤል ጸሳው፥  
 ቱማፔ ኔኒ ኔና  
 ጌንፊዛ ጸሳ።

16 ኤቃ ጸሳታ ሜዲዛይቲ  
 ኡባይ ዬላታና፥ ጉጸና  
 ኢሲ ቦላ ካዉያና።

17 ኢሰራኤልይ ጊዲኮ  
 ጎዳን ሜርና ኣቶቴል ኣታና፤  
 ኢንቴካ ሜርናሰ  
 ዬላቴኬታኔ  
 ካዉዬኬታ።

18 ሳሎታ ሜዲዳይ ኢዚ ጎዳ፤  
 ቢታ ጊግሲዲ ሜዲዳይ፥  
 ሳኣሰ ዮቕ ዬጊዳይ፥  
 ኢዛ ኣሳ ዴሳሶ  
 ጊዳና ማላ ኣቲን  
 ጮ ማላ ዋሳናሰ  
 ሜዶንታ ጎዳይ፥  
 ታኒ ጎዳ፤  
 ታፔ ሃራይ ዴና።

19 ታ ዲማ ቢታን  
 ጌማን ዮታቤኬ፤  
 ያቆቤ ዜሬሳታሰ፥  
 «ታና ጮ ሃዳ ኮዪቴ» ጋቤኬ።  
 ታኒ ጎዳይ ቱማ ሃሳያይሰ፤  
 ሱሬ ዮኦ ኣዋጃይሰ።

ሳሎኔ ሳኣ ሜዲዳ ጸሳኔ ባቢሎኔ ኤቃታ

- 20 «ኢንቴኖ ካዎቴላታፔ  
 ቤተዳይቶ!  
 ኢሲፌ ሸቂዲ ሃዪቴ፤  
 ማታ ሸቂቴ።  
 ሚላፌ ኦሴቲዳ ኤቃ ጸሳ  
 ቶኪዛይታሲኔ፥  
 አሻናዉ ዳንዳዮንታ  
 ጸሳ ዎሲዛይታሰ  
 ኤራቴሉ ዴና።
- 21 ኣኔ ኢንቴ ሞቶ ዮቴቴ፤ ሺሺቴ፤  
 ኢሰቲ ኣኔ ኢሲፌ  
 ሸቂዲ ዘሬቴቶ።  
 ሃይሳ ኮይሮቲዲ  
 አዋጁዳይ ኣኔ?  
 ቤኒ ዮቴዳይ ኣኔ?  
 ታና ጎዳ ጊዲከና?  
 ዲሎይኔ አሺዛ ጸሲ  
 ታፔ ኣቲን ሃራይ ዴና።
- 22 «ኢንቴኖ ቢታ ጋጸን  
 ዴኢዛ ኡባቶ!  
 ታኮ ሰሚዲ ኣቲቴ።  
 ታኒ ጸሳ፤ ታፔ ኣቲን  
 ሃራይ ዴና።
- 23 ጉልባቴይ ኡባይ  
 ታ ሲንላን ጉልባታና፤  
 ኢንጻርሰ ኡባይካ ታናን ጫቃና፤  
 ታኒ ታርካ ታ ሁኤን ጫቃዲሰ፤  
 ጉዬ ሲሞንታ ቃላይ  
 ታ ዶናፔ  
 ዲሎቴላን ኬዚዴሰ።
- 24 «ኢሰቲ ታ ጊሻሰ ሃሳይሹ፥  
 «ዲሎቴሉኔ ዎልቃይ  
 ጎዳን ጸላ ዴሰ» ጋና» ጌሰ።  
 ኢዛ ቦላ ሃንቆን ዴንዲዳይቲ  
 ኡባይ ኢዛኮ ዪዲ ዬላታና።

- 25 ጊድ ኣቲን ኢሰራኤል ዜሬል ኡባይ  
ጎዳን ጸላና፤  
ቦንቾካ ዴማና።

## 46

### ባቢሎኔ ጸሳታ

- 1 ቤሌይ ካዉዪዴስ፤  
ኔቦይ ኬሂ ጉጺዴስ፤  
ኢስታ ኤቃ ጸሳቲ  
ጫና ማሄታን ጫኔቲዳ፤  
ኢስቲ ኦይኪ ዩዪዛ  
ሚሰሌቲ ቶሆ፤  
ዳቡርዳ ሚዶሳታስ ዴጾ ባኦ።
- 2 ኢስቲካ ኢሲ ቦላ ዱጌ ጉፋናና፤  
ጫናካ ኣሻና  
ዳንዳዬቴና፤  
ኢስቲካ ዲኤቴዲ ባና።
- 3 ጎዳይ፥ «ኢንቴኖ ያቆቤ  
ሶ ኣሳቶ!  
ኢሰራኤሌፔ ኣቲዳ ኡባቶ!  
ኢንቴ ኢንቴ ኣዩ ኡሎን  
ሻራ ኣቶሳፌ ሃ ሲሚን  
ኢንቴና ታ ኦይኪዳይቶ!  
ኢንቴ ዩሌቶሶፌ ደማዳ  
ታ ቶኪዳይቶ!  
ታ ጊዛ ሲዩቴ።
- 4 ኢንቴ ጨሚዲ  
ፑሉማና ጋካናስካ  
ኢንቴና ቶኪዛይ ታና፤  
ታኒ ታና፤  
ታኒ ኢንቴና ማጳዲስ፤  
ታኒ ኢንቴና ቶካና፤  
ታኒ ኢንቴና ካፋና፤  
ታ ኢንቴና ኣሻና።
- 5 «ታና ኦናራ ጊኒሴቲ?  
ታና ኦናራ ሊኪሴቲ?  
ኦኒ ኢሲኖ ሚሳታና ማላ

- ታና ኦናራ ጌዳሬቲ?  
 6 አማርዳ አሳቲ ዋርቃ  
   ባንታ ካራጺቴፔ ቆሌቴሰ፤  
   ቢራካ ሜዛኔን  
   ጌዳሬቴሰ፤  
   ኢሰቲ ሴሪሲ ቲጊዛ  
     ሂላንቻ ቃጸሬቴሰ፤  
   ኢዚካ ኢሰታሰ ጸሳ  
   ሂሰቲ ሜጴሰ።  
   ኢሰቲካ ኢዛሰ ጎይኔቴሴኔ  
   ያይኔቴሰ።  
 7 ዴንሊዲ ባንታ  
   ሃሼን ቶኬቴሰ፤  
   ዛሪዲ ሄ ዴንሊዲ  
   ሶሆን ዋሌቴሰ፤  
   ኢዚካ ሄን ኤቃ ጌሰ፤  
     ሄፔ አዋካ ቃጸና፤  
     ኦኒካ ኢዛኮ ዋሲኮ  
     ዛሮ ኢሜና፤  
     ሜቶፔካ ኢዛ አሼና።  
 8 «ኢንቴኖ ሞራንቻቶ!  
   ሃይሳ አኬኪቴ፤  
   ዩሽካ ቆፒቴ፤  
   ኢንቴ ዋዚናን ቁምኢ ኦይኪቴ።  
 9 ካሴ ቤኒ ዋዴ  
   ሃኒዳ ዮኦታ አኬኪቴ፤  
     ታኒ ጸሳ፤  
   ታፔ ሃራይ ዴና፤  
     ታኒ ጸሳ፤  
   ታ ማላይ ኦኒካ ዴና።  
 10 ዉርሴፋን ሃናናይሳ ኮይሮታ፥  
   ቡሮፔ ያናይሳ ቤኒ ዮታዲሰ፤  
   ኘታ ሃልቾይ ሚኖ፤  
   ታና ኡፋይሲዛዝ ኡባ  
     ታ ኦፋና፥ ጋዲሰ።  
 11 አርሼይ ሞኪዛ ባጋፌ  
   ቦንቂዛ አርጋንሐ፥

ሃሆ ቢታፌ ታ ቆፋ  
 ፖሊዛ ኣሰ ታኒ ጸይጋና።  
 ታ ዮቲዳይሳ ታ ኦፋና፤  
 ታ ሃልቺዳይሳ ታ ፖላና።

- 12 «ኢንቴሮ ዋዚና ሹቻቶ፥  
 ጸሎቴላፊካ ሃኪዳይቶ፥  
 ታና ሲዪቴ።  
 13 ታኒ ታ ጸሎቴላ ኤሆን ዳይስ፤  
 ሃሆ ጊዳና።  
 ታ ኣቶቴላይ ጋሞኤና፤  
 ታኒ ጸዮኔ ኣቶቴላ።  
 ኢስራኤል ቦንቾ  
 ማይዛና» ጌሰ።

## 47

- ባቢሎኔ ቦላ ያና ፒርዳ  
 1 ጎዳይ፥ «ሃኔ ባቢሎኔ ጌላኦ፥  
 ጉዲላ ቦላ ዋዳ ኡታ፤  
 ሃኔ ባቢሎኔታ ናዬ፥  
 ኔ ኣራታፔ ዋዳ፤  
 ቢታን ኡታ፤  
 ሃይሳፌ ጉዬ  
 ኔኒ ማላ ሎኦኔ ዳልቂዳልቃ  
 ጌቴታ ጸይጌታካ።  
 2 ዋዳ ኤካዳ ካል ጋጫ፤  
 ኔ ጎሳ ቃራ፤  
 ኔ ቃሚሳዛ ቃራ፤  
 ኔ ጸፋ ቤሳ፤  
 ጋዲጋዳሼ ሻፋ ፒና።  
 3 ኔ ካሎቴላ ቆንጮ፤  
 ዩላቺዛ ኔ ካሎይ ቤቶ፤  
 ታኒ ሃሎ ማካና፤  
 ታ ኦናካ ኣኒኬ» ጌሰ።  
 4 ኦና ዋዚዛ

ኢስራኤል ጌሻሰ፤  
ሱንላይ ጎዳ ኡባፌ  
ዋልቃማ ጸሳ።

5 «ሃኔ ባቢሎኔታ ናዬ፤  
ጁማሶ ጌላዳ ጮኡ ጋ ኡታ፤  
ሃይሳፌ ጉዬ ኔ ካዋቴላታ  
ጎዳቴዮ ጌቴታ ጸይጌታካ።

6 ታኒ ታ ዴራ ሃንቄታዲሰ፤  
ታኒ ጸንጸዛካ ቴኒሳዲሰ፤  
ታኒ ኢሰታ ኔ ኩሼን  
አላ ኢማዲሰ።  
ኔኒ ጌዲኮ  
ኢሰታሰ ቃጵታቤካ፤  
ጨሚዳይታ ቦላካ  
ኬሂ ዴጾ ቃምባራ  
ዋላዳሳ።

7 ኔኒ፤ ሐኒ ሜርናሰ  
ጎዳቶ ጌዳና ጋዳሳ።  
ጌዶ አቲን ሃይታንታ  
አኬካቤካ፤  
ኢሰታ ዉርሴላ  
አይ ጌዳናኮ ቆፓቤካ።

8 «ሃኔ ኢሻሎ ዴሰ ዲዛሬ!  
ኔርካ ኔናን  
አማኔታ ኡቴዳሬ!  
ኔ ዋዚናን፤ ሐና፤  
ታፔ አቲን ሃራይ ባ።  
ሃኒፌ ጉዬ ታኒ አምኦ ጌዲኬ፤  
ዬላዳ ጵሚዳር ጌዲኬ፤  
ጌዛሬ ሲያ!

9 ሃ ናምኡ ዮኦቲ፤  
አምኤቴላኔ ዬሊ ጵንላ  
ቆፋይ ባይንዳ ኢሲ ጋላሰ  
ኔ ቦላ ጋኪ ዋላና፤  
ኔ አይ ኬና ቢቴኮካ፤  
ኔ አይ ኬና ሙሬኒኮካ  
ኢሰቲ ኔ ቦላ

- ኩሜላ ዋልቃራ ያና።  
 10 ኔኒ ኔ ኢታቲላን አማኔታዳ፥  
   ኅታና ኦኒኔ ቤኤና፥ ጋዳሳ።  
   ቃሴ፥ ኅታና፤  
   ታፔ አቲን ሃራይ ዴና  
   ኔ ጊዳ ዋዴ  
   ኔ አጵ ኤራቴላይኔ  
   ጨንጫቴላ  
   ኔና ባሌሊዳ፥ ጋዳሳ።  
 11 ባሺ ኔ ቦላ ያና፤  
   ኔኒ ዋስታ ሙሬና  
   ዛራናኮ ኤራካ፤  
   ኔ ቃንጾ አማዳ  
     ኔ ዳንዳዮንታ ቆሆይ  
     ኔ ቦላ ጋካና።  
   ኔ ቆፖንታ ሜቶይ  
     ኔ ቦላ ዲንጋቲ ያና።  
 12 ሄኮ ቤኣ፤  
   ኔኒ ናቴላፌ ዶማዳ  
   ኦላሼ ዳቡርዳ ቢታታኔ  
   ዳሮ ሙሬናታ  
   ጉጃ ጉጃ ኦላ፤  
   ኦኔ ኤሪዛይ ኔስ ሃናናኮ፥  
     ኦኔ ኤሪዛይ ኔኒ  
     ኔ ሞርኬታ ሺሮሳናኮ?  
 13 ኔ ኤኪዳ ዞሬ ኡባይ  
   ኔና ዳቡራራ አሺዴስ፤  
   አጊናፔ አጊና ጋካናስ  
     ጸለንቲ ጸሊ ካዪዛይቲ፥  
   ጸለንቲ ታይቢዛይቲ  
   ኣኔ ሃ ዬቶ፤  
   ኔና ጋኪዛ ሜቶፔ  
   ኣኔ ኢስቲ ኔና አሹቶ።  
 14 ሄኮ ኢስቲ ሃፓ ማላ፤  
   ታማይ ኢስታ ማና።  
   ታማ ላጮፔ ዴንዲዳይሳን  
   ባና አሻናስ

- ዳንዳዬቴና።  
 እሲ ሆኑና ቦንቆይ ዳና፤  
 ኡተዲ ሆኑና  
 ታማይካ ዳና።
- 15 ናቴላፌ ደማዳ  
 ኔ ኢስታራ ዳቡርዳይቲ፥  
 ኔ ኢስታራ ዛልኢዳይቲ፥  
 ኢስቲ ኦፋና ዳንዳይዛይ  
 ሃይሳ ጸላ፤  
 ኢሶይ ኢሶይ ባ ሞሮ  
     ጉጂ ጉጂ ባና፤  
 ጊዶ እቲን ኔና  
     አሻናይ ዳና» ጌሰ።

## 48

- ሲሞንታ ኢጲዳ ኢስራኤሌ
- 1 ጎዳይ፥ «ኢንቴኖ ኢስራኤሌ ሱንላን ጸይጌቲዳ፥  
 ያቆቤሶ አሳቶ!  
 ዩሁዳ ዛሬፔ ቤቲዳይቶ!  
 ኢንቴኖ ጎዳ  
 ሱንላን ጫቂዛይቶ!  
 ቱማቴላኒኔ  
 ጸሎቴላን ጊዶንታ፥  
 ኢስራኤሌ ጸሳ ጸይጊዛይቶ!  
 ሃይሳ ሲዪቴ።
- 2 ሉኒ ጌሻ ካታማይን  
 ዲዛይታን ጊዲ  
 ኢንቴርካ ኢንቴና ጸይጊዛይቶ!  
 ኢስራኤሌ ጸሳን  
 አማኔቲዛይቶ!  
 ጎዳይ ኡባፌ  
 ዋልቃማ ጸሳይ  
     ጊዛይሳ ሲዪቴ።
- 3 «ካሴ ሃኒዳ ሚሻታ  
 ታኒ ዳሮ ዋዴፔ ሲንላን  
     ዮታ ዋላዲሰ፤  
 ታ ዳናፔ ኬዚዳሰ።

- ኢስቲ ኤሬታና ማላካ  
 ታኒ ኦላዲስ፤  
 ታ ዲንጋቱ ኦሊን  
 ኢስቲካ ፖሌቲዳ።
- 4 ኔ አይ ማላ ሲሞንታ  
 አስ ጊዲዳኮ  
 ታ ኤራይስ፤  
 ኔ ሞርጌ ሻያይ ቢራታ ማላ፤  
 ኔ ኮንኬይ ጸርቂማላ ሚሳቴስ።
- 5 ሄሳ ጊሻስ ሃይታ ሃ ዮኦታ  
 ቤኒ ታ ኔስ ዮታዲስ፤  
 ኢስቲ ፖሌታናፔ ሲንላን  
 ታ ኔና ኤሪሳ ዋላዲስ፤  
 ሄሲካ፥ ሩታ ኤቃ ጸሳቲ  
 ሃይሳ ኦሊዳ፤  
 ሚላፌ ማሴቲዳ ሚሰሌቲኔ  
 ቢራታፔ ኦሴቲዳ ታ ጸሳቲ  
 ሃይሳ ታስ አዛዚዳ  
 ጎንታ ማላሳ።
- 6 «ሃይታ ሃ ዮኦታ  
 ኔ ሲያዳሳ፤  
 አኔ ኡባካ ዶላ፤  
 ኢስቲ ሊኬ ጊዲዳይሳ  
 ኔኒ ኔ ሁኤራ ማርካቲኪ?  
 ሃኢፔ ደማዳ  
 ኦራላ ሚሻታ፥  
 ኔፔ ጌሚዳይታኔ  
 ኔ ኤሮንታ ዮኦታ  
 ታ ኔስ ዮታና።
- 7 ሄይቲ ሃኢ ሜጴቲዳ አቲን  
 ካሴ ጊዳና፤  
 ኢስታ ጊሻስ ኔ ሃቺፌ አቲን  
 ካሴ ሲያቤካ፤  
 ሄሳ ጊሻስ፥  
 ሎ፥ ታ ኢስታ ጊሻስ ኤራይስ  
 ጋና ዳንዳያካ።
- 8 ኔኒ ሲያቤካ ዋይኮ ኤራቤካ፤  
 ኔ ሃይላ ቤኒፔካ

ደዩቲቤና።  
 ጋሶይካ ኔኒ ካሴካ  
 ጨሚዛዴኔ  
     ናቴላፌ ደማዳ  
     ኔ ማካላንቻ  
 ጌቴቲዳይሳ  
     ታ ኤራዲሰ።

- 9 «ታ ሱንላ ጊሻሰ ጋዳ  
     ታኒ ታ ሃንቆ ጋሞኢሳና፤  
     ታ ጋላታ ጊሻሰ ጋዳ  
         ታ ኔፔ ቴቃና፤  
     ታ ኔና ቃንጸንታ  
     ኣጋና ማላሳ።
- 10 ቤኣ ቢራ ማላ ጊደንታ ኣጊኮካ  
     ኔና ጋጫዲሰ፤  
     ታማ ማላ ሜቶን ፓጫዲሰ፤
- 11 ታ ጊሻሰ ጋዳ፥  
     ታኒ ታ ጊሻሰ ጋዳ ኦላይሰ።  
     ታርካ ታና ዋሰታ  
     ካዉሻቴላሰ  
         ኣላ ኢሞ?  
     ታ ቦንቾ ኦናሰካ ኢሚኬ።

ጸሊ ዶሪዳ ኦሳንቻ

- 12 «ኔኖ ያቆቤ፥  
     ታኒ ጸይጊዳ ኢሰራኤሌ  
         ታኒ ጊዛ ሲያ።  
     ታኒ ኢዛ፤  
     ኮይሮይካ ታና፤  
     ዉርሴላይካ ታና።
- 13 ቢታሰ ዮች ዩጊዳይ  
     ታ ኩሼ፤  
     ሳሎታ ሚጨዳይ  
     ታ ኡሻቻ ኩሼ።  
     ታ ኢሰታ ጸይጊዛ ዋዳ

ኢሰቲ ኡባይካ  
ኢሲ ቦላ ኤቄቴሰ።

- 14 «ኢንቲ ኡባይካ  
ኢሲ ቦላ ሺቂዲ ሲዪቴ፤  
ኤቃ ጸሳታፔ ካሴ  
ሃይታንታ ዮቲዳይ ኦኔ?  
ኅዳሰ ዶሬቲዳ ላጌይ  
ኢዚ ባቢሎኔ ቦላ  
ሃልቲዳይሳ ፖላና፤  
ኢዛ ቄሴይካ  
ባቢሎኔታ ቦላ ጊዳና።
- 15 ታኒ ታርካ ዮታዲሰ፤  
ቱሙካ ታ ጾይጋዲሰ፤  
ታ ኢዛ ኤሃና፤  
ኢዛ ኦሶይካ ኢዛሰ ፖሌታና።
- 16 «ታኮ ሃ ሺቂዲ ሃይሳ ሲዪቴ፤  
ታኒ ኮይሮፔ ደማዳካ  
ጌማን ሃሳያቤኬ፤  
ኢዚ ፖሌቲሺን  
ታ ሄን ዳይሰ» ጌሰ።

- ሃኢካ ኡባ ሃሪዛ  
ኅዳይኔ ኢዛ ኣያናይ  
ታና ከቲዳ።
- 17 ኅዳይ ኔና ዎዚዳ  
ኢሰራኤሌ ጌሻይ፥  
«ታኒ ኅዳ ኔ ጸሳይ፥  
ኔና ኅኢዛዝ ታማርሲዛይሳ፥  
ባናሰ ቤሲዛ ኦጌራ  
ኔና ካሌሊዛይ ታና።
- 18 ኔኒ ታ ኣዛዞ ሲዪዳ ጊዲዳኮ፥  
ኔሰ ሳሮቴሊ ሻፋ ማላ፥  
ኔሰ ጸሎቴሊካ  
ኣባ ዳሞባላ ማላ ጊዳናሺን።
- 19 ኔ ዘራሊ ኣባ ሻሚንታ ማላ፥  
ኔ ናይቲካ ቆዳይ ባይንዳ  
ጉዲላ ማላ ጊዳናሺን፤

ኢስታ ሱንላ ቁጨጭቴና፤  
ታ ሲንላፌ  
ቆጭቴናሺን» ጌሰ።

- 20 ባቢሎኔ ቢታፌ ኬዚቴ፤  
ባቢሎኔ አሳፔ ባቃቴቴ!  
ሃይሳ ኢሊሊሳን ኤሪሲቴ፤ አዋጁቴ፤  
ቢታ ጋጸ ጋካናሰ ዮቴቴ፤  
«ኅዳይ ባ አሸካራ  
ያቆቤ ዋዚዳሰ» ጌቴ።
- 21 ኢዚ ኢስታ ባዞ ቢታራ  
ካሌሊሺን  
ኢስቲ ሳጫቴቤቴና።  
ኢዚ ኢስታሰ ዛላፌ  
ሃላ ፑልቲሲዳሰ፤  
ኢዚ ዛላ ጳልቂዳሰ፤  
ሃሊካ ቆቂ ኬዚዳሰ።
- 22 «ኢታታሰ ሳሮይ ባ» ጌሰ ኅዳይ።

## 49

ኅዳ አሳንቻ

- 1 ኢንቴሮ ሃሩሮቶ፥  
ታ ጊዛይሳ ሲዪቴ።  
ኢንቴሮ ሃሆን ዲዛ  
ካዋቴላቶ፥  
ሃይሳ ኤዘጊቴ።  
ታኒ ታ አዪ ኡሎን ዲሺን  
ኅዳይ ታና ጴይጊዳሰ፤  
ታ ዬሌቶንታ ዲሺን ታና  
ታ ሱንላን ጴይጊዳሰ።
- 2 ታ ኢንጻርሳ  
ጊላ ማሻ ማላ ቃራሲዳሰ፤  
ባ ኩሼ ኩዋን  
ታና ጌንላዳሰ፤  
ኢዚ ታና ሆጾ

- ዪሻ ማላ ኦሊዴስ፤  
 ሂስቲዲ ባ ኮሆ ጊዶን  
 ታና ቆቲዴስ።  
 3 ኢዚ ታና፥ «ኢስራኤል  
 ኔ ታ አይሌ፥  
 ታኒ ታ ቦንቾ  
 ኔናን ቆንጨሳና» ጊዴስ።  
 4 ጊዶ አቲን ታኒ፥  
 «ታኒ ሜላ ጮ ዳቡራዲስ፤  
 ጎኣይ ባይንዳ  
 ጮ ሃዳ ሚሻን  
 ታ ዋልቃ ዉርሳዲስ፤  
 ጊዲኮካ ታ ኦሶዛስ  
 ኩሺ ዛራናይ ጎዳ፤  
 ታ ዋጋይካ  
 ታ ጸሳ ማታና» ጋዲስ።  
 5 ሃኢ ታኒ ጎዳ አይፌ  
 ሲንላን ቦንቼታዲስ፤  
 ጸሳይ ታስ ዋልቃ ጊዲዴስ፤  
 ታኒ ያቆቤ  
 ኢዛኮ ዛራና ማላ፥  
 ኢስራኤል ኢዛኮ ሺሻና ማላ  
 ኦሊዳ ጎዳይ  
 ሃኢካ ዛሪዲ፥  
 6 «ኔኒ ታስ ኦሳንቻ ጊዴሊ፥  
 ያቆቤ ቆሞታ  
 ኔ ዛራናይሲኔ  
 ታ ናጊዳ ኢስራኤል ዛራዳ  
 ኔ ኤሃናይሲ  
 ሄሲ ኔና ዴዴና፤  
 ቃሴካ ታ አቶቲላ  
 ቢታ ጋጸ ኔ ጋላና ማላ፥  
 ታኒ ኔና ካዋቲላታስ  
 ፖኦ ሂስታና» ጌስ።

## 7 ካዴቲዳይሳሲኔ

ካዎቴላን ኢጴቲዳይሳስ፥  
 ዳሬ ሃሪዛይታ  
 አሽካራ ጊዲዳ ኔስ፥  
 ጎዳይ፥ ኢስራኤል  
 አሺዛ ጌሻይ፥  
 «ካዎቲ ኔና በኢዲ ዴንዲ ኤቃና፤  
 ካዎ ናይቲ ኔና በኢዲ  
 ኔስ ዚጋና፤  
 ጋሶይካ ኔና ዶሪዳ ጎዳይ፥  
 ኢስራኤል ጌሻይ  
 አማኔቲዳዴ» ጌስ።

ኢስራኤል ዛሪ ኤሶ

8 ጎዳይ፥ «ታኒ ዶሪዳ ዋዴ  
 ኔ ኦይሻ ዛራና፤  
 አቶቴላ ጋላስ  
 ታኒ ኔና ማዳና፤  
 ዴራስ ጫቆ ቃላ ጊዳና ማላ፥  
 ቢታዮካ ኔ ዛራ ኤሳና ማላ፥  
 ካሴ ቢታ ዩጊ ቆይዳይታስ  
 ኢስታ ጸንጾ  
 ኔ ዛራ ኢማና ማላ፥  
 ታ ኔና ማዳና፤  
 ታ ኔስ ኦላና።

9 ኔኒ ዲኤቲዳይታ፥  
 «ሃ ኬዚቲ!»  
 ቆማን ዲዛይታ፥  
 «ፖኦን ኬዚቲ»  
 ጋና ማላ ታ ኦላዲስ።  
 ኢስቲ ኦጌይ ዲዛሶን ዲዛሶን  
 ካል ማና፤  
 አይኮይ ባይንዳ ዙምቡላ ቦላ  
 ሄሜቲዛሶ ዴማና።

10 ኢስቲ ጋፌቴቴና  
 ዋይኮ ሳሜቴቴና፤  
 ኢስታ ባዞ ቢታ ሴላይ  
 ዋይኮ አዋ ሴላይ ቆሄና።  
 ኢስታስ ቃጴቲዛይ

ኢስታ ካለፋና፤  
ሃላ ፑልቶይ ዲዛሶን  
ኢስታ ሄማና።

- 11 «ታ ዙማታ ኡባ  
ኦጌ ኬሳና፤  
ታ ዋጋ ኦጌቲካ ቶቁ ጋና።
- 12 ሄኮ ኢስቲ ሃሆ ዳሬፔ ያና፤  
ኢሲ ኢሲኔቲ ፑዳሃፔ፤  
ባጋይቲ ኦርሼይ ወሊዛ ባጋፌ፤  
ሃንኮ ኦቲዳይቲ ሲኒሜፔ  
ያና» ጌሰ። \*
- 13 ሳሎቶ አንቲ፥ ኢሊሊ ጌቲ፤  
ቢታዬ ኔኒ ኡፋዬታ።  
አንቲኖ ዙማቶ ኡፋይሳን ዬጺቲ፤  
ጋሶይካ ጎዳይ  
ባ ዴራ ሚንፊፊሰ፤  
ሜቶታንቻታሰ ቃጼቲሰ።
- 14 ጸዮና ጊዲኮ፥  
«ጎዳይ ታና አጌዴሰ፤  
ጎዳይ ታና ባሊዴሰ» ጋዲሰ።
- 15 ጎዳይ፥ «ኣያ ባ ቶንፊዛ ና  
ባላናሰ ዳንዲያዜ?  
ባ ዬሊዳ ናሰ ቃጼቲኬ?  
ኦኔ ኤሪዛይ  
ኢዛ ባላና ዳንዲያዉሰ፤  
ታኒ ጊዲኮ ኔና ባሊኬ።
- 16 ሄኮ ታኒ ኔና  
ታ ኩሼ ቃኣን ጸፋዲሰ፤  
ኔ ዲርሳ ገምቤቲካ ኡባቶ  
ታ ሲንፋን ዴቲሰ።
- 17 «ኔ ኦቱማ ናይቲካ  
ኤሶን ሲማና፤

---

49:10 አጁ 7:16-17

\*

49:12 ሲኒሜ ጌቲቲዛይ ሃኢ ዋዴን ኣሴዋ ጌቲቲዛ  
ጊብጼ ካታማኮ።

እና ላሊዳይቲ ኔፔ ባቃታና።  
 18 እኔ ቶቁ ጋዳ  
   ኔ ዩሾ ጸላ፤  
   ኔ ናይቲ ኡባይ ኢሲፌ ሸቂዲ  
     ኔኮ ያና።  
   ታኒ ጎዳይ ታ ዳኦን ጫቃይሰ፤  
   ኔኒ ኢሰታ ኡባ  
     እሌቆ ማላ ማይኣና፤  
   ኔ ኢሰታ ሚሺራ ማይኦ ማላ  
     ማይኣና» ጌሰ።

19 «ኔ ላሌታዳ ቡላ ጊዲኮካ፥  
   ኔ ቢታይ ሙሌራ ቆይኮካ፥  
   ሃች ኔኒ ኔ ዳሬዛሰ  
     ጹንሐ ጊዲኮካ፥  
   ኔና ሚቲዳይቲ  
   ኔፔ ሃካና።

20 ጩጩ ዋዴ ኔ ዬሊዳ ናይቲ፥  
   ኔ ሃይሉ ሲዩሺን፥  
   ኣሃይሲ ጋዴይ  
   ኑሰ ኬሂ ጸሚዳሰ፤  
   ኑ ዳናሰ ኑሰ  
   ጊዲዛሶ ኢማ» ጋና።

21 ኔኒ ኔ ዋዚናን፥  
   ኣሃይታ ታሰ ዬሊዳይ ኦኔ?  
   ታኒ ጩጩዛዴኔ ማይኔ፤  
   ታኒ ጎዴቲዳዴኔ  
     ኢጾቲዳዴ ጊዳ ዲሺን  
   ሃይታንታ ዲቺዳይ ኦኔ?  
     ታኒ ታርካ ኣታዲሰ ሺን  
     ሂሰቲን ሃይታንቲ  
   ኣዋፔ ዩዶ?» ጋሳ» ጌሰ።

22 ኡባ ሃሪዛ ጎዳይ፥ «ቤኣ፥  
   ታኒ ካዎቴላታ  
   ማላታን ጸይጋና፤  
   ታኒ ታ ባንዲራ ኣሳሰ  
     ቶቁ ሂሰታ ኤሳና፤

ኔ አቱማ ናይታ  
 ኢሰቲ ኢዲማ ኤሃና፤  
 ኔ ማጫ ናይታካ  
 ባንታ ሃሼን  
 ቶኪዲ ኤሃና።

- 23 ካዎቲ ኔና ዲቺዛ  
 አዋታ ጊዳና፤  
 ኢሰታ ማቼቲ ኔና ዲቺዛ  
 አዬታ ጊዳና፤  
 ኢሰቲ ጉፋኒዲ ኔሰ ጎይናና፤  
 ኔ ቶሆ ቦላፌ  
 ባናካ ላጫና፤  
 ኔካ ታኒ ጎዳ  
 ጊዲዳይሳ ኤራና፤  
 ታናን ሂዶታ ኦሊዛይቲ  
 ዬላቴቴና» ጌሰ።

- 24 ዲኢ ኤኪዳ ሚሽ ኦላንቻታፔ  
 ጉዬ ዛራናሰ፤  
 ዲኤቲ ቢዳይታ  
 ሜንጾ ኢታታ ኩሼፔ  
 አሻናሰ ዳንዳዬቴዜ?

- 25 ጊዶ አቲን ጎዳይ፤  
 «ቱሙካ ኦላንቻቲ  
 ዲኢ ኤፊዳ ሚሽ  
 ኬሰ ኤካናሰ፤  
 ሜንጾ ኢታታ ኩሼፔ  
 ዲኤቲዳይታ አሻናሰ  
 ዳንዳዬቴሰ፤  
 ኔናራ ኦሊቴዛይታራ ታ ኦሌታና፤  
 ኔ ናይታካ ታኒ አሻና።

- 26 ኔና ኡንኤሊዛይቲ  
 ባንታርካ ባ አሾ ማና፤  
 ዎይኔ ኡሻን  
 ማሶቲዛ ማላ  
 ባንታርካ ባ ሱፋን  
 ማሶታና፤  
 ሄሳፌ ጉዬ አሳ ዜሬሐ ኡባይ፤

ታኒ ጎዳ፥ ኔና አሺዛይሳ፥  
ኔና ዋዚዛይሳኔ  
ያቆቤ ዋልቃማ ጊዲዲይሳ  
ሄሳን ኤራና» ጌሰ።

## 50

ኢስራኤል ናጋራኔ ጸላ አይሌ አዛዜቴል

1 ጎዳይ፥ «ታኒ አንቴ አዮ  
አንጃ ዬዲዳ ዋራቃታይ  
አዋን ዲዜ?  
ዋይኮ ታ አንቴና  
አይ ታልኣ ኤኪዳዴስ ባይዛዲና?  
ቤኢቴ አንቴ አንቴ  
ናጋራ ጊሻስ ባይዜቴዴታ፤  
አንቴ ሞሮ ጊሻስ  
አንቴ አያ አንጃታ ባዱስ።

2 ታኒ ዪዛ ዋዴ ሄን  
አሲ አይስ ዳይዴ?  
ታ ጾይጊዛ ዋዴ  
ዛሮ አሚዛ አሲ  
ሄን ዋኒ ዳይዴ?  
አንቴና ዋዛና ሚሽ ጨጋናስ  
ታ ኩሼይ ቃማዴ?  
ዋይኮ አንቴና አሻናስ  
ታስ ዋልቃይ ጉፉ?  
ቤኢቴ ታ ሃንቆን  
አባ ሜሊሳይስ፤  
ሻፋታካ ባዞ ኬሳይስ  
ኢስታን ዲዛ ሞሌቴ  
ሳሞን ሃይቂዲ ዜቄቴስ።

3 ታኒ ሳሎ ቋሚሳና፤  
ታኒ ኢዛ ማቃ ማይዛና» ጌሰ።

4 ኡባ ሃሪዛ ጎዳይ ታስ  
አንጻርሳ ኤራቴል አሚዴስ፤  
ሄሳ ጊሻስ ዳቡራንቻታስ  
ታ አይ ጋና ቤሲዛኮ ታ ኤራይስ፤  
ማላዶ ማላዶ  
ታና ቤጎፊስ፤

- ታማርሼ ዲዛ ታማሬ ማላ  
 ሲያናሰ ታ ሃይሐ ደዬሰ።
- 5 ኡባ ሃሪዛ ጎዳይ  
 ታ ሃይሐ ደይዳሰ፤  
 ታኒ ማካላንቻ ዲኬ፤  
 ጉዬካ ባቃታቤኬ።
- 6 ታ ዞኮ ሾጪዛይታሰ፥  
 ታ ቡቻ ሾዲዛይታሰ  
 እላ አማዲሰ፤  
 ታ አይፌሶ ጩቻፌ  
 ጌንላቤኬ።
- 7 ኡባ ሃሪዛ ጎዳይ  
 ታና ማዲዛ ጊሻሰ  
 ታኒ ካዉይኬ፤  
 ሄሳ ጊሻሰ ታ አይፌሶ  
 ዳልዳቻ ሹቻ ማላ  
 ኦላዲሰ፤  
 ታኒ ዬላቶንታይሳ ኤራይሰ።
- 8 ታ ጸሎቴላ ቆንጪሲዛዴይ  
 ታ ማታን ዴሰ፤  
 ሂሰቲን ታና ሞታና  
 ዳንዳይዛይ ኢዚ ኦኔ?  
 ኦኔ ኢሲፌ ቲራን ጋይቶሰ!  
 ታ ባልጋራይ ኦኔ?  
 ኦኔ ሃዮ!
- 9 ቤኢቲ፥ ኡባ ሃሪዛ ጎዳይ  
 ታና ማዴሰ፤  
 ሂሰቲን ታ ቦላ ፒርዳናይ ኦኔ?  
 ቤኢቲ፥ ኢሰቲ ኡባይካ  
 ማይኦ ማላ ጩጋና፤  
 ቢላይ ኢሰታ ማና።
- 10 ኢንቲ ጊዶፌ ጎዳሰ ያዬዛይ፥  
 ኢዛ አይላ ቃላሰ  
 ኦዛዜቲዛይ ኦኔ?  
 ሄሳዴይ ቆማን

- ቢዛ ጊዲኮኔ  
 ፖኦይ ኢዛሰ ባይንዳ ኣጊኮ  
 ኢዚ ጎዳ ሱንፋን  
 ኣማኔቶ፤  
 ባ ጸሳንካ ዜምፖ።  
 11 ሃኢ ጊዲኮ ኣንቲ ታማ ኤሌዲ፥  
 ላጪዛ ኣንቲ ጸምፔ ጸምፔ  
 ኦይኪዳ ኡባቲ  
 ኣንቲ ፖኦን ቢቲ፤  
 ኣንቲ ኦይሊዳ ጸምፔ  
 ፖኦን ሲሜሬቲቲ፤  
 ኣንቲ ታ ኩሺፔ  
 ኤካናይሲ ሃይሳ፤  
 ኣንቲ ኢታ ሜቶን ኩንዳና።

## 51

- ጸዮኒስ ሜርና ኣቶቴሐ  
 1 «ኣንቲኖ ጸሎቴሐ ካሊዛይቶ፥  
 ጎዳ ኮይዛይቶ ሲዩቲ።  
 ኣንቲ ኢዛፔ ጳልቄቲ  
 ኬዚዳ ዛላዛኔ  
 ኣንቲ ቦኬቲ ኬዚዳ  
 ኦላ ጸሊቲ።  
 2 ኣንቲ ኣዋ ኣብራሃሜኮ፥  
 ኣንቲና ዩሊዳ ሳራኮ ጸሊቲ።  
 ኢዚ ባርካ ዲሺን  
 ታኒ ኢዛ ጸይጋዲሰ፤  
 ታኒ ኢዛ ኣንጃዲሲኔ ዳርሳዲሰ።  
 3 «ጎዳይ ጸዮኖ  
 ቱሙ ሚንፊላና፤  
 ኢዚ ላሊቴሓ  
 ቃጺታን ጸላና፤  
 ኢዚ ባዞ ቢታዛ ኤዳኔ ማላ፥  
 ኢዚ ባዞ ቢታዛ  
 ጎዳ ኣታኪልቲሶሆ ማላ  
 ኦላና፤  
 ኢሻሎይኔ ኡፋይሲ፥

ጋላታይኔ ዬላ ጨንጉርሲ  
ኢዚን ሴቴታና።

- 4 «ታ ባጋቶ ታ ጊዛይሳ ሲዪቴ፤  
ታ ዴሬዞ ታ ጊዛ ኤዝጋ፤  
ዎጋይ ታፔ ኬዛና፤  
ታ ፒርዳይ ካዎቴላታስ  
ፖኦ ጊዳና።
- 5 ታ ዲሎቴላይ  
ኤሶቲ ዬላ ቦላ፥  
ታ አቶቴላይ ማቲሼ ዴሰ፤  
ታ ቄሴይ ካዎቴላታስ  
ቱማ ፒርዳ ኤሃና፤  
ሃሩሮቲ ታኮ ያላና፤  
ታ ቄሴካ ሂዶታ ኦላና።
- 6 ፑዴ ቆቁ ጊዲ ሳሎታ ያሊቴ፤  
ዚቂ ጊዲ ዴጌ ሳኣካ ያሊቴ።  
ሳሎቲ ጨዋ ማላ  
ቲሞኢ ጊ ሳያና፤  
ሳኣይካ አፋላዲን ጨጋና፤  
ኢዚን ዴኢዛ አሳይ ኡዲንጾ ማላ  
ኤሶን ሳያና፤  
ታ አቶቴላይ ሜርናስ ዳና፤  
ታ ዲሎቴላሰካ  
ዉርሴሊ ዴና።»
- 7 ጎዳይ፥ «ኢንቴኖ  
ዲሎቴላ ኤሪዛይቶ፥  
ታ ዎጋ ኢንቴ ዎዚናን  
ዎሊዳ አሳቶ  
ታ ጊዛ ሲዪቴ።  
አሳይ ኢንቴና ካጂሺን ባቦፍቴ፤  
ኢሰቲ ኢንቴና  
ጫዴሺን ዳጋሞፍቴ።
- 8 ቢላይ ማይኦ ሚዛ ማላ  
ኢሰታ ማና፤  
ኢሰቲ ጉጹኔይ ሚዳ  
ሱፌ ማላ ጊዳና፤  
ታ ዲሎቴሊ ጊዲኮ ሜርናስ፥  
ታ አቶቴሊ ዬሌታፔ

ዬሌታ ጋካናስ ዳና» ቤስ።

- 9 አቤት ጎዳ ቄሴይ ዳንዳ፤  
 ዋለቃ ማይኣ፤  
 ካሴ አዲዳ ዋዴታን፤  
 ሚሚንቲ ቃንጾሬሊዳይ፤  
 ጌታ ዳዌዛ ጨዲዳይ  
 ኔና ጌዲኪ?
- 10 ዋዜቲ አቲዳይቲ ፒናና ማላ፤  
 አባኔ ጨማ  
 ሃላ ሜሊሲዳይ፤  
 ጨማ ጌዶራ ኦጌ ገግሲዳይ  
 ኔና ጌዲኪ?
- 11 ጎዳይ ዋዚዳይቲ ሲማና፤  
 ዬጺሼካ ጸዮኔ ጌላና፤  
 ሜርና ኡፋይሳ ካላቻ  
 ሁኢን ጎጾና፤  
 ኢስቲ አንጃኔ ኡፋይሳ  
 ዲስ ዳማና፤  
 ጨጭይኔ ዬሆይ  
 ኢስታፌ ባቃታና።
- 12 ጎዳይ፤ «አንቲና ሚንሊዛይ  
 ታኒ ጸላ ኢዛ፤  
 ሃይቁዛ አሳ ዜሬሐ፤  
 ማታ ማላ ሹሊዛ አሳ ናስ  
 አይስ ባባይ?
- 13 ኔና ሜዲዳይሳ፤  
 ሳሎታ ቶሊዳይሳ፤  
 ሳኣስ ዮቾ ዬጌዳይሳ ኔ ባላዳሳ፤  
 ኔና ጳይሳናስ ጊጌቲዳ  
 ሚንጾ ኢታዛ ጋሶፔ  
 ዳንዲዳይሳን  
 ኡባ ጋላስ ሺርን ዳሳ፤  
 ሂስቲን ሄ ሚንጾ ኢታዛ ሃንቆይ  
 ሃኢ አዋን ዲዜ?
- 14 ቃሹቲዳይቲ ኤሶን ቢርሼታና፤  
 ኢስቲ ባ ቃሹቲዳ  
 ኦላ ጌዶን ሃይቁቲና፤

- ካሉ ኢስታስ ፓጮና።  
 15 ጋሶይካ ዳምባላይ ዳንዳና ማላ  
   ኣባ ቃሊዛ  
   ታኒ ጎዳይ ኔ ጸሳ፤  
   ታ ሱንሉ ጎዳ  
     ኡባፌ ዋልቃማ ጸሳ።  
 16 ታኒ ታ ቃላ  
   ኔ ደናን ዋላዲስ፤  
   ታ ኩሼ ኩዋን ካማዲስ፤  
     ሳሎታ ኢስቲ ዲዛሶን ዋሊዳይ፥  
     ቢታስ ዮች ዩጊዳይ፥  
     ጸዮኖ፥ ሩቅ ታ ዴሬ  
     ጊዳይ ታና» ጌስ።

### ጎዳ ሃንቆ

- 17 ጎዳ ኩሼፔ ሃንቆ  
   ኡሹ ኡዱዳሬ፥  
   ኦርጮካ ኣሾንታ፥  
   ኣስ ጋንዲጋርሲዛ ኡሹ  
     ጸዲ ሂስታ ኡዱዳሬ፥  
     ሃኔ ዩሩሳላሜ ዳንዳ!  
     ዳንዳ፥ ዳንዳ ኤቃ!  
 18 ኢዛ ዩሊዳ ናይታ ኡባፌ  
   ካሌሊዛይ ኢሶይካ ባዋ፤  
   ቃሴ ኢዛ ዲቺዳ  
   ናይታ ኡባፌካ  
   ኢዚ ኩሼ ኦይኪዛይ  
     ኢሶይካ ባዋ።  
 19 ቤኣ ባሻ ቦላ ባሺ  
   ኔ ቦላ ዩዴስ፤  
   ሂስቲን ኔና ኦኔ  
   ሚንሴላናይ?  
   ኢስቲካ ላሌቴሊኔ ጳይስ፥  
     ኮሻኔ ማሻ።  
 20 ኔ ኣቱማ ናይቲ ዳቡርዳ፤  
   ዋጺማዴን ኦይኬቲዳ

ጌኔሳ ማላ  
 ኦጌ ጋጸን ኡባን ኢቺዳ።  
 ጎዳ ሃንቆይኔ  
 ኔ ጸሳ ሴራይ  
 ኢስታ ቦላ ኩሚዴስ።

- 21 ሄሳ ጊሻስ ዋይኔ  
 ኡሻን ጊዶንታ  
 ጮ ማሳቲዛሬ ሃይሳ ሲያ
- 22 ባ ዳራ አሺዛ ኔ ጎዳይ  
 ኡባፌ ዋልቃማ ጸሳይ፥  
 «ቤአ፤ ኔና ጋንዲጋርሲዛ  
 ኡሻ ኔ ኩሼፔ  
 ታ ኤካዲስ፥  
 ታ ሃንቆ ጸአፔ  
 ናሞአንሶ ኡያካ።
- 23 ታኒ ሄሳ ኔና ኡንኤሲዛይታ  
 ኩሼን ዋላና።  
 ኢስቲ ኔና፥ ሩኒ ኔ ቦላራ  
 ሄሚቲዲ አቆና ማላ ዛቁላ ጊዳ።  
 ሂስቲን ኢስቲ አቆና ጋካናስ  
 ኔ ዘኮ ኢስታስ ቢታ ማላኔ  
 ኦጌ ማላ ኦላዳሳ» ጌስ።

## 52

- ጸሳይ ዩሩሳላሜ አሻና
- 1 ሃኔ ጲዮኔ ዴንዳ፤ ዴንዳ፤  
 ዋልቃ ማይአ፤  
 ጌሻ ካታማዬ  
 ዩሩሳላሜ!  
 ኔ ቦንቾ ማይኦ ማይአ፤  
 ሃይሳፌ ጉዬ ቃጻሬቶንታይኔ  
 ቱናይ ኔ ጊዶ ጌሌና።
- 2 ሃኔ ዩሩሳላሜ፥ ዴንዳ፤  
 ጉዲላ ፒታ፤ ኔ አራታን ኡታ።  
 ዲኤቲዳ ጲዮኔ ናዬ፥

- ኔ ቆጵን ቃሼቲዳ  
 ሳንሳላታ ኬሳ ዬጋ።
- 3 ጎዳይ፥ «ኢንቴ ጮ  
 ሃዳ ባይዘቲዳታ፤  
 ሃኢካ ሚሺ ባይንዳ  
 ጮ ኢንቴ ዋዜታና» ጌሰ።
- 4 ኡባ ሃሪዛ ጎዳይ፥  
 «ኮይሮ ታ ዳሬይ ዳኣናስ  
 ዱጌ ጊብጼ ዋጂዳስ፤  
 ጉዬፔ ኣሶሬይ ጋሶይካ ባይንዳ  
 ኡንኤሲ ሃሪዳስ።
- 5 ሂሰቲን ታ ዳሬይ  
 ጋሶይካ ባይንዳ  
 ዲኤቲ ቢቺን  
 ታስ ሃን ኣዚ ዲዘ? ›  
 ኢስታ ሃሪዳይቲ  
 ኢስታ ቦላ ቂልጪዳ፤  
 ጋላስ ኩሜል ታ ሱንፋ  
 ፓጩይ ባይንዳ ጫዬቲስ።
- 6 ሄሳ ጊሻስ ታ ዳሬይ  
 ታ ሱንፋ ኤራና፤  
 ሄ ጋላስ ካሴካ ዮቲዳይ  
 ታና ጊዲዳይሳ ኢስቲ ኤራና።  
 ኤ ሄሲ ታና» ጌሰ።
- 7 ዙማ ቦላ ኤቂዳ ቶሆቲ፥  
 ሚሺራቾ ኤኪ ዪዛ ቶሆቲ፥  
 ሳሮቴል ዮቲዛይቲ፥  
 ሎኦ ሚሺራቾ ዮቲዛይቲ፥  
 ኣቶቴል ኣዋጂዛይቲ፥  
 ጸዮኖካ፥  
 «ኔ ጸሳይ ካዋቲዳስ»  
 ጊዛ ቶሆቲ ኣይ ማላ ሎኦ!
- 8 ሃኔ ሲያ! ኔና ናጊይዛይቲ  
 ባንታ ቃላ ቆቁ ሂሰቲዳ።

ኢሲ ቦላ ኢሊሊሼ ዩጾቴስ፤  
 ጎዳይ ጸዮኔ ሲሚዛ ዎዴ፥  
 ኢስቲ ኢዛ  
 ባንታ አይፌራ ቤኣና።

- 9 ኢንቴኖ ዩሩሳሌምን  
 ቆሌቲዳ ሶሆቶ!  
 ኢንቴ ኢሲ ቦላ ኢሊሊሳን ዩጾቴ፤  
 ጎዳይ ባ ዴራ ሚንፊሊዴስ፤  
 ዩሩሳሌም ካታማካ ዎዚዴስ።

- 10 ጎዳይ ባ ጌሻ ቄሳ  
 ካዎቴላታ ኡባ  
 ሲንላን ቆንጨሳና፤  
 ቃሴ ቢታ ጋጸን ዲዛ ኡባይካ  
 ኑ ጾሳ አቶቴላ ቤኣና።

- 11 ኢንቴኖ ጎዳ ኬላ  
 ሚሻታ ቶኪዛይቶ!  
 ሻኬቲቴ፥ ሻኬቲቴ፤  
 ሄፔ ኬዚቴ።  
 ቱና ሚሽ ቦቾፍቴ፤  
 ሄፔ ኬዚቴ፤  
 ኢንቴ ሁኤሲካ ጌይቴ።

- 12 ጊዲኮካ ኤሶን ኬዜኬታ፤  
 ዎይኮ ቤቲ ቤኬታ፤  
 ጎዳይ ኢንቴፌ ሲንሐ ኣጲዲ  
 ኢንቴና ካሌላና፤  
 ኢሰራኤል ጾሳይካ  
 ጉዩራ ኢንቴና ናጋና።

ሜቶይ ኢዛ ጋኪዛ ኦሳንቻ

- 13 ጎዳይ፥ «ቤኢቴ፥  
 ታ አሽካራይ ኣኬካን ኦላና፤  
 ኢዚ ኤሬቲዲዴ ጊዳና፥  
 ኢዚ ጶቁ ጶቁ ጋና፤  
 ኢዚ ኬሂ ቦንቹታና።
- 14 ዳሮ ኣሳይ ኢዛን  
 ዳጋማናሼ ጋካናስ

- እስ ኡባፌ ቆሄቲዳ ገሻስ  
 ኢዛ መጃይ  
 እሳ መጃፕ ላመቲዴስ።
- 15 ሄሳ ገሻስ ኢዚ  
 ዳሮ ካዎቴላታ ማላሊሳና፤  
 ኢዛ ጋሶን ካዎቴላቲ  
 ባንታ ዶና ኦይካና፤  
 ኢስታስ ዮቴቶንታይሳ  
 ኢስቲ ቤኣና፤  
 ኢስቲ ሲዪ ኤሮንታ  
 መሻሽ ኣኬካና» ጌሱ።

## 53

- 1 ዴሬዚ፥ «ኮኒ ዮቴዳይሳ  
 ኦኔ ኣማኒዳይ?  
 ጎዳ ቄሴይ ኦናስ ቆንጨዴ?
- 2 ኢዚ ኢዛ ሲንፋን ጫሬቻ ማላ፥  
 መላ ቢታፌ ሞኪዛ  
 ጸጸ ማላ ሞኪዴስ፤  
 ኦ ኢዛ ጸላናስ ሺጫቴሉ  
 ዎይኮ ቱማይ ዴና፤  
 ኦ ኢዛ ዶሳናስ  
 ኢዛ ማላይ ሎኤና።
- 3 ኢዚ ኣሳን ካጼቲዳዴኔ  
 ኢጾቲዳዴ፤  
 ኢዚ ሃርጌፌኔ መቶፕ  
 ሻኬቲ ኤሮንታ ኣሳ፤  
 ኢዚ ኣሲ ኢዛ ቤኣናፕ  
 ባ ኣይፌሶ ሃራሶ ዛሪዛ ኣሳ ማላ  
 ካጼቲዳዴ ገዲዴስ፤  
 ኮኒካ ኢዛ ቦንቲቤኮ።
- 4 «ቱሙካ ኢዚ ኦ ሃርጌ  
 ባስ ኤኪዴስ፤  
 ቃሴ ኦ ሳኮካ ኢዚ ቶኪዴስ።  
 ኮኒ ገዲኮ ኢዛ ጋኪዳ መቶይ፥  
 ዴሼቴላይኔ ዋዬይ

- ጸሳፌ ኢዛስ አሜቲዳዛ  
ጊዲ ቆፒደስ።
- 5 ጊደ አቲን ኢዚ  
ኑ ሞሮ ጊሻስ ጫዴቲደስ፤  
ኑ ቆሆ ጊሻስ ለቁደስ፤  
ኢዛ ቦላ ዋጂዳ ቁጻቴይ  
ኑስ ሳሮ ኤሂደስ፤  
ኢዛ ማዲንፋን ኑ ፓጺደስ።
- 6 ኑኒ ኡባይ ደርሳ ማላ  
ቶይላቲ ቶይደስ፤  
ኑኒ ኢሶይ ኢሶይ ኑ ኦጌ ቢደስ፤  
ጎዳይ ኑ ኡባ ቆሆ  
ኢዛ ቦላ ዋሒደስ።
- 7 «ኢዚ ኡንኤቲደሲኔ ዋዬቲደስ፤  
ጊደ አቲን ደናካ ፖጊቤና።  
ደርሳ ላቃ ማላ  
ሹኬታናስ ላጌቲደስ፤  
ባ ኢስኬ ቃንጸዛይታ ሲንፋን  
ጮኡ ጊዛ ደርሳ ማላ  
ኢዚ ደናካ ጸቂቤና።
- 8 ኢዛ ሜቶሶኒኔ ፒርዳን ኤፊዳ፤  
ኢዚ ታ ዴራ ሞሮ ጊሻስ  
ዴሼቲዲ፥ ፓጻይ ዲዛ ቢታፌ  
ዲጌቲዳይሳ ኢዛ ዜሬላፌ  
አኬኪዳይ ኦኒ?
- 9 ኢዚ አይኮ ጌኔ ሃሳዮንታ፥  
አይ ሞሮካ ኦሶንታ፥  
ኢዛ ሃይቆይ ኢታታራ  
ኢሲፌ ቆዴቲደስ፤  
ጊደ አቲን ኢዚ ዱሬታ  
ዱፎን ሞጌቲደስ።
- 10 «ኢዛ ሊቆላኔ ዋዬዚ  
ጎዳ ሼኔ ጊዲደስ፤  
ጎዳይ ኢዛ ሼሞፖ

- ናጋራ ያርሾ ኦሲኮካ  
 ኢዚ ባ ዜሬላ ቤኣና፤  
 ጎዳ ሼኔይ  
 ኢዛ ኩሼን ፖሌታና።
- 11 ኢዛ ሼምፖይ ዋዩቲዳፔ ጉዬ  
 ኢዚ ዴኦ ፖኦ  
 ቤኣናኔ ኡፋዩታና።  
 ታ ደሎ ኣይሌዚ ባ ኤራቴላን  
 ዳርታ ደሊሳና፤  
 ኢስታ ሞሮካ ቶካና።
- 12 ሄሳ ጊሻስ ኢዛ ጋኪዛ ጊሻ  
 ጊታ ኣሳታ ጊሻራ ኢሲፌ ሂስታና፤  
 ዲኢ ኤሂዳይሳ ዋልቃማታራ  
 ኢዚ ኢሲፌ ጊሼታና፤  
 ኢዚ ባ ሼምፖ  
 ሃይቆስ ኣሊ ኢሚዲ፥  
 ኢታ ኦሊዛይታራ  
 ኢሲፌ ቆዴቲዳ ጊሻስ፥  
 ዳርታ ናጋራ ቶኪዴስ፤  
 ቆሂዳይታ ጊሻስ  
 ጋናቲዴስ» ጋና።

## 54

ደዮኔስ ሲንላፌ ያና ቦንቾ

- 1 ጎዳይ፥ «ሃኔ ማይኔ ማጫሳዬ፥  
 ና ዬላ ኤሮንታሬ ዬጸ፤  
 ኢሊሊ ጋዳ ኡፋይሳን ዋሳ፤  
 ሃኔ ሚጸታ ኤሮንታሬ፥  
 ባ ኣዚናራ ዲዛሪ ናይታፔ  
 ኣዚናይ ኣጊዳሪ  
 ናይቲ ዳራና» ጌሰ።
- 2 ኔ ዱንካኔ ኤሳናሶ ኣሳ፤  
 ኔ ዱንካኔ ማጋላሻታካ  
 ኣሳ ቶላ፤ ጸንሶፋ፤  
 ኔ ዋዶርታ ኣዱሳ፤  
 ጺሽኬታካ ሚንላ ኤሳ።

3 ኔኒ ኡሻቻ ባጋራኔ  
 ሃዲርሳ ባጋራ አካና፤  
 ኔ ዛሬቲ ካዋቴላታ ላታና፤  
 ሂሰቲዲ አይኮይ ባይንዳ  
 ኢስታ ካታማታን ኢሰቲ ዳና።

4 «አይኮይ ባ ባቦፋ፤  
 ኔ ዬላታካ፤  
 ሂርጎፋ፤ ኔ ካዉያካ፤  
 ኔ ዬላጋቴላ ዬላ  
 ኔኒ ዶጋና፤  
 ኔ አምኤቴላ ቦርካ  
 ሃይሳፌ ሲንላን ሃሳኣካ።

5 ኔና ሜዲዳይሲ ኔሰ አዚና፤  
 ኢዛ ሱንላይካ ኡባፌ  
 ዋልቃማ ጎዳ።  
 ኔና ዋዚዳይ  
 ኢሰራኤል ጌሻ፤  
 ኢዚ ቢታ ኡባ ጸሳ ጌቴቴሰ።

6 ናቴላን ኤኪዲ  
 ካዲዳ ማቺ ማላ፤  
 ኔኒ ዋዚና ሜቂዳኔ  
 ካዲዲ ማቺ ማላ፤  
 ጌዶ አቲን ጎዳይ  
 ኔና ጉዬ ዛሪ ጸደጋና»  
 ጌሰ ጸሳይ።

7 «ጉላ ዋዴ ታኒ ኔና አጋዲሰ፤  
 ጌዶ አቲን ጌታ ቃዴታን  
 ታ ኔና ዛራ ሺሻና።

8 ታ ጉላ ዋዴሰ  
 ከሃ ሃንቂቲዳ ጌሻሰ፤  
 ታ አይፌሶ ኔፔ ጌንላዲሰ፤  
 ጌዶ አቲን ታ ሜርና  
 ኪያቴላን ኔሰ ቃዴታና»  
 ጌሰ ኔና ዋዚዛ ጎዳይ።

9 «ሃይሲ ታሰ ኖሄ ዋዴ ሃሊ  
 ቢታ ዛሪ ዳይሶንታ ማላ

- ታ ጫቆይሳሉ  
 ሃኢካ ኔ ቦላ ዛራዳ  
 ሃንቄቶንታ ማላኔ  
 ሴሮንታ ማላ ታ ጫቃዲሰ።  
 10 ዙማቲ ቃጺኮ፥  
 ዙምቡላቲ ባ ዲዛሶፔ  
 ኪቺኮካ፥  
 ኔሰ ዲዛ ታ ሲቆይ ቃጺና፤  
 ኔናራ ታ ጫቂዳ  
 ሳሮቴላ ቃላይ ላሌቴና»  
 ጌሰ ኔና ማሪዛ ጎዳይ።  
 11 ጎዳይ፥ «ሃኔ  
 ኡንኤቲዳ ካታማዬ!  
 ጎቴ ጫርኮን ሾጩቲዳሬ!  
 ሚኔቶንታሬ! ቤኣ፥  
 ታኒ ኔና ቦንቺቲዳ  
 ሹቻታን  
 ኣሌቂሳ ኪጸና፤  
 ሴምፔሬ ሹቶ ኔሰ  
 ዮቶ ዩጋና።  
 12 ታኒ ኔ ቁሰቴ ዞኦ ኢንቁን፥  
 ኔ ፔንጌታ ጸልቂዛ ኢንቁታን፥  
 ኔ ዲርሳታ ቦንቺቲዳ  
 ሹቻታን ኣላና።  
 13 ኔ ኣቱማ ናይቲ ኡባይ  
 ጎዳፔ ታማርዳይታ ጊዳና፤  
 ኔ ናይታ ሳሮቴሊካ ዳራና።  
 14 ኔኒ ጸሎቴላን ሚና ኤቃና፤  
 ጌኔ ኦጌራ ኣይሶይ  
 ኔፔ ሃካና።  
 ኔና ባቢሲዛ ሚሺ ዳና፤  
 ሺሮቴሊ ኔፔ ሃካና፤  
 ኔ ማታካ ሺቆና።  
 15 ኦኒካ ኔና ቆሂኮ፥  
 ሄሲ ታፔ ጊዳና፤  
 ኔና ቆሂዳይ ዲኮ  
 ኔ ሲንላን ኩንዳና፤

- 16 «ቤኣ፥ ጸፋይ ታማን ቦንቃና ማላ  
 ዋምፒና ፑኒዛይሳ፥  
 ኦላ ሚሽ ቆጶዛ ዋጋጨ  
 ሜጲዳይ ታና።  
 ቃሴ ባሽ ጋላና ማላ  
 ሜጲዳይካ ታና፤  
 ባሺዛይሳ  
 ሜጲዳይካ ታና።
- 17 ኔና ቆሃናስ ኦሴቲዳ  
 ሚሺ ኦፊና።  
 ኔና ሞቲዛ ኢንጸርስ ኡባ  
 ኔ ላላና፤  
 ሄሳ ገሻስ ጎዳ ኣይሌታ  
 ጸንጾይ ሃይሳ፤  
 ኢስቲ ታፔ ዴማና  
 ኣንጆይ ሄሳ» ጌስ።

## 55

### ጸሓፊ ቤቲዛ ማርቲል

- 1 ጎዳይ፥ «ኢንቴሮ ሳሜቲዳይቶ  
 ኡባይካ ሃ ዪቴ!  
 ሃላኮ ሃ ዪቴ፤  
 ኢንቴሮ ሚሺ ባይንዳይቶ  
 ሻሚቴ፤ ሚቴ።  
 ሃ ዪቴ፤ ሚሺ ባይንዳይ  
 ቃንጾንታ ዋይኔ ኡሺኔ  
 ማል ሻሚቴ።
- 2 ጎኦንታ ካላስ  
 ኣይስ ኢንቴ ሚሽ ጳይሴቲ?  
 ኢንቴና ካልሶንታ ሚሻስ  
 ኣይ ኤካናስ  
 ኢንቴ ዋልቃ ዉርሴቲ?  
 ሲዪቴ፤ ታ ገዳዝ ሲዪቴ፤  
 ሎኦ ገዲዳዝ ሚቴ፤  
 ሎኦ ቁማን ኢንቴና ኡፋይሲቴ።
- 3 ኢንቴ ሃይል ዶይዲ

- ሃ ታኮ ሺቂቴ፤  
 ኢንቴ ሽምፖራ ፓጻ ዳና ማላ  
 ታ ጊዛ ኤዘጊ ሲዪቴ፤  
 ካሴ ታ ዳዊቴራ ጫቂዳ  
 ሚኖ ሲቆን ኢንቴናራካ  
 ሜርና ጫቆ ጫቂታና።
- 4 ቤኢቴ፥ ታኒ ኢዛ ዴራሰ ማርካ፥  
 ካሌሊዛዴኔ  
 ኦላ ጋዳዋ ኦላዲሰ።
- 5 ቤኣ፥ ኔኒ ኤሮንታ  
 ካዎቴላታ ጸይጋና፤  
 ኔና ኤሮንታ ካዎቴላቲ  
 ኔኮ ኤሶን ያና።  
 ጋሶይካ ጎዳ ኔ ጸሳይ  
 ኢሰራኤሌ ጌሻይ ባ ቦንቸን  
 ኔና ቶቁ ቶቁ  
 ሂሰቲዴሰ» ጌሰ።
- 6 ጎዳይ ቤቲዛ ዎዴ  
 ኢዛ ኮዪቴ፤  
 ማታን ዲዛ ዎዴ  
 ኢዛ ጸይጊቴ።
- 7 ኢታ ኣሲ ባ ኦጌ፥  
 ቆሂዛይካ ባ ቆፋ ኣጎ፤  
 ጎዳኮ ሲሞ።  
 ኢዚካ ኢዛ ማራና፤  
 ኢዛ ማሮቴላይ  
 ዳሮ ጊዲዳ ጊሻሰ  
 ኢዚ ኑ ጸሳኮ ሲሞ።
- 8 ጎዳይ፥ «ታ ቆፋይ  
 ኢንቴ ቆፋ ማላ፥  
 ኢንቴ ኦጌይካ  
 ታ ኦጌ ማላ ጊዴና።
- 9 ሳሎቲ ሳኣፔ ቶቂዳ ማላ፥  
 ታ ኦጌይ ኢንቴ ኦጌቴ፥  
 ታ ቆፋይካ

- 10 እንቴ ቆፋፔ ጽቁስ።  
 ኢራይኔ ሻቺ  
 ሳሎፔ ዋጂዲ  
 ቢታ ካልሲዲ፥  
 ቢታይ ሞከሳና ማላኔ  
 አይፌ አማና ማላ፥  
 ዜሪዛዴስ ዜሬል፥ ሚዛዴስ ካል  
 አሞንታ ዲሼ  
 ጉዬ ሲሞንታይሳ ማላ፥  
 11 ታ ዶናፔ ኬዚዛ ቃላይካ  
 ጮ ሃዳ ሃ ታኮ ሲሜና፤  
 ጊዶ አቲን ኢዚ  
 ታኒ ኮዪዲይሳ ኦፊስ፤  
 ባ ከቴቲዳ ዋና  
 ቆፋካ ፖሌስ።  
 12 እንቴ ኡፋይሳን ኬዛና፤  
 ሳሮን ሞይዜታና።  
 ዙማቲኔ ዙሞቡላቲ  
 እንቴ ሲንላን  
 ኢሊሊሳራ ዩጸና፤  
 ዴምባን ዲዛ ሚላቲ ኡባይካ  
 ባንታ ኩሼ ባቃና።  
 13 አጉንላ ጊሻስ ጸዳይ፥  
 ከንዲቾ ጊሻስ ባርሲኔቴ  
 ጌቴቲዛ ሚሊ ሞካና፤  
 ሄሲካ ጎዳ ሃሳኢሲዛ  
 ሚሺ ጳዮንታ ማላ  
 ሜርናስ ማላታ ጊዳና» ጌስ።

## 56

አዛዜቲዛ ኡባስ አሜቲዳ አቶቴል

- 1 ጎዳይ፥ «ቱሙ ፒርዳ ናጌቲ፤  
 ሎኦ ኦሊቴ፤  
 ጋሶይካ ታ አቶቴላይ  
 ማታን ዴስ፤  
 ታ ጸሎቴላይካ  
 ኤሶን ቆንጫና።

2 ሳምባታ ቱኒሶንታ ቦንቹዛይ፥  
 ኢታ ኦሶፔ ባ ኩሼ  
 ሸሺዛይኔ ናጊዛይ፥  
 ሃይታንታ ፖሊዛይ  
 ኣንጄቲዳዴ» ጌሰ።

3 ጎዳኮ ሸቂዳ ቤቴይ፥  
 «ጎዳይ ታና ባ ኣሳፔ  
 ቱመኦ ሻካና» ጎፖ።  
 ጉንዱላይካ፥  
 «ታኒ ሜሊዳ ሚላ» ጎፖ።

4 ጎዳይ፥ «ታ ሳምባታታ  
 ቦንቹዛ ጉንዱላታስ፥  
 ታና ኡፋይሲዛ ሚሽ ዶሪዛይታስ፥  
 ታ ጫቆ ቃላ ናጊዛይታስ፥

5 ታ ኬላኒኔ  
 ታ ጊምቤታ ጊዶን  
 ኣቱማ ናይታፔኔ  
 ማጫ ናይታፔ ኣፂዛ  
 ሃሳኢሲዛ ሚሺኔ  
 ሱንሐ ኢስታስ ኢማና፤  
 ሜርናስ ዳዮንታ ሱንሐ  
 ታ ኢስታስ ኢማና።

6 ጎዳስ ሃጋዛናስ፥  
 ባና ጎዳራ ጋሐ  
 ዋጺዳ ቤቴ ኣሳታ  
 ጎዳ ሱንሐ ሰቂዛይታኔ  
 ኢዛስ ጎይኒዛይታ፥  
 ሳምባታ ቱኒሶንታ  
 ቦንቹዛ ኡባታኔ  
 ጫቆ ቃላ ናጊዛይታ፥

7 ታኒ ታ ጌሻ ዙማ ቦላ  
 ኢስታ ኤሃና፤  
 ታ ዋሳ ኬላ ጊዶን  
 ታ ኢስታ ኡፋይሳና።  
 ታስ ያርሾ ያርሺዛሶዛ ቦላን  
 ኢሰቲ ሸሺዛ  
 ጹጌቲዛ ያርሾኔ

ሃራ ያርሾታ ታ ኤካና፤  
 ጋሶይካ ታ ኬላይ  
 ኡባ እሳ  
 ዋሳ ኬል ጌቴታና» ጌሰ።

- 8 ላሌቲዳ ኢሰራኤል ሺሺዛ፥  
 ኡባ ሃሪዛ ጎዳይ፥  
 «ሺቂዳይታ ቦላ ጉጃ፥  
 ታኒ ሃራታካ ዛራ ሺሻና» ጌሰ።

ኢታታ ቦላ ጸሳ ዋላሴ

- 9 ኢንቴኖ ዶኦቶ፥  
 ኢንቴኖ ዋራ ዶኦቶ  
 ኡባይካ ሃ ዪቴ፤  
 ኢንቴ ኣቻራካ  
 ፑዘሬሊቴ።  
 10 ኢሰራኤል እሳ ናጊዛይቲ ቆቄ፤  
 ኢሰታሰ ኤራቴሊ ዴና  
 ኢሰቲ ኡባይ ቦጮንታ ካና ማላ፤  
 ቦጮናሰ ዳንዳዬቴና፤  
 ኢሰቲ ኢቺዲ ኣጉሜቴቴሰ፤  
 ኢሰቲ ጂሰካንቻ።  
 11 ኢሰቲ ጋንጃማ ካና ማላ፤  
 ሚዲ ካሊ ኤሬቴና።  
 ኢሰቲ ኣኬካይ ባይንዳ  
 ሄንላንቻታ፤  
 ኢሰቲ ኡባይ  
 ባንታ ኦጌ ኦጌ ቤቴሰ፤  
 ኢሶይ ኢሶይ ባ ጎኣ ጸላ ጸሌሰ።  
 12 ኢሰቲ ኢሶይ ኢሳራ፥  
 «ሃ ዪቴ፤  
 ዋይኔ ኡሹ ኣኔ ኡዮሰ።  
 ኣኔ ማሶታና  
 ጋካናሰ ኡዮሰ!  
 ዋንቶይካ ሃቻ ማላ ጊዳና፤  
 ዋይኮ ሃቺፊካ ኣጂ

ሎኦ ጊዳና» ጌቴታና።

## 57

ጸሎታ ጋኪዛ ሜቶ

- 1 ጸሎ ኣሲ ሃይቄሰ፤  
ሄሳ ኦኒካ ዋዚናን ዋሌና፤  
ጸሳሰ ኣቂዛ ኣሳታ  
ሼምፖይ ኤኬቴሰ፤  
ጸሎቲ ኢታፔ ኣታና ማላ  
ኤኬቴዳይሳ ኦኒካ ኣኬኬና።
- 2 ሱሬቴላን ቢዛይቲ ሳሮን ጌላና፤  
ሃይቂዲካ ሳ ሂላን  
ሳሮን ሼምፓና።

ኢታታ ቦላ ያና ፒርዳ

- 3 ጎዳይ፥ «ኢንቴኖ ማር ናይቶ፥  
ኢንቴኖ ላጌሊዛይሳኔ  
ላይማቲዛሪ ዜሬላቶ፥  
ኢንቴ ሃ ዪቴ።
- 4 ኢንቴ ኦና ቦላ ቂልጩቲ?  
ኢንቴ ኢንጸርሲ ኦና ቦላ ኬሴቲ?  
ኢንቴ ማካላንቻታ ናይታኔ  
ዋርዳንቻታ ዛሬ ጊዳኬቲ?
- 5 ኢንቴ ዋላ ጋርሳኒኔ  
ዳሻ ሚላታ ጋርሳን  
ዚታን ጸጌቲዛይታ ጊዳኬቲ?  
ዙሌታኒኔ ዛላ ዛኣታ ጋርሳን  
ኢንቴ ናይታ  
ያርሺዛይታ ጊዳኬቲ?
- 6 ሃኔ ዙሌን ዲዛ ሊቆ ሹቻቲ  
ኔሰ ኤቃ ጸሳታ፤  
ኢሰቲካ ኔ ቃዳታ፤  
ቱሙካ ኔ ኢሰታ ቦላ  
ኡሻ ያርሾ ጉሳዳሳ፤  
ካላ ያርሾካ ሺሻዳሳ፤  
ሂሰቲን ሃ ዮኦታ ጊሻሰ  
ታ ጮኡ ጋኔ?

- 7 ኔ ሂጸ ጶቁ ጊዳ  
 ኣዲሳ ዙምቡላ  
 ሁኤን ሂጸዳሳ፤  
 ሄን ኔ ያርሾ  
 ሸሻና ኬዛዳሳ።
- 8 ኔ ፔንጌፌኔ ቆሲላላፊ  
 ሶ ባጋራ ኤቃ ሚሰሌታ ኤሳዳሳ።  
 ታና ኣጋዳ ኔ ሂጸ ቃራዳሳ፤  
 ኢዛ ቦላ ኬዛዳ ኬሃ ቃራዳሳ፤  
 ኔ ዶሲዳይታራ ቃላ ጊጋዳሳ፤  
 ኢስታ ካሎካ ቤኣዳሳ።
- 9 ዋጋራ ዛይቲ ኤካዳ፥  
 ሸቶ ኢዛ ቦላ ጉጃዳ  
 ሞሎኬ ጌቲቲዛ  
 ኤቃ ጸሳኮ ባዳሳ፤  
 ኔስ ከቲቲዛይታ  
 ሃኮ ዴሬ ከታዳሳ፤  
 ዱጌ ሲኦሌ ጋካናስ  
 ካንላዳሳ።
- 10 ኔ ኦጌ ዳሮፔ  
 ዴንዲዳይሳን ዳቡራዳሳ፤  
 ጊዶ ኣቲን፥  
 ሂዶታይ ባዋ ጋቤካ።  
 ኔ ዋልቃይ ሃ ኦራጺዴስ፤  
 ሄሳ ጊሻስ ኣርጋጫቤካ።
- 11 «ኔኒ ታስ ዋርዶቲዳይ፥  
 ኦናስ ያያዳ?  
 ኦናስ ሂርጋዳ?  
 ኔ ታና ቆፖንታ ኣጊዳይ፥  
 ሃይሳካ ኔ ዋዚናን  
 ቁምኣንታ ኣጊዳይ፥  
 ታስ ኔ ያዮንታ ኢጲዳይ፥  
 ታኒ ጮኡ ጊዳ ጊሻስ ጊዴኔ?
- 12 ታኒ ኔ ጲሎቴሉኔ  
 ኔ ኦሶ ቆንጨሳና፤  
 ኢስቲካ ኔና ጎኤቴና።
- 13 ኔኒ ማዶ ዴማናስ  
 ዋሲዛ ዋዴ፥

እኔ ኔ ሺሺዳ ኤቃ ጸሳቲ  
 ኔና አሼቶ!  
 ኢስታ ኡባካ  
 ጫርኮይ ኤኪ ኤፋና፤  
 ጉላ ፔኖይ  
 ኢስታ ላሊ ጳይሳና፤  
 ጊዶ አቲን ታና ባስ  
 ባቃታሶ ኦሊዳ አሲ  
 ቢታዮ ላታና፤  
 ታ ጌሻ ዙማዮ  
 ባስ ሚሽ ኦፋና» ጌስ።

ዎዚናይ ሜቂዳይታስ ኢሜቲዳ ሚንጮሶ

- 14 ጎዳይ፥ «ባሲቴ፥ ባሲቴ!  
 ኦጌ ጊግሲቴ፤  
 ታ ዴራ ኦጋፔ ቆጶዛ ሚሽ  
 ኡባ ዳጊቴ» ጌስ።

- 15 ቶቄ ጊዳይሲ፥  
 ኡባ ሃሪዛይሲ፥  
 ኢዛስ ሱንሳይካ  
 ጌሽ ጌቴቲዳይሲ፥  
 ሜርናስ ዴኢዛይሲ፥  
 «ካዉዪዳይታ ኣያና  
 ዴንጮፋናስ፥  
 ዎዚናይ ሜቂዳይታ  
 ሚንጮፋናስ፥  
 ቶቄ ጊዳ ጌሻሶሆን  
 ታ ዴኣይስ፤  
 ቃሴካ ዎዚናይ  
 ሜቂዳይታራኔ  
 ኣያናን ኣሽኬ ጊዳዳይታራ  
 ታኒ ዴኣና።

- 16 ኣሳ ኣያናይ ታ ሲንፋን  
 ዳቡሮንታ ማላ  
 ታ ሜጲዳ ኣሳስ  
 ፔኖይ ኤቆንታ ማላ  
 ታ ሜርናስ ዋላሲኬ፤  
 ታ ኡባቶ ሃንቄቲኬ።

- 17 ኢዛ ናጋራ ገሻሲኔ  
 ኢዛ ዪቄቴላ ገሻሲ  
 ታ ሃንቄታዲሰ፤  
 ታ ኢዛ ቃጸያዲሰ፤  
 ታ ሲንላካ ሃንቆን  
 ኢዛፔ ጌንላዲሰ፤  
 ጊዶ ኣቲን ሃኢካ ሰሚዲ  
 ኢዚ ባ ኦጌን ቢዴሰ።
- 18 ታኒ ኢዛ ኦጌታ ቤኣዲሰ፤  
 ጊዲኮካ ታ ኢዛ  
 ፓላናኔ ካሌላና፤  
 ኢዛሲኔ ኢዛ ገሻሲ  
 ዬኪዛ ጌሻታ ታ ሚንፌላና።
- 19 ኢሰራኤል ቢታን  
 ዬኪዛይታ ዶናን  
 ታ ጋላታ ዋላና።  
 ማታኒኔ ሃሆን ዲዛይታሰ  
 ሳሮይኔ ዋፓይ ጊዶ።  
 ታኒ ኢሰታ ፓላና» ጌሰ።
- 20 ጊዶ ኣቲን ኢታቲ ዳሞባላይ  
 ኡርቃኔ ቡራ ኬሲዛ ማላ  
 ጮኡ ጋናሰ  
 ዳንዳዮንታይሳ ማላ  
 ቡላኬቲዛ ኣባ ማላ።
- 21 ታ ጸሳይ፥  
 «ኢታታሰ ሳሮይ ባዋ» ጌሰ።

## 58

### ቱሙ ጸማ

- 1 ጎዳይ፥ «ኔ ቃላ  
 ጶቄ ሂሰታ ዋሳ፤  
 ኣይኮካ ኣሾፋ።  
 ኔ ጩንጉርሳ ዛዬ ማላ ሲሳ።  
 ታ ዴራሰ ኢሰታ ማካላቴላ፥  
 ያቆቤ ኬላ ኣሳሲካ  
 ኢሰታ ናጋራ ዮታ።
- 2 ኢሰቲ ታና ሃኛ ሃኛ ኮዬቴሰ፤  
 ታ ኦጌዛ ኤራናሰ

ለሞቲዛ ሚሳቴቴስ።  
 ሱሬ ሚሽ ኦሊዳ  
 ካዎቴላ ማላኔ  
 ባ ጸሳ አዛዞ ዬገ  
 አጎንታ ዴሬ ማላ፥  
 ኢስቲ ታና  
 ሱሬ ፒርዳ ኦይቼቴስ፤  
 ጸሲ ኢስታኮ ሺቃናይሳ  
 ኢስቲ ዶሲዛ ሚሳቴስ» ጌስ።

3 ኢስቲ ሸቂዲ፥ «ኔ ኤኮንታሺን  
 ኑ አዛስ ጸሚደኒ?  
 ኔ ወዲ ጎንታሺን አይስ ኑና  
 ካወሸደኒ?» ጋና።  
 ጎዳይ ዛሪዲ ኢስታስ፥  
 «ጊዲኮካ ኢንቲ ጸሚዛ ጋላስ  
 ኢንቲ ዋዚና ቆፋ ማላ ኦሴታ፤  
 ኢንቲስ ኦሊዛይታፔ  
 ቦንቄታ።

4 ኢንቲ ጸማይ  
 ኦሻኒኔ ፓላማን፥  
 ጌኔ አሶኒኔ ዋዴታን ፖሌቴስ፤  
 ሃይሳፌ ሲንፋን  
 ኢንቲ ጸሚዛይሳ ማላ  
 ሃቺፌ ጉዬ ኢንቲ ዋሳይ  
 ሳሎን ሲዬታና ጊዲ  
 ሂዶታ አሶፍቴ።

5 ታኒ ዶሪዳይ ሃይሳ ማላ ጸማ?  
 አሲ ባና ካወሻናይ  
 ሃይሳ ማላ  
 ጋላስ ጸላ?  
 ሻጫ ማላ ባና  
 ዘቂ ሂስቴሌ?  
 ዋይኮ ማቃ ማይኢዲ  
 ቢዲንፋ ሶላ ቡሉሌቴሌ?  
 ሂስቲን ኔ ጸማ ጋ  
 ጴይጊዛይሲ ሃይሴ?  
 ጎዳይ ሄሳ ማላን ኡፋዬቴዜ?

- 6 «በኢቴ ታኒ ዶሪዳ ጸማይ፥  
ኡንኤቲዳይታ ሳንሳላታ  
ኢንቴ ዱዳና ማላ፥  
ቃምባራ ዋዶሮ  
ኢንቴ ቢርሻና ማላ፥  
ኡንኤቲዳይታ ኢንቴ  
ላኣ ዬዳና ማላ፥  
ቶሆ ጊዱዳ ቃምባራ ኢንቴ  
ሜንዳና ማላ ጊዴኔ?
- 7 ቃሴካ ኔ ቁማፔ  
ጋፊዳዴስ ሻካናስ፥  
ቶይላቲዳ ማንቆዛ  
ኔሶ ጌልዳናስ፥  
ካሎቲዳ በኣዳ ማይዛናስ፥  
ኔሶ ኣሾ ዳቦዛስ ኔ ሲንሊ  
ኔ ቱኮንታ ማላ ጊዴኔ?
- 8 ኔ ሄሳዎ ኦሊኮ ኔ ፖኦይ  
ዋንታ ጸልቄ ማላ ጫራና፤  
ፓጻቲሊ ኔሰ ኤሶን ጋካና፤  
ጸሎቲሊ ኔፔ  
ሲንላራ ባና፤  
ጸሳ ቦንቾይ  
ኔና ጋራዳና።
- 9 ሄ ዋዴ ኔኒ ጸይጋና፤  
ኅዳይካ ኔሰ ኮያና።  
ኔኒ ማዶ  
ዴማናስ ዋሳና፤  
ኢዚካ፥ ሓ ኔሰ ዳይሰ፥ ጋና።
- «ኔ ኔፔ ሜቶሊዛ ቃምባራ፥  
ኢታ ሃሳያኔ  
ቢራጄን ማላታ  
በሲዛይሳ ኣገኮ፥  
10 ጋፊዳዴስ ኔ ቃጄቲኮ፥  
ቆሂቲዳይቲ ካላና ማላ  
ኔ ሂሰቲኮ  
ኔሰ ፖኦይ ቋማ

- ጊደን ፖኣና፤  
 ኔሰ ጹሚዳይሲካ  
 ሴታ ጋላሳ ማላ ጊዳና።  
 11 ጎዳይ ኔና ኡባቶ ካሌፋና፤  
 አዋይ ጸጊዳ ቢታን  
 ኔ አሞ ኢዚ ኩንፋና፤  
 ኔ ሜቄላታካ  
 ኢዚ ሚንፋና።  
 ኔኒ ሃላ አላዳ አታኪልቴሶሆኔ  
 ሙሌካ ቶኦንታ  
 ፑልቶ ማላ ጊዳና።  
 12 ኔ ዳቦቲ ቤኒ ዮቻታ ዩጋና፤  
 ካሴ ላሌቲዳይታ ዛሪ ኬጻና፤  
 ኔኒ ላሌቲዳ ጊምቤ  
 ዛሪ ኦራጺሲዛዴ፥  
 ዋጋ ኦጌቲ ዲዛ ካታማታ  
 ዛሪ ገግሲዛዴ ጌቲታና» ጌሰ።

ሳምባታ ቦንቾን ቤቲዛ ጎኣ

- 13 ቃሴካ፥ «ኔ ቶሆቲ  
 ሳምባታ ሻሮንታ ማላ  
 ኔ ሼምፒሲኮ ዱማቲዳ  
 ታ ጋላሳን  
 ኔ ዋዚና ቆፋ ኦሶንታ ኣጊኮ፥  
 ሳምባታ ጋላሳ ኡፋይሰ፥  
 ጎዳሰ ዱማቲዳ ጋላሳ  
 ኔኒ ቦንቾ ጋላሰ  
 ጋ ጸይጊኮ፥  
 ኔ ሼኔ ማላ  
 ኔ ኦሲዛይሳፌኔ  
 ሃዳ ዮኦፔ ኔ ናጌቲኮ፥  
 14 ሄ ዋዴ ኔ ጎዳን ኡፋዬታና።  
 ቢታ ቦላን ቶቃሶሆታን  
 ታ ኔና ቶጊሳና፤  
 ኔ አዋ ያቆቤ ጸንጾ  
 ኔ ካላ ማና ማላ ኦፋና»  
 ጊዲ ጎዳይ ሃይሳ  
 ባ ዶናን ሃሳይዴሰ።

## 59

ናጋራ ማሬቴሊኔ ዋዜቴል

- 1 ሄኮ ጎዳ ኩሼይ አንቴና  
አሻናሰ ቃሚቤና፤  
ኢዛ ሃይሊ  
ሲያናፔ ቱሊቤና።
- 2 ጊዶ ኣቲን አንቴ ቆሆይ አንቴና  
አንቴ ጸሳፌ ሻኪዴሰ፤  
አንቴ ናጋራይ ኢዛ ኣይፌሶ  
አንቴፌ ፔንሊዴሰ።  
ሄሳ ጊሻሰ ኢዚ ሲዬና።
- 3 አንቴ ኩሼይ ሱላን፥  
አንቴ ቢራዴይካ  
ቆሆን ሙሉቲዴሰ፤  
አንቴ ዶናይ ዋርዶ ሃሳይዴሰ፤  
አንጸርሳቲ ኢታ ዮኦ ሲሲዳ።
- 4 ጸሎቴላን ሞቲዛይ ባዋ፤  
ቱማቴላን ፒርዲዛይ  
ኦኒካ ዴና።  
ሃዳ ዮኦን አማኔቴቴሰ፤  
ዋርዶ ሃሳዬቴሰ፤  
ሺር ቃንላቲዲ ኢታቴል ዩሊዳ።
- 5 ኢሰቲ ሾሻ  
ጵጵሌ ሃጵዳ፤  
ኣቻር ኬል ኬዲዳ፤  
ኢሰታ ጵጵሌታ  
ሚዛ ኣሲ ሃይቄሰ፤  
ኢሰታፌ ኢሶይ ሚቄኮ  
ፑኪዛ ሾሻ ኬዜሰ።
- 6 ኢሰታ ቃፌናይ ማይኦ ጊዴና፤  
ኢሰቲ ኦሊዳይሳን ባንታ ቦላ  
ካማና ዳንዳዬቴና፤  
ኢሰታ ኦሶይ ኢታ፤  
ኢሰታ ኩሼታን  
ማካላ ኦሶይ ኩሚዴሰ።
- 7 ኢሰታ ቶሆቲ ናጋራኮ ዋጵቴሰ፤  
ጸሎ ሱል ፑሳናሰ ኤሶቴቴሰ፤

- ኢስቲ ኢታ ቆፋ ቆፔቴሰ።  
 ባሺኔ ቆሆይ  
 ኢስቲ ኣጲዳ ኦጌ ኡባሰ ማላታ።  
 8 ኢስቲ ሳርቴላ ኦጌ ኤሬቴና፤  
 ኢስቲ ቢዛ ኦጌን  
 ሱሬ ፒርዳይ ባዋ፤  
 ኢስቲ ባንታ ኦጌ ጌላሲዳ፤  
 ሄ ኦጌራ ቢዛይ ሳሮ ዴማና።
- 9 ሄሳ ገሻሰ ሱሬ ፒርዳይ ኦፔ ሃኪዴሰ፤  
 ጸሎቴሊካ ኦኮ ጋኬና።  
 ኦኒ ፖኦ ኮዪዶሰ፤  
 ጌዶ ኣቲን ኡባይ ቋማ ጌዲዴሰ፤  
 ዋጋጋ ፖኦ ኮዪዶሰ፤  
 ጌዶ ኣቲን ሳካና  
 ቋማ ጌዲዴሰ።
- 10 ቆቄ ማላ  
 ገምቤዛ ቦላ ጋንዲጋርዶሰ።  
 ኦ ሄማታይ ኣይፌይ ባይንዳ  
 ኣሳ ማላ ታታፌቴሰ ጌዲዴሰ፤  
 ኣርሼይ ዉሊሺን ሃኒዛ  
 ሴታ ጋላሰ ቋጵቲዶሰ።  
 ቃሴ ሚኖ ኣሳታ ጌዶን ኦኒ  
 ሃይቂዳ ኣሳ ማላ ጌዲዴሰ።
- 11 ኦኒ ኡባይ ዛርዶ ማላ ላዎሰ፤  
 ሃራጵታ ማላካ  
 ጨጨሽ ጉጉሞሰ፤  
 ኦኒ ሱሬ ፒርዳ ኮዪዶሰ፤  
 ጌዶ ኣቲን ዴሚቤኮ፤  
 ኣታና ኮዪዶሰ፤  
 ጌዶ ኣቲን ኢዚ ኦፔ ሃኪዴሰ።
- 12 ጋሶይካ ኦ ቆሆይ  
 ኦ ሲንላን ዳሪዴሰ፤  
 ኦ ናጋራይካ  
 ኦ ቦላ ማርካቲዴሰ።  
 ኦ ሞርይ ኦፔ

- ሻኬቲቤና፤  
 ኑ ማካላቴላካ  
 ኑኒ ኤሮስ።
- 13 ኑኒ ጎዳ ቦላ ማካሊዲ  
 ዋርዶ ሃሳይደስ፤  
 ኑ ጸሳ ካሎ አጊዲ  
 ሼርኢ ጊደስ፤  
 ማካላቴላኒ  
 ጌኔ ዮኑ ሃሳይደስ።  
 ኑ ዋዚናይ ሻሪ ኡቲዳ  
 ዋርዶ ሃሳይደስ።
- 14 ሄሳ ጊሻስ ሱሬ ፒርዳይ  
 ጉዬ ሱጌቲደስ፤  
 ጸሎቴላካ ኑፔ ሃኪደስ፤  
 ቱማቴላ ኦጌ ቦላ  
 ቆጶቲደስ፤  
 ሱሬቴላካ ጌላናስ  
 ዳንዳይቤና።
- 15 ቱማቴላ ኣዋንካ ቤቲና፤  
 ኢታቴላፊ ሃኪዳይ  
 ቆሂቴስ፤
- ጎዳይ ቤኢዲ ሱሬ ፒርዳይ  
 ቆይዳ ጊሻስ ጨጫደስ።
- 16 ኦኒካ ባይንዳይሳ ቤኢደስ፤  
 ኢዛኮ ጋናቲዳይ ባይንዳይሳ  
 ቤኢዲ ማላሊቲደስ፤  
 ሄሳ ጊሻስ ኢዛ ቁሴይ  
 ኢዛስ ኣቶቴላ ኤሂደስ፤  
 ኢዛ ጸሎቴላ ኢዛ ካፊ ኦይኪደስ።
- 17 ኢዚ ጸሎቴላ ጸሩሬ ማላ  
 ቲራን ማይኢደስ፤  
 ኣቶቴላ ቢራታ ቆቤ ማላ  
 ባ ሁኤ ቦላ ዋሊደስ።  
 ማይኦ ጋርሳራ ማይኢዛ ማላ  
 ሃሎ ኬሶ ማይኢደስ፤  
 ማይኦ ጎጲ ማይኢዛ ማላ

- ቃናቴ ቦላራ ጎጂደስ።  
 18 ኢስታ አሶ ማላ  
   ሃንቆ ባ ባልጋራታስ፤  
   ፒርዳ ባ ሞርኬታስ ኢዚ ቃንጸና።  
   ሃሩሮ ቢታታስ ኢስታ  
     አሶ አሶ ማላ አማና።  
 19 ጎዳ ፔኖይ ሱጊ ኤኪ ቢዛ  
   ዋልቃማ ዲኦ ማላ ያና።  
   ሄሳ ጊሻስ አርሼይ  
   ዉሊዛ ባጋራ ዲዛይቲ  
   ጎዳ ሱንላስ ያያና፤  
   አርሼይ ሞኪዛ ባጋራ ዲዛይቲ  
   ኢዛ ቦንቾስ ሃሬታና።  
 20 ጎዳይ፥ «ዋዚዛዳይ ጸዮኔሲኔ  
   ያቆቤ ዛሬታን ባንታ ናጋራ  
     ፓጺዳይታኮ ያና» ጌስ።  
 21 ቃሴካ ጎዳይ፥ «ታ ባጋራ ታሲኔ ኢስታስ ዲዛ ጫቆ ቃላይ  
   ሃይሳ፤ ኢንቴ ቦላ ዲዛ ታ ኣያናይኔ ታኒ ኢንቴ ዶናን ዋሊዳ ታ  
   ቃላይ ሃቺፌ ዶሚዲ ሜርና ጋካናስ፥ ኢንቴ ዶናፔ፥ ኢንቴ ናይታ  
   ዶናፔኔ ኢንቴ ዜሬላ ዶናፔ ሻኬቴና» ጌስ።

## 60

ሲንላፌ ያና ጸዮኔ ቦንቾ

- 1 ጎዳይ፥ «ኔ ፖኦይ ዪዳ ጊሻስ  
   ዴንዳዳ ፖኦሳ፤  
   ጎዳ ቦንቾይ  
   ኔ ቦላ ፖኦደስ።  
 2 ቤኣ፥ ቋማይ ሳኣ ካማና፤  
   ሳካና ቋማይ  
   ዴራ ጎዚ ኣይካና፤  
   ጊዶ ኣቲን ጎዳይ ኔስ ጋካና፤  
   ባ ቦንቾካ  
   ኔ ቦላ ፖኦሳና።  
 3 ካዎቴላቲ ኔ ፖኦኮ፥  
   ካዎቲካ ኔ ዋንታ  
   ጸልቄኮ ያና።

- 4 «**ጵቂ** ጋዳ ኔ ዩሾ ጸላ፤  
 ኢስቲ ኡባይ ኢሲፌ ሸቂዱ  
 ኔኮ ያና፤  
 ኔ አቱማ ናይቲ ሃሆፔ፥  
 ኔ ማጫ ናይቲካ  
 ኢዲሞን ኔኮ ያና።
- 5 **ሄ** ዋዴ ኔ ቤኣና ኦላና፤  
 ኔ ዋዚናይ ኡፋይሳን ኩማና፤  
 አባን ዲዛ አቆታይ  
 ኔኮ ያና፤  
 ካዎቴላታ ዱሬቴሉ  
 ኔስ ጊዳና።
- 6 **ጋሜላ** ማራቲ፥  
 ሚዲያሜፔኔ ኤፋፔ ዪዳ  
 ጋሜላ ማራቲ  
 ኔ ቢታ ካማና።  
 ዋርቃኔ ኤጸኔ  
 ኤኪዲ ሳባፔ ዪዛይቲ  
 ጎዳ ጋላታ አዋጀና።
- 7 **ቄዳሬፔ** ዶርሳታ ዉዴይ  
 ኡባይ ኔኮ ሸቃና፤  
 ኔባዮቴ ዴሬ ቆርሾቲ  
 ኔና ጎኣና፤  
 ሃይታንቲ ታስ ያርሾ  
 ያርሺዛሶዛ ቦላ  
 ኤኬቲዳ ያርሾታ ጊዳና፤  
 ታኒካ ታ ቦንሾ  
 ኬፋ ፑላሳና።
- 8 «**ሃራዴይ** ባ አቂዛሶ  
 ቢዛ ማላኔ  
 ሻራ ማላ  
 ቢዛይቲ ሃይታንቲ ኦኔ?
- 9 **ቱሙካ** ሃሩሮቲ  
 ታናን ሂዶታ ኦፊቴሰ፤  
 ኢዚ ኔና ባ ቦንሾ  
 ማይዚዳ ጊሻሰ፥  
 ጎዳ ኔ ጸሳ ቦንሾሰ፥

ኢስራኤል ጌሻስ  
 ሃኮፔ ኔ አቱማ ናይታ፥  
 ኢስታ ቢራራኔ ዋርቃራ  
 ጋሊ ኤሃናስ ታርሴሴ ማርካቤቲ  
 ሲንላቲ ኬዛና።

- 10 «አላጋቲ ኔ ገምቤ ገምባና፤  
 ኢስታ ካዋቲ ኔስ ሃጋዛና፤  
 ታ ሃንቆን ታ ኔና  
 ሾጪዳ ጊዲኮካ፥  
 ታ ቃጴታ ሲቆ ኔና ቤሳና።
- 11 ኔ ፔንጌቲ ኡባቶ ደያ ዳኣና፤  
 ጋላስ ጊዲን ኦማርስ  
 ሙሌካ ጎርዴቴቴና፤  
 ሄሲካ አሳይ ካዋቲላታ  
 ዲሬቴላ  
 ኔኮ ኤሃናሳ፤  
 ኢስታ ካዋቲካ  
 ጸኖን ኔኮ ጌላና ማላሳ።
- 12 ኔስ ሃሬቶንታ ካዋቲሊኔ  
 ዳሬይ ሙሊካ ዲፒ ጋና።
- 13 ታ ኬላይ ዲዛሶ አሌቂሳናስ፥  
 ሊባኖሴ ቦንሾይ  
 ጉጋንሊ፥ ጸዲይኔ  
 ባርሴኔቴይ ኔኮ ያና፤  
 ታ ቶሆይ ኤቂዛሶዛ ታ ቦንቻና።
- 14 ኔና ኡንኤሊዳይታ አቱማ ናይቲ  
 ዘጊሼ ኔኮ ያና፤  
 ኔና ካዲዳ ኡባቲ  
 ኔ ቶሆ ቦላ ኩንዳና፤  
 ሳሃ ኅዳ ካታማዬ!  
 ኢስራኤሌስ ጌሻ ሚሽ ጊዲዳ  
 ጸዮኔ ጊ ጴይጋና።

- 15 «ሃኔ ኢጶታዳ ዬጌቲዳሬ፥  
 ኦኒካ ኔ ጊደራ ካንሊ  
 ቢዛሮ ጊዶንታ ኣጊኮካ

- ታኒ ኔና ሜርና ጨቆሲኔ  
 ዬሌታ ኡባስ ኡፋይስ ሂስታና።  
 16 ኔኒ ካዎቴላታ ማሕ ኡያና፤  
 ካዎታ ቋንፊካ ቋማና።  
 ሄሳፌ ጉዬ ታኒ ጎዳይ  
 ኔና እሺዛይሳ፥  
 ኔና ዋዚዛይሳኔ  
 ያቆቤ ዋልቃማ ጊዲዲይሳ  
 ኔኒ ኤራና።  
 17 ጸርቂማላ ሶሆን ዋርቃ፥  
 ቢራታ ሶሆን ቢራ ኤሃና፤  
 ማላ ሶሆን ጸርቂማላ፥  
 ሹቻ ሶሆን ቢራታ ኤሃና፤  
 ሳሮቴሐ ኔና ኣይሲዛዴ፥  
 ጸሎቴላካ ኔስ  
 ሃላቃ ሂስታና።  
 18 ሃይሳፌ ጉዬ ኔ ቢታን ሸርይ፥  
 ኔ ዛዋንካ ላሌቴሊኔ  
 ባሺ ሰዬቴና።  
 ጊዶ ኣቲን ኔ ዲርሳ  
 ገምቤ ኣቶቴሊ፥  
 ኔ ፔንጌታካ ጋላታ ጋዳ  
 ኔ ጴይጋና።  
 19 «ሃሳፌ ጉዬ ጋላስ  
 ኣዋ ፖኦይ ኔስ ኮሺና፤  
 ኦማርሲካ ኣገናይ ፖኤና፤  
 ጋሶይካ ጎዳይ ኔስ  
 ሜርና ፖኦ ጊዳና፤  
 ኔ ጸሳይ  
 ኔስ ቦንቾ ጊዳና።  
 20 ኔ ኣርሼይ  
 ሃይሳፌ ጉዬ ጌሌና፤  
 ኔ ኣገናይካ  
 ፖኦ ኢሞ ኣጌና።  
 ጎዳይ ኔስ  
 ሜርና ፖኦ ጊዳና፤

- ኔ ጩጩዳ ጋላሳቲ ጊዳና።
- 21 ኔ አሳይ ኡባይ  
 ጸሎ ጊዳና፤  
 ቢታዮካ ሜርናስ ላታና፤  
 ኢስቲ ታ ቦንሾ ቆንጩሳናስ  
 ታኒ ቶኪዳ ፑቲታኔ  
 ታ ኩሼ ኦሶታ።
- 22 ኔፔ ካሎዚ ሺ፥  
 ኡባፌ ወርሴላ ካሎዚ  
 ዋልቃማ ካዋቲል ጊዳና፤  
 ታኒ ጎዳ፤  
 ዋዴይ ጋኪዛ ዋዴ  
 ታኒ ሄሳ ኤሶን ፖላና» ጌስ።

## 61

### አቶቴላ ሚሺራሾ

- 1 ኡባ ሃሪዛ ጎዳ አያናይ ታ ቦላ ዴስ፤  
 ሂዬሳታስ ሚሺራሾ  
 ዮታና ማላ፥  
 ጎዳይ ታና ቲይዴስ።  
 ኢዚ ታና ዋዚናይ ሜቂዳይታ  
 ኮላና ማላ፥  
 ዲኤቲዳይታ ላኦ ኬሳና ማላ፥  
 ቃሼቲዳይታስ ቢርሼል  
 አዋጃና ማላ ኪቲዴስ።
- 2 ዶሴቲዳ ጎዳ ላይል፥  
 ኑ ጸሳይ ሃሎ ኬሲዛ ጋላሳ  
 አዋጃና ማላኔ  
 ዬኪዛይታ ኡባ  
 ሚንጮሳና ማላ  
 ታና ኪቲዴስ።
- 3 ቃሴካ ጸዮኔን ካዮቲዛይታ  
 ዶሺሳና ማላ፥  
 ቢዲንላ ጊሻስ  
 ፑላቴላ ካላቻ፤

ዬሆ ጊሻስ ኡፋይሳ ዛይቲ  
 ኢስታ ሁኡን ታ ጉሳና ማላ፥  
 ጨጭ ኢያና ጊሻስ ጋላታ ሴሎ  
 ታ ኢስታ ቦላ ጎጾና ማላ  
     ታና ኪቲዴስ፤  
 ኢስቲካ ኢዛ ቦንቾ  
 ቆንጨሳና ማላ  
 ጎዳይ ቶኪዳ ጸሎ ሚል  
     ጌቴቲ ዴይጌታና።

- 4 ኢስቲ ቤኒ ላሌቲዳይታ  
     ዛሪ ኬጾና፤  
     ካሴ ዋዴ ኩንዲዳይታካ  
     ዛሪ ኤሳና፤  
     ዳሮ ዬሌታታፔ  
     ካሴ ኩንዲዳይታኔ  
     ላሌቲዳ ካታማታ  
     ዛሪ ኬጾና።
- 5 ኢማላቲ ኢንቲ ዶርሳ  
     ዉዴታ ሄማና፤  
     ኣላጋ ቢታ ኣሳቲ  
     ኢንቲ ጋዴኒኔ  
     ኢንቲ ዋይኔ  
         ኣታኪልቲ ጊዶን ኦላና።
- 6 ኢንቲ ቃሴ፥ «ጎዳ ቄሴታ»  
     ጌቴቲ ዴይጌታና፤  
     ኣሳይካ ኢንቲና፥  
         «ኑ ጾሳ ኦሳንቻታ»  
         ጊዲ ዴይጋና፤  
     ኢንቲ ካዋቲላታ ኣቆታ ማና፤  
     ኢስታ ዲሬቴላንካ  
         ኢንቲ ጨቄታና።

- 7 ታ ዳሬይ ዬላቲዳይሳ ቆጼ  
     ናሞኡ ኩሼ ኤካና፤  
     ካዉዪዳይሳ ቆጼ  
         ባንታ ጸንጾን ኡፋዬታና፤  
     ባንታ ቢታስ

ናምኤ ኩሼ ላታና፤  
ሜርና ኡፋይሲ ኢስታስ ጊዳና።

8 ታኒ ጎዳይ ሱሬ ፒርዳ ደሳይሰ፤  
ቦንቃኔ ቆሆ ኢጸይሰ።  
ታ ኣማኔቴላን  
ኢስታስ ቤሲዛይሳ ኢማና፤  
ኢስታራ ሜርና ጫቆ  
ቃላ ጌላና።

9 ኢስታ ዛሬቲ ካዎቴላታ ጊደን፥  
ኢስታ ናይቲ ዳሬ ጊደን  
ኤሬቲዳይታ ጊዳና፤  
ኢስቲ ቤኢዛ ኡባይ ጎዳይ ኣንጂዳ  
ዳሬ ጊዳዳይሳ ኤራና፤

10 ታኒ ጎዳን ከሂፔ ኡፋይታይሰ፤  
ታ ሼምፖያካ  
ታ ጸሳን ሆምቦጫዉሰ፤  
ሚሺራይ ባ ሁኤን  
ካላቻ ጎጲዛ ማላ፥  
ሚሺራያካ ባና ኢንቁን  
ሴሌሲዛ ማላ  
ኣቶቴላ ማይኦ ታና ማይዚዴሰ፤  
ጸሎቴላ ሴሎካ  
ታ ቦላ ጎጲዴሰ።

11 ቢታይ ጫሬኙ ጫሪሲዛ ማላ፥  
ኣታኪልቴሶሆይ  
ፑቴ ፑቲሲዛ ማላ፥  
ኡባ ሃሪዛ ጎዳይ  
ካዎቴላታ ኡባ ሲንላን  
ጸሎቴላኔ ጋላታ ጫሪሳና።

## 62

ጸዮኒስ ኦራላ ሱንሐ

1 ኢዚ ጸሎቴላ ማላዶ ፖኦ ማላ ጸላናሼ ጋካናሰ፥  
ኢዚ ኣቶቴላ ጸምፔ ማላ

- ፖኣናሼ ጋካናሰ  
 ታ ጸዮኒ ገሻሰ ጮኡ ጊኬ፤  
 ዩሩሳሌም ገሻሲካ  
 ሰርጺ ጊኬ።
- 2 ካዎቴላቲ ኔ ጸሎቴል፥  
 ካዎቲካ ኔ ቦንቾ ቤኣና፤  
 ጎዳይ ባ ዶናን ሱንፊዳ  
 ኦራሳ ሱንፋን  
 ኔ ጸይጌታና።
- 3 ኔኒ ጎዳ ኩሼ  
 ቦንቾ ኣኪሊሌ፥  
 ኔ ጸሳ ኩሼን ካዎታ  
 ካላቻ ጊዳና።
- 4 ሃይሳፌ ጉዬ ኔኒ፥  
 «ኣዚናይ ዬጊ ኣጊዳሮ» ጌቴታካ።  
 ቃሴ ኔ ቢታያካ፥  
 «ዬጌታ ኣቲዳሮ» ጌቴቱኩ።  
 ጊዶ ኣቲን፥  
 «ታ ኡፋይሲ ኢዚና» ጌቴታና፤  
 ኔ ቢታያካ፥  
 «ኣዚናይ ዲዛሮ» ጌቴታና፤  
 ጎዳይ ኔናን ኡፋይታና፤  
 ኔ ቢታያካ  
 ኣዚናራ ዲዛሮ ጊዳና።
- 5 ፓንፊ ጌላኦ ኤኪዛ ማላ፥  
 ኔ ናይቲ ኔና ኤካና፤  
 ሚሺራዚ ሚሺራይን  
 ኡፋይቲዛ ማላ፥  
 ኔ ጸሲ ኔናን ኡፋይታና።
- 6 ሃኔ ዩሩሳሌም!  
 ናጊዛይታ  
 ኔ ዲርሳታ ቦላ ኤሳዲሰ፤  
 ኢሰቲ ጋላሲካ  
 ኦማርሰ ጉዬ ጌቴና፤  
 ኢንቴኖ ጎዳኮ ዋሲዛይቶ፥  
 ሙሌካ ሸምፖፍቴ፤
- 7 ኢዚ ዩሩሳሌም ሚንፋና  
 ጋካናሲኔ

ቢታ ኡባ ቦላ ኤሬቲዳ  
ካታማ ኦፋና ጋካናስ  
ኢዛስ ሼምፖ ኢሞፍቴ።

8 ጎዳይ ባ ኡሻቻ ኩሼኒኔ  
ባ ዎልቃማ ቄሴን፥  
«ሃይሳፌ ጉዬ ታ ኢንቴ ካል  
ኢንቴ ሞርኬታስ  
ቁማ ጊዳና ማላ ኢሚኬ፤  
ቃሴ ኢንቴ ዳቡሪ ኬሲዳ  
ኦራላ ኡሻ  
ኦላጋቲ ኡዬቴና።

9 ጊዶ ኦቲን ካል ሺሺዳይቲ ማና፤  
ጎዳካ ጋላታና፤  
ዎይኔ ቲራ ማጺ ሺሺዳይቲ  
ታ ኬል ፔንጌን ኡያና»  
ጊ ጫቂዴስ።

10 ኦጲቲ! ኢዛ ፔንጌታ ባጋራ  
ካንሊ ቢቴ፤  
ዴራስ ኦጌ ባሲቴ፤  
ገግሲቴ፤ ሹቻታ ዲጊቴ፤  
ካዎቴላታስ ማላታ ኤሲቴ።

11 ቤኢቴ፥ ጎዳይ  
ሳኦ ጋጸ ጋካናስ፥  
«ጸዮኔ ማጫ ናይስ፥  
ኦሂኮ ኔና ኦሺዛዴይ ዬስ፤  
ኔ ዋጋይ ኢዛ ኩሼን ዴስ፤  
ኔ ቃዳይ ኢዛኮን ዴስ፥ ጊቴ»  
ጊዲ ኦዎጂዴስ።

12 ኢስቲ፥ «ጎዳይ ዎዚዳ  
ጌሻ ዴሬታ፤  
ኔካ ዬጌታ ኦቶንታሮ  
ኮዬቲዛ ካታማዮ» ጌቴታና።

## 63

- ጾሳ ጸኖኔ ኢዚ አሺዛ ዋልቃ
- 1 ኤዶሜ ቢታን ዲዛ  
 ቦጺራ ካታማፔ  
 ዘኦ ሴሎ ማይኦ ማይኢዲ  
 ዪዛይ ሄሲ ኢዚ ኦኔ?  
 ሃይሲ ቦንቾ ማይኢዲ  
 ባ ዋልቃ ጊታቴላን ሄማቲሼ  
 ዪዛይ ኢዚ ኦኔ?  
 «ጺሎ ሃሳይዛይኔ  
 አሻናሰ ዋልቃይ ዲዛይ  
 ታና ጊዲኪና!» ጌሰ ኀዳይ።
- 2 ኔ ሴሎ ማይኦይ ዋይኔ ጉምኢዛ  
 አሳታ ማይኦ ማላ  
 አይሰ ዘኢዳ?  
 3 «ጉምኢዛሶሆዛን ዋይኔ  
 ታኒ ታርካ ዬቆዲሰ፤  
 ካዋቴላታፔ ኦኒካ  
 ታናራ ዳና፤  
 ታኒ ኢሰታ ታ ሃንቆን ዬቆዲሰ፤  
 ታ ባሻንካ  
 ኢሰታ ዲርጾሬላዲሰ፤  
 ኢሰታ ሱላ ታ ሴሎ  
 ማይኦ ቦላ ቆጩቲዳሰ፤  
 ታ ማይኦይ ኡባይ ሞሬቲዳሰ።
- 4 ታኒ ሃሎ ኬሳና  
 ጋላሳይ ታ ዋዚናን ዳሰ፤  
 ታ ዋዛና ጋላሳይካ ጋኪዳሰ።
- 5 ታኒ ጸላዲሰ ሺን  
 ማዲዛይ ቤቲቤና፤  
 ማዲዛዳይ ባይንዳ ጊሻሰ  
 ታኒ ማላሌታዲሰ  
 ታሰ አቶቴሐ ኤሂዳሰ፤  
 ታ ሃንቆይካ ታና ሚንሉዳሰ።
- 6 ታ ሃንቆን ካዋቴላታ  
 ዬቆዲሰ፤  
 ታ ባሻን ኢሰታ ማሶሳዲሰ፤  
 ኢሰታ ሱላካ

ቢታን ጉሳዲሰ» ጋና።

ጾሳይ ኢሰራኤልስ ኦሊዳ ኪያቴል

7 ጎዳ ኪያቴል፥

ጎዳይ ኦሰ ኦሊዳ

ኦሶ ኡባ ጊሻሰ፥

ኢዚ ጋላቴቲዛ

ኦሶዛ ጊሻሰ፥

ኢዛ ሲቆዛኔ

ኢዛ ኪያቴል ኬና፥

ኢሰራኤል ኬላሰ

ኢዚ ኦሊዳይሳ፥

ኤ ኢዚ ኦሊዳ

ሎኦ ኦሶታ ጊሻሰ

ታ ዮታና።

8 ጎዳይካ፥ «ቱሙካ፤

ኢሰቲ ታ ዴሬታ፤

ኢሰቲ ታሰ ዋርዶቶንታ

ኣቱማ ናይታ» ጊዴሰ።

ሄሳ ጊሻሰ ኢዚ ኢሰታ

ኣሺዛዴ ጊዴዴሰ።

9 ኢሰታ ሜቶ ኡባን ጨጨዴሰ፤

ኢዛ ዱሳ ኤሪሲዛ ኪታንቻይ

ኢሰታ ኣሺዴሰ፤

ኢዚ ባ ሲቆኒኔ

ባ ማርቴላን

ኢሰታ ዋዚዴሰ።

ካሴ ኣጲዳ ዋዴ ኡባን

ኢሰታ ዴንሊዴሲኔ ቶኪዴሰ።

10 ኢሰቲ ጊዲኮ ማካሊዳ፤

ኢዛ ጌሻ

ኣያናካ ሚሺሲዳ

ሄሳ ጊሻሰ ኢዚ ሲሚዲ

ኢሰታሰ ዋርኬ ጊዴዴሰ፤

ኢሰታ ኦሊዴሰ።

11 ሄሳፌ ጉዬ ኣሳይ ቤኒ ዋዴዛኔ

ሙሴ ዋዴ የሺ ቆፒዴሰ፤  
 ባ ደርሳታ ሄንላንቻታራ  
 ኡባፌ ኬሲዳይሲ  
 ኢዚ አዋን ዲዜ?  
 ባ ጌሻ አያና  
 ኢስታ ጌዶን ዋሊዳይሲ  
 ሃኢ አዋን ዲዜ?

- 12 ቦንቹቲዳ ዋልቃማ ቄሴ፥  
 ሙሴስ ኡሻቻ ኩሼ  
 ቦላ ዋሊዴሰ፤  
 ባስ ሜርናስ ሱንሐ ኬሳናስ፥  
 ሃላታ ኢስታ

- 13 ፓራይ አይኮይ ባይንዳ ባዞ ቢታራ  
 ካንሊ ቢዛ ማላ፥  
 ኢስታካ ጨማ ጌዶራ  
 ካሌሊ ፒንሊዴሰ፤  
 ሄሳ ጌሻስ  
 ኢስቲ ቋዴቲቤቴና።

- 14 ዱጌ ዙሌ ዋዲዛ  
 ማሄ ዉዴ ማላ፥  
 ጎዳ አያናይ ኢስታስ  
 ሼምፖ ኢሚዴሰ፤  
 ኢዚ ዴራ ሄሳሶ  
 ካሌሊዳይ፥ ኔ ሱንላ  
 ቦንቹሳናሳ።

ማዶ ዴማናስ ዋሲዛ ዋሳ

- 15 አቤት ጎዳዉ፥  
 ዲማቲዳ፥ ቦንቹቲዳኔ  
 ቋቁ ጌዳ ኔ አራታፔ  
 ሳሎፔ ዱጌ ዴላ፤  
 ኔ ዋልቃይኔ  
 ኔ ሚሼቲዛ ሚሾይ አዋኔ?  
 ኔ አሽኬቴላይኔ  
 ኔ ቃዴቴሊ  
 ኑፔ ሃኪዴሰ።

- 16 አብራሃሜይ ኑና ኤርንታ አጊኮ፥  
 ኢስራኤሌይካ  
 ኑና አኬኮንታ አጊኮካ  
 ኔኒ ኑስ አዋ።  
 አቤት ጎዳዉ፥ ኔኒ ኑስ አዋ፤  
 ቤኒሶፊካ ደሚዲ  
 ኔ ሱንላይ ኑና ዎዚዛይሳ።
- 17 አቤት ጎዳዉ፥  
 ኑኒ ኔ ኦጌፔ ኬዛና ማላ፥  
 ኑ ዎዚና ቱሊሳዳ  
 ኔስ ያዮንታ ማላ  
 አይስ ኦላይ?  
 ኔ አይሌታ ጊሻስ ጋዳ፥  
 ኔስ ጸንጾ ጊዲዳ  
 ቆሞታ ጊሻስ  
 ጋዳ ኑኮ ሲማ።
- 18 ጉላ ዎዴስ ኔ ዴሬይ  
 ጌሻሶሆዛ ላቲዳስ፤  
 ሃኢ ጊዲኮ ኑ ሞርኬቲ  
 ኔ ኬላ ዩዲዳ።
- 19 ሄኮ ቤኒሶፊ ኑኒ ኔይታ፤  
 ጊዶ አቲን  
 ኢስታ ኔኒ ሃራቤካ፤  
 ኢስቲ ኔ ሱንላንካ  
 ዴይጌቲቤቴና።

## 64

- 1 አቤት ጎዳዉ፥ ኔኒ ሳሎታ ዳካዳ ዴጌ ዎዳርኪ!  
 ዙማቲ ኔ ሲንላን ኮኮሬቶ።
- 2 ቃይጸሬ ታማይ  
 ሃላ ፔንቲሲዛ ማላ፥  
 ኔ ሞርኬታ ማታን ኔ ሱንላ  
 ኤሬታና ማላ ዎዳ፤  
 ካዎቴላታካ  
 ኔ ሲንላን ኮኮርሳ።
- 3 ካሴካ ኔኒ ኑ ቆፖንታ  
 ያሺሲዛ ሚሽ  
 ኔ ኦሊዳ ዎዴ

- ኔ ዋጂን ዙማቲ ኮኮሪዳ።  
 4 በኒሶፌ ደሚዲ ሂደታ ኦሊ  
   ናጊዛይታሰ ጋኪዛ  
   ማለታ ኦሊዳይ ኔፔ አቲን  
   ሃራ ጸሰ በኢዳ አይፌይኔ  
   ሰዪዳ ሃይሊ ሙሌካ ዴና።
- 5 ሱሬ ሚሽ ኡፋይሳን  
   ኦሊዛይታኔ  
   ኔ ኦጌ ቆፒዛይታ  
   ኔኒ ማዳሳ፤  
   ጊዶ አቲን ኑኒ ኢሰታ ቦላ  
     ፓጩይ ባይንዳ  
     ናጋራ ኦሊዳ ጊሻሰ  
     ሄኮ ኔኒ ኑ ቦላ  
     ሃንቂታዳሳ፤  
     ሂሰቲን ኑኒ ዋኒ  
     አታና ዳንዳይዞኒ?
- 6 ኑኒ ኡባይካ  
   ቱና አሳ ማላ ጊዲዶሰ፤  
   ኑ ጸሎቴላ ኦሶ ኡባይ  
     ቱኒዳ ጫርቃ ማላ።  
   ኑኒ ኡባይካ  
   ቦንጮ ማላ ቆኪዶሰ፤  
   ኑ ናጋራይ ኑና ጫርኮ ማላ  
     ፒቲ ኤፊዴሰ።
- 7 ኦኒካ ዋሳን  
   ኔ ሱንሐ ጸይጌና፤  
   ኔና ኦይካና  
   ፓጪዛይካ ዴና፤  
   ኔኒ ኔ አይፌሶ  
   ኑፔ ጌንፋዳሳ፤  
   ኑ ናጋራይ ኑና  
     ዳይሳና ማላ አጋዳሳ።
- 8 ጊዲኮካ አበት ጎዳዉ፥  
   ኔኒ ኑሰ አዋ፤ ኑኒ ኡርቃታ፤  
   ኔኒ ኑና ሜዲዳይሳ፤

- ኑኒ ኡባይካ  
 ኔ ኩሼን ማጽደቃታ።
- 9 አቤት ጎዳ፡ ኬሃ ሃንቁቶፋ፤  
 ኑ ናጋራካ ማርናስ ቆፖፋ፤  
 ኑስ ዋሴታ፤  
 ኑ ኡባይ ኔ ዴሬ ጊዲዳ ጊሻስ  
 ኔ አይፌሶ ኑኮ ሃ ዛራ።
- 10 ኔ ጌሻ ካታማቲ አይኮይ ባይንዳ  
 ባዞ ጊዲዳ፤  
 ጸዮናካ አይኮይ ባይንዳ  
 ባዞ ቢታ ጊዲዱስ፤  
 ዬሩሳላሜይካ ዬጌታ አታዲስ።
- 11 ኑ አዋቲ ካሴ ኔና  
 ኢዛን ጋላቲዛ ጸሳ ኬላይ  
 ታማን ጸጌቲዴስ፤  
 ካሴ ሎኦሶቲ ኡባቲካ ጳይዳ።
- 12 አቤት ጎዳ፡  
 ሃይሲ ኡባይ ሃኒንካ  
 ኔ ሲሚኪ?  
 ኔኒ ጮኡ ጋዳ ኑና  
 ዛዋይ ባይንዳ ቂጻቲ ቃጸያይ?

## 65

### ፒርዳኔ አቶቴስ

- 1 ጎዳይ፡ «ታና ዋሶንታይታስ  
 ታ ቆንጫዲስ፤  
 ታና ኮዮንታይታስ ቤታዲስ።  
 ታ ሱንላ ጸይጎንታ  
 ካዋቴላስ፤  
 «ዬ! ዬ!» ጋ ኮያዲስ።
- 2 ማካላንቻ ዴሬታስ፡  
 ኢታ ኦጌራ ቢዛይታስ፡  
 ባንታ ዋዚና አሞ ካሊዛይታስ፡  
 ታ ኩሼ ጋላስ ኩሜስ ሚጫዲስ።
- 3 አታኪልቴሶሆን ያርሾ ያርሺዛይቲ፡  
 ኡርቃፌ ማጽደቃ

- ያርሾሶሆታ ቦላ  
 ኤጳኔ ጨዋሲዛይቲ፥  
 ኡባ ዋዴ ታና  
 ሃንቄሲዛ ዴሬታ።  
 4 ዱፎ ጊዶን ኡቲዛይቲ፥  
 ጌማሶሆን አቄዛይቲ፥  
 ጉዱንፋ አሾ ሚዛይቲ፥  
 ኢሰቲ ባንታ ኦቶታ ቱኒዳ አሾ  
 ጫምባ ኩንሲዛይታ።  
 5 ኢሰቲ፥ ቀጥ ጌሽ ጊዱዳ ጊሻሰ  
 ኪቻ፤ ታ ማታ ዮፓ፤  
 ታኮ ሽቆፓ ጊዛይታ።  
 ሃይሳ ማላ ዴሬይ  
 ታ ሲዴን ጨዋ ማላኔ  
 ጋላሰ ኩሜል ኤጲዛ  
 ታማ ማላ።  
 6 «ቤኢቲ፥ ታ ሲንፋን  
 ጳፊቲ ኡቲዳሰ፤  
 ታ ጮኡ ጊኬ፤  
 ጊዶ አቲን ኢዛ ኦሶ ኦሶ ማላ  
 ታ ኢዛሰ ኢማና፤  
 ኢሰታ ሃኖ ማላ  
 ታ ኢሰታሰ ጨጋና።  
 7 ኢንቲ ናጋራ ሃሎኔ  
 ኢንቲ አዋታ ናጋራ  
 ሃሎ ታ ኬሳና።  
 ኢሰቲ ዙማታ ቦላ ጸጌቲዛ  
 ያርሾ ሺሺዳ ጊሻሰ፥  
 ዙምቡላታ ቦላ  
 ታና ጫደዳ ጊሻሰ፥  
 ኢሰቲ ማኪዳ ሚሻን  
 ኢሰታሰ ዛሪ ማኬታና፤  
 ኢሰቲ ካሴ ኦሲዳ ኦሶ ኩሼ  
 ዛሪ ኤካና» ጌሰ።  
 8 ጎዳይ፥ «ዋይኔ ወርጮ ጊዶን  
 ኢሊሎይ ዱዛ ማላ

- አሳይካ፥ ሩዚ ይገደን  
 ሎኦ ሚሽ ዲዛ ገሻሰ  
 ኢዛ ቃንጾፍቲ፥ ገዛ ማላ፥  
 ታኒካ ታ አይሌታ ገሻሰ  
 ጋዳ ሄሳሶ ኦላና፤  
 ሙሌራ ታኒ ኢስታ ጳይሲኬ።  
 9 ታኒ ያቆቤ ዜሬላታ፤  
 የሁዳ ዜሬላፌ ታ ዙማታ  
 ላታናይታ ታ ኤሃና፤  
 ዶሬቲዳ ታ ዳሬይ  
 ኢስታ ላታና፤  
 ታ አሽካራቲካ ሄን ዳና።  
 10 ታና ሚንሉ ኮይዛ ታ ዳሬዛስ፥  
 ላሻሮኔይ ዶርሳ ወዳይ  
 ሄማቲዛሶ፥  
 አኮሬ ዙሌይ ወዳ ማሄይ  
 ፔኢዛሶ ገዳና።  
 11 ገዳ አቲን ጎዳ አጊዳ ኢንቴስ፥  
 ታ ጌሻ ዙማ ደጊዳ ኢንቴስ፥  
 ነታ ባሶ ጌቲቲዛ  
 ኤቃ ጸሳስ ሶሆ  
 ገጊሲዳ ኢንቴስ፥  
 ሩጋዴ ጌቲቲዛ ኤቃ ጸሳስ  
 ዋላኬቲዳ ዋይኔ ኡሹ  
 ዋንጫን ኩንሉዳ ኢንቴስ፥  
 12 ታ ጸይጊን ዛሮንታ  
 ኢጲዳ ገሻሰ፥  
 ታ ዮቲን ሲዮንታ  
 ኢጲዳ ገሻሰ፥  
 ታ ሲንፋንካ  
 ኢታ ኦሊዳ ገሻሰ፥  
 ታና ሃንቄሊዛ ሚሽ  
 ኢንቴ ዶሪዳ ገሻሰ፥  
 ታ ኢንቴና ማሻሰ  
 አላ ኢማና፤  
 ኢንቴ ኡባይካ ሹኬታናሰ  
 ቆጼ ኢማና» ጌሰ።

- 13 ሄሳ ጊሻሰ፥  
 ኡባ ሃሪዛ ጎዳይ፥  
 «ቤኢቴ፥ ታ አሸካራቲ ማና፤  
 ኢንቴ ጊዲኮ ጋፋና፤  
 ታ አሸካራቲ ኡያና፤  
 ኢንቴ ጊዲኮ ሳሜታና፤  
 ታ አሸካራቲ ኡፋዬታና፤  
 ኢንቴ ጊዲኮ ዬላታና።
- 14 ታ አሸካራቲ  
 ዋዚናፔ ኡፋይሳን ዬጸና፤  
 ኢንቴ ጊዲኮ ዋዚናይ ሜቂን  
 ኢንቴ ዋሳና፤  
 ኢንቴ ኢያናይ ሜቂዳ ጊሻሰ  
 ኢንቴ ዋ ዋ ጊዲ ዋሳና።
- 15 ኢንቴ ኢንቴ ሱንሳ  
 ዶሬቲዳ ታ ዳሬይ  
 ቃንጋና ማላ አሐ ኢማና፤  
 ኡባ ሃሪዛ ጎዳይ  
 ኢንቴና ዋሳና፤  
 ባሰ ሃጋዚዛይታሰ ጊዲኮ  
 ኢዚ ሃራ ሱንሐ ኢማና።
- 16 ሄሳ ጊሻሰ ቢታይ ቦላ  
 እንጂ ኮይዛዴይ  
 ቱማ ጸሳ  
 ሱንሳን እንጃታና፤  
 ቢታይን ጫቂዛ አሲ  
 ቱማ ጸሳ  
 ሱንሳን ጫቃና፤  
 ካሴ አዲዳ ሜቶቲ ዶጌቲዳ፤  
 ታ አይፌፔካ ጌሚዳ» ጌሰ።

### ኦራሳ ሜዴታታ

- 17 ጎዳይ፥ «ሄኮ፥  
 ታኒ ኦራሳ ሳሎታኔ  
 ኦራሳ ሳኦ ሜሳና፤  
 ካሴ አዲዳ ሚሻቲ  
 ቆፊቲቲናኔ  
 ሃሳኤቲቲና።

- 18 ጊደ አቲን  
 ታኒ ሜዲዛይሳን ኡፋዬቲቲ፤  
 ሜርናሰ ሆምቦጪቲ፤  
 ታኒ ዬሩሳላሜ ኡፋይሳስ፤  
 ኢዚ ዴራካ ሆምቦጪፋሰ  
 ሜዳና።
- 19 ታኒ ዬሩሳላሜን ኡፋዬታና፤  
 ታኒ ታ ዴሬዛን ሆምቦጪና፤  
 ሃይሳፌ ጉዬን ዬሆይኔ  
 ዋሶይ ሄን ሴቲቲና።
- 20 ሃይሳፌ ጉዬን  
 ሄን ጉላ ዋዴሰ  
 ሼምፖራ ፓጸ  
 ዳና ዪዳይ ዋይኮ  
 ዋዴ ካሎንታ  
 ጨማይ ዴና፤  
 ጸቱ ላይሰ ኩሚዳ አሲ ሃይቂኮ  
 ዋዴይ ጋኮንታ  
 ሙልቄቲ ሃይቂዳ  
 አሳ ማላ ቆዴታና፤  
 አሲ ጸቱ ላይሰ  
 ኩሞንታ ሃይቂኮ  
 ቦሻን ሃይቂዳ ማላ  
 ቆዴቲሰ።
- 21 ሄ ዋዴ አሳይ ኬሰ ኬጻና፤  
 ኢዛንካ ዳና፤  
 ዋይኔ ሚሰ ቶኪዲ  
 ኢዛ አይፌ ማና።
- 22 ሃይሳፌ ጉዬ ሃራ አሲ  
 ኢዛን ዳና ኬሰ ኬጸቲና፤  
 ዋይኮ ሃራይ ማና  
 ሚሺ ቶኬቲና፤  
 ታ ዴራ ላይሰ  
 ሚላ ላይሳ ማላ አዲቃና፤  
 ታኒ ዶሪዳይቲ ባንታ  
 ኩሼ ኦሶን  
 አዲሳ ላይሰ ኡፋዬታና።

- 23 ኢስታ ዳቡራይ ሃዳ አቴና፤  
 ቃዳ ኢታ ናካ ዩሌቴና፤  
 ኢስቲኔ ኢስታ ዜሬሊ  
 ጎዳይ አንጂዳ ዴሬ ጊዳና።
- 24 ኢስቲ ቡሮ ታና ጴይጋናፔ  
 ካሴታ ታኒ ኮያና፤  
 ኢስቲ ታስ ዮቲ ዉርሶንታ  
 ታ ሲያና።
- 25 ካና ሱይቴይኔ ዶርሳ ላቃይ  
 ኢሲፌ ማና፤  
 ጋሞይ ቦራ ማላ  
 ማታ ማና፤  
 ሾሺ ጉዱላ ላጫና፤  
 ታ ጌሻ ዙማ ቦላ  
 ኢስቲ ቆሄቴቴና፤  
 ባሺካ ኢስታ ቦላ  
 ዬና» ጌሰ።

## 66

### ፒርዳኔ ሂደታ

- 1 ጎዳይ፥ «ሳሎይ ታስ አራታ፤  
 ሳኦይካ ታስ ዩጲዛሶ፤  
 ሂስቲን አንቴ ታስ  
 ኬጻና ኬሊኔ  
 ታ ሼምፓና ሶይ አዋይሴ?
- 2 ሃይታ ኡባ  
 ታ ኩሼይ ኦሊቤኔ?  
 ሃይቲ ቤታና ማላ ኦሊዳይ  
 ታና ጊዲኪና?  
 ታኒ አሽኬ፤  
 ዋዚናይ ሜቂዳዴኔ  
 ታ ቃላሰካ ኮኮሪዛዴኮ  
 ታ ጴላይሰ።
- 3 «ጊዶ አቲን ታስ ቦራ ያርሺዛዴይ  
 ኦስ ዋጲዛዴ ማላ፥

ደርሳ ላቃ ያርሺዛዴይ  
 ካና ጨሊ ዋጂዛ ኣሳ ማላ፤  
 ካላ ያርሾ ሺሺዛዴይ፥  
 ጉዲንላ ሱሐ  
 ሺሺዛዴ ማላ፤  
 ቆፊሶስ ኤጳኔ ታስ ጨኣሲዛዴይ፥  
 ኤቃ ጸስ ጎይኒዛ ኣሳ ማላ፤  
 ኢስቲ ባንታ ኦጌ ደሪዳ፤  
 ኢስታ ሼምፖፖካ  
 ኢስታ ቱናቴላን ኡፋዬታዉስ።

- 4 ሄሳ ጊሻስ ሜቶ  
 ታ ኢስታ ቦላ ጋፋና፤  
 ኢስቲ ያዱዳ ሚሺካ  
 ታ ኢስታ ቦላ ኤሃና፤  
 ጋሶይካ ታ ጸይጊዛ ዋዴ  
 ኢስቲ ኮዪቤቴና፤  
 ታ ዮቴሺን ኢስቲ ኤዘጊቤቴና፤  
 ታ ሲንላን ኢታ ሚሽ ኦሊዳ፤  
 ታና ኢቲዛ ሚሽ ደሪዳ» ጌስ።

- 5 ኢንቴኖ ቃላስ ኮኮሪዛይቶ፥  
 ሃይሳ ጎዳ ቃላ ሲዪቴ፤  
 «ኢንቴ ኢሻንቲ  
 ኢንቴና ኢጲዳይቶ፥  
 ታ ሱንላ ጊሻስ  
 ኢንቴና ኬሲ ዩጊዳይቶ!  
 ኢንቴና፥ ላኔ ጎዳይ  
 ቦንቹቶ!  
 ኣኔ ኢንቴ ኡፋይሳካ ቤኦስ» ጊዳ፤  
 ጊዲኮካ ኢስቲ  
 ዩላታናይሲ ኣቴና።

- 6 ሄሳ ካታማን ዲዛ ዋሶዛ ሲዪቴ፤  
 ጸሳ ኬላን ዲዛ  
 ጫባ ሲዪቴ፤  
 ሄሲካ ጎዳ ጨንጉርሳ፤  
 ኢዚ ባ ሞርኬታስ  
 ቤሲዛ ዋጋ ቃንጸና።

- 7 ሚጸታናፔ ካሴታ ዩላዉስ፤

ሚጸ ዋዬ ቤኦንታ ዳሼ  
አቱማ ና ዬላዉሰ።

- 8 ሄሳ ማላ ዮኦ ሲዬ ኤሪዛይ ኦኔ?  
ሄሳ ማላ ዮኦ  
ቤኢ ኤሪዛይ ኦኔ?  
ዴሪይ ኢሲ ጋላስ ሜዴቲ ኤሪዜ?  
ዎይቦ ካዎቲላቲ  
ቂጲዳ አይፌይ  
ጸላናሼ ጋካናስ  
ቤቲ ኤሪዞ?  
ጲዮኖ ቡሮ ሚጸይ ኦይኪሺን  
ሄራካ ባ ናይታ ዬላዉሰ።

- 9 ዬሌታና ማቲዳይሳ  
ዬሌቶንታ ማላ  
ታኒ ዲጋዚና?» ጌስ ጎዳይ።  
«ዬሊሺን ዬሊዛ ኡሎ  
ታ ጎርዳ ኤሪዚና?»  
ጌስ ኔ ጎዳይ።

- 10 «ኢንቴኖ ዬሩሳላሞ  
ሰቂዛ ኡባቶ፥  
ኢዚራ ኡፋዬቲቲ፤  
ኢንቴ ኢዚራ ሆምቦጪቲ፤  
ኢዚሰ ዬኪዳ ኡባቲ  
ኢዚራ ኬሂ ኡፋዬቲቲ።

- 11 ሚንፌሊዛ ኢዚ ቶንላ  
ኢንቴ ቶሚዲ ካላና፤  
ኢንቴስ ገዳናሼ ጋካናስ  
ኢንቴ ኡያና፤  
ኬሂፔ ዳሮ ገዲዳ  
ኢዚ ዲሬቲላን  
ኢንቴ ኡፋዬታና» ጌስ ጎዳይ።

- 12 ጎዳይ፥ «ቤኢቲ፥  
ታኒ ኢዚሰ ሳሮቲሐ  
ጌታ ሻፋ ማላ ጎጊሳና፤  
ካዎቲላታ አቆታ  
ሻፋ ሃላ ማላ ጎጊሳና  
ኢንቴ ኢዚ ኪኦን

- ኢዲሜቲ ጳማና፤  
ኢዚ ከኦን ኡቲዲ ኢንቲ ጉፓና።
- 13 ኢያ ባ ና ኣልኢሲዛ ማላ  
ታካ ኢንቲና ኣልኢሳና፤  
ኢንቲ ዩሩሳላሜን  
ሚኔታና» ጌሰ።
- 14 ኢንቲ ሄሳ ቤኢዛ ዎዴ  
ኢንቲ ዎዚናይ ኡፋዬታና፤  
ኢንቲ ሜቄሳይካ  
ማታ ማላ ጨለላና፤  
ቃሴ ጎዳ ኩሼይ  
ኢዛ ኣይሌታ ቦላ ዲዛይሲ ኤሬታና፤  
ኢዛ ሃንቆይ ጊዲኮ  
ኢዛ ሞርኬታ ቦላ ቆንጫና።
- 15 ሄኮ ጎዳይ ታማ ላጮን ያና፤  
ኢዛ ፓራ-ጋሬቲ ጎቲ ጫርኮ ማላ፤  
ኢዚ ባ ዪሎ ሃንቆን፤  
ባ ሴራ ታማ ላጮን ቆንጫሳና።
- 16 ታማኒኔ ማሻን  
ጎዳይ ባ ፒርዳ  
ኣሳ ኡባ ቦላ ኤሃና፤  
ዳሮቲ ጎዳ  
ማሻን ሹኬታና።
- 17 ጎዳይ፥ «ኣታከልቴይ ዲዛሶሆ ቢዲ ኢሰታፌ ኢሳሰ  
ጎይናናሰ ባና ጌሺዛይቲኔ ዲማሲዛይቲ፥ ጉዳንፋ ኣሾኔ ኤጨፎ  
ኣሾ፥ ቱኒዳ ሚሻታ ሚዛ ኡባቲ ባ ፒርዳ ወርሴፋን ኢሲፌ ኤካና»  
ጌሰ።
- 18 «ታኒ ኢሰታ ኦሶኔ ኢሰታ ቆፋ ኤሪዛ ጊሻሰ፥ ካዎቴላታ ኡባኔ  
ዲማ ዲማ ቃላን ሃሳይዛ ኡባታ ኢሲፌ ሺሻናሰ ያና፤ ኢሰቲካ  
ዪዲ ታ ቦንሻ ቤኣና።
- 19 ታኒ ኢሰታ ጊዶን ማላታ ኦፋና፤ ኢሰታፌ ኣቲዳ ኢሲ ኢሲኔታ  
ጌዴ ካዎቴላታኮ፥ ታርሴሴ፥ ፑጾ፥ ዎንዳፌን ኦሌቲዛ ኤሬቲዳ  
ሉዴታኮ፥ ቱባሌኔ ያዋኔ ሃሳፉካ ታ ጎባቴፋ ሲዮንታይታኮኔ ታ  
ቦንሻ ቤዮንታይታኮ ሃኮን ዲዛ ኣባ ጊዶን ዲዛ ሃሩርታኮ ታ  
ዬዳና፤ ታ ቦንሻ ካዎቴላታ ጊዶን ዮታና።

20 ጎዳሰ ያርሾ ጊዳና ማላ አንቲ አሻታ ኡባታ ካዎቴላታፔ ቦንቹቲዳ ታ ዙማ ዩሩሳላሜ ፓራን፣ ፓራ-ጋሬኒኔ ጋሬን፣ ባቁሎኒኔ ጋሜላን አሰታ ኤሃና። ኢሰራኤል አሳይ ካላ ያርሾ ዋጋን ዲዛ ማላ ጌሻ ሚሻን ዋሊዲ ጎዳ ኬል ሺሺዛ ማላ ሃይታካ ሺሻና።

21 ታኒካ አሰታፌ ባጋይታ ቄሴታኔ ሌዌታ ጊዳና ማላ ታ ደራና» ጌሰ።

22 ጎዳይ፥ «ታኒ ሜቆና ኦራላ ሳሎቲኔ ኦራላ ሳኣይ ታ ሲንላን ሚኒ ዳናይሳሉ አንቲ ሱንሊኔ አንቲ ዜሬላ ሱንሊ ሄሳሉ ሚኒ ዳና።

23 አገና ጸሮፔ ቢዲ ሃራ አገናይ ጸራና ጋካናሰ፥ አሲ ሳምባታፔ ቢዲ ሃራ ሳምባታ ጋካናሰ፥ አሰ ጊዲዳ ኡባይ ታሰ ጎይናና ያና።

24 አሰቲ ኬዚዲ ታ ቦላ ማካሊዳ አሳታ አሃ ቤኣና። አሰታ ሚዛ ጉጹኔይካ ሃይቄና፤ አሰታ ሚዛ ታማይካ ቶኤና። አሰቲ አሳ ዜሬል ኡባሰ ሃራሲዛዝ ጊዳና» ጌሰ።

CCX

## ጌሻ ማጸፋ

### **Gamo: ጌሻ ማጸፋ Bible of Ethiopia, Ethiopic script**

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

---

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b